

E lab júu[^] quiá'- Dsea` Jmáang⁻ e cajme' LUCAS

E uiing[~] e cajme' Lucas e jì' la

¹ Teófilo, niñí[^] 'n^u e fíim' dsea` cajme'r' fí' ni[~] jì' jalé' e nicalí⁻ jee[~] jneaa[~]aa', ² j_o cajme'r' laco' júu[^] e cajmée` jaléng[^] i dsea` i cangá⁻ jial calí⁻ lamí⁻ cagüéng⁻ Jesús fí' jmigüí' la, j_o i dsea` íb` i ca'e' jalé' júu[^] quiá'- Jesús cajo. ³ J_o nica'nób[^] jnea[~] cajo, j_o nicalidseáam' dsii⁻ jalé' e já'- e calí⁻ latí' mi[~] uiing[~] j_o latí' lana, j_oba' nijmée'[~] e 'n^u júu[^] jial calí⁻ lamí⁻ cateáng⁻ Jesús fí' jmigüí' la, ⁴ j_o laj_oba' dseáng⁻ lajang⁻ niliñí'[^] jalé' e júu[^] e nica'e'[^] dsea` 'n^u.

Jaang` ángel cajméer` júu[^] e niliseeng` Juan i seáang` dsea` jmí[^]

⁵ J_o lajee[~] líng' Herodes dseata[~] dsea` féng[^] quiá'- Judea, j_o seeng` jaang` jmidsea` quiá'- dsea` Israel i sií' Zacarías, i líng' dsea` quiá'- jaang` jmidsea` i sií' Abías. J_o i dseamí' quiá'- i Zacarías do siir` Elisabet, siju[~] jaang` jmidsea` i calisí' Aarón. ⁶ J_o lajì huáam⁻bre núu[^]r[~] jalé' ta[~] quiu'[^] Fidié[~], j_o eáam' guiúíñ⁻ fí' quini[~] dsea` do cajo e laco' jíí'[~] jaang` dsea` ja` cuóøng` cuó'-reiñ' do dsee⁻. ⁷ J_o dsu' ja` i j_oor' seeng`, co' i dseamí' do ja` cuóøng` nidsiquieeiñ[~] y^u^u, j_ogui dsím⁻ nidseáaiñ⁻ lajì huáaiñ⁻ do cajo.

⁸⁻⁹ J_o co_o` jmí[~] catíng⁻ jaléng[^] jmidsea` e lí' quíing[^] Zacarías do e nijmiféiñ[^] Fidié[~] fí' dsíí' guá'- fé' e si' fí' Jerusalén, j_o nitíng⁻ lajee[~] la'ó'

jmidsea` e guíng` yaaiñ` i` i nitíng` e nijír` sũ` fí nife`, jò Zacaríasbing` catíng` ie` jò. ¹⁰ Jò 'ñiab` Zacarías ca'ír` tí nife` ie` jò e quier` e sũ` do. Jò lajee` coo` e sũ` do, lajalém` dsea` teáaiñ` fí caluu` e jmféiñ` Fidiée`. ¹¹ Jò lajee` iuung` Zacarías fí nife` do, jò coo` cajném` jaang` ángel quiá'- Fidiée` lí- lí dsée` e nife` e lí iuuiñ` jír` e sũ` do. ¹² Jò mi` cangáng` Zacarías i` ángel do, dsíng`- cafóíñ` jii` ja` ñir` e` nijmér`. ¹³ Jò cajíng` i` ángel do casír` Zacarías:

—Ja` fòøñ~, Zacarías, co' nicanúub` Fidiée` lajii` júu` e nicamáñ` na'r do, jò lana dseam` quií'- nidsiquieeiñ` jaang` yuu` siñuu` i` nitó` e nilisii` Juan mi` niliseeiñ`. ¹⁴ Jò fím` dsea` nili'iaang` dsíir` jogui dsíng`- nili'iaang` óo' 'nú` e niliseeng` i` yuu` quií`-na' do cajo, ¹⁵ co' mi` nicuaiñ`, dsíng`- niliféiñ` fí quini` Fidiée`. Jò ja` méé` ni'ír` carta` niteaiñ` fí jmigüi, jogui nú`-gui e niliseeiñ`, ni'íñ` Jmigui quiá'- Fidiée` e nijmicóo` quiá'r` lajii` ta` e nijmér` fí jmigüi la. ¹⁶ Jogui nijmér` e niquí`- jíng` yaang` fím` dsea` Israel fí quini` Fidiée`. ¹⁷ Jò i` Juan do ni'íñ` Jmigui quiá'- Fidiée` laco' ca'íng` jaang` dseañu` i` cali'gøng` eáang` i` calisí Líí, jaang` i` café` cuaiñ` quiá'- Fidiée` mali`-gui eáang`. Jòba` i` Juan na niguiár` júu` mi` nijaquíéng` e nijáa` Dsea` Jmáang` e laco' røøb` nisíng`-tu` jaléng` joo` dsea` cóo`- jaléng` sejmiir`, jogui e laco' jaléng` dsea` i` jo` núu`- júu` quiá'- Fidiée` niquí`- jíng` yaaiñ` mi` ninúr` jalé` júu` e niguiá` i` dsea` í. Jò lajòba` nijmér` e niguíéng` guiá` yaang` dsea` e nijmicuíñ` Dsea` Jmáang`.

¹⁸ Jò mi` cató` e fé` i` ángel do jalé` júu` quiá'-

Fidiéẽ, jò cajmingi' Zacarías i ángel do:

—¿Jial nilita~ dsi` jnea~ jalé` e jò, co' nidseám~baa' eáang' cóo~ dseamf quié~e?

¹⁹ Jò cañíi' i ángel do:

—Jneab~ i ángel Gabriel, jò jmóo`o jalé` ta~ e iing~ Fidiéẽ, jò íb` dsea` casíiñ` jnea~ e cagajméé`e 'nua` jalé` e juguiú~ e nifá~-a na. ²⁰ Jò dsu' uíi~ e ja` já~-calín~- jalé` júu^ quié~e, joba' latí lana nijá^ e jo` lí fo^ jíi~ camí^ júu^ cartí niliti~ lajii~ júu^ e nifá~-a na, jò joguib nifo^tu' jóng.

²¹ Jò lajee` súnng` Zacarías cóo~ i ángel do, jò caluu` guá~- féb~ teáang~ jaléng` i dsea` i sijeeng` ír` do. Jò lajaléng` i dsea` do ninaang` í dsíir' jiali' cali'ing~ Zacarías eáang' fí lí~ cangór~ fí nife` do.

²² Jò dsu' mi~ cagüi'í' Zacarías fí jò, jo` lí fé'r`. Joba' dsifí lajob calilí^ jaléng` i dsea` i teáang~ caluu` do e liim~ba' e cangáiñ~- do e fí dsíi' guá~- do. Jò dsifí ladob canaang` Zacarías e jmóor` lí cóo~ guóor` quiá~- jial e cangár~ do, jò cangoca`bi e líiñ` lado.

²³ Jò mi~ cangí jò, mi~ catí í' e cadsíng~ lajii~ jmíi~ e catíng~ Zacarías e iuuiñ~ fí sinúu^ guá~- do, jò cangám~-bre fí quiá'r~. ²⁴ Jò mi~ calicóng`gui lajo, yuub` cacóng~ dseamf quiá'r~. Jò lajee` 'ñíing~ si' jo` cagüi'í' i dseamf do sinúu^ quiá'r~, jò lajee` jò í dsíir': ²⁵ “Gui'máam~ Fidiéẽ quiá~- e guiá~ e jmóor` cóo~ jnea~ e lacó' jo` nifé` dsea` ga` uii~ quié~e.”

Mi~ cajméé` i ángel do júu` e niliseeng` Dsea` Jmáang~

²⁶ Jò mi~ cadsíng~ jñúung~ si' lajo, coo` jmíi~ casíng` Fidiéẽ i ángel Gabriel do fí coo` fií lí~ sii` Nazaret e néé' fí lí~ se' Galilea. ²⁷ Jò casíiñ` dsea` do fí quiá~- jaang` simí^ i sii` Yá^ i ninéé' júu^ quiá~-

cóo~ jaang` siming` siju` Daví^ i sii` Sé^ . 28 Jo mi~ caguié~ i ángel do fí` quiá'- i simí^ do jo casí'- reiñ':

—Juguiá~ o` quíí'-, simí^, co' 'nũ`bing' i nicaguíng` Fidiéé~ lajee~ lajaléng` dsea` i seeng` fí` jmigüî, jo Fidiéeb` nijmicóo~ 'nũ`.

29 Jo mi~ canúu~ i simí^ do júu^ quiá'- i ángel do, dsíng'- cangogá` dsír' jo ca'f` dsír' e~ uiing` e cajíng'- dsea` do lado.

30 Jo cajíng'- tu i ángel do:

—Ja` f00n~ jii~ coo~, co' iáam` dsíí' Fidiéé~ cóo~ 'nũ', 31 jogui lana nigüi:quiéen' jaang` yuu` siñuu^, jo mi~ niliseeiñ, nitó`na' e nilisiir` Jesús. 32-33 Jo mi~ nicuáiñ, nijmé~ Fidiéé~ e nilíñ~ jaang` dsea` féng' laco' calíng~ i sijur` Daví^ do. Jogui i yuu` do quíí'- latab~ niquiá'r~ ta~ quiá'- lajaléng` dsea` Israel, jogui niquiá'r~ ta~ cajo fí` la'úng~ fí` jmigüî, jogui nilisiir` Jóo' Fidiéé~ dsea` guing~ ñiff~.

34 Joba' cajmingi' Yá^ i ángel do:

—¿Jial cu00ng` nilí` lajo? Ja`gui cóo~ o` dseañu'.

35 Joba' cañíi` i ángel Gabriel do:

—Fidiéé~ dsea` guing~ ñiff~ nijmér~ cóo~ güea^ 'gøng' quiá'r~ e niquin'- lafa' jee~ cab00~ jníí, jo lajee~ joba' nicu0r~ 'nũ` Jmiguí quiá'r~, jo joguiba' nigüi:quiéen' i yuu` güeang'^ i líng' Jóo' Fidiéé~ do.

36 Jogui i nii' i sii` Elisabet, jaang` dseamf i niyúng' eáang', jñúung~ si'' ningóo' e quíeíñ` jaang` yuu` siñuu^ . Jo i dseamf do i nica'éeng` dsea` eáang' e ja` jiuung~ nic00iñ~, yuub` niquíeíñ` lana, 37 co' jaléb' tñng` Fidiéé~ jmér~.

38 Joba' cañíi` Yá^:

—I quiá'- Fidiéeb` jnea~. Güijméeb` Fidiéé~ cóo~ jnea~ laco' nicafee~ na.

Jō mi~ calí~ sáiiñ` lado, jō cangám'-tu i ángel do fí lí~ cajar~.

Mi~ cangó~ Yá^ e cango'eer~ Elisabet

39-41 Jō dsifí mi~ cangí lajō, cangó~ Yá^ fí cōo` fii e née' fí jee~ mó' lí~ se' Judea e cango'eer~ i níir^ Elisabet i cōo'~ Zacarías do.

Jō mi~ caguiér~ fí jō, jō cangoféiñ' dsea` do. Jō mi~ cató~ Yá^ cató'r~ Elisabet, dsifí ladob cajóng' i yuu i iuung~ dsí' tu' Elisabet, jogui dsifí ladob ca'ing' Elisabet Jmiguí` quíá'- Fidiée~. 42 Joba' cajíng' i Elisabet do casí'r~ Yá^ e ngocáng` dsír' jō cajíñ'-:

—'Nu'bing' i nicajmigüeang'^ Fidiée~ lajee~ lajaléng' dseamí i seeng` fí jmigüí, jogui nicajmigüeaiñ' yuu quí'~ cajo. 43 ¿i~ jnea~ e nija'ee~ niquíá'^ Fí'i jnea~? 44 Co' mi~ canú~u e cate' jnea~, dsifí ladob cajóng' yuu quíe~ e lí~ iuuiñ` fí dsí' tú' u e iáang` dsír'. 45 Joba' eám' juguiá~ quí'~, cō' jáb'- calín'- e niliti~ jalé' júu^ quíá'- Fidiée~ e cacuø'r' 'nu'. 46 Joba' cajíng' Yá^: Dsíng'~ jmifén' jnea~ Fidiée~,

47 jogui dsíng'~ iáang` dsii~ cōo'r~ cajo,
cō' íbre dsea` caleáaiñ` jnea~ jee~ dsee~ quíe~ e.

48 Dsu' jnea~ lín' n jaang` dsea` quíá'- Fidiée~
i ja' jmiféng' 'ñia', jō si'ím' Fidiée~ jnea~,
jō latí' lana jō cartí' róo` jmigüí nifé' jaléng'
dsea` jmigüí juguiá~ uii~ quíe~ e.

49 Co' Fidiéeb~ dsea` 'gøiñ' fí la'úng~ fí jmigüí,
jogui jmiguiab' jalé' e nicajméer` cōo'~ jnea~
cajo,

cō' íbre dsea` güeaiñ' fí latøøng~ fí jmigüí.

50 Jøgui contøøm⁻ nilí[^] fi[^] líiñ⁻ jaléng[^] dsea[^] ì nijmi'gó[^] ír[^].

51 Jø íbre tíiñ[^] jmér⁻ lí[^] doñí[^] ee[^],
jøgui cajméer[^] e cajgiéem⁻ jalé[^] e í dsíí[^] dsea[^] ì
jmicóøng[^] yaang[~].

52 Jøgui cajgiáam⁻ bre uó⁻ jaléng[^] dsea[^] ì óo[^] ta[~] ñíí[^],
jøgui yáb[^] caseáiñ[^] jaléng[^] dsea[^] ì ja[^] jmicóøng[^]
yaang[~].

53 Jøgui juguiáb⁻ cacuø^r jaléng[^] dsea[^] ì ja[^] 'ga[^] lí
sea[^] quiá[^],

jøgui cajmilím⁻ bre guoo[^] jaléng[^] dsea[^] sea[^] cuu⁻.

54-55 Jøgui cajmicóo^r jaléng[^] dsea[^] góor[^] dsea[^] Is-
rael

ì caguíñ[^] lamí[~] jéeng[^] gui ì nilíng⁻ dsea[^] quiá^r,
co[^] lajòb júu[^] caséer[^] cóo[^] 'líi[~] yúu[~] qui[^]ii[^] ì sii[^]
Abraham e nilí[^] fi[^] líng⁻ Fidiée[^] jneaa[~]aa[^],
jøgui nijmicóo^r jneaa[~]aa[^] lata[^].

Jø jalé[^] e júu[^] na cajíng[^] Yá[^] ie[~] jø.

56 Jø cajeb[^] Yá[^] gaang[^] si[^] cóo[^] ì Elisabet do. Jø
mí[~] cangí[^] jø, jøguiiba[^] cangáng[^] tur[^] fi[^] quiá^r.

Mí[~] caliséng[^] Juan ì seáang[^] dsea[^] jmí[^]

57 Jø mí[~] cangí[^] jø, cadsím⁻ jmí[~] e niliseeng[^]
yuu[^] quiá^r Elisabet, jø jaang[^] yuu[^] siñuub[^] caliséng[^]
quiá^r. 58 Jø dsíng[^] cali[^]iaang[^] dsíí[^] jaléng[^] rúíñ[^]
cóo[^] jaléng[^] dsea[^] ì neáang[^] lacúng[^] lajíng[^] lí[~]
neáaiñ[^], co[^] calilí^r e dsíng[^] guiá[^] e cajmée[^] Fidiée[^]
cóo[^] ì Elisabet do. 59 Jø mí[~] cadsí[^] ì yuu[^] quiá^r
Elisabet do jñíá⁻ jmí[~], jøba[^] cangojéeng[^] neiñ[^] e
nitó⁻ lí[~] fi[^] ngúu[^] táaiñ[^] laco[^] e qui[^] tíng[^] dsea[^]
Israel. Jø mí[~] cajméer[^] lajò, sí[^]í[^] nilisií[^] ì yuu[^] do laco[^]
sii[^] tiquiá^r Zacarías. 60 Dsu[^] ì Elisabet do cañír[^] jø
casí^r jaléng[^] ì dsea[^] do:

—Ũ, Juam 'né` nilisiiñ` na.

⁶¹ Joba' cajíng'` ì dsea` caguaiang` do casí'r` Elisabet:

—Jò ¿jialí'` nilisiir` lajò? Jíí'` jaang`gui dsea` sináúú` quíí'` ja` siir` lajò.

⁶² Joba' cajmíngí'` ì dsea` caguaiang` do Zacarías e jmóor` li` cóo'` guóor`:

—Jò ¿jial` nilisii` ì yúú` la, fó'` 'nu`?

⁶³ Jò Zacarías camír'` cóo'` li` nijmé'r` jial` iiñ` e nilisii` ì yúú` do, joba'` cajme'r` e Juam nilisiiñ` do. Jò dsíng'` cangogá` dsíí'` jaléng'` ì dsea` do e calisí` ì yúú` do Juan. ⁶⁴ Jò dsifí'` ladob` caná'` oo` luu` Zacarías jò canaaíñ` jmiféíñ'` Fidié`.

⁶⁵ Jogui` jaléng'` dsea` ì neáang'` lacúng'` lajíng'` li` guíng` Zacarías eáam'` cangogá` dsíir'` quíá'` jalé'` e calí'` do, jò lajobi` lacaang'` jee` mó'` li` se` Judea eáam'` caliseá'` e júu` jò. ⁶⁶ Jò lajíng'` dsea` ì caliñí'` jalé'` e calí'` do cajmíngí'` rúíñ`:

—¿E` sí'íng'` ì yúú` la mi` nicuáíñ'? Dsúco'` eáam'` li` e jmícoo'` Fidié` quíá'r`.

Jalé'` e ca'ø` Zacarías quíá'` Fidié`

⁶⁷ Jò mi` caná'` oo` luu` Zacarías, dsifí'` lajob` ca'íñ'` Jmíguí'` quíá'` Fidié` jò canaaíñ` fé'r` jalé'` júu` e cangííñ` cacuo'` Fidié` ladsifí'` lado jò cajíñ`:

⁶⁸ Güijmifém'` jaléng'` dsea` Fí'naa'` Fidié` quíá'` dsea` Israel,

dsúco'` nicajár` jee` jneaa`aa', dsea` lí'naa'` dsea` quíá'r`,

jò nicaleáam`bre` jneaa`aa'` jee` jalé'` dsee` quí'naa'.

⁶⁹ Jò caguíñ'` lajee` lajaléng'` síju` dseata`

dsea` féng' Daví` i j móo` ta` quiu' Fidié` do
 jaang` i 'gøng'gui eáang'
 e quiá'r` nileáiñ` jneaa`aa' jee` jalé` dsee`
 quí`ii'.

70-71 Co' laj ob júu` cacuø' Fidié` jaléng` dsea`
 quiá'r` i nicafé` cuaiñ` quiá'r` mali`gui
 eáang'

e nileáiñ` jneaa`aa' jee` jaléng` i 'ní` níng`
 jneaa`aa'

jogui jee` jaléng` i guíng` quí`naa' cajo,

72 jogui nilí` fi` lím`bre jaléng` 'lí` dsea` cøøng`
 quí`naa',

co' ja` ni`íng` dsíir` lajii` júu` e cajmirø`
 cóo` 'lí` yuu` qui`ii' Abraham lajii` mali`gui
 eáang'.

73 Jo` e lab júu` e cacuø' Fidié` i Abraham do ie` jo:

74 e nileáiñ` jneaa`aa' jee` jaléng` i 'ní` níng`
 jneaa`aa',

joba' jneaa`aa' nijmó`naa' e ngocáng` dsi`naa' lí`
 dseáng` lacó' iing` Fidié`,

jo jo` e 'gøng`naa' jii` cóo` i dsea` i 'ní` ní` quí`ii`
 do jóng.

75 Jogui lata` see`naa' fi` jmigü` la,

nisee`naa' e lí`naa' dsea` güeang` quiá`
 Fidié` jogui dsea` i ée` røø` lacó' sí`í` fi`
 quini` Fidié`.

76 Jo` mi` calí` e jo, jo lalab casí` Zacarías i yuu` do:

Jogui 'nu`, yuu` quí`ii', nilisii` dsea` i caguíng`
 Fidié` dsea` guíng` ñifí` i nífé` cuaiñ`
 quiá'r`;

co' 'nub` dsea` niguiéen` dsea` guiá`,

cō' lana nijaquíéeng' e tí lí~ nijáa' Fíi'naa' Dsea'
Jmáang~.

77 Jō nijmée'~ dsea' júu^ jial nileáng~ Fidiée' jaléng'
dsea' jmigüi' e ni'íing~ dsee~ quiá'r~.

78 Jō Fidiée' nijmér~ jalé' e jō, cō' dsíng' 'neáaiñ'
jneaa~aa', jōgui eáam' fí' líiñ~ jneaa~aa'
cajo.

Jōba' nicacuø'r' jneaa~aa' e lafa' nijneá' cōø' jì e
jlo'^ niing~ 'gøng' fí' lí~ see~naa' lana,

79 jō e jōba' nijmicōø'~ quiá'~ jaléng' dsea' i seeng'
lafa' sijúung~ lí~ nua' s'.

Jō Fidiée' ni'é'r' jneaa~aa' fí' guiá'~ quiá'r~ e laco'
nilisee~naa' juguiá' júu^ røø'.

Jō jalé' e júu^ na café' Zacarías ie~ jō.

80 Jō cuaam' i yuu' quiá'r~ do laco' ngóo' jmi~.
Jō lajee' cuaaiñ', eáang' ngóo' licuíiñ' Fidiée' jōgui
eáang' ngóo' liguiiñ' la'eáang' cōø'~ Jmiguí' quiá'
dsea' do. Jō mi~ 'lé' cacuaiñ~, jō cangór~ fí' cōø'
jee~ mó', jō jōb cateáaiñ' cartí' mi~ caguié' jmi~ e
nilicuíi' dsea' Israel quiá'r~.

2

Mí' caliséng' Jesús

(Mt. 1:18-25)

1-2 Jō ie~ jō seeng' jaang' dseata~ dsea' féng' i sii'
Augusto i quiá' ta~ ie~ jō, jō seeng' jaang' dseata~
dsea' nu'luu~ quiá'r~ i sii' Cirenio i guing~ líng' ta~
fí' lí~ se' Siria. Jō ie~ jō caquiá' i Augusto do ta' e
nili'íing^ jaléng' dsea'. 3 Jō jaléng' dsea' i taang~ fí'
lí~ jié' 'né' nidsilíiñ' fí' góo'bre, jō fí' jōb nili'íiñ'.

4 Jō mi~ cahuí' ta~ lajo, jōba' cagüi'íi' i Sé^ do fí'
lí~ guiiñ' fí' fí' Nazaret lí~ se' Galilea, jō cangáiñ'~

fi' góor' fi' li~ se' Judea fi' coo' fii' e sii' Belén fi' li' caliséng' i dseata~ dsea' féng' i sii' Daví' do, jaang' dsea' siju' Sé' i caliséng' mali'gui eáang'. ⁵ Jo mi~ cangáng' Sé' fi' góor', tée'bre Yá', co' ninée' júu' quiá'r~ cooíñ' do, jogui yuub' niqúieeiñ' do cajo.

⁶⁻⁷ Jo mi~ caguiliñ' fi' Belén, job catí' í' e niliseeng' yuub' quiá'- Yá', dsu' ja' li~ calí'r~ li~ nijér~, co' dsíng' fíng' jaléng' dsea' i caseáng' e fi' fii' do ie~ jo. Jo li~ güing' jaléng' cuea~ güitáb^ cajer', jo job caliséng' i yuub' do. Jo íb' la'uii~ jóo' Yá' i caliséng'. Jo mi~ cangí' jo, caquiñ' coo' 'mi', jo catiráaiñ' dsí' coo' ni'núu' li~ gø' jó', dsuco' ja' li~ sea' li~ guiá' fa' niqúier'.

Mi~ cajnéng' ángeles fi' li~ taang' dsea' jmóo' í' jo'se'

⁸ Jo mi~ canuu' e jmi~ jo, jo nicaje' coo' tú~ máng' dsea' i jmóo' í' jo'se' quiá'- fi' lí' caluu' fii' Belén. ⁹ Jo lajee' neáaiñ' e canuu' e jmi~ jo, coo' cajném~ jaang' ángel i casíng' Fidiée' fi' li' neáaiñ', jo dsíng' jlo'^ cajnea~ e güea'^ quiá'- Fidiée' do lacúng' lajíng' li~ neáang' i dsea' do, jo dsíng' cafóíñ'. ¹⁰ Jo cajíng' i ángel do casí'r~ jaléng' i dsea' do:

—Ja' fðong' na' jii' coo', dsuco' juguiáb~ quiee^ quií'na', jo fíim' dsea' nili'iaang' dsíir' uí' e júu' jo. ¹¹ Co' fi' lab góo' dseata~ dsea' féng' Daví', jo lana fi' lab nicaliséng' Dsea' Jmáang~, dsea' nileáiñ' 'nú' jee~ jalé' dsee~ quií'na'. ¹² Jo niñí'ba' e mi~ nigüi'néng' na'r jo niguiéng' na'r quiíñ' coo' 'mi' jo ráaiñ' dsí' coo' ni'núu' li~ gø' jó'.

¹³ Jo mi~ cató' e café' i ángel do lado, coo' cajném~ ángeles i fíng'gui fi' li' neáang' i dsea' do, jo lajalém' i ángeles do canaaíñ' e jmiféiñ' Fidiée' lajaléiñ' do jogui canaaíñ' do ø' lala:

¹⁴ i Majmiféng' naa' Fidiée' dsea' guing~ ñiff~,

jogui jaléng` dsea` jmigüü` i seeng` guiá- cóo`r`
güiliseem`bre juguiá- júu` røø` cóo`~ dsea`
do!

15 Jo mi~ cató' e ca'ø' i ángeles do, cangolím`tur fi
li~ jalíñ-. Jo i dsea` i jmóo` í` jo'se' do canaaiñ` sáiñ`
lajee` la'ó' yaaiñ` jo sí' rúñ' lala:

—Má-aa' fi' Belén. Mane`duu' jalé' e nicajíng'-
Fíi'naa' Fidiée` quiá'- jalé' e nicalí' jmí~ na.

16 Jo catam'- i dsea` do fi' lajminá-, jo mi~
caguiliñ` fi' Belén, cadséiñ' Yá^ cóo`~ Sé` jogui i
yuu` do e ráaiñ` dsí' cóo` ni'núu` li~ gø' jó'. 17 Jo
mi~ cangí e cangáiñ` i yuu` do, jo canaam`bre ni'r`
júu` lajii' e cajíng'- i ángel do cuaiñ` quiáiñ'- do.
18 Jo jaléng` dsea` i canúu- e júu` jo dsíng'- cangogá`
dsí' . 19 Jo dsíng'- ca'í` dsí' Yá^ quiá'- jalé' e calí- ie~
jo, jogui ca'mea`bir e júu` jo fi' dsí' moguir`.

20 Jo mi~ cangí jo, caquim'-tu i dsea` jmóo` í`
jo'se' do. Jo lajee` ngolíñ` jo ør' quiá'- Fidiée`
jo dsíng'- jmféiñ' Fidiée`, co' calitib~ lajii' júu` e
quie` i ángel do ie~ jo.

Mi~ cangojéiñ` Jesús fi' guá'- fé' e si' fi' Jerusalén

21 Jo mi~ cadsí'- i yuu` do jñiá- jmí~, jo can-
gojéeng`neiñ' e cató` li~ fi' ngúu` táaiñ` laco' qui'-
tíng` dsea` Israel. Jo dsifi' ladob catéer` e calisíñ' do
Jesús lí' laco'gui cajíng'- i ángel do casí'r- Yá^ lajii'-
mi~ ná' gui e nidsiquiéiñ' i yuu` do.

22 Jo mi~ cangí jo, mi~ cadsí'- Yá^ tuló- jmí~
e caliséng` i yuu` do, cajmiti`bre lajii' júu` e
casée' Moi~ e 'né- nilí, joguiba' cangolíñ` can-
gojéeng`neiñ' fi' guá'- fé' e si' fi' Jerusalén e laco'
nidsijeáang`neiñ' fi' quini` Fidiée`. 23-24 Jo mi~ niti'-
í' e nidsilíng- dsea` Israel sinúu` guá'- cóo`~ yuu`

siñuu^ la'uui~ i liseeng` quiá'r-, 'né- jéeng` sejmii`
 i yuu` do gáng- bõsii~ osi gáng- mee~ quiá'- e ni-
 jngáng'- jmidsea` fí nife^ quiá'- e sinúu^ guá'- do.
 Jo jalé^ e jo cajmée` i Sé^ do cóo~ i Yá^ do ie~ jo, có`
 lalab ta~ caquiá' Fidiéé` mali~ gui eáang': "Song ii`
 caliséng` yuu` siñuu^ la'uui~ quiá'-, íbing' i nijmé-
 ta~ lí^ lajii~ e iing~ Fidiéé`."

25 Jo ie~ jo seeng` jaang` dseañu^ fí Jerusalén i sii`
 Simeón, jaang` dseañu^ i guiúng- eáang', jo dsíng'-
 jmiféiñ' Fidiéé`, jogui sijeeiñ` i nisíng- Fidiéé` i
 nileáng- dsea` góor` dsea` Israel jee~ jalé^ dsee-
 quiáiñ'. Jo jéeb' Jmiguí quiá'- Fidiéé` quiá'- i
 Simeón do, 26 jo la'eáang` cóo~ e joba' caliñir' lajii~
 lami~ jéeng` gui e ja` nijúuiñ- e ja` mí` cangáaiñ` Dsea`
 Jmáang-, dsea` i nisíng- Fidiéé` do. 27 Jo ie~ jo
 cajmée` Jmiguí quiá'- Fidiéé` e cangó- Simeón fí`
 guá'- fé' e si' fí Jerusalén. Jo mi~ caguiér- e fí guá'-
 jo, fí job nitaang~ Yá^ cóo~ gui Sé^ e jeeiñ` i yuu` Jesús
 do e jmóor` jalé^ ta~ e caquiá' Fidiéé` e 'né- lí. 28 Jo
 mi~ cangáng- Simeón i yuu` do jo casang` neiñ' jo
 canaaíñ` jmiféiñ' Fidiéé` jo cajíñ'-:

29 Gui'máam^ba' Fí'naa' Fidiéé`, có' nicalitib~
 lajii~ júu^ quíi' e cajmée^ jnea~ jéeng` gui.

Joba' dsíng'- iáang` dsii- lana, jo nicuóøm` nitøø'-
 jnea~ fí ñifí` quíi', jnea~ dsea` i jmóo' lajii~
 e iing~ 'nu;

30-31 có' nicamám-baa i yuu` la, dsea` i nileáng-
 jnea^ jee~ jalé^ dsee- quí-ií', dsea` see-naa'
 fí jmigüi la.

32 Có' i lab dsea` i líng' e jí e jnea` jee~ jaléng' dsea`
 jmigüi,

jogui la'eáang' i lab cajo e nijmi'gò' dsea` jaléng' dsea` quí' dsea` Israel.

³³ Jo dsíng' cangogá dsí' Yá^ cóo' gui Sé^ quía' jalé' e cajíng' i Simeón do uii~ quía' i yuu do. ³⁴ Jo mi~ calí' e café' Simeón lajo, jo cataiñ' güea' i yuu do cóo' sejmiiñ' jogui cajíñ' casí'r Yá^:

—I yuu la nisi'íiñ' mi~ nicuáiñ' e niguiár júu^ jial nijmicuíng' dsea` Fidiée~, joba' fíim' dsea` jmígüi' niqúí' jíng' yaañ' fí' quini' Fidiée~. Dsu' seem` dsea` i ja` ni'íng' jalé' júu^ e niguiáiñ' do, co' ja` nití' dsír', ³⁵ co' niguiéeb' jmí~ mi~ nilidseáang' dsí' jial í' dsí' lajaang' lajaang' dsea` jmígüi'. Jogui 'nua` dsíng' nilijjuung~ o' mi~ nijmeáang' dsea` i yuu la quí' mi~ niféiñ'.

³⁶ Jo mi~ calí' e fé' Simeón lajo, jo cajám'bre i yuu do cóo' sejmiiñ'. Jo dsifí' ladob cangoquiéng' jaang' dseam' i sii` Aa~ fí' lí' sing' Yá^ cóo' gui Sé^ e jéeiñ' i yuu do, jo fé' i dseam' i sii` Aa~ do cuaiñ' quía' Fidiée~ cajo, jo i dseam' í' líiñ' jóg' jaang' dseañu' i sii' Fanuel i líng' dsea` siju~ jaang' dsea` i calisí' Aser. Jo i dseam' do eámam' niyúíñ'; ochenta y cuatro jii` nínogóo' e 'niiñ' jo le'eáam^bir eáang' mi~ cacúng' guór', jo guié' jii' mi~ cangí'gui lajo, cajúm' dseañu' quía'r. ³⁷ Jo contøøm' iuuiñ' sináa^ guá' e jmitir~ lajii' e iing~ Fidiée~ e jmiféiñ' dsea` do jogui e jmóor' ayuno cajo. ³⁸ Jo mi~ cangáiñ' i yuu Jesús do, jo cacuø'r' gui'máang' Fidiée~ uii~ quíaíñ'. Jo mifíng' canaaíñ' jma'r' júu^ jaléng' i dsea` i sijeeng' i dsea` i nisíng' Fidiée~ e quía' nileáiñ' dsea` jee~ dsee~ quía'r jo cajíñ' casí'-reiñ': “I lab i yuu i cajíng' Fidiée~ i nisíñ' i ni'íng' dsee~ quí'naa'.”

Mi~ cangolíng tu Yá^ cóo~ Sé^ fí Nazaret

³⁹ Jo mi~ cangí e cajmiti~ sejmiì Jesús jalé' e ta~ huí' fí ni~ jì quiá'- Fidié~ do, cangolíng tur cóo~ i yuu` do fí Nazaret fí li~ se' Galilea. ⁴⁰ Jo cuaam` Jesús lajee~ jo laco' ngóor' jmii~, jo dsíng'- ngóo' litíiñ, jo eáam' jmigüeang^ Fidié~ ír`.

Mi~ caje' Jesús fí dsí' guá' fé' e si' fí Jerusalén

⁴¹ Jo laco~ jii` mi~ tí jmii~ Pascua quiá'- dsea` Israel, nitíng` sejmiì Jesús e dsilíiñ` fí Jerusalén. ⁴² Jo ie~ mi~ cadsí'- i jiuung~ do guitu' jii, jo fí job cangór- cóo~ sejmiir` cóo~ jaléng' dsea` sinúu^ quiá'r- jogui cóo~ jaléng' dsea` i neáang' fí Nazaret. Jo fí job caje' lajaléng' i dsea` do lajee~ catí e jmii~ do. ⁴³ Jo mi~ cadséng- e jmii~ do, jo cangolíng tur lajaléiñ' do fí Nazaret, ⁴⁴ dsu' dob nicaje' i jiuung~ Jesús do fí Jerusalén. Jo ja` nicalilí^ sejmiir` e nicajer', co' líiñ- e jee~ i dsea` caguiaang- dob ngaiñ'. Jo catam'-bre fí lajaléiñ' do lajee~ cóo` jmii~. ⁴⁵ Jo mi~ caniúíñ' guiá'^ fí, jo ca'naiñ'- Jesús jee~ jaléng' i dsea` caguiaang- do, dsu' jo' lí' cadséng' neiñ' do. Joba' caquim'- tur fí Jerusalén e cango' néeiñ' i jiuung~ do.

⁴⁶ Jo mi~ caguilíng- tur fí Jerusalén, jo ja` cadséng' neiñ' dsifí lado car` mi~ cadsíng- 'ní jmii~ guí lajo, joguiba' cadséng' neiñ'. Dsu' fí guáb'- guíiñ' do e núur` e síng` jaléng' tifa' quiá'- júu^ quiu' ta~ quiá'- dsea` Israel, jogui jmiguiab' jalé' e jmíngí'- rúng' Jesús cóo~ jaléng' i dsea` í. ⁴⁷ Jo jaléng' dsea` i teáang- núu' jial ngú i jiuung~ Jesús do dsíng'- dsigá' dsíir', co' tiiñ' biñ' eáang'. ⁴⁸ Jo mi~ cangá- sejmiì Jesús e dob guíiñ~, jo dsíng'- cango' gó' dsíir' jo cajíng'- niquiá'r^ casí'- reiñ':

—Yuu` quí-ii', ¿jiali' cajmeáan~ jnea^ lana? Dsíng'- nicajmó^oo' fíí^ cóo~ tiquíí^, jò dsíng'- nica'néeng'~naa' 'nu`.

49 Jòba' cañíi` Jesús quiá'- niquiá'r^ jò casí'- reiñ':

—¿jiali' ngí'na' 'náng'na' jnea~? ¿Su ja` ñí'na' e~ ta~ nisisíin^ e nijmee~e quiá'- Tiquié'e dsea` guing~ ñiff~?

50 Dsu' ì sejmiir` do ja` cangáin` jiali' cajíng'- ì jiuung~ Jesús do lado.

51 Jò mi~ calí- sáin` e jò, jò cangolíim`tur lajì gaain` do fí Nazaret. Jò dsíng'- guiúng- Jesús cóo~ sejmiir`, jò dsíng'- núu'r~ cajo. Jò eám' iáang` dsíi' niquiá'r^ mi~ ca'íi~ dsíir' quiá'- jalé' e cangojéé' ie~ jmíi~ jò. 52 Jò lajee~ jò cuaam` Jesús, jò ngóo' litíing`guir lacoó` jmíi~, jò dsíng'- iáang` dsíi' jaléng' dsea` cóo'r~, jogui lajòbì Fidiéé~ cóo~ ír` cajo.

3

Mí~ canaang` Juan ì seáang` dsea` jmíi` e guiar' júu` quiá'- Fidiéé~

(Mt. 3:1-12; Mr. 1:1-8; Jn. 1:19-28)

1 Jò ie~ jò ningóo' gui'ñiá` jing` e líng' Tiberio dseata~ dsea` féng' quiá'- fí la'úng- fí jmigüí. Jò seeng` quiúung- dseata~ dsea` nu'luu~ quiá'r~, jaang` ì sii Poncio Pilato ì guing~ líng' ta~ fí Judea, jò jaang` ì sii Herodes ì líng' ta~ fí Galilea, jò seeng` jaang` rúng' dsea` ngáang' cóo~ Herodes ì sii Lií ì guing~ líng' ta~ fí Iturea cóo~ cóo~ lí sii Traconite, jogui jaang` ì sii Lisaniás ì guing~ fí cóo~ lí sii Abilinia. 2 Jò ie~ jò seeng` gáng- jmidsea` laniing-, jaang` ì sii Anás cóo~ gui jaang` ì sii Caifás. Jò ie~ jò cajo ì Juan do ì líng' jóo' Zacarías guíin~ fí jee~

uó⁻ quiú[^] mi[~] café[^] Fidiée[~] caféng[^]neiñ[^] e nicatíb[^]
 í[^] e nináíñ[^] do e niguiár⁻ júu[^] quiá[^] Fidiée[~] fí[^] jee[~]
 dsea[^] jmigüí[^]. ³ Jo mi[~] cahuí[^] ta[~] lajo, jo dsifí[^] lajob
 cangó⁻ i Juan do fí[^] gua[^] Jordán, jo fí[^] job canaaíñ[^] e
 guiar[^] júu[^] quiá[^] Fidiée[~] fí[^] quini[~] dsea[^] i caseáng[^]
 fí[^] lacuee[^] e gua[^] do ie[~] jo. Jo fí[^] job e[^]r[^] jaléng[^] dsea[^]
 i guilíng⁻ do, jo sí[^]reiñ[^] e 'né⁻ niquí[^] jíng[^] yaaiñ[^]
 fí[^] quini[~] Fidiée[~], jo lajoguiba[^] e nisáíñ[^] jmí[^] e laco[^]
 cuó[^] lí[~] e cajmée[^] dsea[^] do lajo. ⁴ Jo e jo cangojée[^]
 lí[^] laco[^] fé[^] fí[^] ni[~] jì[^] quiá[^] Fidiée[~] e cajme[^] Saí[^]
 malí[~] gui eáang[^], jaang[^] dsea[^] i café[^] cuaiñ[~] quiá[^]
 Fidiée[~], lí[~] fé[^] lala:

Ngí[^] jaang[^] dsea[^] i fé[^] teá[^] fí[^] ni[~] guóo[^] uó⁻ quiú[^] jo
 fé[^]r[^] lala:

“Jmeáang[^]na[^] guiú[^] fí[^],
 jogui[^] nea[~]na[^] condsee[^],
 co[^] lana tí[^] lí[~] nijáab[^] Fí[^]naa[^]!”

⁵ Jo jmiróo[^]na[^] lacaang[^] guiá[^] fí[^],
 jo jmiróo[^]na[^] lacaang[^] lí[~] jung[^],
 jo jmee⁻na[^] condsee[^] fí[^] lacaang[^] lí[~] tu[^] fí[^],
 jo jaléb[^] fí[^] nilí[^] røø.

⁶ Jo jalém[^] dsea[^] jmigüí[^] nilí[^]r[^] jial e nileáiñ[^] jee[~]
 jalé[^] dsee⁻ quiá[^]r⁻ la'eáang[^] cóo[^] i dsea[^] í[^].”
 Jo jalé[^] e na cajíng[^] Saí[^] fí[^] ni[~] jì[^] quiá[^] Fidiée[~].

⁷ Jo mi[~] caguilíng⁻ dsea[^] i iing[~] nisáng[^] jmí[^] e fí[^]
 gua[^] lí[~] táang[^] i Juan i seáang[^] dsea[^] jmí[^] do, jo casí[^]
 i Juan do lajaang[^] lajaang[^] i dsea[^] i caguilíng⁻ do ie[~]
 jo:

—i[^]óó[^] jaléng[^] mí[^] guíng⁻ 'nú[^]! ¿í[~] cajme[^]
 'nú[^] júu[^] e lala cuóøng[^] nileáng[^]na[^] lají[^] iihuí[^] e
 nijacuíéeng[^] jmí[^] na? ⁸ 'Né⁻ nijmiliing[~] yaang[~]na[^]
 e laco[^] nililí[^] jaléng[^] dsea[^] rúng[^]na[^] e dseáng[^] e
 já⁻ba[^] nicaquí[^] jíng[^] yaang[~]na[^] fí[^] quini[~] Fidiée[~].

Jō ja' jmigóøng` yaang`na' e nileáng`na' jee` dsee` quí`na' dsu' uí` e Abraham líiñ` 'lí` yúu'` quí`na', cō' e já'` e fíi` 'nú` e cuóøm` jmé` Fidiée` siju` Abraham jalé` cuu` e néé` la facō' iñ` lajō. ⁹ Cōfa' jaléng` dsea` i ja' quí` jing` yaang` fí` quini` Fidiée` líiñ` lacō' e 'ma` ofíi` e ja` dseeng` ofíi` e cuø', jōba' huí`b' e 'ma` do jō dsitōo'` fí` ni` jì` lafa' cuiib`, cō' ja` ee` ta` íng` jíi`` cōo`.

¹⁰ Jō mi` canúu` jaléng` i dsea` do jalé` e café` i Juan i seáng` dsea` jmí` do, jōba' cajmingí`` reiñ' do lala:

—¿Jial ni'ee` jnea`^ guiá` cōo`` Fidiée`?

¹¹ Jōba' cañíi` i Juan do jō casí`r` i dsea` do:

—E laba' 'né` nijmee`na': Ii` 'nú` oo`na' tú` 'mi`quí`na', 'né` nicuó`na' cōo` jaang` dsea` i ja` sea` quiá``; jogui`ii` 'nú` sea` e cø`na', 'né` nicø`na' jmá``jiu` cōo`` jaléng` i ja` sea` e dø``.

¹² Jō lajee` síng` Juan i seáng` dsea` jmí` do cōo`` i dsea` do, jōba' caguilíng` cōo` tú` míng`` nodsicuu` i iing` nisáng` jmí`, jō cajmingí`r` i Juan do jō cajíi``:

—Tífa', ¿e` 'né` jmó` jnea`^ e lacō' ni'ee`naa' guiá` cōo`` Fidiée`?

¹³ Jōba' cañíi` i Juan do quiá`` i nodsicuu` do jō casí``reiñ':

—Elaba' 'né` nijmée`^ 'nú`': Jō`mí`na' cuu` quiá`` dsea` e jmiguiú`gui lacō' ta` quiu'` fí` ni` jì` quiá`` dseata`.

¹⁴ Jō lajee` síng` i Juan do cōo`` i nodsicuu` do, caguilíng` cōo` tú` míng`` 'lée` fí` lí` táaiñ` jō cajmingí`r`reiñ':

—Jogui` jnea`^, ¿e` 'né` nijmó`naa' e lacō' ni'ee`naa' guiá` cōo`` Fidiée`?

Joba' cañí' i Juan do jo casí'r- i 'lée- do:

—E laba' 'né- nijmití' 'nú': Ja' ee' uóø'na' quiá'- dsea' laguidseaang^, o'gui fong'na' dsea', o'gui jmoona' dsee- quiá'- dsea' e ngi~gui, o'gui ni'náng~na' dsea' e ja' ee' mí' cajméer' jí'~ coo'; jo güilí'íang' óo'na' cóo'~ lají'~ e 'léeng'na'.

15 Jo lajee' fé' i Juan do e júu^ na, jo jaléng' i dsea' caguiaang- do í dsíir' e~ nilí' jogui' í dsír' su Dsea' Jmáam- i Juan i seáang' dsea' jmíi' do. 16 Jo mi~ calilí'^ i Juan do e í dsíí' i dsea' do lajo, joba' casí'-reñ' jo cajíñ'-:

—E já', jnea~ seáan'n 'nú' jmíi' cóo'~ layaang~ jmíi', jo dsu' nabi nijáa' jaang'gui dsea' i niseáng- 'nú' jmíi' cóo'~ Jmiguí' quiá'- Fidiée' jogui cóo'~ jí'. Jo i dsea' í 'gøng'guir laco' jnea~ e jí'~ jnea~ ja' catín-n fa' nisíi'~i capí'^ ñí' 'ñúu' lomíir-. Co' jnea~ nicaseán-n jaléng' 'nú' jmíi' cóo'~ layaang~ jmíi' e laco' cuø' lí~ e nicacu'~ jing' yaang~na' fí' quini' Fidiée'; dsu' ír' mi~ nigüeeiñ- niseáiñ- 'nú' jmíi' cóo'~ Jmiguí' quiá'- Fidiée' e laco' cuø' lí~ e nicangíng'na' Jmiguí' quiá'- dsea' do. 17 Jo quieb' dsea' do e jmáiñ' ta~ quiá'- e nisíñ' micui'íee, jo nisér- ca' e qui' quiá'- do. Jo dsu' e micui'íee' do ni'meár- fí' dsíí' sinúu^, jogui e qui' quiá'- nijí-bre fí' lí' coo' jí' e ja' tóo' jmíi' yu'.

18 Jo jmang' cóo'~ júu^ lanaba' caféng' i Juan do jaléng' i dsea' do, jo ca'e'reñ' jalé' júu^ quiá'- Fidiée' quiá'- jial laang' dsea' jee~ jalé' dsee- quiá'r-. 19 Jogui' caféng' i Juan do jaléng' dsea' e ja' dseeng' laco' jmóo' i dseata~ Herodes do e jeeiñ' lafa' dseamí' quiá'r- oo~ dseañu' rúíñ' dsea' ngáang'~ cóo'r- i síi' Lii~, jogui' cajíñ- dseata~

Herodes cóo'~ jalé' e ga` e jmóoiñ' do. ²⁰ Jo mi~ caliñí' i dseata~ do lajii'~ e júu^ e fé' i Juan do uii'~ quiá'r~, joba' dsíng'~ caliguiñ~ jogui cajméer` cóo`gui e ga`, có' caquiur' ta~ e catam!' i Juan do, jo 'nuñib^ catang'~ neiñ' do.

*Mi~ cajgáang~ Jesús jmii`
(Mt. 3:13-17; Mr. 1:9-11)*

²¹ Jo dsu' nú'-gui e ni'í' i Juan do 'nuñi^, lajee~ cateáaiñ` fi' gua` Jordán e seáaiñ` dsea` jmií, jo cóo` jmii~ caguié~ Jesús fi' jo, jo cajgáaiñ~ jmií` cajo. Jo dsifi' mi~ cangî e jo, jo caféng'` Jesús Fidiée~ dsea` guing~ ñifi~, jo lajee~ jo cana' cateá' fi' ñifi~, ²² jo fi' job cajgó~ Jmiguí' quiá'- Fidiée~ e liing~ jaang` mee~ fi' yú'^ mogui~ Jesús, jo caná' e liing~ ii' guicafé' fi' yú'^ jmigüi' jo guicajiiñ':

—'Nub` Joo`o i 'neáan`n eáang', jo dsíng'~ iáang` dsii~ cóo'~ 'nu`.

*Jaléng'` 'lii~ yuu'~ quiá'- Jesús
(Mt. 1:1-17)*

²³ Jo guigui' jii` ningóo' Jesús mi~ canaaiñ` jmóor` ta~ e si'íiñ^. Jo jaléng'` dsea` líiñ~ e i Sé^ do tiquiá'^ Jesús. Jo tiyuu'~ quiá'- Jesús siir` Elí, ²⁴ jo tiquiá'^ Elí siir` Matat, jo tiquiá'^ Matat calisír` Leví, jo tiquiá'^ Leví calisír` Melqui, jo tiquiá'^ Melqui calisír` Jana, jo tiquiá'^ Jana calisír` Sé, ²⁵ jo tiquiá'^ Sé calisír` Matatías, jo tiquiá'^ Matatías calisír` Amós, jo tiquiá'^ Amós calisír` Nahum, jo tiquiá'^ Nahum calisír` Esli, jo tiquiá'^ Esli calisír` Nagai, jo tiquiá'^ Nagai calisír` Maat, ²⁶ jo tiquiá'^ Maat calisír` Matatías, jo tiquiá'^ Matatías calisír` Semei, jo tiquiá'^ Semei calisír` Sec, jo tiquiá'^ Sec calisír` Judá, ²⁷ jo tiquiá'^ Judá calisír` Joanán, jo

tiquiá'^ Joanán calisír` Resa, jò tiquiá'^ Resa calisír`
 Zorobabel, jò tiquiá'^ Zorobabel calisír` Salatiel,
 jò tiquiá'^ Salatiel calisír` Neri, ²⁸ jò tiquiá'^ Neri
 calisír` Melqui, jò tiquiá'^ Melqui calisír` Adi, jò
 tiquiá'^ Adi calisír` Cosam, jò tiquiá'^ Cosam calisír`
 Elmodam, jò tiquiá'^ Elmodam calisír` Er, ²⁹ jò
 tiquiá'^ Er calisír` Josué, jò tiquiá'^ Josué calisír`
 Eliezer, jò tiquiá'^ Eliezer calisír` Jorim, jò tiquiá'^
 Jorim calisír` Matat, ³⁰ jò tiquiá'^ Matat calisír`
 Leví, jò tiquiá'^ Leví calisír` Simeón, jò tiquiá'^
 Simeón calisír` Judá, jò tiquiá'^ Judá calisír` Sé,
 jò tiquiá'^ Sé calisír` Jonám, jò tiquiá'^ Jonám
 calisír` Eliaquim, ³¹ jò tiquiá'^ Eliaquim calisír` Me-
 lea, jò tiquiá'^ Melea calisír` Mainán, jò tiquiá'^
 Mainán calisír` Matata, jò tiquiá'^ Matata calisír`
 Natán, ³² jò tiquiá'^ Natán calisír` Daví', jò tiquiá'^
 Daví' calisír` Isaí, jò tiquiá'^ Isaí calisír` Obed,
 jò tiquiá'^ Obed calisír` Booz, jò tiquiá'^ Booz
 calisír` Salmón, jò tiquiá'^ Salmón calisír` Naasón,
 jò tiquiá'^ Naasón calisír` Aminadab, ³³ jò tiquiá'^
 Aminadab calisír` Aram, jò tiquiá'^ Aram calisír`
 Esrom, jò tiquiá'^ Esrom calisír` Fares, jò tiquiá'^
 Fares calisír` Judá, ³⁴ jò tiquiá'^ Judá calisír` Jacó^,
 jò tiquiá'^ Jacó^ calisír` Isáa', jò tiquiá'^ Isáa' calisír`
 Abraham, jò tiquiá'^ Abraham calisír` Taré, jò
 tiquiá'^ Taré calisír` Nacor, ³⁵ jò tiquiá'^ Nacor
 calisír` Serug, jò tiquiá'^ Serug calisír` Ragau, jò
 tiquiá'^ Ragau calisír` Peleg, jò tiquiá'^ Peleg calisír`
 Heber, jò tiquiá'^ Heber calisír` Sala, ³⁶ jò tiquiá'^
 Sala calisír` Cainán, jò tiquiá'^ Cainán calisír` Ar-
 faxad, jò tiquiá'^ Arfaxad calisír` Sem, jò tiquiá'^
 Sem calisír` Noé, jò tiquiá'^ Noé calisír` Lamec, ³⁷ jò

tiquiá'^ Lamec calisír` Matusalén, jo tiquiá'^ Matusalén calisír` Enoc, jo tiquiá'^ Enoc calisír` Jared, jo tiquiá'^ Jared calisír` Mahalaleel, jo tiquiá'^ Mahalaleel calisír` Cainán, jo tiquiá'^ Cainán calisír` Enós, ³⁸ jo tiquiá'^ Enós calisír` Set, jo tiquiá'^ Set calisír` Adán, jo tiquiá'^ Adán 'ña' Fidiée`.

4

*Mi` cajmée` fi~ i 'ling'^ quijí` jial niróng` Jesús dsee`
(Mt. 4:1-11; Mr. 1:12-13)*

¹ Jo ie~ jo, mi~ cangf e cangíng` Jesús Jmiguí` quiá'- Fidiée`, jo e Jmiguí` do cangojéeng` ír` fí` jee~ uó` quiá`, ² jo fí` job cajer` lajee` tuló` jmíi~. Jo lajee` jo ja` e cagó'r` jíi~ capí'^. Jo lajee` táaiñ` fí` jo, jo caguié` fi~ i 'ling'^, jo cajmée` quijí` jial e niróng` dsea` do dsee`. Jo mi~ cangf e tuló` jmíi~ do, joguiba' cadseá` jmí'aang` Jesús jóng. ³ Jo dsifí` lajob cajíng` fi~ i 'ling'^ casí'r` dsea` do:

—¡Song já'- e 'nua` lin' i Jóo' Fidiée` camíng` do, joba' jmee` e ni'uíng` iñí'^ e cuu~ née` la!

⁴ Joba' cañí` Jesús quiá'- fi~ i 'ling'^ do jo casí'-reiñ`:

—Lalab fé` fí` ni` jì` quiá'- Fidiée`: “Ja` niliseeng` jaléng` dsea` jmigüí` juguiá` e lico' ni'í` nidó'r` jalé` e sea` fí` jmigüí`. Co' 'né` nijmiti~bre jalé` ta` quiá' fí` ni` jì` quiá'- Fidiée`, jo lajoguiba' e niliseeiñ` juguiá` jóng.”

⁵ Joba' cajmée` tu fi~ i 'ling'^ quijí` jial e niróng` dsea` do dsee`, jo cangojéeiñ` dsea` do fí` coo` yá'^ mó' e ñí' eáang', jo ca'e'reiñ` jalé` fi~ e sea` fí` la'úng` fí` jmigüí` dseáng` lajee` cateá`. ⁶ Jo cajíñ` casí'r` dsea` do:

7 —Jalé^h e la nicuøø⁻ quií^h- cóo^h jalé^hgui e jlo^h e sea^h fí^h jo song nisi^h uø⁻ jní^h jo nijmifén^h jnea^h, có^h e quié⁻baa lajalé^h e na, jo jneab^h cuøøng^h jmee^h e guié^h jo cuøøm⁻ cuøø^h doñí^h ii^h i iin^h.

8 Dsü^h dsifí^h ladob cañí^htu Jesús quiá^h- fii^h i 'ling^h do jo casí^h-reiñ^h:

—Güihuíng⁻ cáan^h, Satanás, dsüco^h lalab fé^hgui fí^h ni^h jì^h quiá^h- Fidié^h cajo: “Jí^h Fidié^h dsea^h guing^h ñifí⁻bing^h nijmifén^h, jo jí^h ta^h quiü^h íbre e nijmití^h cajo.”

9 Jo mi^h cangf^h jo, cajmée^htu fii^h i 'ling^h quijí⁻ jial nirøng^h Jesús dsee⁻, jo cangojéeiñ^h dsea^h do fí^h yá^h guá^h- fé^h e si^h fí^h Jerusalén jo cajíñ^h- casí^h- dsea^h do:

—Song já^h e 'nü^h lin^h i Jóo^h Fidié^h camíng^h do, laco^h téé⁻ee^h tí^h yá^h la bíng^h uø^h cartí^h uii^h, ¹⁰ có^h lalab fé^h fí^h ni^h jì^h quiá^h- Fidié^h:

Fidié^h niquiú^h- ta^h jaléng^h ángeles quiá^h- e nijmér⁻ í^h 'nü^h,

11 jo nisáiñ^h 'nü^h cóo^h guóor^h lajee^h guiáang^h guo^h guiá^h güí^h,

jo lajoba^h ja^h nilihuín^h mi^h nititáan^h fí^h ni^h uø⁻.

12 Dsü^h Jesús cañí^htur quiá^h- fii^h i 'ling^h do jo casí^h-reiñ^h:

—Dsü^h lalab fé^hgui cajo fí^h ni^h jì^h quiá^h- Fidié^h: “Ja^h jmoo^h jial ni^hé⁻ Fíi^h Fidié^h dsee⁻.”

13 Jo cóo^h e job catí^h 'ní^h née^h e jmóo^h fii^h i 'ling^h quijí⁻ jial e nirøng^h Jesús dsee⁻, dsü^h jí^h cóo^h née^h ja^h calí^h- lajo. Jo mi^h cangf^h jo, mi^h jo^h ñí^h fii^h i 'ling^h jial nijmér⁻ e nirøng^h Jesús dsee⁻, joba^h catiúum⁻bre dsea^h do, jo cangohuím⁻bre lajee^h cateá^h.

Mi~ canaang` Jesús jmóor` ta~ quiá'r- fí lí~ se' Galilea

(Mt. 4:12-17; Mr. 1:14-15)

¹⁴ Jo mi~ cangá jo, cangám'-tu Jesús fí lí~ se' Galilea, jo la'eáang' cóo'~ jalé" bí 'gøng" quiá'- Jmiguí quiá'- Fidié~ canaang` ni' júu^ quiá'r- fí lacoq` fi~ e née' fí la'úng- lí~ se' fí jo. ¹⁵ Jo mi~ niguiéer' lacoq` fi~ lí~ dséer', dsifí ladob ír' fí dsifí guá'- quiá'- dsea` góor` dsea` Israel, jo fí job e'r jaléng" dsea` i dsilíng- fí guá'- do jalé" júu^ quiá'- Fidié~. Jo jaléng" dsea` i núu` júu^ quiá'r- eám' jmiféiñ' dsea` do.

Mi~ cangáng'-tu Jesús fí Nazaret

(Mt. 13:53-58; Mr. 6:1-6)

¹⁶ Jo ie~ jo, lajee~ ngí Jesús fí lí~ se' Galilea, jo caguiéng'-tur fí Nazaret fí lí~ cacuaiñ-. Jo mi~ jmí~ e jmi'íng" jaléng" dsea` góor` dsea` Israel, dséer' fí Sináú^ guá'- laco' jii~ e tiiñ` 'ñia'r'. Jo lajee~ táaiñ` fí e sináú^ guá'- do, jo casíng" 'ñia'r' jee~ jaléng" dsea` góor', ¹⁷ jo ca'íñ" cóo` jì e ca'ír' lí~ tóq` jalé" júu^ quiá'- Fidié~ e cajme' Saií, jaang` dsea` i café" cuaiñ~ quiá'- Fidié~ mali'gui eáang'. Jo mi~ caneáar' e jì do, joba' cadsé'r' lí~ tóq` lala jo ca'ír':

¹⁸⁻¹⁹ E Jmiguí quiá'- Fii~ Fidié~baa' e jéeng` jnea~, có' caguiéng" Fidié~ jnea~ e laco' niguiaa^ jalé" juguiá- quiá'r- fí jee~ jaléng" dsea` tiñíng-: jogui nicasíiñ` jnea~ cajo e laco' niguiaa^ juguiá- quiá'- e nileáng` jaléng" i dsea` i lafa' 'ñúung" cóo'~ dsee- quiá'-, jogui e nijmee~ e e nilijné"tu jaléng" dsea` tiuung-, jogui e nilaan- jaléng" dsea` i íng" iihuí quiá'- dsea` rúng",

jogui e nijméé' e júu^ e nicatíb' í' e nijmé' Fidiée' e ni'uíng' guiá' quiá' dsea' jmigüí'.

Jō lanab jii' lí' júu^ e fé' fí' ni~ jì' quiá' Fidiée'.

20 Jō mi~ calí' e í' Jesús e júu^ do, jō cajníb'tur e jì' do jō cajá'r' i dsea' née' ni~ e guá' do, jō caguáb'tur. Jō jalém' i dsea' teáng' sinúu^ guá' do teáaiñ' jóoiñ' Jesús. 21 Jōba' canaang' Jesús sí'r' jaléng' i dsea' do jō cajíñ':

—E jmii~ na nicaliti~ jalé' e nicanúu' 'nú' e tōo' e fí' ni~ jì' la.

22 Jō jaléng' dsea' i teáng' dsí' e guá' do dsíng' dsigá' dsíir' jalé' júu^ quiá' Jesús, jogui jmang' juguiáb' fé'r' quiá' dsea' do, jogui jmingí' rúíñ' la'ó' yaaiñ':

—¿Su o' i nabi jóo' Sé' i guíng' fí' fii' la?

23 Jōba' caíí' Jesús casí'r' jaléng' i dsea' do jō cajíñ':

—Ja' ngám' nisí' 'nú' jnea~ jii' laco' júu^ róo': "Timí', jmee' mii' quí' uø'"; osi nifo'bi' é: "¿Jiali' ja' jmée' fí' góo' la lajalé' e nicajmee' fí' Capernaum?"

24 Jō cajíng' gui Jesús casí'r' jaléng' i dsea' do:

—Jō jnea~ jmitaa' óóna' e jii' jaang' dsea' i fé' cuaiñ' quiá' Fidiée' ja' íng' dsea' góor' ír'. 25 ¿Já' tōo' óóna' jalé' e fé' fí' ni~ jì' quiá' Fidiée' e calí' malí'gui eáang' mi~ cajá' Líí' i café' cuaiñ' quiá' Fidiée'? Co' ie~ jō ja' catuu' jmii' fí' Israel lajee' 'ní' jiiing' dsí' ca'ná'^, jogui dsíng' cajá' oo' cajo.

26 Jō dsu' ie~ jō ja' caquiú' Fidiée' ta' fa' e cajmée' Líí' e guiá' quiá' i dseamí' dsea' góor' i 'ní', co' caquiú' dsea' do ta' e cajmée' i Líí' do e guiá' dsu' quiá' jaang' dseamí' i 'ní' i guíng' fí' lí' huíí' eáang' fí' coo' lí' sii' Sarepta quiá' lí' née' fii' Sidón.

27 Jo lajob calí- cajo ie~ mali~gui eáang' mi~ cajá- Cheey~, jaang` dsea` i café" cuaiñ~ quiá"- Fidiée~. Co' fím' dsea` Israel dsea` góo` Cheey~, calidsée'r` e cacár- jmohuí' 'li^ fí' ngúu' táaiñ` ie~ jo, dsu' jii~ jaang` i dsea` góor` fa' cajmi'leáaiñ-. Co' camíng' dsea` i sii` Naamán i guing~ tí' lí~ huíi^ eáang', tí' lí~ se' Siria, jii~ í'bing' i ca'láang-, co' lajob ta~ caqui~' Fidiée~.

28 Jo mi~ canúu- jaléng' i dsea` i teáang'~ dsíí' sinúu^ guá'- do jalé" júu^ quiá"- Jesús jo dsíng'- caliguiñ-. 29 Joba' caguim`bre dsea` do sinúu^ guá'-, jo ca'óøng`neiñ' catí' guiée'~ fi~, jogui cangojéeng`neiñ' cartí' coo` yú^ jiáa'. Jo fí' job lí~ lamí~ iñ~ nibíiñ- dsea` do, co' í' dsír' e nijngám'-breiñ'. 30 Jo mi~ caguiliñ- tí' e yú^ jiáa' do e lí~ í' dsír' e nibíiñ- dsea` do, jo dsu' Jesús caquim'-tur jo cangíiñ' jee~ jaléng' i dsea` do, jo jii~ coo` jo` eé' cajméeiñ' do quiá'r-.

*Jaang`dseañu` i jée' i 'ling'^ quiá'-
(Mr. 1:21-28)*

31 Jo mi~ cangí jo, jo cangób-tu Jesús fí' Capernaum fí' lí~ se' Galilea. Jo mi~ caguiér- e fí' jo, jo ca'ír- fí' dsíí' sinúu^ guá'- quiá'- dsea` góor` dsea` Israel, jo fí' job canaaiñ` e'r' jaléng' i dsea` í' jalé" júu^ quiá"- Fidiée~ lajee~ jmí~ e jmi'ing' jaléiñ" do. 32 Jo dsíng'- dsigá' dsíí' jaléng' dsea` i núu' júu^ quiá'r-, co' fé'r' lí^ laco' jaang`dsea` i óo` ta~.

33 Jo e fí' guá'- do e lí~ caguié- Jesús e cango'ée'r' dsea` júu^ quiá'- Fidiée~, jo fí' job nising' jaang`dseañu` i jée' i 'ling'^ quiá'-. Jo cajmée` i 'ling'^ do e ca'óo` i dseañu' do ga` eáang', jogui café'r' jo cajíñ'- lala:

34 —Jéeng' na, Jesús, dsea` seeng` fí Nazaret. ¿Jiali' ñijmiguín'^ jnea'^? ¿Su cañi' e ni'lin' jnea'^? Cuím`baa' 'nua', joba' ne~naa' e lin' dsea` güeang'^ quiá'- Fidiée` dsea` guing` ñiff'.

35 Joba' cajíng- Jesús i 'ling'^ do jō casí'- reiñ':

—i Tii- íí moní'^, jō tiúung' i dseañu' na lana!

Jō mi~ cajíng'- Jesús lajō, jō dsifí' ladob cajmée` i 'ling'^ do e caquíng'- i dseañu' do fí quini` jaléng'^ i dsea` teáng' dsíí' sinúu^ guá'- do. Jō joguiba' catiúung- i 'ling'^ do i dsea` do, jō jíí' coo` jō ee` cajmeáñ' i dseañu' do. 36 Jō dsíng'- caføng' jaléng'^ dsea` jō jmingi' rúñ' lala:

—¿I' i dsea` na, faa~aa', e quiu'r' ta~ laco' jaang` dsea` i óo` ta~, jogui quí'~bre jmi~ e jmihuín` jaléng'^ i 'ling'^ i jée' quiá'- dsea`, jō dsifí' lajōb dsihuíng- jaléng'^ i 'ling'^ do?

37 Jō mi~ calí- lado, dsíng'- cani'- júu^ la'úng- fí lí se' Galilea quiá'- jalé' e guiá- e jmóo` Jesús fí Capernaum.

*Mi~ cajmi'leáng- Jesús iemisé` Tú^ Simón
(Mt. 8:14-15; Mr. 1:29-31)*

38 Jō mi~ cangí jō, jō cagüi'ib' Jesús lí iuuiñ- fí dsíí' guá'- quiá'- dsea` góor` i seeng` fí Capernaum, jō cangór- fí quiá'- Tú^ Simón. Jō mi~ caguiér- fí jō, nidséeb' iemisé` Tú^ Simón e dsíng'- iu~ guíñ'. Jō coo` tú- máng' dsea` i teáng' e sinúu^ do camí'r' Jesús jmi'ee` fa' e nijmi'leáañ' i dseamí do. 39 Joba' cangó- Jesús fí lí ráang' i dsea` dsée' do. Jō mi~ caguiér- lí ráañ' do, jō cajíñ- e jmohuí' e líng' i dsea` do. Jō dsifí' ladob ca'láang- i dseamí do, jō cajém' e iu~ guíñ' do. Jō mi~ cangí lado,

jò caróo bre jò cajméer e cagó^h Jesús cóo^h i dsea caguiaang gui do.

Mi cajmi'leáng Jesús fíng' dsea dsée^h
(Mt. 8:16-17; Mr. 1:32-34)

⁴⁰ Jò mi canuu e jmi^h jò, jò fíim' dsea caguiliín e 'náiñ' Jesús, jò jéeiñ jaléng' dsea dsée^h quiá'r e laco' nijmi'leáng dsea do. Jò mi caguiliín fí lí guing Jesús, jò camí'r' dsea do jmi'ee^h lajii^h ta ngoliñ; joba' lí jò caquidsí Jesús guór' fí moguí lajaang lajaang i dsea dsée^h do, jò dsifí ladob 'láaiñ'. ⁴¹ Jò jee i dsea dsée^h do niquíéng dsea i jée i 'ling'^h quiá'. Jò laco' ngóo Jesús e jmi'leáaiñ lajaang lajaang i dsea do, jò lajob dsihuíng jaléng' i 'ling'^h do, jò sóng^h óor' t'láaiñ Jesús jò fé'r:

—'Nub dsea lin' Dsea Jmáng i Joo' Fidiée^h camíng'.

Jò dsifí mi canúu Jesús e fé' i 'ling'^h i jée quiá' i dsea do lado, dsifib' ca'gaaíñ quiáiñ jò jo cacuø'r' fí fa' ee café'guiíñ do, co' líb' i 'ling'^h do e Jesús líiñ Dsea Jmáng i cajíng' Fidiée^h i nisíñ fí jmi'güí la lajii^h lamali'gui eáng'.

Mi caguia' Jesús júu^h quiá' Fidiée^h fí lí se'
Galilea
(Mr. 1:35-39)

⁴² Jò mi cajneá e jmi^h e cajmi'leáng Jesús jaléng' i dsea dsée^h do, cagüí'fíb' Jesús e fí do, jò cangór' fí coo' lí cateáaiñ 'ñia'r'. Dsu' dsifí ladob caguilíng jaléng' dsea e 'náiñ' dsea do calé' catú, jò jniíñ dsea do e laco' ja nidséiñ fí lí jíé'. ⁴³ Joba' cajíng' Jesús casí'r' jaléng' i dsea do:

—'Né- ninií' i lacoḡ lacoḡ fiī e niguiaa^ júu^ quiá'- jial íng- Fidiéé̄ dsee- quiá'- dsea` e lacoḡ cuóøng` nicár` nifí quiáíñ'-.

⁴⁴ Joba' canaaíñ` ngir' lacoḡ fiī e guiar' e júu^ jo fí lacoḡ guá'- quiá'- dsea` góor` dsea` Israel e téé- fí la'úng- fí lí- neáng' dsea` do.

5

*Mī cajmée` Jesús e calí'- Tú^ Simón 'ñū i lí' eéang`
(Mt. 4:18-22; Mr. 1:16-20)*

¹ Jo coḡ jmī cangó- Jesús fí 'ni' coḡ guiéé' fé' e siī Genesaret, jḡgui siī'bi guiéé' Galilea cajo, jo caguilíng- fíng' dsea` e iñ~ ninúr- jalé' júu^ quiá'- Fidiéé̄ e e' dsea` do. Jo dsíng'- fíng' i dsea` i caguilíng- do, joba' dsíng'- sicúung' Jesús jee~ jaléng' i dsea` do. ² Jo lajeē jo, cangá- Jesús tú- móo' e téé- quiá'- 'ni' jmī, jo i dsea` fiī e móo' do nínica'uøøm`bre dsíí, jo dob nitaaiñ~ ru'r' 'máa' quiá'r- 'ni' e guiéé' do. ³ Joba' camí Jesús fí e cajgóor- dsíí coḡ e móo' do e quiá'- Tú^ Simón, jo caguá'bre fí dsíí, jo casí'r- i dsea` do fa' e nidsi-huíng- guijiu e móo' do fí 'ni' uø- quiá'. Jo mī cajé' e móo' do ni~ jmī, jo tí job ca'e' Jesús jaléng' i dsea` i teáng- 'ni' jmī do jalé' júu^ quiá'- Fidiéé̄. ⁴ Jo mī cató' e e' Jesús jaléng' i dsea` do jalé' júu^ quiá'- Fidiéé̄, jo casí'r- i Tú^ Simón do jo cajíñ'-:

—Jmee- e nidsé- e móo' la tí dóo- tí lí- ni'a'gui quiá'- e guiéé' la. Jo mī niguiéé' lí- ni'a'gui, nibí'na' 'máa' quí'na' jo nijmang'na' 'ñū.

⁵ Joba' cañí' Tú^ Simón jo casí'r- Jesús:

—Tifa', lata uóob`nicataang`naa' jmoo`naa' ta` bî 'máa', jò jii` jaang` 'ñu` ja` mí cali'naa'. Dsu` 'nu`gui quiá' ta` lana, joba' nibí`baa 'máa' quié`e.

6 Joba' cangolíñ` cartí` lí` ni'a`gui quiá'` e guiéé` do, jò job cabír` 'máa' quiá'r` fí` lí` ca'e` Jesús, jò i` lí` 'ñu` cali'r`. Jò mi` canaaiñ` øøiñ` e 'máa' do, jò canaang` 'gui`ba' do, cò' dsíng'` fíng' i` jó` do nicangotáang`ne' fí` dsíí` e 'máa' do. 7 Joba' cató'r` i` dsea` la'ó` jmoo` ta` cóo'r` i` teáng` dsíí` e móo` e cóo`gui do, jò íb` cangolíng` e cangojmícóo` quiá'r` e quiá'` e caguá` e 'máa' do. Jò mi` caguir` e 'máa' do, jò canaaiñ` uóøiñ` i` 'ñu` do, jò catáng` neiñ' do fí` dsíí` e móo` do car` caróng` laji` tú`. Jò jiu` ja` cango'ang` e móo` do, cò' dsíng'` fíng' i` 'ñu` do cali'r`. 8 Jò mi` cangá` Tú` Simón jalé' e do, dsifí` lajob casí'r` uó` jnir` fí` quini` Jesús laco' teáiñ` dsíí` e móo` do, jò casí'r` dsea` do jò cajíñ`:

—Fíi`, ja` catín'` sin'` cáan`n, cò' jaang` dsea` dsee` dsea` quib` líng` jnea`.

9 Jò cajíng'` Tú` Simón lajo, cò' dsíng'` cangogá` dsíir` colíng` cóo`` jaléng` i` dsea` caguiaang` gui do dsu' e cali'r` jaléng` i` 'ñu` do ie` jmi` jò. 10 Jò jee` i` dsea` í` nitaang` gáng` dseañu` i` jmoo` ta` colíng` cóo`` Tú` Simón, jaiñ` do siir` Tiáa` jò jaang`gui i` sii` Juan, jò laji` huáaiñ` do líiñ` jóo` jaang` dseañu` i` sii` Zebedeo. Joba' cajíng'` Jesús casí'r` Tú` Simón:

—Ja` fóøn'`, Tú` Simón, cò' latí` lana nitú` e ta` jmoo` na, jògui nicuóø`ø` 'nu` cóo`gui ta` e líb`jiu` la líí` e ta` na cajo, cò' nijmée` ta` guia` júu` quié`e jee` jaléng` dsea` jmígüí`.

11 Jò mi` cangí` jò, cangolíim`tur fí` 'ni` uó` quiá` cóo`` laji` tú` e móo` do, jò job catú` i` dsea` do

lajì tú̄ e móó' do cóo'~ lajalé' e sea` quiá'r-, jo cangolíim^bre cóo'~ Jesús.

Mi~ cajmi'leáang- Jesús jaang` dsea` i líng' jmohu# 'li^

(Mt. 8:1-4; Mr. 1:40-45)

¹² Jo mi~ cangf̄ jo, jo lajee` táang` Jesús fí' cóo` fíi lí' se' Galilea, jo caguié- jaang` dseañu" i líng' jmohu# 'li^ fí' ngúu' táang`. Jo mi~ caguiér- quiá' lí' sing' Jesús, jo casí'r` uó- jnir~ jo catúuiñ' cartí' ní' uó^ jo camí'r' jmi'ee` dsea` do jo cajíñ'- casí'-reiñ':

—Fíi'naa', cuóom` lí' jmi'leáan'^ jnea~ song iin~ lajo.

¹³ Jōba' cagüing' Jesús i dsea` dsée'~ do jo cajíñ'- casí'-reiñ':

—Iim~baa jmi'leáan~n 'nu. Jōba' latí' lanab ni'leáan'- lajii~ jmohu# e lin'.

Jo dsifí' mi~ cajíng'- Jesús lajo, cajém' e jmohu# e líng' i dsea` dsée'~ do, jo jii~ capi'^ jo ee' líng'guir e jmohu# 'li^ do. ¹⁴ Jōba' caqui# Jesús ta~ i dseañu" do e ja` ii' nisí'r` jii~ jaang` lajii~ e calí' do, jo casí'-reiñ' do jo cajíñ'- lala:

—Gua~ jo güjáng~ uó' fí' quini` jmidsea` quí-ii', jogui 'né- líng~ ee' cóo` nigüicá'^ e quiá'- e nicuó'^ guí'máang' Fidié~ lí' laco'gui ta~ caqui# Moi~. Jōba' i jmidsea` do nijíñ'- e nica'láam~ba' lajii~ jmohu# e lin', jo lajōb jaléng' dsea` ninír' e jo lin' jii~ cóo`.

¹⁵ Jo dsu' dsifí' ladob cani'- júu^ e dsíng'- 'gøng' Jesús. Jo dsíng'- fíng' dsea` cangolíng^ e 'náíñ' dsea` do e iin~ ninúr- jalé' júu^ quiá'- Fidié~, jogui iin~ e nijmi'leáang- dsea` do lajii~ jmohu# e líiñ' do. ¹⁶ Jo dsu' tá'- cō' jeeng~ jmi'nám` 'ñia' Jesús, jo

'nó'r' lí~ ja` ií` dsea` seeng`, jò fí' jòb dséer' dsisiñ`
còo'~ Fidiée`.

*Mi~ cajmi'leáang` Jesús jaang` dseañu` i caang` tii`
(Mt. 9:1-8; Mr. 2:1-12)*

¹⁷ Jò mi~ cangí' jò, còo` jmiñ` lajee` e' Jesús jaléng`
dsea` jalé` júu` quiá'- Fidiée`, jò fí' jòb neáang` còo`
tú` mning`~ dsea` Israel i lúng` dsea` fariseo colúng`
còo'~ tifa' quiá'- júu` quiu' ta` quiá'- dsea` Israel.
Jò i dsea` do, seeiñ` do jalíiñ` fí' Jerusalén còo'~ gui
jalé` fii` e née' quiá'- lí~ se' Galilea còo'~ gui lí~ se'
Judea. Jò dsíng'~ lí~ e jmicòo'~ quiá'- Jesús e güea'
'gøng'~ quiá'- Fidiée`, cò' dsíng'~ tiiñ` e jmi'leáaiñ`
jaléng` dsea` dsée'~. ¹⁸ Jò lajee` jò caguilíng` tú`
'ní mning`~ dseañu' fí' lí~ táang` Jesús e dsíiñ` jaang`
dseañu' i caang` tii~, cò' iin` nidsijéeiñ` i dsea`
dsée'~ do fí' quini` Jesús. ¹⁹ Dsu' ja` lí~ cadsé' i dsea`
do fí' lí~ ningíiñ`, cò' dsíng'~ fíng` dsea` i teáang'~ e
sinúu` do ie` jò. Jòba' cajgóo` i dsea` jéeng` i dsea`
dsée'~ do fí' yá' 'núu' lí~ røø. Jò mi~ caguilíiñ` fí' jò,
jò ca'òr` còo' too', jò fí' jòb cangíiñ` i dsea` dsée'~ do
laco' dsíiñ` do e fí' ní~ lí~ ráaiñ`, jò cajgiáang` neiñ`
do jee` jaléng' i dsea` i teáang' e dsíi' sinúu` do
dseáng' fí' quini` Jesús. ²⁰ Jò mi~ catisíng' i dsea`
dsée'~ do cartí' ní~ uó`, dsifí' ladob calilí' Jesús e
jáb' lúng` i dsea` dsée'~ do còo' i dsea` dsíi' quiá'r`
do e quíib'~ dsea` do jmiñ` e nijmi'leáaiñ` jaléng`
dsea` dsée'~. Jòba' casí'r` i dsea` dsée'~ do jò cajíiñ`:-
—Ni'íim`baa dsee` quíi', Ruu'.

²¹ Jò mi~ canúu` jaléng' tifa' quiá'- júu` quiu' ta`
quiá'- dsea` Israel còo'~ gui jaléng' i dsea` fariseo
do e cajíng' Jesús lajò, jò canaaiñ` í' dsíir' jò siiiñ`
la'ó' yaaiñ`: “¿I` i dseañu' la e jafée'r` jalé` júu` e

jíi' Fidiéeb' dsea`catíiñ' fé'r? Co' jíi' Fidiéé' dsea` guing' ñiff' catíiñ' ni'íiñ' dsee' quí'naa'."

²² Dsu' Jesús calilí'bre jalé' e í' dsí' i dsea` do, joba' casí' reiñ' jo cajmingí' reiñ' lala:

—¿Jiali' í' ó'na' lana? ²³ ¿E' e líng'na' e ja'gui huíng' e nifé'naa': su e "Ni'ím'baa dsee' quí'—", osi e nifé'naa' é: "Ráan' jo ngí'?" ²⁴ Dsu' lana jnea' ni'é'e 'nú' e jnea~, i cajá' fí' ñiff' e lín'n jaang' dsea` jmigüi, oo'baa ta' e ni'íin'n dsee' quía' jaléng' dsea` jmigüi.

Joba' casí' Jesús i dsea` i caang' tii' do jo cajíiñ':

—Ráan', Ruu', jo uó'ba' nicó' e lí' dsíin' na, jo guóng' fí' quí' náng.

²⁵ Jo mi' café' Jesús lado, dsifí' ladob caróo' i dsea` caang' tii' do jee' jaléng' i dsea` i teáng' do, jo case'r' e lí' dsíiñ' do, jo cangáiñ' fí' quía'r'. Jo lajee' ngaiñ' jo jmiféiñ' Fidiéé' dsu' uíi' e ca'láaiñ'.

²⁶ Jo lajalém' i dsea` i teáng' do dsíng' cangogá' dsíir', jo canaiñ' cuø'r' gui'máang' Fidiéé' jogui jmiféiñ' dsea` do cajo dsu' e ca'láang' i dseañu' i caang' tii' do, jo síiñ' lajee' yaaiñ':

—Jíi' coo' né'e' ja'mí' cane'naa' e guiá' e la jmóo' i dseañu' na.

*Mí' cató' Jesús jaang' dseañu' i sií' Leví
(Mt. 9:9-13; Mr. 2:13-17)*

²⁷ Jo mi' cangí' jo, jo cagüi'íb' Jesús lí' iuuiñ' do, jo cangór' fí' lí' jíé'. Jo lajee' iuuiñ' fí' ngóor', cangáiñ' jaang' nodsicuu' i sií' Leví i guing' fí' lí' mir' cuu' e catíng' dseata' i guing' fí' Roma. Jo cató' Jesús i dsea` do jo casí' reiñ':

—Leví, má'aa' cóo' jnea~.

28 Jo mi~ canúu~ Leví e tó` Jesús, jo dsifí ladob catár` ta~ jmóor` cóo~ jalé` e sea` quiá~r~ jo cangó~bre cóo~ Jesús.

29 Jo mi~ cangî jo, fí` quiá~ Leví cajméer` cóo` jmi~ fe` e quiá~ e jmi`gór` Jesús, jogui cató~r~ jaléng`gui nodsicuu~ i cuiñ` e cagó~r` colíng~, jogui fíim`bi dsea`jiéng` i caseáng` fí jo ie~ jo. 30 Jo lajee` jo, dob neáng` jaléng` dsea` fariseo cóo~ jaléng` tifa` quiá~ júu^ quiá~ ta~ quiá~ dsea` Israel. Jo mi~ cangár~ e gó~ Jesús cóo~ jaléng` nodsicuu~ cóo~gui jaléng` dsea` i sea` júu^ e dsíng` røøiñ` dsee~, joba` canaaiñ` éeiñ` Jesús jo casí~r~ i dsea` i caguilíng~ cóo~ dsea` do:

—¿Jiali` í` gó~ tifa` qui~na` cóo~ jaléng` nodsicuu~ cóo~gui jaléng` dsea` i sea` júu^ e dsíng` røøiñ` dsee~?

31 Jo mi~ canúu~ Jesús e fé` i dsea` do lado, jo cañí~r` quiá~iñ` jo casí~reiñ`:

—Jaléng` dsea`guiúng~ ja`neaiñ` timí~, có`lají~ dsea` dséel`bing` i neáng~ timí~. 32 Jo jnea~ ja` cagá~a fí` jmigüi` la e caga`nén`n jaléng` dsea` i guiúng~, có` jaléng` dsea` dsee~ dsea` qui`bing` i caga`nén`n e lacó` niquí~ nijíng` yaaiñ` fí` quini` Fidié~ dsea` guíng~ ñíff~.

*Mi~ cajmingí~ dsea` Jesús cuaiñ` quiá~ ayuno
(Mt. 9:14-17; Mr. 2:18-22)*

33 Jo mi~ cangî e cajíng` Jesús lajo, jo caleáb` catú~ cajmingí~tu i dsea` Israel i líng` dsea` fariseo do jo cajíñ` lala e cajmingí~r~ Jesús:

—Jaléng` dsea` i ngí` cóo~ Juan i seáng` dsea` jmi~ cóo~gui jaléng` jnea`, dsea` línaa` dsea` fariseo, dsíng` jmoo~naa` ayuno jogui dsíng`

fé'naa' fa', jə ɟjialí' jaléng' dsea` i ngí' cóo' ˈnɯ`
laco` jm̩ib̩ ɟ' gø'r', jə ja` jmóor` ayuno laco' jnea'˘?

34 Jəba' cañí'tu Jesús quiá' ˈi dsea` do jə cajíñ' ˈcasí' ˈreiñ':

—Fa' mi~ jmoo` 'nú' jm̩i~ e cung' guoo` dsea`,
jəba' ja` cuóøng` e niseáang~na' jaléng' ˈi dsea`
simíng˘ do e nijmérˉ ayuno lajee` neáaiñ' cóo' ˈi
siming' ˈi nicúng' ˈguó' do. 35 Jə dsu' niguiéeb' jm̩i~
mi~ nitøø` dsea` ˈi siming' do, jə ie~ jə mi~ nijméˉ
ayuno ˈi dsea` simíng˘ do.

36 Jəgui ca'e'gui Jesús jaléng' ˈi dsea` do jalé' júu`
já' ˈe lafa' júu` cuento jə cajíñ' ˈ:

—Mi~ 'né' te' dsea` cóo` 'mi', ja` jmóor` fa' e
qui'ra' ca'ná' ˈmi'qui' e 'm̩i~ jə nite'rˉ cóo' ˈcōo`
'mi'qui' e yúu' ˘. Co' song cajméer` lajə, ni'ímˉ e
'mi'qui' e 'm̩i~ do, jəgui ni'ímˉ e 'mi'qui' e yúu' ˘ do
cajə, co' mi~ nijgíˉ, nijóm' e 'mi' 'm̩i~ e sito' do, jə
nilife'gui e lí' sí'guí' do. Jə mi~ niliqui'ra' jə jə ee`
ta` íng' ˈjí' ˈcapí' ˈjóng.

37 Jəgui cajíng' ˈgui Jesús casí'rˉ jaléng' ˈi dsea` do:

—Jə lajəbi cajə, ja` guié' dsea` jmí' ˈmí' huíng`
jə' e laco' gui'ná' ˈcó' fí' cóo` dsí' loo~ jə' e yúu' ˘,
dsuco' song cajméer` lajə, jəba' ni'guí'ba' do jə
nidsí'íib' e jmí' ˈdo jəgui ni'ímˉ e loo~ jə' do cajə. Jə
co' lajəb líí, 38 jəba' guiú'gui e niguié' dsea` e jmí' ˈ
mí' huíng` jə' do laco' gui'ná' ˈcó' fí' cóo` dsí' loo~
jə' e 'm̩ib̩, jə lajəba' ja` dseáang' ˈfa' e ni'guí' e loo~
jə' do o'gui fa' e nidsí'íí' e jmí' ˈdo cajə. 39 Jəgui jíí' ˈ
jaang` dsea`, mi~ nicangoyúung' ˈe ca'í'rˉ jmí' ˈmí' ˈ
huíng` jə' e nicó', íing~guír fa' ni'í'r' jmí' ˈe ja` mí'
líí lajə, co' jalém' dsea` fé'r': “Eáang'gui jlo' ˈjmí' ˈ
mí' huíng` jə' e nicó' laco'gui jmí' ˈe ja` líí lajə.”

Jō jalé' e júu^ na ca'e' Jesús jaléng' i dsea` do ie~ jō.

6

*Mĩ ca'éeng` dsea` quiá'- Jesús láa' quiá'- cui'iee`
(Mt. 12:1-8; Mr. 2:23-28)*

¹ Jō mi~ cangî jō, cōo` jmi~ lajee` e jmi'ing' jaléng' dsea` Israel, cangíng' Jesús cōo'~ jaléng' dsea` quiá'r- fí 'ni' lí~ sijnea~ cui'iee'. Jō lajee` teáaiñ~ fí lado, jaléng' i dsea` do canaañ` éeiñ` láa' quiá'- cui'iee`, jō guiár` fí jaguór` jō jiuur` quiá'-, jō cu'r e micui'iee` do. ² Jō dob ngolíng` tú` 'ni' míng'~ dsea` Israel i líng' dsea` fariseo. Jō mi~ cangár` e éeng` jaléng' i dsea` do láa' quiá'- cui'iee`, jō dsifí ladob cajmíngi' reiñ' jō cajíñ'- lala:

—¿Jiali' jmoo` 'nú' cōo` e ja` catíng` nijmé` dsea` mi~ jmi~ e jmi'ing' naa', dsea` lí' naa' dsea` Israel?

³ Jōba' cañí' Jesús quiá'- i dsea` do jō casí'- reiñ' jō cajíñ'-:

—¿Su ja` mi' ca'í' 'nú' fí ni~ jì quiá'- Fidiée` lí~ fé' jial cajmée` dseata~ dsea` féng' Daví'^ cōo'~ jaléng' dsea` quiá'r- mi~ cadseá` jmi'aañ`? ⁴ Cō' ie~ jō i dseata~ Daví'^ do ca'ír- fí dsí' sinúu^ guá'- quiá'- dsea` góor` dsea` Israel, jō camí'r jmidsea` i néé' ni~ guá'- do iñí^ e güeang' e tíng' dsea` e cuø'r Fidiée`, jō cagó'r` cōo'~ jaléng' i dsea` i cōo'r` do. Jō niñib^ 'nú' e ja` cuøng` dó'- lí^ doñí' i dsea` e iñí^ do, cō' lajii' jmidsea`bing' cuøng` lí' dó'- e jō. Dsá' cangím` i dseata~ dsea` féng' Daví'^ do e cagó'r` e iñí^ do ie~ jō colíng` cōo'~ jaléng' dsea` quiá'r-.

⁵ Jō lalab cajíng'~ gui Jesús:

—Jò jnea~, ì cagüéng~ fí jmigüî la e gáa'a fí ñiff~ e lín'n jaang`dsea` jmigüî, seab` fí quié~ e e quiá'~u ta~ lajee~ e jmî~ e jmi'íng' dsea` góo`o dsea` Israel.

Mi~ cajmi'leáng~ Jesús jaang` dseañu' ì caang~ guoo`

(Mt. 12:9-14; Mr. 3:1-6)

⁶ Jò mi~ cangî jò, mi~ caguié~ coo`gui jmî~ e jmi'íng' jaléng' dsea` Israel, jò calí~ Jesús fí dsíí coo`guá'~ quiá'~ dsea` góor`dsea` Israel, jò canaaiñ` e'r' jaléng' dsea` jalé' júu^ quiá'~ Fidiéé~. Jò jòb nitáang` jaang` dseañu' ì nicaang~ guoo` dsée'. ⁷ Jò jaléng' tifa' quiá'~ júu^ quiu' ta~ quiá'~ dsea` Israel cóo'~gui jaléng' dsea` Israel ì lîng' dsea` fariseo dob ngír' e téeiñ` Jesús, jò iin~ e nijóør~ su nijmi'leáng~ dsea` do ì dsea` dsée'~ do lajee~ mi~ jmî~ e jmi'íng' jaléng' dsea` Israel; jò faco' lajò, niguiér' jial e ni'naiñ` dsea` do. ⁸ Jò dsu' Jesús lí^bre jalé' e í dsíí jaléng' ì dsea` do, jò casí'r~ ì dseañu' ì caang~ guoo` do jò cajíñ'~:

—Ráan'~ jò ñising' uø' fí quini~ jaléng' ì dsea` la.

Jò dsifí ladob caróo~ ì dseañu' ì caang~ guoo` do, jò cangór~ fí lí~ cajíng'~ Jesús. ⁹ Jò mi~ caguiér~ fí lí~ e' dsea` do, jòba' cajíng'~ Jesús casí'r~ jaléng' ì dsea` ì teáng'~ dsíí e sinúu^ guá'~ do:

—Sea` coo` e nijmingí'~i 'ná' jaléng' na' na. ¿E~ ta~ quiu' fí ni~ jì quiá'~ Moi~ e cuøong` jmó^oo' mi~ jmî~ e jmi'íng' naa', su jalé' e ga` ofa' jalé' e guiáb~ é? ¿Su e jngáang'~ naa' jaléng' dsea` dsée'~ ofa' e jmi'leám^baa'r é?

¹⁰ Jò mi~ calí~ e fé' Jesús lajò, jò cajóøiñ~ jaléng' ì dsea` ì teáng'~ dsíí e sinúu^ guá'~ do, jò casí'r~ ì dsea` caang~ guoo` do jò cajíñ'~:

—Níi' guóo', dseañu'.

Jō mi' cani' i dsea` do guóor` e caang` do, dsifi' ladob ca'lóo~, jō jii' cōo` jō` ee` lí'. ¹¹ Jō mi' cangá~ jaléng' i tifa' quiá'~ júu^ quiu' ta~ quiá'~ dsea` Israel cōo'~gui jaléng' dsea` Israel i líng' dsea` fariseo e cajmi'leáam~ Jesús i dsea` dsée'~ do, dsíng'~ caliguíñ~ jō canaaiñ` sáiñ` lajee` yaaiñ` jial laco' cuøøng` e nijmeáiñ' dsea` do.

*Mi' caguíng' Jesús dsea` guitúung` quiá'r`
(Mt. 10:1-4; Mr. 3:13-19)*

¹² Jō mi' cangí jō, cōo` jmii' cangó~ Jesús fí' cōo` yá'~ mó', jō fí' jōb cateáaiñ` lata~ uøø` e sáiñ` cōo'~ Fidiée' dsea` guing` ñifi'. ¹³ Jō mi' cajneá~ e uøø` jō, jō cató'r~ jaléng' dsea` i ngí' cōo'r~ do. Jō mi' caguilíñ'~ do fí' lí' siñ', jō caguíñ' guitúung` i dsea` do i ni'uíng~ dsea` apóo^ i nijmé~ ta~ ni' júu^ quiá'r~. ¹⁴ Jō lalab sii` i dsea` guitúung` do: jaang` i sii` Simón, jō mi' canaaiñ` ngír' cōo'~ Jesús jō calisír` Tú^; jaang`gui i sii` Dí^, rúng' dsea` ngáang'~ cōo'~ i Simón do; jaang`gui i sii` Tiáa~, jaang`gui i sii` Juan, jaang`gui i sii` Lií~, jō jaang`gui i sii` Bartolomé, ¹⁵ jaang`gui i sii` Mateo, jaang`gui i sii` Mó^, jaang`gui i sii` Tiáa~, jōo' jaang` dseañu' i sii` Alfeo; jaang`gui i sii` Simón i líng' dsea` celote; ¹⁶ jaang`gui i sii` Judas, rúng' dsea` ngáang'~ cōo'~ i Tiáa~ do; jō lí' cadséng~gui jaang`gui i sii` Judas Iscariote, dsea` i cajáng' dsea` Jmaang~ fí' jaguó` jaléng' dsea` cøøng'~ quiá'~ dsea` Israel.

*Mi' ca'e' Jesús f#ng' dsea` jalé' júu^ quiá'~ Fidiée'
(Mt. 4:23-25)*

¹⁷ Jō mi' cangí jō, cajgám~tu Jesús fí' e yá'~ mó' do colíng~ cōo'~ dsea` quiá'r~ jō catisáiñ' cōo' lí'

iã~ cõo` mí^ røø, jø fí job cajer' e ca'e'reiñ' do jalé' júu^ quiá'- Fidiée~. Jø lajee~ jø caguilíng~ jaléng' dsea` ì jalíng~ fí Jerusalén cõo~ jalé'gui fii' jié' e téé~ lí~ se' Judea cõo~ jaléng' dsea` ì neáng' fí 'ni' jmiñí' fí Tiro cõo~gui fí Sidón. Jø jaléng' ì dsea` do caguilíñ~ 'náñ' Jesús, cõ' iñ~ e ninúr~ jalé' júu^ quiá'- Fidiée~ e e' dsea` do. Jøgui fíim'biñ' do jéeiñ' jaléng' dsea` dsée~, cõ' niñir' e jmi'leám~ Jesús jaléng' ì dsea` la'í lí^ doñí ee` jmohuí e líiñ'. 18 Jøgui jaléng' dsea` ì jée' ì 'líng'^ quiá'- cajmihuíim~ Jesús ì 'líng'^ do, jø lajõba' ca'láam~ jaléng' ì dsea` do. 19 Jø jalém' dsea` ie~ jø iñ~ nidsilíñ~ cáang' Jesús, jø iñ~ nigü'r~ fa' capí^ sib' dsea` do, jø lajõba' ni'leáaiñ~ lí^ doñí ee` jmohuí e líiñ' la'eáng' cõo~ güea' 'gøng' quiá'- dsea` do.

Ì jaléng' ì seeng' jøguiá~
(Mt. 5:1-12)

20 Jø lajee~ sing' Jesús colíng~ cõo~ ì dsea` quiá'r~ do, jø cajõng~ neiñ' jø casí'r~ dsea` do lala:
—Jøguiá~jiã quií^ 'nú', ja` e lí' jialgui la tiñíng~na', cõ' Fidiéeb~ dsea` ni'quie' nifí quií~na' lana.

21 Jøguiá~jiã quií~na', 'nú' dsea` móo~na' oo~, cõ' Fidiéeb~ nicuó'~ 'nú' lalíng` mi~ nití' í' lajõ.

Jøguiá~jiã quií~na', 'nú' dsea` jiuung~ óo'na' car quií'na', cõ' 'nú'bing' ì ningí~ mi~ niguiéé' jmí~.

22 Jøguiá~jiã quií~na' mi~ 'ní' níng~ jaléng' dsea` 'nú' uii~ quié~ jnea~, osi mi~ øøíñ' 'nú' fí caluu~ fii' lí~ seeng'na', osi mi~ jmineaiñ'^ 'nú', osi mi~ nijíng'~ jaléng' dsea` e 'líim'^ba' dsu' uíi' e núu'~na' jalé' júu^ quié~e, dsea` ì casíng' Fidiée~ fí jmigü' la e lín'n jaang' dsea` jmigü'. 23 Jø e jmí~ e mi~ nijmeáng'

dsea` 'nú` jalé` e ga` lajo, güili`iáang` óo`na' dsuco` niliseab` guiéé` quí`na' mi` niti` fí` ñifi`. Dsuco` lajõb cajmée` jaléng` i` 'lii` yúu` quiá`- jaléng` i` dsea` i` 'ní` níng`- 'nú` do ie` lami` cajmeáin` ga` jaléng` i` dsea` i` café` cuaiñ` quiá`- Fidiéé` malii` gui eáang`.

Jõ mi` calí` e ca`e` Jesús jalé` e júu` na, jõ lalab cajíng`- guir:

24 —E ngi` fii`- 'nú`, jaléng` dsea` sea` cuu`, co` nicañi`-ba' e sii` juguiá`.

25 'E ngi` fii`- 'nú`, dsea` sea` e cø`na' laling` lana, co` niguiéé` jmi` mi` nimó`na' oo`.

'E ngi` fii`- 'nú`, dsea` jmi`iáang` óo`na' cóo`- jalé` e sea` fí` jmi`güi` la, co` niguiéeb` jmi` mi` nilijiuung` óo`na' car` niqui`na' uii` quiá`- jalé` e jõ.

26 'E ngi` fii`- 'nú` mi` fé` jaléng` dsea` jmang`- e guiá`- uii` quí`na', co` lajõb cajmée` 'lii` yúu` quiá`r` cóo`- jaléng` dsea` i` cajmícaang` e café`r` cuaiñ` quiá`- Fidiéé` malii` gui eáang`.

'Né` nijmi`neáang`naa' jaléng` i` 'ní` níng`- jneaa`aa'

(Mt. 5:38-48; 7:12)

27 Jõ mi` calí` e cajíng`- Jesús lajõ, jõ caféng`- guir jaléng` i` dsea` do jõ cajíñ`- casí`- reiñ`:

—Núu`na' jalé` júu` quié`-e: 'Né` nijmi`neáam`ba' jaléng` i` 'ní` níng`- 'nú`, jogui jmee`na' jmang`- e guiá` cóo`- jaléng` dsea` i` 'léé` quí`na', 28 jogui féeng`na' Fidiéé` uii` quiá`- jaléng` i` cuø` 'nú` júu` 'li`^, jogui mí`na' Fidiéé` jalé` e guiá`- uii` quiá`- jaléng` i` jmineang`^ 'nú`. 29 Song ii` caquiúu` cataang` moní`na', jõba` cuøø`na`r e cataang`gui do güiquiúu`r` jóng. Jõ song ii` cagui` 'mi`guiéé` quí`na', jõba` cuøø`na`r

la quie' 'mi'quí'~na' cajo. ³⁰ Cuóø'~na' jaléng' i mi' 'nú' lí' doñí' ee' mir', jo song i' cacá' ee'go e sea' quí'~na', jo' güimí'~na'r. ³¹ Jmicóo'~na' jaléng' dsea', jo' jmee'~na' jmang' e guiá' cóo'r lí' laco'gui iing'~na' e nijmér' cóo'~ 'nú'.

³² Jo song 'nú' 'neáang'~na' lajii' i 'neáang' 'nú', joba' ja' güi'f' óo'na' e jmoo'na' e guiá', co' lajob jmoo' cajo jaléng' dsea' dsee' dsea' quí'. ³³ Jogui song jmicóo'~na' lajii' dsea' i jmicóo'~ 'nú', joba' ja' güi'f' óo'na' fa' e jmoo'na' e guiá', co' lajob jmoo' cajo jaléng' dsea' dsee' dsea' quí'. ³⁴ Jogui mi' ee'go jmi'óøng' rúng'~na' jo' jmoo'na' lajo cóo' i dsea' i líng'~na' i niquí' e dsí' quí'~na', joba' ja' güi'f' óo'na' jóng fa' e jmoo'na' e guiá', co' lajob jmoo' cajo jaléng' dsea' dsee' dsea' quí', jo' jmoo'r lajo uí' líng' ee' sijear' e ni'íñ' quíá' dsea' rúíñ'.

³⁵ 'Dsu' 'nú' 'né' nijmi'neáang'~na' jaléng' i 'ní' níng'~ 'nú', jogui jmang' e guiá' 'né' nijmee'~na' cóo'~ lajaléng' dsea'. Jogui jaléng' dsea' i líng' ee'go jmi'óøng' 'nú', ja' güi'f' óo'na' fa' dseáng' e niquí'~tur quí'~na'. Jo song nijmití'~na' jalé' e nicafá'~a na, joba' dseáng'~ niliseab' guiée' quí'~na', jo lajoguiba' nilíng'~na' jóo' Fidiée' dsea' guíng' ñíí', co' jii'~ íb' dsea' guiúng' cóo'~ jaléng' dsea' doñí' fa' soo' dsír' osi ja' cuø'r' gui'máang' dsea' do é mi' ee'go íñ'. ³⁶ Jo' jmee'~ba' fí' líng' rúng'~na' laco'gui Tiquí'~ii' dsea' guíng' ñíí' fí' lííñ'~ 'nú'.

Ja' cuø'na' dsee' dsea' rúng'na'

(Mt. 7:1-5)

³⁷ Jo' ja' cuø'na' dsee' dsea' rúng'~na', jo lajoba' Fidiée' ja' nicuø'r'~ 'nú' dsee' cajo. Jo ja' fó'na'

júu[^] ga` quiá⁻ dsea` rúng[^]na', jòba' Fidié[~] ja` ni-
jmér⁻ lajò cóo[~] 'ná[^]'. Íng[^]na' dsee⁻ quiá⁻ jaléng[^]
dsea`, jò lajòb ni'íng⁻ Fidié[~] dsee⁻ quií⁻na' cajo.
³⁸ Cuóø[^]na' jaléng[^] dsea` ee`gò e 'né⁻, jò lajòb
nińíng[^]na' quiá⁻ Fidié[~] cajo; jò nijmér⁻ lajò cóo[~]
'ná[^] lafa' mi[~] cuø[^]na' dsea` micuí[^] e néé' í[^] cóo[~]
'ma' í[^] cui[^], jò mi[~] nidsitoo[~], 'né⁻ e ni'iéng[^] e 'ma' í[^]
cui[^] do, jò mi[~] carøng⁻ 'né⁻ e nidsitoo[~] teá[^], jò mi[~]
calí⁻ jò, 'né⁻ e nilí[^] guisó[^] guiá⁻. Jò Fidié[~] nijmér⁻
cóo[~] 'ná[^] lí[^] laco'gui la jmoo[^]na' cóo[~] jaléng[^] dsea`
rúng[^]na'.

³⁹ Jò mi[~] calí⁻ e cajíng[^] Jesús jalé[^] e júu[^] na,
jò ca'e'guir jaléng[^] i dsea` do jò casí[^]-reiñ[^] lala jò
cajín[^]:

—Song jaang[^] dsea` tiuung⁻ nijéiñ⁻ jaang[^]gui
dsea` tiuung⁻, jòba' dseáng[^]- fí' ðb[^] nijiúíñ[^] lajì
huáaiñ⁻ do. ⁴⁰ Jògui jí[^] jaang[^] dsea` i jmitíng[^],
tíng[^]guir laco' tifa[^] quiá[^]r⁻ lajee[~] e jmitíiñ[^]. Dsu[^]
mi[~] ca'e' i tifa[^] do lajalé[^] e tíiñ[^], jòguiba' røøb[^]
nilitíiñ[^] jóng.

⁴¹ Jò çjiali[^] ca[^] cuente lajji[^] qui' iu[~] jmini[~] jaang[^]
dsea` rún[^], jò dsu[^] ja` ca[^] cuente uø[^] e jie[~] ja`
latøøng⁻ cóo[~] 'mab[^] iu[~] jminí[^]? ⁴² Jò song ja` lí[^]
cá[^] cuente uø[^] jial tí[^] fe[^] e iu[~] jminí[^], jòba' çjial
niteá[^] o[^] e nifí[^] jaang[^] dsea` rún[^] lala: “Rú[^]uu[^],
nea[^]du ne[~]ee[^], jò nigui[~]duu e qui' iu[~] jminí[^]”? i[^]
jmicaang[~] 'na[^]! Jáng[^] gui[~]du e 'ma[^] e iu[~] jminí[^]
uø[^], jò lajòguiba' nicuøøng[^] jøø[^] guiá⁻ e niguí[^] e
qui' e iu[~] jmini[~] i dsea` rún[^] do.

*Jalé[^] 'ma' ofí[^] cuí[^] dsea` la'eáang[^] cóo[~] ofí[^] e ðb[^]
(Mt. 7:17-20; 12:34-35)*

43 Jo mi~ calí~ jo, jo cajíng'~gui Jesús casí'r~ jaléng' i dsea` do:

—Ja` sea` 'ma` ofii` e guiá~ e cuø` ofii` e ja` dseeng`, o'gui sea` 'ma` ofii` e ja` dseeng` fa' e cuø` ofii` e guiá~. 44 Co' jalé' 'ma` ofii`, mi~ cacuø` ofii` quiá'~, joguiba' nililí'^ dsea` su guiá~ osi ja` dseeng` e 'ma` ofii` do. Co' ja` cuø` güiñí'^ yá'^ 'matóó', o'gui mí'^ huíng` jò'^ í yá'^ 'matóó' fí'. 45 Jo jaang` dsea` i guiúng` fé'r` jalé' e guiá~, co' jmang'~ e guiáb` í dsír'. Jogui jaang` dsea` i soo` dsí' jmang'~ e gab` fé'r`, co' jmang'~ e gab` í dsír'. Co' dseáng'~ lají' e í dsíb` dsea` e fé'r`.

Jial lí' mi~ núu'~ dsea` júu^ quiá'~ Fidié'
(Mt. 7:24-27)

46 'Jiali' fi'na' jnea~, “Fí'i, Fí'i”, song ja`gui núu'~na' jalé' ta~ quiá'~? 47 Nifá'^duu i~ líng' la líng' jaang` dsea` i núu'~ júu^ quié~ e jogui jmitir~ jalé' e fá'a: 48 i dsea` í líiñ' la líng' jaang` dsea` i cajme' coo` 'núu'. Jo i dsea` í, nú'-gui e nijmé'r~ e 'núu' do, catá'r~ tí~ fií e a' jogui caséer` coo'~ cuu~ e cóo'~ eáang', joguiba' cajme'r' e 'núu' do. Jo mi~ cajá~ jmí' dsiing~, dsíng'~ ca'í~ jmí e tí~ e 'núu' do, jo dsu' jí'~ coo` ja` eè calíng~, co' teáb` eáang` si'. 49 Jogui i dsea` i ja` núu'~ jalé' júu^ quié~ e o'gui jmitir~ jalé' e fá'a, i dsea` í líiñ' la líng' jaang` dsea` i cajme' coo` 'núu', jo ja` catá'r~ tí~ fií. Jo mi~ cajá~ jmí' dsiing~, eáang` ca'í~ jmí tí~ e 'núu' do, jo ca'ím~ba' do co' caquíb'~.

Jo jalé' e júu^ na ca'e' Jesús jaléng' i dsea` do e fí e mí'^ røø` do ie~ jo.

7

*Mi~ cajmi'leáang~ Jesús jaang`dsea`'léeng~ quiá'-
jaang`fi~ 'lée~ romano*

(Mt. 8:5-13)

¹ Jo mi~ cató' e caféng' Jesús jaléng' i dsea` do, jo cangám'-tur cóo'~ dsea` quiá'r- fí' Capernaum.

² Jo e fí' fi# Capernaum do nitáang` jaang` fii~ 'lée- i niseeng` fí' Roma. Jo niseeng` jaang` dsea` 'léeng'~ quiá'r- i iin~ dsíng'-, jo i dsea` i` niráaiñ` dsée'r~, jo dseáng' t' li~ nijúum~bre co' eám' líiñ'. ³ Jo mi~ caliñi' i fii~ 'lée- do e caguiéng' Jesús fí' Capernaum, jo dsifí' ladob casíiñ` tú- 'ni' máng'~ dsea` cóøng'~ quiá'- dsea` Israel e cangoféeiñ' Jesús fa' e nidsér- e nidsijmi'leáaiñ` i dsea` dsée'~ do. ⁴⁻⁵ Jo mi~ caguilíng- i dsea` cóøng'~ do fí' li~ sing' Jesús, jo camí'r dsea` do jmi'ee' lajúi'~ ta~ ngoliñ- jo cajíñ'-:

—I fii~ 'lée- i casíi` qui-naa' do, dsíng'~ guiúin~ cóo'~ jaléng' dsea` góo'naa' dsea` Israel, co' íbre caqui#r' ta~ e calíi- guá'- qui-naa', joba' iin~naa' e nijmicóo'~re lana.

⁶ Jo mi~ canúu- Jesús jalé' e cajíng'- i dsea` do, jo cangó~bre cóoiñ'~ do. Dsu' ná'-gui e niguiéé' Jesús fí' quiá'- i dsea` do, cajíñ' tú- 'ni' máng'~ dsea` i casíng' i fii~ 'lée- do i quie' júu^ quiá'r-, jo cajíñ'- casí'r- Jesús lala:

—Lalab jíng'- fii'naa': ⁷ “Fíi'i, ja` jmée'^ fí'í' fa' ñi' t' quie'-e, co' ja` catín'- fa' e ni'úun'~ sinúu^ quie'-e, co' dsea` 'gøm' 'n#', o'gui fa' e cateá- dsii- e caga'nén'n 'n#` 'ñiá'a, co' dsea` fém' 'n#`. Jo lico' fée'~ e ni'leáang- dsea` dsée'~ quie'-e, jo ni'leáam~bre jóng. ⁸ Ds#co' jnea~ seem`dsea` i qui#r' ta~ quie'-e, jogui seem` dsea` i quiá'~ ta~ cajo. Jo

mĩ fñ̄-i jaang`dsea`quíe`-e e gua~, j̄oba' dsifí' laj̄ob dséer'; j̄ogui mĩ fñ̄-guñ̄ i jiéng` e nea', j̄oba' dsifí' laj̄ob jáar' cajo; osi mĩ fñ̄-i jaang`dsea`'léeng`-quíe`-e e jmee` e la, j̄oba' dsifí' laj̄ob jmóor` cajo; j̄o jalém` dsea`quíe`-e núu`r~ júu`quíe`-e.”

J̄o jaléb` e júu` na quíe` i dsea` i cangojmijíng` Jesús do.

⁹ J̄o mĩ canúu` Jesús lado, j̄o dsíng`- cangogá dsíir' j̄o caji`r' nir~ caj̄oñ̄ jaléng` i dsea` i cóo`r` do j̄o casí`-reiñ̄ j̄o cajiñ̄`- lala:

—Lajee` lajaléng` dsea` góo`naa' dsea` Israel ja mĩ cajín`n j̄úí~ jaang` i dseáng`- lajang` já`- líng` júu`quíe`-e lac̄o`gui i dsea` romano la.

¹⁰ J̄o cangolím`tu i dsea` do fí' quiá'- i fii`'lée` do. J̄o mĩ caguilíñ̄, j̄o ee` líng` i dsea` dséel` do j̄úí`- c̄o, c̄o' ninica`láam`-bre.

Mĩ cajmée` Jesús e caji`tu j̄o` jaang`dseam` i`nñ̄-

¹¹ J̄o mĩ cangí j̄o, cangó` Jesús fí' c̄o` fñ̄ e sii` Naín cóo` dsea` guitúung` quiá'r-, j̄o dsíng`- fñ̄ng` dsea` i ngolíng`- cóo`r` ie~ j̄o. ¹² J̄o mĩ caguiér`- quiá'- e fñ̄ do, j̄o cajiñ̄' cab̄o~ dsea` i jéeng` jaang` 'líñ̄, j̄o teáañ̄` do fí' e ningolíñ̄` fí' codsii`. J̄o dsíng`- qui' niquiá'^ i 'líñ̄ do, c̄o' j̄úí~ dob j̄oor` i niseeng`, j̄o j̄úí~ jaang` j̄o` i seeng` quiá'r-, c̄o' ninicajúm` dseañ̄` quiá'r- cajo. ¹³ J̄o mĩ calilí` Jesús e j̄o` ii` seeng` quiá'- i dseam` 'nñ̄ do, j̄o dsíng`- calí` fñ̄ líng`-neiñ̄', j̄o casí`r- i dseam` do lala:

—Jo` qui`.

¹⁴ J̄o mĩ cajiñ̄`- lado, j̄o cangoquíeñ̄` quiá'- lí~ ngóo` e guóo` e iuung` i 'líñ̄ do, j̄o cagüi`r` e dse`

guóo' do. Jo i dsea`i jée' quiá'- i 'lii~ do, dsifi' ladob cajer'. Jo cajíng'- Jesús caféiñ' i 'lii~ do:

—Siming', jnea~ tóø-ø 'nu': iRáan'- na!

15 Jo dsifi' ladob cají' i 'lii~ do, jogui caguár` jo canaaiñ` fé'r`. Jo Jesús cajáiñ' i siming' do cóo'~ niquiáiñ'^. 16 Jo mi~ cangá- jaléng' i dsea` do e cají' i 'lii~ do, joba' dsíng'- cangogá` dsíir' jogui dsíng'- cafóñ' cajo. Jo canaaiñ` jmiféiñ' Fidiée` jo siiiñ` lajee` yaaiñ`:

—Jaang` dsea` i 'gøng' eáang` i fé' cuaiñ` quiá'- Fidiée` nicagüéiñ` jee~ jneaa`aa' lana.

Jogui fé'guir cajo lala:

—Fidiéeb` nicagüéiñ` e nijmicóo'r~ jaléng' dsea` góor`.

17 Jo jalém' dsea` i seeng' fí jalé' fiñ e née' fí li~ se' Judea cóo'~ gui fí lacúng' jo, caliñir' e júu^ jo lajii' e cajmée` Jesús do.

Mi~ casíng` Juan i seáang` dsea` jmii` dsea` quiá'r- fí li~ táang` Jesús

(Mt. 11:2-19)

18 Jo lajee` jo caliñí' Juan i seáang` dsea` jmii` do jalé' e jmóo` Jesús, có' e júu^ jo cajmée` i dsea` quiá'- i Juan do. 19 Joba' cató'- i Juan do gáng- dsea` quiá'r-, jo casíng`neiñ' fí li~ táang` Jesús e cangojmingü'r` dsea` do su íbing' i cajíng'- Fidiée` i nigüéeng- fí jmigüi' la, osi 'né- e nijém-bir jaang`gui i jiéng' é. 20-21 Jo mi~ caguilíng- i dsea` quiá'- i Juan do fí li~ táang` Jesús, jo gui'nang'~ jmóo` dsea` do mii' quiá'- jaléng' dsea` dsée'~ i líng' doñi' ee` jmohuí': seeng` dsea` tiuung- jogui seeng` dsea` i jée' i 'ling' quiá'- . Joba' cangáb- i dsea` gáng- do mi~ cajmi'leáang- Jesús jaléng' i dsea` dsée'~ do. Jo

cangoquiéeng' i dsea` quiá'- i Juan do fí lí~ sing' Jesús jō cajmingi'r' dsea` do:

—I Juan i seáng` dsea` jmíi` do casíiñ` jnea'^ e cajmingíi`naa' 'nua', ¿su 'nub` dsea` i cajíng'- Fidiée` i nigüéeng` fí jmigüí` la, o'si 'né` e nijeem`baa' jaang` i jiéng`gui é?

22 Jōba' cañíi` Jesús casí'r` i dsea` do:

—Güiling`na' güijmée`na' i Juan do júu` jalé` e nicañíi`na' jogui jalé` e nicanúu`na' na: güijmée`na'r júu` jial lijné`tu jaléng` dsea` tiuung`, jogui jial ngí`tu jaléng` dsea` jlúung`, jogui jial linúub`tu jaléng` dsea` güiing~, jogui jial 'láang`tu jaléng` dsea` líng` jmohuí` 'lí'^ fí ngúu` táang`, jogui jial jí`tu jaléng` 'líi~, jogui jial guiaa` júu` cajo quiá'- jial nileáng` jaléng` dsea` dsee` dsea` qui` jee` jalé` dsee` quiá'r`. 23 Jō juguiá`jiu quiá'- jaléng` dsea` i ja` litúng` dsí' cōo` jalé` júu` quié`e.

24 Jō mi` calí` e fé` Jesús lado, jō cangolím`tu i dsea` quiá'- i Juan i seáng` dsea` jmíi` do, jō Jesús canaañiñ` sí'r` jaléng` i dsea` i taang` cōo'r` do jalé` juguiá` uii` quiá'- i Juan do, jō casí`reiñ' do jō cajíiñ` lala:

—¿E` caguijōø` 'nú` mi` canúu`na' e ningí` i Juan i seáng` dsea` jmíi` do fí guóo` uø` quiú`? ¿já` leáa`?, ja` caguijōøng` 'nú` jaang` dsea` i uaang` júu` quiá'- i jmóo` lí'^ doñí` ee` ta` quiu` dsea` jiéng` i líng` la lí' cōo` cuiñí'^ e dsée` cataang` lí'^ doñí` jié` fí lí` í' guí, 25 o'gui caguijōøng`na' jaang` dseañu` i jlo` sí'^ i seeng` juguiá`, cō' niñíb` 'nú` e i dsea` la'í` neáaiñ' quiá'- dseata` dsea` féng`. 26 Jō ¿í`

í óóna' i caguijθøng~na? Jo e já', 'nú' caguijθøng~na' jaang`dsea` i laniing~gui laco'gui i dsea`caguaang` i café` cuaiñ~ quiá'~ Fidiée` malii`gui eáang'. ²⁷ Jo nab nicaliti~ laco' fé` Fidiée` fi' ni~ jì quiá'r~ cuaiñ~ quiá'~ i Juan i seáang`dsea` jmi#` do mi~ cajíñ'~ lala:

Nisín^`n jaang`dsea` i niguiá~ júu^` quié~ e nú'~gui e niguó^` fi' jmigüí`

e laco' niguiár~ guiá~ fi' li~ ningí`^.

Jo lanab fé` fi' ni~ jì quiá'~ Fidiée` uii~ quiá'~ i Juan do.

²⁸ Jo casí'~gui Jesús jaléng` i dsea` do jo cajíñ'~ lala:

—Lajee` lajaléng` dsea` i nicalfé` cuaiñ~ quiá'~ Fidiée`, ja` mi` caliséng` jaang` i niing~gui ta~ quiá'~ laco' i Juan i seáang`dsea` jmi#` do. Jo dsu' i dsea` i ja` niing~ fi' jmigüí` la, dsu' Fidiée`bing' i quié` nifi` quiá'r~, joba' íbing' i niing~gui laco' i Juan do.

²⁹ Jo jaléng` dsea` i canúu~ júu^` quiá'~ i Juan do ie~ jo cajgáam~bre jmi#, jogui lajob cajmée` cajo jìgui jaléng` nodsicuu~ i jmóo` ta~ quiá'~ dseata~ quiá'~ Roma, co' calilí'r^ e Fidiée`bing' i ée` røø` laco' catíng~. ³⁰ Dsu' jaléng` i dsea` Israel i líng` dsea` fariseo cóo'~ jaléng` i tifa' quiá'~ júu^` quiu'` ta~ quiá'~ dsea` Israel ja` cali'iiñ~ fa' cajgáaiñ~ jmi#` mi~ cajá~ i Juan do, co' ja` cali'iiñ~ lajúi'~ e lamí` si'íiñ^` ni'íiñ` quiá'~ Fidiée`.

³¹ Jo cajíng'~gui Jesús:

—¿I~ nifá^`a i líng` la líng` jaléng` i dsea` i seeng` lana? ³² Co' jaléng` í líiñ` la líng` jiuung~ i taang~ tacóo` fi' 'móo'~, jo mi~ nití`áng` rúíñ` jo fé'r` lala: “Jnea^` cajjúu^`naa' lúu', dsu' ja` cadseeng~na'; jo ca'ø^`naa' jalé` e ø` dsea` li~ ráang` 'li#, dsu' ja`

caquí'~na'." 33 Co' lalab café'~ 'nú' mi~ cajá~ i Juan i seáng` dsea` jmí` do, co' ca'eeng`-na'r e jé' i 'ling`^ quiá'r` dsu' uí'~ e ja` 'leáng`- gø'r' jogui jí'~ capí`^ jmí`^ mí`^ huíng` jø'` ja` í'r'. 34 Jogui cagá`- jnea` fí' jmigüí` la e lín`n jaang` dsea` jmigüí` e gø'`baa jí'~ laco' gø'` dsea`, jo dsu' jaléng` 'nú' ca'eeng`-na' jnea` e lín`n jaang` dsea` cúng` i gø'` contøng`-, jogui e lín`n jaang` dsea` íng` i ngí` cóo'~ jaléng` dsea` i sea` júu` e dsíng`- røøiñ` dsee-, osi cóo'~ jaléng` 'ná`^ nodsicuu` é i jmóo` ta` mí` cuu` e catíng`- dseata` quiá'- Roma é. 35 Jo dsu' cóo'~ jalé' e jmóo` Fidié', jmijnéiñ` jial tí' tiiñ` ngáíñ'.

Mi~ cagø'` Jesús fí' quiá'- jaang` dsea` fariseo i sii Simón.

36-37 Jo mi~ cangí` jo, jaang` dsea` fariseo i sii Simón catø'r`- Jesús fí' quiá'r` e cagø'r` í' e jmí` jo. Jo e fí' góo` i Simón do niseeng` jaang` dseamí` i nijmóo` ta` 'nñing` 'ñia'. Jo mi~ nicaliñí` i dseamí` do e nidsé`- Jesús fí' quiá'- i dsea` fariseo do, jo cangó`-bre cajo. Jo lajee` guíng` Jesús e gø'r' cóo'~ jaléng` i dsea` do, ca'í` i dseamí` do fí' lí` guíng` Jesús jo quier` cóo` sít e a` jmí` jmeafí` e 'mo'` eáang`. 38 Jo mi~ caguié` i dseamí` do tí` lí` guíng` Jesús, jo casí'r` uø`- jnir~, jo canaaíñ` qui'r'. Jo laco' qui'r', jalé' jmí` e í` jminir` do tí' fí' tí` Jesús, jo cóo'~ e jmí` jo canaaíñ` ru'r` tí` dsea` do, jogui cajmiquií'r` tí` dsea` do cóo'~ jñaguir`. Jo mi~ calí` lajo, jo cachu'r` tí` dsea` do, jo casúur` e jmí` jmeafí` e quier` do fí' tí` dsea` do. 39 Jo mi~ cangá` i dsea` fariseo do i catø'- Jesús fí' quiá'r` do jalé' e cajmée` i dseamí` do quiá'- Jesús, joba' canaaíñ` í' dsíir': "Facø'` já'- i fé'` cuaiñ` quiá'- Fidié' i

dseañuⁿ la, joba' nilí[^]bre jóng e[~] jaléⁿ dsee⁻ røøng[`] i dseam[^] i güi['] tñir⁻ na.” ⁴⁰ Joba' Jesús casí^r- i dsea[`] do jo cajíñ[']:-

—Simón, sea[`] coo[`] e 'né⁻ nifí[^]i 'nua[`].

Joba' cañí['] i dsea[`] fariseo i sii[`] Simón do jo cajíñ[']:-

—¿E[~] nifo[^], Tifa[']?

⁴¹ Joba' cajíng[']- Jesús casí^r- reiñ[']:

—Coo[`] née[~] caliséng[`] gáng⁻ dsea[`] i røøng[`] cuu⁻ quiá[']- jaang[`] dseañuⁿ i jmóo[`] ta[~] jmí[']øø[`] cuu⁻. Jo jaaiñ['] do røøiñ['] 'ñiá[`] ciento cutee[`], jo jaang[`]guiñ['] do røøiñ['] jii[']~ cincuenta cutee[`]. ⁴² Jo mi[~] camí['] i dsea[`] do cuu⁻ quiá^r-, jii[']~ jaang[`] i dsea[`] do ja['] ee[`] sea[`] quí^r- quiáiñ[']-. Joba' jo[`] ee[`] camí['] i dsea[`] fií⁻ cuu⁻ do cuu⁻ quiá^r-, jo caláam⁻ i dsea[`] do, jo jo[`] ee[`] caquí^r jii[']~ coo[`] 'ñiá[`]. Féé[']-du 'nua[`] ne[~]du[']: ¿I[~] lajee[~] laji['] huáang⁻ i dsea[`] do eáang[']gui 'neáang[`] i dsea[`] cacuo['] cuu⁻ do?

⁴³ Joba' cañí['] i Simón do jo cajíñ[']:-

—Jnea[~] lín[']n e i dsea[`] i carøøng[`] jmigui[']gui do.

Joba' cañí['] Jesús quiáiñ[']- do jo cajíñ[']:-

—E uii[~], jáb[']- quí[']-, lajob líí['].

⁴⁴ Joba' cajøøng⁻ Jesús i dseam[^] i guing[~] uii[~] tñir⁻ do, jo casí^r- Simón jo cajíñ[']:-

—¿Jøøng[~] i dseam[^] la? Mí[~] ca'úu['] sinúu[^] quí[']-, ja['] cacuo['] jnea[~] jmí['] fa['] e carúu['] tñi['] laco['] tñng['] jneaa[~]aa['] fí['] la; dsu['] i dseam[^] la, dsea[`] i co['] jáab['] la, nicaru[']bre tñi['] cóo['] jmí['] í['] jminir[~] jogui['] nicajmiqui[']r cóo['] jñguir[~]. ⁴⁵ Jogui['] ja['] cachu['] 'nua[`] nii⁻ laco['] tñng['] jneaa[~]aa['] fí['] la mi[~] neeng['] rú[']naa[']; dsu['] i dseam[^] la ja['] mí['] caquiuiñ['] e chu[']r tñi['] laco['] mi[~] ca'úu['] sinúu[^] quí[']-. ⁴⁶ Jogui['] ja['] casúu['] jmí['] jmeafí['] mogui⁻ laco['] tñng['] jneaa[~]aa['] fí['] la; dsu['] i

dseamî la cagüeiñ̄ quier' cōo` sîi' e a~ jmiî` jmeafiî` e 'mo'^ eáang', jō nicasúur- tîi'. 47 Dsu' jnea~ nifiî` i 'nua' e já'- i dseamî la dsíng'- nicarøøiñ` dsee-, dsu' jnea~ nica'ím- baa jalé' e dsee- jō quiá'r-, jōba' dsíng'- jmi'neáaiñ` jnea~ lana; dsu' jaléng'gui i dsea` i líng- e ja` 'ga' lí dsee- røøiñ` e lacō' jnea~ ni'ín- n jalé' e jō, jōba' ja` 'ga' lí jmi'neáaiñ` jnea~ jóng.

48 Jōba' cajíng'- Jesús casí'r- i dseamî do:

—Nica'ím- baa jalé' dsee- quíi'.

49 Jō jaléng' i dsea` i neáang'gui do cōo~ Jesús canaaiñ` sîiñ` lajee` yaaiñ`:

—¿I~ i dseañu' la e íiñ` dsee- quiá'- jaléng' dsea'?

50 Dsu' Jesús casí' guir i dseamî do jō cajíñ'-:

—Jnea~ nica'ín- n jalé' dsee- quíi'- dsuco' jáb'- calín'- jalé' júu^ quíe'-e; jōba' lana guóng' cōo' e guiá- fí quíi'-.

8

Jaléng' dseamî i cajmîcōo' quiá'- Jesús

1 Jō mi~ cangî jō, cangó- Jesús lacōo` fiî` e cōo' cōo'~ jalé' fiî` e pí'^ quiá'- e guiar' jalé' júu^ quiá'- Fidié` e quiá'- jial quie' dsea` do nifi' quiá'- jaléng' dsea'. 2-3 Jō cōo'~ bre jaléng' i dsea` guitúung` do quiá'r-, jogui ngolímbi cajo jaléng' dseamî i nicajmi'leáang- Jesús lí'^ doñí' ee' jmohuí' líiñ', fa' jaléng' i jée' i 'líng' quiá'- lamí~ jéeng'gui. Jō jee~ jō quíeeng` jaang` dseamî i sii` Yá^ i seeng` fí Magdala i ca'uóøng` guiáng- i 'líng'^ quiá'-; jō jaang'gui dseamî i sii` Sihuoo- i líng' oo~ jaang` dseañu' i sii` Chuza i jmóo` ta~ laniing- quiá'- dseata~ Herodes;

jə jaang`gui i sii` Susana, jə f#m`bi jaléng` dseam#
i jiéng`gui i ngolíng` ie` jə, jə jmicóo`r` Jesús cóo`
jalé` e sea` capí` quiá`r`.

*Mi` ca'e` Jesús cóo` júu` já` e lafa' júu` cuento
quiá` mi` bí` dsea` mijú`
(Mt. 13:1-9; Mr. 4:1-9)*

⁴ Jə cóo` jmí` ie` jə, mi` caliñí` jaléng` dsea` jie`
fí` lí` táang` Jesús, jə ca`uøøiñ` cango`néeiñ` dsea`
do; jə dsíng` f#ng` dsea` caseáiñ` ie` jə, jəba` ca'e`
Jesús jaléng` i dsea` do cóo` júu` já` e lafa' júu`
cuento jə casí`r` dsea` do lala:

⁵ —Jaang` dseañu` cangór` cangobíir` mijú`
quiá`r` fí` lí` nicajír`. Jə mi` cabír` e mijú` do, sea`
e cajiá` lí` ng#ng` fí`. Jə mi` cang#ng` jaléng` dsea`,
caso`øm`bre jalé` e mijú` do, jə e l#ng`gui cagó` tá`
cajo. ⁶ Dsu` sea`bi e cajiá` ni` cuu` lí` ja` leáang`
guóo` néé; jəba` mi` ca`iáang`, dsifib` caliquiá` có`
ja` sea` lí` nisó` jmó` quiá` lí` güí`, jəba` ca`ím`
cajo. ⁷ Jogui sea`bi e mijú` do e cajiá` jee` mijú`
'matóo'; jə mi` ca`iáang` e mijú` do, jéeng`gui e mijú`
'matóo' do cacuáng` jə ca`ím` e mijú` e cabí` i dsea`
do jee` e mijú` 'matóo' do. ⁸ Dsu` seab` e mijú` do e
cajiá` lí` jlo` uø` jə mi` cacuáng` jə jlob` cacuø`
sea` e cacuø` laji` cien m#` lacam#` mijú`.

Jə mi` calí` fé` Jesús jalé` e júu` na, jə casí` guir
jaléng` i dsea` do, jə café`r` laco` ninú` i dsea` do
røø` jə cajíñ`:

—lí` 'nú` sea` loguá`na', núu`na` jalé` júu` quié`e.

*E uing` e ca'e` Jesús jalé` júu` já` e lafa' júu`
cuento
(Mt. 13:10-17; Mr. 4:10-12)*

⁹ Jo mi~ cangî jo, jo cajmingî i dsea` guitúung` do cajmingi`r Jesús e` guóng` e júu` e ca`er` do. ¹⁰ Joba' cajíng`- Jesús casí`r- i dsea` guitúung` do:

—Quiá!- Fidié` nicangíng` 'nú` e ngáng`na' jalé` e ja` mí` ñí` dsea` jéeng`gui, e dsea` î` iĩñ` cár` nifí` quiá!- lajaang` lajaang` dsea` jmigüi`. Dsa' jnea` ée`-e jaléng` i dsea` na cóo`~ júu` já!- e lafa' júu` cuento e laco' mi~ ninír`, nijér` lafa' ja` ee` cangá`bre, jogui mi~ ninúr`, nijér` lafa' ja` ee` canúu`bre cajo.

Mi~ cajmée` Jesús júu` e` guóng` e júu` quiá!- i dsea` bí` mijú` do

(Mt. 13:18-23; Mr. 4:13-20)

¹¹ Joba' cajíng`- Jesús casí`r- i dsea` guitúung` do:

—Lalab guóng` e júu` e ca`é`e na 'micú!-: E mijú` do líí` lafa' júu` quiá!- Fidié`. ¹² Jo e cajiá!` lí` ngíng` fí` do líí` lafa' i dsea` i núu` e júu` do, jo dsa' lajmináb` güéeng`- fi~ i 'ling!`, jo dsifí` lajob jmóor` e ja` já!- líng` i dsea` do e júu` jo, jo lajoba' ja` nileáiñ` do jee` jalé` dsee` quiá!`r-. ¹³ Jogui e mijú` e cajiá!` fí` ni` cuu` do líí` lafa' jaléng` dsea` i iáang` dsíí` íng` jalé` e júu` jo, jo dsa' ja` huøø` ee` e já!- líiñ`, co' mi~ huíng` dsijéé` quiá!`r- uí!` e já!- líiñ` júu` quiá!`- Fidié`, joba' dsifí` lajob tá`tur e júu` jo, jo i dsea` í`bing` i líng` la líí` e mijú` e ja` 'leáang`- jmó` sea` do. ¹⁴ Jo e mijú` e cajiá!` jee` mijú` 'matóo` do líí` lafa' jaléng` dsea` i núu` júu` quiá!`- Fidié` jo ca`ím!`bre e júu` jo, jo dsa' laco' ngóo` jmíng~, eáang`gui guiing` dsíir` jalé` fí`í` dsíí` sea` quiá!`r- jogui quiá!`- jalé` ta` lí` cuu` jogui cajo e quiá!`- jial nijmi`iáang` dsíir` cóo`~ jalé` e sea` fí` jmigüi`. Jo co' lajob líiñ`, joba' ja` cuø` fí` quiá!`r- fa' e nidsicuáng`gui e júu` quiá!`-

Fidiéẽ e já' lãĩĩ` do. ¹⁵ Jõgui e mijú' e cajiá' lĩ jlo' uó` do lí' lafa' jaléng' dsea` ì dsíng' iáang` dsí' íĩ' júu` quiá'- Fidiéẽ, jõgui eáam' jmóor` núu'r` jalé' júu` quiá'- dsea` do, cõ' ja` litúng` dsíir' jalé' e jõ. Jõ ì dsea` íbing' ì teáang` teá` cõõ' júu` quiá'- Dsea` Jmáang`, jõgui eáam' dsicuáng` e júu` jõ quiá'r`.

*Cõõ` júu` já' e lafa' júu` cuento quiá'- jial mĩ`
jmijneá` dsea` jĩ`
(Mr. 4:21-25)*

¹⁶ Jõ mĩ` calí` e fé' Jesús júu` quiá'- mĩ` bí` dsea` mijú', jõ cajíng' guir casí'r` jaléng' ì dsea` do:

—Jí' jaang` dsea` ja` 'gui'r` cajlí'` quĩ` e mĩ` nicoo` jõ nijlĩr` õ'gui nisí'r` cõõ` lĩ` cõõng'`, cõ' iĩĩ` e jneá' fĩ' la'úng` sináú` quiá'-bre. Cõ' 'né` niquidsir' e quĩ` do cõõ` lĩ` ñĩ' e laco' jneá' mĩ` dsitáaiĩ', jõ lajõba' jné' jaléng' dsea` ì dsitáang' e sináú` do. ¹⁷ Jõ lajõb` lí' cõõ' júu` quié`-e: Ja` sea` jalé' júu` quié`-e fa' e si'ma` e ja` niní` dsea`, õ'gui sea` jalé' júu` quié`-e fa' e ja` tõõ` jmĩĩ` niliĩ' dsea` jaléiĩ'. ¹⁸ Jõba' fĩ' jneá' 'nú', núu`-na' júu` quié`-e; cõ' jaléng' dsea` ì nináú' júu` quié`-e, jmiguiá'gui niĩiĩ` e ngáiĩ', jõ dsu' jaléng' dsea` ì ja` núu' júu` quié`-e, jõba' ni'ím` lajĩ' e ni'ĩ' dsíir' e ngáiĩ' do.

*Mĩ` cajá` niquiá'` Jesús cõõ'` jaléng'` rúĩĩ'`
(Mt. 12:46-50; Mr. 3:31-35)*

¹⁹ Jõ lajee` táang` Jesús e e'r' jaléng' ì dsea` do, caguié` niquiár` cõõ'` jaléng'` rúĩĩ' e 'náĩĩ' dsea` do. Jõ cõ' ja` cuõõng`gui fa' e nidsiquiéiĩ' do tí' quiá'- lĩ` sing' dsea` do, cõ' dsíng' fĩng' dsea`, ²⁰ jõba' jaang` ì dsea` do cajmea'r' Jesús júu` jõ casí'r` dsea` do jõ cajíĩ' lala:

—Na nicagüéng⁻ niquíi'[^] cóo'[~]gui jaléng'[^] rún'[^] e 'náiñ'[^] 'n^u, j_o nab teáaiñ[^] caluu'[^] lana.

²¹ Dsu'[^] Jesús cañiir[^] j_o casí'r⁻ i dsea[^] do j_o cajíñ'⁻:

—Jaléng'[^] dsea[^] i núu[^] júu[^] quiá'⁻ Fidié[~] j_o jmitir[~] e júu[^] j_o, jaléng'[^] i dsea[^] í'bing'[^] líng'[^] niquié[^] e j_ogui rún'[^] n.

Mi[~] cajmée[^] Jesús e ca'uáang⁻ e í' guí[^] j_ogui ca'uáang⁻ e róo⁻ jmⁱⁱ

(Mt. 8:23-27; Mr. 4:35-41)

²² J_o mi[~] cangí[^] j_o, lajee[~] e táang[^] Jesús fí' Galilea, j_o cóo[^] jmⁱⁱ ca'ír⁻ fí' dsí' cóo[^] móo' cóo'[~] i dsea[^] guitúung[^] quiá'r⁻ do j_o casí'⁻ reiñ':

—Má⁻ aa' lí[^] 'ngóo'[~] cataang[^] e guíe[^] la.

J_o dsifí' ladob cangolíñ⁻ fí' lí[~] e' Jesús. ²³ J_o lajee[~] ngolíñ⁻ ni[~] jmⁱⁱ j_o caquiam'⁻ Jesús. J_o lajee[~] güiing[^] dsea[^] do, j_o dsíng'⁻ canaang[^] í' guí[^], j_o mífíng[^] canaang[^] dsi'a[~] jmⁱⁱ dsí' e móo' do, j_o cafóm'[^] i dsea[^] guitúung[^] do, có' f^o' nidsi'am'[^] e móo' lí[~] teáaiñ'[~] do. ²⁴ J_oba' cangoñiñ[^] Jesús j_o cajíñ'⁻ casí'r⁻ dsea[^] do:

—¡Tifa'! ¡Tifa', nicanaang[^] dsi'am'[^] baa'!

J_o caróo⁻ Jesús, j_o caqui^u'r ta[~] e guí[^] do cóo'[~] e jmⁱⁱ do. J_o dsifí' ladob cahuíng'[^] e í' guí[^] j_o cahuím'[^] e róo⁻ jmⁱⁱ cajo, j_o tiib⁻ ca'í'. ²⁵ J_o casí'⁻ Jesús i dsea[^] do j_o cajíñ'⁻ lala:

—¿Jna[~] gui e fól'na' e já'⁻ líng'na' júu[^] quié⁻ e?

Dsu'[^] i dsea[^] guitúung[^] do dsíng'⁻ cafóíñ'[^] j_o can-gogá' dsír' j_o cajmingi'[^] rúíñ':

—¿I[~] i dseañ^u' la e qui^u'r ta[~] j_o núu[^] jalé[^] guí cóo'[^] jalé[^] jmⁱⁱ júu[^] quiá'r⁻?

Jaang` dseañu` i seeng` fí Gadara i nijéé` i `ling` quiá`-

(Mt. 8:28-34; Mr. 5:1-20)

26 Jo mi~ caguié- Jesús cóo!~ dseá` quiá`r- fí lí- 'ngóo!~ cataang` e guiéé` do, jo caguiliñ- fí coo` fiñ` lí~ siñ` Gadara. 27 Jo mi~ cajgáñ- e móo` do, jo cangoquiéeng` jaang` dseañu` i niseeng` e fiñ` do i nijéé` i fíng` i `ling`^ quiá`- lajji!~ malib~jiu eáang`. Jo ja` ee` si`r^ qui`r, o`gui guiñ~ fí` quiá`r-, jo jji!~ fí` lí~ áang` 'lib~ güññ`. 28 Jo mi~ cangáng- i dseá` do Jesús, jo cangoquiéeiñ` fí` quini` dseá` do jo casí`r uó- jnir~, jo canaaiñ` fé`r` teá` jo sí`r` dseá` do lala:

—¡Jesús, Jóo` dseá` guing~ ñifi-, ja` jmiguín!` jnea!`! jo mñi~i` 'nu` jmí`ee` fa` nijiéé` o` e ja` nijmeáan!~ jnea!` ga`!

29 Jo i `ling`^ i jéé` quiá`- i dseá` do café`r` lado, co!` Jesús nicanaaiñ` quiu`r` ta~ i `ling`^ do e nitiúuiñ- do i dseá` do. Co!` lamí~ jéeng`gui, eáang` jmiguíu` néé!~ nicajméé` i `ling`^ i jéé` quiá`- i dseañu` do e ga` eáang`; jo nañi` fa!` jaléng` dseá` nicasaiñ- i dseañu`- do, jo nica!ñu`r` guoo` tñiñ- cóo!~ ñi` cadena e laco!` jo` nijméiñ- ga`, dsu!` dsifi` ladob fiñ` do jalé` ñi`^ cadena, jo jmóo` i `ling`^ do e dséé` i dseañu` do fí` lí~ ja` ii` dseá` seeng`. 30 Jo lalab cajíng!- Jesús cajmingí!-reiñ`:

—¿Jial sii`?

Joba!` cañi` i `ling`^ i jéé` quiá`- i dseañu` do:

—Legióm sii`-naa!`.

Jo cajíng!- i `ling`^ do lado, co!` dsíng!- fñiñ` jéer` quiá`- i dseá` do. 31 Jo jaléng` i `ling`^ do camí`r` Jesús e ja` niquiá!- dseá` do ta~ e nidsiliñ` do fí` lí~ `li`. 32 Jo co!` dsíng!- fíng` cú` nitaang~ne!

gø're' nuu` fí dse` cõõ` mó` quiá`- li` táang` Jesús, joba' camí` ì 'ling`^ do jmi'ee` camí'r` dsea` do e nicuór`- fí e nidsitáaiñ`~ do dsí` jaléng` ì cú` do. Joba' cacuø` Jesús jaléng` ì 'ling`^ do fí lajõ. ³³ Jo dsifí ladob catiúung`- jaléng` ì 'ling`^ do ì dsea` do, jõ cangotáaiñ`~ dsí` jaléng` ì cú` do. Jo mi` cangotáang`~ ì 'ling`^ do fí dsí` jaléng` ì jó` do, jõ dsifí ladob cacuí`re', jõ cabíng`- yaang`ne' fí 'ni` jiáa', jõ cajiúng`ne' fí dsí` jmí, jõ cajgó`bre' jmí` jóng.

³⁴ Jo mi` cangá`- jaléng` ì dsea` ì jmóo` í` ì cú` do lajii`~ e calí`- do, dsifí ladob cacuí`r` cangolíñ` fí fií, jõ caguiar` júu` lajii`~ e calí`- cõõ` ì cú` do, jõgui cajmea`r` júu` jaléng` dsea` ì cajiñ`` guiá`^ fí cõõ`~ fí jee` mó` laco` ngolíñ`. ³⁵ Jo mi` caliñí` jaléng` ì dsea` seeng` fí jõ jalé` e calí`- e jmí` jõ, jõ dsifí ladob cangolíñ` fí li` táang` Jesús. Jo mi` caguilíñ`- fí li` táang` dsea` do, jõ cangár`- e dob niguiing`~ ì dsea` ì lamí` jée` ì 'ling`^ quiá`- do colíng`~ cõõ`~ Jesús, jõ niqúi`bre si`r`^, jõ jõ` ee` líiñ`` jii`~ cõõ`. Jo dsíng`- cafõng` jaléng` ì dsea` ì caguilíng`- do. ³⁶ Jo jaléng` dsea` ì cangá`- jial ca`láang`- ì dseañu` ì lamí` jée` ì 'ling`^ quiá`- do, dsifí ladob caguiar` júu` jial calí`. ³⁷ Jo mi` calí`- lado, jaléng` ì dsea` ì seeng` fí Gadara do camí`r` jmi'ee` Jesús e nigüi`ñb` dsea` do e fí li` táaiñ` do, cõ` dsíng`- 'gó` jaléng` ì dsea` do. Jo mi` cajíng`- ì dsea` do lado, jõ dsifí ladob ca`í`-tu Jesús dsí` e móo` do, jõ ca`í`r`- fí e nidsém`-tur fí Galilea. ³⁸ Jo ì dseañu` ì lamí` jée` ì 'ling`^ quiá`- do camí`r` Jesús jmi'ee` e nidsér`- cõõ`~ dsea` do, dsu` ja` cacuø` Jesús fí lajõ. Jo caquiur` ta` ì dseañu` do e cangáiñ`- do fí quiá`r`-, jõ casí`-reiñ` jõ cajñi`-:

39 —Guǝng' fí' quíi'⁻, jǝ gũiguiã~ júu^ jalé'⁻ e guiá⁻ e nicajmée Fidiée~ cóo'⁻ 'nɤ.

Jǝ cangám'⁻ ì dseañu' do, jǝ cajmiti~bre jalé' ta~ e caquiã' Jesús, jǝ caguiã'bre júu^ jalé'⁻ e guiá⁻ e cajmée` dseã` do cóo'r~.

Mi~ cajmi'leáang⁻ Jesús jóo' Jairo
(Mt. 9:18-26; Mr. 5:21-43)

40 Jǝ mi~ caguiéng'⁻ tu Jesús fí' Galilea, jǝ dsíng'⁻ fíng' dseã` ì niteáang⁻ gũijée~ quiá'r⁻. Jǝ dsíng'⁻ iáang` dsíí jaléng'⁻ ì dseã` do dsu' caguiéng'⁻ tu Jesús fí' do. 41 Jǝ lajee~ jǝ, caguié⁻ jaang` dseañu' ì sii` Jairo ì líng' fii~ féng' quiá'⁻ guá'⁻ quiá'⁻ dseã` Israel. Jǝ mi~ caguiér⁻ fí' quini~ Jesús, jǝ casí'r` uó⁻ jnir~ fí' quini~ dseã` do jǝ camír' jmi'ee~ fa' e nidsé⁻ dseã` do fí' quiá'r⁻, cǝ' seeng` camíng'~ simí^ jiuung~ quiá'r⁻ ì níngóo' guitu` jii` jǝ niráaiñ' do dsée'r` eáang` e dseáng'⁻ tí lí~ nijúum~bre. 42 Jǝ lajee~ ngóo' Jesús fí' quiá'⁻ Jairo, dsíng'⁻ fíng' dseã` ngolíiñ⁻, jǝ dsíng'⁻ sicúung'⁻ Jesús jee~ jaléng'⁻ ì dseã` do.

43 Jǝ jee~ jaléng'⁻ ì dseã` ì jée' quiá'⁻ Jesús níngóo' jaang` dseamí^ ì nilíng' jmohuí^ e tuuiñ` lajii'⁻ níngóo' mi~ guitu` jii`. Jǝ lamí` jéeng` dsíng'⁻ nica'íiñ⁻ cuu⁻ quiá'r⁻ cóo'⁻ jaléng'⁻ tímí^, jǝ jii'⁻ jaang` ja` ii` mí cali' fa' ì nicajmi'leáang⁻ ír`. 44 Jǝ guidseam^ calí'⁻ ì dseamí^ do cangíiñ` jee~ jaléng'⁻ ì dseã` do, jǝ cangoquiéeiñ' fí' lí' caluu~ Jesús jǝ catíiñ⁻ capí'^ 'ni' sî'^ dseã` do, jǝ dsifí' ladob ca'láaiñ⁻, jǝ jii'⁻ capí'^ jmí' jǝ e tuuiñ` jóng. 45 Jǝ Jesús dsifí' ladob cajmingí'r⁻ jaléng'⁻ ì dseã` ì cóo'r` do jǝ cajíiñ'⁻:

—¿I~ ì catíng⁻ capí'^ sí'i'?

Jò cò' jaléng' ì dsea` do cañír` e jíí~ jaang` ja` ìi cajmée` lajò, jòba' cañíi` Tù` Simón:

—Tifa', ¿jiali' jmingá' ì catúng` capí' sí'? Cò' jalém' dsea` 'leng' rúin' fí' la fí' na.

46 Jòba' cañíi` tu Jesús jò cajíin`:

—Lím`bing' ì cagüi' sí'ì, cò' 'ñiá'a calilí`i e lím`bing' ì nicajmi`leáan`n cóo` e 'gøn`n.

47 Jò ì dseam` do, mi` canúur` e calilíb'` Jesús e líng` ì catúng` sí'r`, jòba' dsíng'` cafóin'` jò dsíng'` jléein` cangór` fí' quini` Jesús, jò casí'r` uó` jnir` fí' quini` dsea` do. Jòba' cajméer` júu` fí' quini` jaléng' ì dsea` do jiali'` cagüi'r` sí` Jesús, jò jial ca'láaiin` ladsifí' lado e jmohuí' e lamí` líiin'.

48 Jòba' cajíng'` Jesús casí'r` ì dseam` do:

—Jóo`o, uíi` e jáb'` calín'` júu` quié`e, jòba' nica'láam`ba' lajii` jmohuí' e lamí` lin'. Jòba' lana guóng'` cóo` e guiá` fí' quíi`.

49 Jò laco' gui'nam`bì síng` Jesús cóo` ì dseam` do, mi` caguié` jaang` dsea` sínúu` quiá'` Jairo e quier` júu` cuaiin` quiá'` ì simí` do, jò lalab casí'r` dsea` do:

—Jò`taan'` ì tifa'` na e dsér` fí' quíi`, cò' nicajúm` simí` jiuung` quíi`.

50 Dsü' mi` canúu` Jesús lado, dsifí' ladob casí'r` Jairo:

—Ja` fòøn` jíi` còo`, lico'` 'né` e jáb'` nilíin` e quíi`baa jmí` nijmee` e e ni'leáng` ì simí` jiuung` quíi`, jò lajob nilí'.

Jò mi` cajíng'` Jesús lado, dsifib'` cangór` fí' quiá'` Jairo.

51 Jò mi` caguié` Jesús fí' quiá'` dsea` do, jò ja` cacuør' fí' fa' e cangotáang'` dsea` jiéng'` gui, jíi` Tù` Simón cóo` Tiáa` cóo` Juan cóo` sejmií` ì simí`

jiuung~ do, jíi~ íbing' i cangíng` fí e cangotáang` fí dsíi` sinúu^ e li~ ráang` i 'lii~ do. ⁵² Jo jaléng` i dsea` sinúu^ quiá'- Jairo dsíng'- qui'r` jogui dsíng'- jiuung~ dsíir' dsu' e nicajúng~ i jiuung~ simí^ do. Joba' cajíng'- Jesús casí'r- jaléng` i dsea` do:

—Ja` qui`na', co' ja` sijúung^ i jiuung~ na co' lico' güim`bre.

⁵³ Dsu' jaléng` i dsea` do lí^ cangím`bre Jesús mi~ cajíng'- dsea` do lado, co' ñi`bre e nicajúm~ i jiuung~ do. ⁵⁴ Jo lajee~ e jmóo` i dsea` do lajo, jo Jesús catíiñ~ guoo` i jiuung~ do, jo cató'-reíñ' la'úung` jo casí'-reíñ' lala:

—¡Ráan'- na, Mí!

⁵⁵ Jo mi~ cajíng'- Jesús lado, dsifí ladob cají'tu i simí^ do jo caróo`-bre. Jo dsifib' caquiua' Jesús ta~ e cangíiñ` do e cagó'r'. ⁵⁶ Jo mi~ cangá~ sejmií` i jiuung~ do e cajíb'tuiñ` do, joba' dsíng'- cangogá` dsíiñ'; dsu' Jesús caquiua'r` ta~ sejmií` i simí^ do e ja` ií` nisíiñ` do jíi~ jaang` lajíi~ e cajméer` e sinúu^ do ie~ jmíi~ jo.

9

Mi~ casíng` Jesús dsea` guitúung` quiá'r- e niguiáañ'- do júu^ quiá'- Fidiée~

(Mt. 10:5-15; Mr. 6:7-13)

¹⁻² Jo mi~ cangí jo, caseáng` Jesús jaléng` dsea` guitúung` quiá'r-, jo caquiua'reíñ' ta~ e nidsiguiáañiñ~ do júu^ quiá'- jial iing~ Fidiée~ e nicár` nifí quiá'- dsea`, jogui cacuø'reíñ' do bí e quíiñ~ do jmíi~ e ni'uóíiñ~ jaléng` i 'líng` i jée` quiá'- dsea`, jogui e nijmilleáañiñ'- do jaléng` dsea` dsée' i líng` doñí ee` jmohuí. ³ Jo lalab casí'- Jesús i dsea` guitúung` do quiá'r- jo cajíñ'-:

—Nigüilíng-na' jo ja` ee` 'né- cá^na' jii~ coo` quiá^- guiá^` fí: ja` 'né- cá^na' 'ma'u` o'gui nosúu` o'gui íi` o'gui ñinée-. Jogui jii~ sí'na' e quií~ba' nicá^na', co' ja` 'né- fa' cá^na' tú- neáng' sí'na'.
 4 Jo mi~ niguilíng-na' fí coo` fii, jo 'né- ni'no^na' coo` 'núu` lí~ nijá^na' carta~ taang~na' e fii jo, jo ja` jmísing^na' lí~ já^na'. 5 Jo jié`go fii lí~ niguilíng-na' lí~ ja` ni'íng^d sea` 'nú', joba' uøøngna' e fii jo, jo mi~ niteáng-na' 'ni' e fii do, bó'na' 'lee' e too~ tí~na' laco' cuø` lí~ e ja` ca'ée` i dsea` do guiá- cóo~` 'nú'.

Jo jalé` e ta~ na caquiá' Jesús quiá^- jaléng` i dsea` guitúung` do.

6 Jo ca'uøøm` i dsea` guitúung` do mi~ cangoyúung~ e ca'íñ` jalé` ta~ nijmér-, jo cangolímbre fí jalé` fii e guiar` jalé` júu^ quiá^- Fidié~ quiá^- jial laang` dsea` jee~ jalé` dsee- quiá'r-, jogui jmi'leáam~bir cajo jaléng` dsea` i líng` doñi` ee` jmohuí'.

Mi~ cangogá`dsí' Herodes jial fé` dsea` uii~ quiá^- Jesús

(Mt. 14:1-12; Mr. 6:14-29)

7-8 Jo ie~ jo nicanú- dseata~ Herodes jalé` e síng` dsea` quiá^- jalé` e guiá- e jmóo` Jesús, jo jii~ ja` ñi` i dseata~ do e~ nijmér-, co' seeng` dsea` dsiçoor` júu^ e nicají'tu jaang` lajee~ lajaléng` dsea` i café` cuaiñ~ quiá^- Fidié~ mali~gui eáang', jogui seeng` dsea` fé'r` e nicajném-tu Líí, jaang` dsea` i café` cuaiñ~ quiá^- Fidié~ mali'gui eáang' cajo, dsu' seem`bi dsea` i fé` e Juan i seáang` dsea` jmii'bing` i nicají'tu calé` catú-. 9 Jo mi~ canú- i dseata~ do e fé` dsea` e nicají'b'tu i Juan i seáang` dsea` jmii` do, joba' eáam` cangogá` dsír' jo cajíñ'-:

—Jneab~ dsea` caquiá'~u ta~ e cahuí' moluu~ i Juan do. Jo çí~ i éeng` jaléng' dsea` i ngí' jmóo` jalé' e guiá~ jogui quá'r~ jmí~ e jmóor` lí' doñí' ee'?

Joba' lajii'~ ie~ job cajmi'úung` dseata~ Herodes e 'nó'r' jial niniñ~ Jesús.

Mí~ cahéng' Jesús 'ñiá` mil dseañh'

(Mt. 14:13-21; Mr. 6:30-44; Jn. 6:1-14)

¹⁰ Jo mi~ calicóng`gui lajo, caguiliim`tu i dsea` guitúung` do e cangocóor` júu` fí' quini` Jesús jalé' e guiá~ e cajméer` lacoo` fí' lí~ cangoliñ~. Jo mi~ calí` féng'` rúin', jo cajém` Jesús i dsea` guitúung` do fí' coo` lí~ ja` ii` 'ga' lí' dsea` ngí', quiá'~ coo` fí' lí~ sií` Betsaida. ¹¹ Jo mi~ caliñí' jaléng'` i dsea` i seeng` e fí' jo jie~ fí' lí~ nitáang` Jesús, joba' fíim' dsea` cangoliñ` fí' lí~ táang` dsea` do. Jo Jesús ca'im`bre jaléng'` i dsea` do mi~ caguiliñ~, jo canaañ` e'r` júu` quiá'~ jial iing~ Fidié~ nicár` nifí' quiá'~ jaléng'` dsea`, jogui cajmi'leáam` bir jaléng'` dsea` dsée'~ i quiéng` jee~ i dsea` do cajo.

¹² Jo mi~ ningóo' ca'lóo~ e jmí~ jo, cangoquiéng` i dsea` guitúung` do fí' lí~ sing'` Jesús jo casí'r~ dsea` do jo cajíñ'~:

—I' júu` jogui sí'~ jaléng'` i dsea` na güiguiñ` jo güiguijméer~ quijí~ lí~ nijér~ cóo'~gui jalé' e nidó'r~ jié' fí' lí~ lí'r` e téé~ 'núu', co' fí' lí~ taang`naa' la ja` ee' sea` e niquiee~naa' cóo'r~.

¹³ Joba' cañí' Jesús casí'r~ i dsea` guitúung` do:

—'Núb' 'né~ cuó`na' e nidó'~ jaléng'` i dsea` la.

Jo cañí'tu i dsea` guitúung` do:

—Jial nilí'gui jo? Co' jii'~ 'ñiá` iñí'`ba' sea` cóo'~gui gáng~ 'ñu, jo fing ja` 'né~ dsé`baa' e dsileá`naa' e nidó'~ jaléng'` i dsea` na.

14 Co' dsíng' fíng' jaléng' i dsea` do; tíbre la 'ñiá mil jíi~ dseañu" jo ja íng^ jaléng' dseam̃ o'gui jaléng" jiuung~ cajo.

Dsu' Jesús casí'r- jaléng' i dsea` quiá'r- do:

—Síi~na' jaléng' dsea` güigüear` tá'- có` nibøø~ tá'- cincuenta dsea`.

15 Jo lajob cajmée` i dsea` guitúung` do, jo caguáb` i dsea` do laco' ta~ caquiá" Jesús. 16 Jo mi~ calí- caguá` jaléng' i dsea` do tá'- có` nibøø~ lacúng' lajíng` lí~ sing' Jesús, joba' catíng- dsea` do lajì 'ñiá e ñií^ do cóo~gui lajì huáang- i 'ñu` do, jo ca-jóør- fí yá^ jmigüí, jo lajoba' cacuø'r' gui'máang' Fidiée` quiá'- e do. Jo mi~ calí- jo, cajmээр` jmá'-jiu e do jee~ jaléng' i dsea` guitúung` do, joba' íguib cajmée` guiée^ jee~ lajaléng' i dsea` fíng' do. 17 Jo jalém' i dsea` do cagó'r' car` calitaañ~ guiá-. Jo mi~ calí- gó'r' lajiiñ` do, caseám- bi guitu` 'matá'gui e røøng` téé~ 'ná^ ñií^ cóo~gui 'náng' i 'ñu` do.

*Mi~ cajíng'- Tí^ Simón e Jesús líiñ' Dsea` Jmáang`
(Mt. 16:13-19; Mr. 8:27-29)*

18 Jo mi~ cangí jo, cóo` jmii~ taang~ Jesús e féiñ' Fidiée~, jo cóo' bre i dsea` guitúung` quiá'r- do. Jo lajee` jo cajmingí'- Jesús jaléng' i dsea` quiá'r- do jo cajíñ'-:

—¿I~ jnea~ fé" jaléng' dsea`?

19 Joba' cañi' jaléng' i dsea` guitúung` do:

—Seeng` dsea` dsicueáaiñ~ 'nu` cóo~ i Juan i seáng` dsea` jmii` do, jo seeng'gui dsea` dsicueáaiñ~ 'nu` cóo~ Líi^ i café" cuaiñ~ quiá'- Fidiée` malii~gui eáang', jogui seem`bi dsea` dsicueáaiñ~ 'nu` e lin' jaang'gui i nicafé" cuaiñ~ quiá'- Fidiée` jogui e nicají" tur lana.

20 Joba' cajmingi'tu Jesús i dsea` guitúung` do jo cajíñ'⁻:

—Jogui 'ná', ¿i` fó'na' e lín'n?

Joba' cañíi` Tú` Simón quiá'⁻ Jesús:

—'Nub` dsea` i líng` Dsea` Jmáang` i casíng` Fidié` dsea` guing` ñifí` cuaiñ` quiá'r`.

21 Dsu! Jesús ca'ír` 'goo` quiá'⁻ jaléng` i dsea` guitúung` do e ja` ii` nisíñ' do jíi` jaang` e íbre líiñ` Dsea` Jmáang`.

*Mi` cajmée` Jesús júu` e tí` nijngáng`⁻ dsea` ír`
(Mt. 16:20-28; Mr. 8:30-9 :1)*

22 Jo mi` calí` cajíñ'⁻ lado, jo casí` guir i dsea` guitúung` do lala:

—E jáb' e jnea` lín'n i dsea` i cajá` fí` ñifí` e lín'n jaang` dsea` jmigüi. Jo dsíng'⁻ 'né` nimoo`o iihuí` e eáang`, co' jaléng` dsea` cóøng` quiá'⁻ dsea` góo`o dsea` Israel nilí` 'ní` níim`bre jnea~, jogui lajob nijmé` jaléng` dsea` quie` nifí` quiá'⁻ jaléng` jmidsea` quí`-ii' cóo'⁻gui jaléng` tifa' quiá'⁻ júu` quiu' ta` quí`-ii'. Jo jaléng` í'bing' i nijngáng`⁻ jnea~; jo dsu! mi` nití` 'ní` jmii` lajo, nijíb'túu calé` catú`.

23 Jo mi` calí` jo, cangób`tur cóo'⁻ i dsea` guitúung` do fí` lí` teáang` jaléng` i dsea` fíng` do jo casí`-reiñ':

—Song ii` dsea` iing` ni'uíng` dsea` quie`-e, joba' güitár` jalé` e lí` dsíir` 'ña'r', jogui lacoo` jmii` güiseaiñ` lafa' crúu` quiá'r` e laco' cuø` lí` e guía` dsíir` e nidsingíiñ` jalé` e huíng` uíi` e líiñ` dsea` quie`-e, jo lajoguiba' ningír` cóo'⁻ jnea` jóng. 24 Co' ii` dsea` i í` dsíir` e lí`bre nileáng` 'ña'r` jee` jalé` dsee` quiá'r`, joba' i dsea` í` conguiab` nibíiñ` fí` lí` 'lí'; jo dsu! ii` dsea` nijúuiñ` uíi` e líiñ` dsea` quie`-e

osi uí' e ni'r' júu^ quiá' jial niliseeng` dsea` cøøng` còo' Fidié` jòba' i dsea` í nitíim` bre fí quini` Fidié` jóng. ²⁵ Jo ja` ee` ta` íng` quiá' jaang` dsea` e silí'r` jalé` e sea` fí jmiǵüí song ja` gui cuíiñ` jnea` , co' fí lí` 'lib'^ nidséiñ` mi` nití` í' e nijúuiñ` , jo doguib lí` ninír` iihuí` lata` . ²⁶ Jogui song i` i` 'gó' nifé' e líiñ` dsea` quié` e, osi i' líiñ` e nifé'r` e já' líiñ` júu^ quié` e é, jòba' lajòb nijmee` jnea` còo' i dsea` í cajo, jnea` dsea` gáa'a fí ñifí` e lín'n jaang` dsea` jmiǵüí; co' lajòb nijmee` e mi` nigáa'túu fí jmiǵüí e niniing` 'gøiñ' quiá' Tiquié` e Fidié` jogui còo' jaléng` ángeles i` güeang`^ cajo. ²⁷ E já' e fí` i` 'nú' e i` líng` lajee` i dsea` i teáng` la ja` mi` júuiñ` cartí` ninír` jial lí' mi` nicá` Fidié` nifí` quiá' lajaang` lajaang` dsea` jmiǵüí` .

Jo jalé' e júu^ na cajíng' Jesús casí'r- jaléng' i dsea` do ie` jo.

*Mi` calisíng` jial jnéeng` Jesús
(Mt. 17:1-8; Mr. 9:2-8)*

²⁸ Jo mi` cangí` jñiá` jmi` e cajíng' Jesús lajo, jo cajgóor` fí còo` yá'^ mó' e cangoféeiñ` Fidié` , jo còo' bre Tú` Simón còo' Tiáa` jogui Juan. ²⁹ Jo lajee` táang` Jesús e féiñ' Fidié` , tá' jiu ladob jnéeng` calisíng` jial jnéeng` nir` jogui calisíng` sí'r` cajo, jo cajnéng` e tee` jlo'^ lafa' joo, jogui calijíñ` laco' jing` iee` . ³⁰⁻³¹ Jo lajee` jo cajnéng` gáng` dseañu` i síng` còo'r` , jo ni` Moib` do còo' gui ni` Líi^ , jo laji` huáaiñ` do líiñ` dsea` i café` cuaiñ` quiá' Fidié` malí` gui eáng` , jo jlob'^ jing` i dseañu` do cajo, jo síiñ` quiá' jalé' iihuí` e nicá` Jesús fí Jerusalén mi` nití` í' e nijngáng' dsea` ír` . ³² Jo dsu' laji` gaang` i dsea` quiá' Jesús i jéeiñ` do dsíng' cajá` e jaligüíñ`

dsu' caje'bre e sijnée` dsír, joba' cangár- e jlo'` jing` Jesús jō la quie`gui i dsea` gáng- do jiiñ` cajo. ³³ Jō mi~ cangá- Tú` Simón e catang` fí i dsea` gáng- i teáng- cóo` Jesús do, joba' dsifí lala casí'r- Jesús jō cajiñ`-:

—Tifa', jdsing`- juguiá- dsu' taang~naa' cóo` i dsea` na fí' la! Fa' na nijmée'~naa' 'ní' 'núu`jiu cóo` má' 'ma~, cóo` quíi'- jogui cóo` quía'- Moi~ jogui cóo` quía'- Líi` cajo.

Dsu' jii` ja` calilí` Tú` Simón e café'r` lado. ³⁴ Jō lajee` gui'nang` fé'bir mi~ cajgó- cabøø~ jní', jō caquiñ`- lajee` teáaiñ- fí' e yá'` mó' do, jō dsing`- cafóng` Tú` Simón cóo` Tiáa~ cóo`gui Juan. ³⁵ Jō lajee` teáaiñ~ jee~ e jní' do, guicaná' cóo` luu~ dsea` fí' yá'` jmigüi` jō guicajing`-:

—I lab Jōo`o i camíng` i 'neáan`n eáang'. Jmee`na' núu`~na' jalé' ta~ quiu'r`.

³⁶ Jō mi~ cangoyúung` e caná' e luu~ dsea` do, cangá- i dsea` gaang` do e jo` jnéeng`-gui Moi` o`gui Líi` fí' do, jō 'ñiab` Jesús sing`gui. Jō mi~ cangí jō, jii` jaang` dsea` ja` ii` cajmea'r` júu` jalé' e cangár- e fí' yá'` mó' do ie~ jmii~ jō.

Mi~ cajmi'leáang` Jesús jaang` siming` i iuung` i 'ling` dsí'

(Mt. 17:14-21; Mr. 9:14-29)

³⁷ Jō mi~ cajneá- cóo`gui jmii~, jō cajgám`-bre e fí' yá'` mó' do. Jō dsing`- fíng` dsea` cajiñ` i ngolíng`- ngo'née` quía'r-. ³⁸ Jō jaang` dseañu` lajee` lajaléng` i dsea` fíng` do catø'r- Jesús e teá eáang` jō cajiñ`-:

—Tifa', ¿já` jmée'` uí` diée~ fa' ñijmee'~ mí' quía'- jōo`o? có' camíng`- siming` labing` i seeng` quie`e;

39 jə jaang` i ʔlingʰ jée' quiá'r-, jə yejɪb- jmóoiñʰ do e dsea` joñiíñ, jə óor` teá` jəguɪ iéngʰ jaléʰ ja` fí mo'oor- lajee` jə, jə dsíngʰ- jmihuhíng`neiñʰ, jə ja` iíñʰ do nitúur-. 40 Jə nicamíí~baa jmí'ee` dsea` quií'- fa' e nijmihuííñ- i ʔlingʰ do, dsu' ja` mí cali'r'.

41 Jəba' lalab casí'- Jesús jaléngʰ i dsea` do jə cajíñ'-:

—jDsíngʰ- ja` já'- líng`na' jnea~, jə jmanɡ'- fí gab` iing`na' cá`na'! ¿Jial nitéʰ líʰi e niliseen- cóo~'núʰ? Níjéeng` i simingʰ` quií'- do fí la.

Jə dsifí` ladob cangojéeng` i dseañu` do i dsea` dsée~ quiá'r- do.

42 Jə mí~ cangoquiéeng` i dsea` dsée~ do quiá'- lí~ singʰ` Jesús, dsifí` ladob cabíí- i ʔlingʰ do cabííñ- i simingʰ` do fí ní~ uóʰ, jə cajméer` e cadseá-tu joñiíñ` do. Jə dsifí` ladob ca'gaang` Jesús cajíñ- i ʔlingʰ do, jə ngohuíim-biñ' do quiá'- i simingʰ` do, jə ca'láam-biñ' do. Jə ngʰ jəguɪba' cajángʰ` Jesús i simingʰ` do cóo~` tiquiá'r^ . 43 Jə dsíngʰ- cangogá` dsíí` jaléngʰ` dsea` i cangá- e jə ie~ jə, có' dsíngʰ- 'gøngʰ` Jesús laco' 'gøngʰ` Tiquiá'r^ dsea` guiing` ñiff-.

*Mí~ cajmée tu Jesús júu^ e nijnga'- dsea` quiá'r-
(Mt. 17:22-23; Mr. 9:30-32)*

Jə lajee` teáng- jaléngʰ` i dsea` do e dsigá` dsíir` quiá'- jaléʰ e cajmée` Jesús cóo~` i simingʰ` do, jə lajee` jə cajíngʰ- Jesús casí'r- jaléngʰ` dsea` quiá'r-:

44 —Núu-na' røø` jaléʰ e nifáʰa la lana, jə ja` gü'líng^ óo`na' lata~ taang`na' fí jmígüí; có' lana tí lí~ niguiéé` jmíí e nisángʰ` dsea` jnea~, dsea` gáa'a fí ñiff- e lín`n jaang` dsea` jmígüíʰ.

45 Dsu' mi~ canúu- jaléng' i dsea` guitúung` do jalé' e cajíng'- Jesús, jíi'~ jaaíñ' do ja` cangáíñ' jíi'~ camí'^ júu^ jialí' cajíng'- dsea` do lado, co' ja` mí cangáíñ' fa' nicacuø Fidiéé` e ningáíñ' e júu^ jo, jogui ja` teá' dsíir' fa' e nijmíngír` jialí' cajíng'- dsea` do lado.

*¿I' i niing-gui fí quini` Fidiéé`?
(Mt. 18:1-5; Mr. 9:33-37)*

46 Jo mi~ cangí jo, coo` jmí~ canaang` i dsea` guitúung` do e guíng' rúíñ' i~ i niing-gui lajee` lajaléíñ' do. 47 Jo dsu' calilí'^ Jesús jalé' e síng` dsea` quiá'r-, joba' dsifí ladob cató'r- jaang` jiuung` jo casíng` neiñ' cáaiñ', 48 jo casí'r- jaléng' i dsea` quiá'r- do jo cajíñ'-:

—Doñi' ii' i íng' dsea` i líng' laco' líng' i jiuung` la la'eáang` cóo'~ jnea~, joba' güíñir' jóng e jneab` íñ'; jo ii' dsea` i íng' jnea` güíñir' e ím'bre Fidiéé` dsea` guíng` ñiff-, dsea` casíñ' jnea` fí jmígú' la. Jogui doñi' ii' i ja` jmiféng' 'ñia' jee~ jaléng' dsea` rúng', íbing' i niing-gui lajee` lajaléng'.

Doñi' ii' dsea` i ja` fé' ga` uii' quí-ii', joba' uíi' quí-baa' siñ'

(Mr. 9:38-40)

49 Joba' cajíng'- Juan casí'r- Jesús:

—Tífa', jnea'^ nicaneem~baa' jaang` dseañu' i jmóo' ta~ uøøng` jaléng' i 'líng'^ la'eáang` cóo'~ 'nu', jo co' ja` ngíguir colíng` cóo'~ jneaa'aa', joba' nicajním'baa' quiá'r- e nijmér- lajo.

50 Joba' lalab cañí' Jesús quiá'- i dsea` quiá'r- do:

—Ja` jníng'~na' quiá'- i dsea` do, co' ja` seeng` jíi'~ jaang` dsea` i nijmé- coo` e li~ e dsigá' dsíir' dsea` la'eáang` cóo'~ jnea~, jo mi~ nilicøøng`gui lajo, nífé'r

ga` uii~ quié-e. Co' i dsea` i ja` fé' ga` uii~ quí-ii',
jo`ba' uii~ quí`baa' siñ'.

*Mi~ ca'gaang` Jesús quiá'- Tiáa` cóo~gui quiá'-
Juan*

⁵¹ Jo mi~ cangf jo, nijaquiéeng` jmi~ e nidséng'-tu
Jesús fi` ñifí-, jo teáb` née` dsíir` cangór` fi` Jerusalén,
co' niñi`bre e fi' job nijngáng'- dsea` ír`. ⁵² Jo nifib`
casíiñ` dsea` quiá'r- i cangojmée` quijí- li~ nijér-
lajee` uóø. Jo cangolíng` i dsea` do fi' cóo` fi' pí`
e née` fi' li~ se' Samaria. ⁵³ Jo mi~ caguilíng- i dsea`
quiá'- Jesús do fi' jo, ja` ca'íng` neiñ' do o'gui cacuør`
li~ nijéiñ'- do, co' calilí'r` e iuung- Jesús fi' e ngóor`
fi' Jerusalén. ⁵⁴ Jo mi~ canúu- Tiáa` cóo~gui Juan e
ja` li~ cangáíiñ` do li~ nijér- fi' jo, jo`ba' casí'r- Jesús:

—Tifa', ¿su iin~ e niquiá`naa' ta~ e nijia` j` fi'
yú` jmi`güi jo nicáng` jaléng` i dsea` do laco'gui
cajmée` Líi` mali~gui eáang`?

⁵⁵ Jo mi~ canúu- Jesús e cajíng'- i dsea` quiá'r- do
lado, dsifí` ladob cajíng` 'ñia'r` jo ca'gaaiñ` quiáiñ'-
do jo casí'-reiñ':

—¿I~ júu` quiá'- jmiti` 'nú'? ⁵⁶ Co' ja` cagá-
jneá~ fi' jmi`güi la e lín`n jaang` dsea` jmi`güi fa' e
nijngán`n jaléng` dsea` jmi`güi, co' jnea~ cagá-a e
lí' laco' nilaan`re jee` jalé` dsee- quiá'-bre.

Jo mi~ calí- cajíng'- Jesús lado, jo fi' li~ jiéb`
cangolíiñ- e ngojméeer` quijí- li~ cajer` e uóø jo.

*Jaléng` dsea` i iing` nidsilíng- cóo~ Jesús
(Mt. 8:19-22)*

⁵⁷ Jo lajee` iuung- Jesús fi' cóo~ dsea` quiá'r- e
ngóor` fi' Jerusalén, jaang` dseañu` cangoquiéeiñ` fi'
li~ ngóo` dsea` do, jo casí'-reiñ' lala jo cajíñ'-:

—Tifa', iim~ jnea~ nii~i cóo~ 'nu' doñí' jié' fí' lí' guó'^.

58 Joba' cañí' Jesús quiá'- i dseañu' do jo casí'-reiñ':

—Jaléng' güí' seab` too` lí' güing`ne', jogui jaléng' ta' seab` sii`re', jo dsu' jnea~, dsea` gáa'a fí' ñíí' e lín'n jaang` dsea` jmigüí', jíí' lí' quíee`e moguii` ja` sea`.

59 Jo mali~guijiu lajo cajíng'- Jesús e sí'r jaang`gui dsea` lala:

—Nea~ cóo~ jnea~ lana.

Jo dsu' i dsea` do cañír` quiá'- Jesús jo cajíñ'- lala:

—Fí'i, cuóø'~ jnea~ fí' e jang'- ni'áan'n tiquié`e, jo mí' níngf` jo, joguiba' ninii~i cóo~ 'nu'.

60 Jo dsu' Jesús cañír` quiá'- i dsea` do jo casí'-reiñ':

—Lí'^ 'nu' gua~ lajminá- güiguia~ júu^ quiá'- jial iing~ Fidiéé` nicár` nifí' quiá'- dsea`, jo cuó' fí' e jaléng' i dsea` i líng` lafa' líing~ ni'áaiñ` tiquíi'^ mí' nití' oor~ quiá'r`.

61 Jo ngí' jo jaang`gui dsea` casí'r` dsea` do jo cajíñ'-:

—Fí'i, iim~ jnea~ ninii~i cóo~ 'nu', dsu' lífa' la'uii~ cuóø'~ jnea~ fí' e jang'- ni'í'^i júu^ jaléng' dsea` sinúu^ quíe`e.

62 Joba' cañí' Jesús quiá'- i dsea` do jo casí'-reiñ':

—Jo i dsea` i já'- nicalíng- júu^ quiá'- Fidiéé`, jo dsu' mí' 'noo`bi guíing~ dsíir' jalé' e sea` fí' jmigüí', joba' i dsea` í' ja` ta` íng` e nicá` Fidiéé` nifí' quiá'r`. Jo e la líí' lafa' mí' jíí' dsea` cóo~ güitá^, co' ja` cuóøng` fa' e nijóør` fí' lí'- caluu` lajee` e jíir`.

10

*Mi~ casíng` Jesús setenta dsea` quiá'r- i can-
gogua` júu^ quiá'- Fidié`*

¹ Jo mi~ cangí jo, caguíng` Jesús setenta dsea` lajee` lajaléng` dsea` i ngí cóo`r~, jo caquiur` ta~ e cangolíñ`- do tá`- gáíñ- nifí`gui laco` ngóor` 'ñia`r` e cangoguaiñ`~ do júu^ e nijaquíem`ba' e ningí`- dsea` do laco` laco` fí. ² Jo mi~ cató' e caguíng` Jesús jaléng` i dsea` do jo cajíñ`- casí`- reiñ`:

—E já` e dsíng`- fíng` jaléng` dsea` i iing`~ ni-jmicuíng` jnea~, dsu` ja` ii` 'ga' lí dsea` seeng` i niguiá` jalé` júu^ quié`-e. Joba' 'né` nimí`~ 'nú` Fidié` e nicuóng`-guir dsea` i niguiá` jalé` júu^ quié`-e. Co' lí` la lí` fa' mi~ caroo` jalé` e ca-jní` jaang` dsea`, jo jo` ii` 'ga' lí dsea` seeng` i nijmicóo`~ e nisítíng`, joba' 'né` nimíñ` i fíng`gui dsea` i nijmicóo`~ quiá'r` e ni~ ta~ do. ³ Jo lana nigüilíng`-na', jo quié`na' cuente e nisín`n 'nú` lafa' sín`n jaang` jo`se` jee~ jaléng` ie`dsinúu^.
⁴ Jo ja` 'né` cá`na' jalé` nosúu` o`gui ñinée` o`gui 'né` cá`na' tú`- neáng` lomí`na', jogui jíi`~ sí`na' e quíi`ba' cá`na'. Jogui ja` jmi`íng`~ yaang`na' e síng`na' cóo`~ doñi` ii` dsea` i nijíng`na' guiá` fí.
⁵ Jo mi~ nigüilíng`-na' quiá`- dsea` laco` fí lí~ nisín`n 'nú`, joba' síi`na're ladsifí lala: “Güiliseem`ba' juguiá` júu^ røø.” ⁶ Jo song guiáb`- ni`íng` i dsea` lí nigüilíng`-na' do 'nú`, joba' juguiáb`- niliseeiñ`; jo dsu` song ja` ni`íñ` 'nú` cóo`~ juguiá`, joba' lajob` ja` juguiá`- niliseeiñ` yaaiñ` cajo. ⁷ Jo mi~ nigüilíng`-na' lí~ nicuó`- dsea` 'núu`, jo job` nijá`na' carta~ taang`na' e fí jo, jogui jalé` e i` gø' i dsea` do e joba' ni`u`^ nicø`na' cajo; dsuco`

lafa' jaang` dsea` i jmoo` ta~ ngim`bre e 'leeiñ~', jo lajobi 'nú' cajo. Jo ja` 'né~ ngi^na' la gui` 'núú'.
 8 Jo mi~ niguiling`na' coo` fi~ li~ iing~ dsea` 'nú', quié'na' doñi' ee'go cacuø' i dsea` do 'nú'. 9 Jogui jmi'leáng`na' jaléng` dsea` dsée'~ i seeng` fi' jo, jo síi'~na' jaléng` i dsea` do lala: "Lana nijaquíéng' e nicá Fidiéé' nifi' quiá'- lajaang` lajaang` 'nú'."
 10 Dsu' fíng caguiling`na' coo` fi~ li~ ja` íng' dsea` 'nú', dsifi' uøøng`na' e fi~ do, jo lajee' jo nifi'^na' jaléng` dsea` i nijíng`na' e jee~ fi~ do: 11 "Lana nicabó'naa' 'lee` quiá'- jee~ fi~ góo'na' e nicaséng` lomí~naa'. Jo latí lana niliing~ jaléng` dsea` i seeng` e fi~ la e ja` íñ' jalé' júu^ quiá'- Fidiéé', dsu' güiliñi^na' guiá~ e nijaquíém'ba' e nicá Fidiéé' nifi' quiá'- lajaang` lajaang` dsea` jmi'güi'." 12 Jo lana fi~ guí' 'nú' e mi~ nijáa' jmí~ e nicá dsea` iihuí' uii~ quiá'- jalé' dsee~ quiá'r', eáang` gui' iihuí' nicá i dsea` seeng` e fi~ li~ ja` ca'íñ' 'nú' lacó'gui' iihuí' e cacá~ jaléng` dsea` i caliséng` fi' Sodoma malí'gui' eáang'.

*Dsea` i ja` já'- calíng` júu^ quiá'- Dsea` Jmáang`
 (Mt. 11:20-24)*

13 Jo mi~ calí~ jo, jo canaang` Jesús e jíiñ~ jaléng` dsea` i seeng` fi' fi~ li~ seeng` jaléng` dsea` i ja` já'- calíng` jalé' júu^ quiá'r~ jo cajíñ'~:

—iFi~ jaléng` 'nú', dsea` seeng`na' fi' Corazín cóo'~ jaléng` 'nú' dsea` seeng`na' fi' Betsaida! Cofa' mi~ cajmé~ e cóo'~ jaléng` dsea` seeng` fi' Tiro cóo'~gui' fi' Sidón lajalé' e guiá~ e quí'~i jmí~ e nicajmé~ e cóo'~ 'nú', joba' dsifi' lajob caquí'~ jíng` yaaiñ~ fi' quini' Fidiéé' facó' mi~ lajo, jo catíng` e nineáaiñ' fi'í^ eáang' uii~ quiá'- jalé' dsee~ e

nīcarøøiñ. 14 Jōba' fīi- i 'nú', dseá` seeng`na' fī Corazín cóo'~gui fī Betsaida, ie~ mi~ nití- í' e nīquidsí Fidiée' í' quiá'- lajaang` lajaang` dseá` jmīgüí, eáang`gui nicuø'r- 'nú' iihuí' laco'gui e iihuí' e ni'ing` dseá` i seeng` fī Tiro cóo'~gui fī Sidón. 15 Jōgui jaléng` 'nú', dseá` seeng`na' fī Capernaum, ¿su líng`na' e 'nú'bing' i nisáng' cartí yá'~gui jee~ jaléng` dseá'? U~, o' lajō, co' 'nú'bing' i nijgiáang` tí lí 'lí' mi~ nití- e í' jō. Cōfa' mi~ fī fīi Sodoma calí- lajalé' e quíi~ jmīi~ laco'gui jīi'~ e nīcajmé- e jee~ 'nú', jōba' ja` ca'íng- e fīi jō, jō siji'~bi jaléng` i dseá` do latí' lana.

Jō cóo'~ júu^ lanab cajíng- Jesús jaléng` dseá` i ja` já'- calíng- júu^ quiá'r-.

Jō mi~ calí- jō, jō casí'- guir jaléng` i dseá` setenta do lajee' nú'-gui e ni'uøiñ' do e nīdsilíiñ- e nīdsiguiar~ júu^ quiá'- Fidiée' jō cajíñ'-:

16 —Ii` dseá` i já'- canúu- júu^ quíi-na', jáb'- ninúr- júu^ quié- jnea~ cajo; jōgui jaléng` dseá` i ja` íng` 'nú', ja` íñ' jnea~ cajo colíng~ cóo'~ Fidiée' dseá` guíng~ ñiff-, dseá` i casíng` jnea~ fī jmīgüí la.

Jō mi~ calí- e cajíng'- Jesús lajō, jō cangolíim- jaléng` i dseá` setenta do laco' ta~ cahuí' ie~ jō.

Mi~ caguilíng`tu jaléng` i dseá` setenta do

17 Jō mi~ lí- cóng`gui lajō, caguilíim`tu i dseá` setenta do fī lí- táang` Jesús, jō dsíng'- íaang` dsír' mi~ caguilíiñ, jō casí'r- dseá` do jō cajíñ'-:

—Tifa', dsíng'- íaang` dsí'naa' jó'naa' lana, co' jì'gui jaléng` i 'líng' i jée' quiá'- dseá` calinúu'r~ jalé' júu^ quíi-naa' mi~ casíi'~naa'r e ngóo'naa' lafa' guóo' 'nu'.

18 Joba' cañí` Jesús casí'r- i dsea` setenta do jo cajíñ`-:

—Lajob lí', jo camób- jnea~ mi~ catóng' fii~ i 'ling'` fí' lí' lamí~ guíñ~ fí' ñiff-, jo catóñ'` lafa' mi~ casí'- coo` jì~ güi'ñiá`. 19 Jogui jnea~ nicacuøø-ø 'nú' e niquí'`na' jmi~ jogui e nilí'`ba' jaléng'` i 'ling'` mi~ jmáñ'` jaléng'` dsea` jmigüí, jogui ja` ee` nilíng-`na' nañí' fa' nicúng'` jaléng'` mi'` guíng-` 'nú' oši ni'ing'` jaléng'` tacú` 'nú' é. 20 Jo dsu' ja` güili'íáang` óóna' e lico'` nilí'`na' uøøng-`na' i 'ling'` i jée' quiá'- dsea`, co'` güili'íáang`gui óóna' e niteáang'`na' fí' ni~ jì` quiá'- Fidiée` fí' lí' niteáang'` jaléng'` dsea` quiá'r- i nidsilíng` fí' ñiff-.

Mi~ cali'íáang` dsí' Jesús

(Mt. 11:25-27; 13:16-17)

21 Jo ie~ jo, dsíng'` cali'íáang` dsí' Jesús la'eáang` cóo'~ Jmiguí` quiá'- Fidiée`, jo cajíñ`- casí'r- Tiquiá'r` dsea` guíng` ñiff-:

—Tea~, lana jmifén'`n 'nu`, dsea` Fii~ guóo'~ uó- jmigüí la, dsuco'` lana nicajmee'` e ngám'` jaléng'` dsea` dsee- dsea` qui'` jalé'` júu` quií'-, jogui cajmee-`ba' e ja` cangáng'` júu` quií'- jaléng'` dsea` i tíng` eáang` i jmicøøng'` yaang` fí' jee~ jaléng'` dsea` rúng'`. Jo lajob lí', Tea~, co'` lajob cali'íáang` o'` e nilí`.

22 Jo mi~ calí- cajíng'` Jesús jalé'` e júu` na, jo cajíng'` guir casí'r- jaléng'` dsea` i teáang` cóo'r` do ie~ jo:

—Nicacuøø'` Tiquié` e jnea~ e née'` nii- jalé'` e sea` fí' la'úng-` fí' jmigüí. Jo jíí'~ jaang` dsea` dseáng'` mí` cuiñ` jnea~, dsea` lín'n` Jóo'` Fidiée` camíng'~, co'` lajíí'~ Tiquié` baa dsea` cuiñ` jnea~; jogui jíí'~ jaang`

dsea`dseáng' m' cuíñ` Tiquié`e dsea`guiing` ñiff` ,
 cō' lajii'~ jneab` dsea` cuín`nre cōo'`gui lajaléng'
 dsea` i nisi'íing` quíe` e e nilicuíñ` dsea` do.

²³ Jō mi` calí` cajíng'` Jesús lana, jō cajøøiñ` lajii'~
 dsea` quiá'r` jō casí` reiñ':

—Juguiá`jiu quí` 'nú', dsea` máang`na' jnea`
 jogui calicuíng`na' jnea~, cō' cang`ng`na' e
 ngám`jiu' júu` quíe` e. ²⁴ Dsucō' dsíng'` cali'ing`
 jaléng'` dsea` i café' cuaiñ` quiá'` Fidié` malii`gui
 eáang` cōo'~ jaléng'` dseata` dsea` cōøng'` fa' mi`
 cangár` jalé' e móo` 'nú' jmi` ná, dsu' ja` cangár`;
 jogui eám' cali'iiñ` fa' mi` canúur` jalé' júu`
 quíe` e, dsu' ja` canúur`.

Mi` ca'e' Jesús jial nijmi'neáang` dsea` rúñ'

²⁵ Jō mi` calí` caféng'` Jesús jaléng'` dsea` quiá'r` ,
 jō cangoquíeng'` fí lí` siñ'` jaang` tifa'` quiá'` júu`
 quiu'` ta` quiá'` dsea` góor` dsea` Israel, cō' iiñ` do e
 niguié'r' jial ni'níñ` dsea` do cōo'~ lajii'` júu` e eiñ',
 jō cajming'`r` dsea` do jō cajíñ'`:

—Tifa', ¿e` 'né` nijmee` e e laco' niñín`n e
 niliseen` cøøng` cōo'~ Fidié` lata`?

²⁶ Jōba' cañí'` Jesús quiá'` i tifa'` do jō casí'` reiñ':

—¿E` jalé' e fé'` fí` ni` jì` quiá'` Fidié` jō jial
 ngán'?

²⁷ Jōba' cañí'` i tifa'` do jō casí'r` Jesús:

—“Né` jmi'neáang`naa' Fidié` quí`ii' car`
 ngocáng` dsi`baa' jogui cōo'~ jalé'` bí` seeng` jmi`guí`
 quí`naa' jogui cōo'~ jalé'` bí` see`naa' jogui cōo'~
 jalé' e í` dsi`naa'; jogui 'né` jmi'neáang`naa' jaléng'
 dsea` rú'naa' lí'` laco'gui jmi'neáang` yee`naa'.”

²⁸ Jōba' cañí'` Jesús quiá'` i dsea` do jō cajíñ'`:

—Lajob lí' laco' fó' na. Jo song nicajmití' jalé' e jo, joba' niñin' e niliseen' cøøng' cóo' Fidié' lata'.

²⁹ Jo dsu' i tifa' do iin' e niní' jaléng' i dsea' do e íbre tĩng'guir laco' Jesús, joba' casí'r' dsea' do jo cajíñ':

—¿I' dsea' i 'né' nijmi'neáan'n jóng, Tifa'?

³⁰ Joba' cañí' Jesús quiá' i dsea' do jo casí' reiñ':

—Coø' née' jaang' dsea' Israel cagü'í' fí Jerusalén jo cangór' fí Jericó. Jo lajee' ngóor' guiá' fí, catóo' i quiá'r' i ca'uø' jalé' e quier', jo jĩgui si' i dsea' do ca'uø'r', jo caquiéng' neiñ' jo jiu' ja' cajngam'bre i dsea' do. Jo mi' calí' jo, jo cangolíim'bre, jo dob caseáaiñ' i dsea' sihuíng' do 'ni' fí. ³¹ Jo co'ná' lajob cangotíng' cangíng' jaang' jmidsea' quiá' dsea' Israel fí li' ráang' i dsea' sihuíng' do. Jo mi' caguiér' fí li' ráaiñ' do, cajméer' lafa' ja' cangám-breíñ', jo cangám'bre; ja' ee' cajmicóo'r' i dsea' sihuíng' do. ³² Jo mi'míng' guijiu' lajo cangíng' jaang' dsea' levita. Jo mi' caguiér' li' ráang' i dsea' sihuíng' do, cajméer' lafa' ja' cangám-breíñ' do cajo, jo cangám'bre; ja' ee' cajmicóo'r' i dsea' do cajo. ³³ Jo dsu' mi'míng' guijiu' lajo caguiér' jaang' dseañu' i seeng' fí Samaria i la'ó' 'ní' níng' rúng' cóo' dsea' Israel. Jo mi' cangáíñ' i dsea' sihuíng' do, dsíng' calí' fí' líng' neiñ'. ³⁴ Jo cangoquiéiñ' fí li' ráaiñ' do. Jo mi' cangár' e sihuím' i dsea' do, jo dsifí lajob cajméer' m'í quiáíñ', jo ca'ñú'r' lacaang' li' sihuíng' quiáíñ' do. Jo mi' calí' e cajméer' m'í quiá' i dsea' do, jo caseáng' neiñ' fí mocóo' bú' quiá'r', jo cató-reiñ' fí li' seeng' dsea' fí li' cajméer' í' i dsea' do, jo job cajer' cóoiñ'

do ie~ canuu e jmi~ jo. ³⁵ Jo mi~ cajneá- e jmi~ jo, mi~ caguia' i dsea` seeng` fi' Samaria do guiá- e nidséiñ-, caguir' cuu- quiá'r- jo caquí'r' quiá'- i dsea` li~ cajer' do quiá'- e nito` fñiñ` do i dsea` sihuíng` do. Jo casí'r- i dsea` fii' 'núu' do jo cajíñ'-: “Jmee- í' i dseañu' la, jo song ca'íing'gui' cuu- quií'- cóo' jalé' m'í' quiá'r-, jneab~ niqú'í' quií'- mi~ nigüéeng-túu calé' catú-.”

³⁶ Jo mi~ calí- e cajíng'- Jesús lajo, jo cajmingí'r- i tifa' do jo cajíñ'-:

—¿I~ lajee~ lajé' gaang` i dsea` do i lín'- i cajmi'neáng` i dsea` sihuíng` do?

³⁷ Jōba' cañí' i tifa' do jo casí'r- Jesús:

—I dsea` i calí- fi' líng- ír', í'bing' cajmi'née' quiá'r-.

Jōba' cañí' Jesús jo casí'r- i dsea` do:

—Guøng' jo güijmi'neáng` jaléng' dsea` laco' cajmée` i dsea` seeng` fi' Samaria do cóo' i dsea` sihuíng` do.

Mi~ caguié- Jesús fi' quiá'- Marta cóo' gui Yá^

³⁸ Jo mi~ cangí jo, jo cangób-tu Jesús laco' iuuiñ- fi' e ngóor' fi' Jerusalén. Jo lajee~ ngolíñ- fi' jo, caguiliñ- fi' cóo' fi' li~ niseeng` jaang` dseamí i sií Marta cóo' jaang` rúíñ` dsea` ngáang' cóo'r- i sií Yá^ . Jo mi~ caliñí i dseamí do e caguiliñg- Jesús cóo' dsea` quiá'r- fi' jo, dsifí lajōb cató'r- dsea` do fi' quiá'r- . ³⁹ Jo mi~ caguié- Jesús fi' jo, dob caguá Yá^ quiá'- li~ guing~ Jesús e núur` jalé' júu^ e e' dsea` do. ⁴⁰ Jo lajee~ jo iuung- Marta e ja` dsiñíñ` e guiar' guiá- jalé' e nidó'- Jesús cóo' jaléng' dsea` quiá'r- . Jōba' cangoquiéeiñ` li~ guing~ Jesús, jo casí'r- dsea` do jo cajíñ'-:

—Tifa', ¿su ja` cuø' fi'í` uø' e nijngáng'` 'ñiá'a e ni` ta` la? Co' nab guing` i` rún`n na ja` ee` jmijír` fa' e nijmicóo'r` jnea` cóo'` jalé` e jmóo`o la. Jiéé` o' síi`gor güijmicóo'r` jnea` lana.

⁴¹ Jōba' cañi` Jesús casí'r` i` dseamî do jō cajíñ`-:

—Marta, Marta, dsíng'` guing` o' dsuco' ja` nid-siñín` e nijmée`^ jalé` e lí' quíi`-. ⁴² Dsua` sea` cóo` e niing`-gui eáang' e 'né` ninúu`^, jō Yá` rún` nīcagui`bre e` e niing`-gui e 'né` jmér`, jō jíi` jaang` jō` i` cuóøng` lí` jníng`-quíá'r`-.

Jō lanab cajíng'` Jesús casí'r` i` dseamî gáng` do ie` jō.

11

*Mi` ca'e Jesús jial nisñ`naa' cóo'` Fidié`
(Mt. 6:9-15; 7:7-11)*

¹ Jō cóo` jmíñ`, mi` cangî e caféng'` Jesús Fidié`, cangoquíéeng' jaang` dsea` quíá'r` fi' lí` siñ' jō casí'r` dsea` do jō cajíñ`-:

—Tifa', mi` cateáang` i` Juan i` caseáang` dsea` jmíñ` do fi' jmígüi` la, ca'e'r` jaléng'` dsea` quíá'r` jial nisíñ` cóo'` Fidié`. Jō ¿su ja` é`^ 'nu` jnea`^ cajo?

² Jōba' cajíng'` Jesús casí'r` jaléng'` i` dsea` do:

—Mi` iing`na' siñg`na' cóo'` Fidié`, lalab 'né` naang`na' fo`na':

Tiquí`ii', dsea` guiin`~ ñiff`-,

güijmifém'` jaléng'` dsea` jmígüi` 'nu`, co'` 'nab` dsea` fén'` fi' la'úng`- fi' jmígüi`.

Jōgui` güijáng'` yaang` dsea` fi' quini`^ e laco'` niquiá`^ ta` quíá'r`- lajaang` lajaañ`.

Jōgui` güijmitib` jaléng'` dsea` jmígüi` jalé` e iing` 'nu` fi' jmígüi` la

lí[^] laco^ogui liti[~] fí[~] ñiffi⁻ quíi⁻.

³ Jogui cuóø^o jnea[^] jalé^o e 'né⁻ niquiee[~]naa' e jmi[~] lana.

⁴ Jogui íng^o dsee⁻ uii[~] quí[^]naa' quiá⁻ jalé^o e ja^o dseeng^o e nicajmó[^]naa',

lí[^] laco^ogui jnea[^] íng^onaa' dsee⁻ quiá⁻ jaléng^o dsea^o rú^onaa' dsea^o jmi^ogü^o mi[~] ee^ogo nica^oléer^o quí⁻naa'.

Jogui jmee⁻ í[^] jnea[^] lacaang^o lí[~] ngí^onaa' e laco^o ja^o nijiá^onaa' fí^o ní[~] dsee⁻,

jogui jmee⁻ í[^] jnea[^] cajo e laco^o ja^o nijmeáng^o jaléng^o i^o ling^o jnea[^].

Jø lanab ca^oe' Jesús ie[~] jø jial féeng^onaa' Fidiée^o.

⁵ Jø mi[~] calí⁻ jø, Jesús casí⁻guir jaléng^o i^o dsea^o do jø cajíñ⁻:

—Majmó[^]naa' cuente e jaang^o 'nú^o seeng^o jaang^o cabóø[~] quíi⁻na', jø i^o cabóø[~] do niguiéer^o e tór^o 'nú^o fí^o quíi⁻na' e guiáang^o uóø^o guienúú^o jø nijíñ⁻:

“Cabóø[~], ¿su ja^o jíeè^o o' fa' jmi^oøø^o jnea[~] 'ní^o íí^o,
⁶ cø^o dob nicaguié⁻ i^o cabóø[~] quíe⁻e do fí^o quíe⁻e i^o iuung⁻ fí^o jang^o fí^o lí[~] huí^o eáang^o, jø ja^o ee^o sea^o cuóø^oøre e nidó^or?”

⁷ Jogui jíí^o jaang^o 'nú^o ja^o ningí^ona' quiá⁻ i^o cabóø[~] quíi⁻na' do jø nifí^ona'r:

“Ja^o ñijmiguí^o, cabóø[~], cø^o uóøb^o eáang^o, jogui lanabi guiáang^o güing^o jaléng^o jiuung[~] quíe⁻e, jø dsíng^o fín⁻ n niráan⁻ n nicuóø^oø 'nú^o jalé^o e fó^o na.”

⁸ Dsu^o jnea[~] fí⁻i 'nú^o e doñí^o fa' ja^o ráang⁻na' uí^o e líng^o i^o dsea^o do cabóø[~] quíi⁻na', dsu^o niráam⁻ba' nicuóø^ona'r e mi^or 'nú^o do e laco^o jø^o siñ^o jmiguí^oñ⁻ 'nú^o.

⁹ Jø lajòb fí⁻i 'nú^o: Mí^ona' Fidiée^o jalé^o e 'né⁻na' jø nicuóø⁻bre; jogui mi[~] 'nó^ona' e 'né⁻na', niguié^oba' jalé^o e 'nó^ona' do; jogui mi[~] tó^ona' fí^o o'nú^o, jøba' nineab^o e 'nú^o do. ¹⁰ Dsuo^o i^o dsea^o i^o

mi' Fidiéé' jalé' e 'né'r-, ngím'bre; jogui ii dsea' i 'nó', niguié'bre e 'nó'r' do; jogui ii dsea' i tø' fí' o'ná^, nineab' e 'nú' do.

11 'Jo ja' lí^ dsii- e seeng` jaang` 'ná', dsea' aang-na' jaléng' jiuung~, e mi~ nimí'r- 'ná' ir~, jo nicuó'^na'r cuu~, o'si mi~ mi'r' 'ná' capí^ ngúu' 'ñu, jo nicuó'ng'^na'r mi', 12 o'si nicuó'ng'^na'r jaang` tacú^ mi~ nimí'r- 'ná' coo` motu. 13 Jo co' 'ná', dsea' si'ling'^na' fí' quini~ Fidiéé', tñm'ba' cuó'^na' jaléng' jóo'na' jalé' e guiá-, jo dsu' eáang'gui jlo'^ nicuó- Tiquí'ii' dsea' guing~ ñifí- mi~ nimí'^na'r, co' nicuó'^bre 'ná' Jmiguí' quiá'r-.

Mi~ cacuø' dsea` dsee- Jesús e jmóor` ta~ la'eáang` cóo` i 'ling'^

(Mt. 12:22-30; Mr. 3:19-27)

14 Jo mi~ cangí jo, coo` jmñ~ caguíng` Jesús jaang` i 'ling'^ i jée' quiá'- jaang` dseañu', jo i 'ling'^ do ninicajméer` e ja' lí fé' i dseañu' do jii~ camí'^ júu^. Dsu' mi~ caguíng` Jesús i 'ling'^ i jée' quiá'- i dsea` do, dsifí' ladob canaang` fé'tuiñ' do. Jo dsíng'^ cangogá' dsí' jaléng' i dsea' i teáang- do mi~ calí- lado, 15 dsu' i lüing~ i dsea` do cajíñ'- ca'éeiñ` Jesús:

—La'eáang` cóo` bí' quiá'- Beelzebú i lüing' fí' jaléng' i 'ling'^, la'eáang' í'bing' tñng' i dseañu' na e uóøiñ' i 'ling'^ i teáang~ dsí' dsea`.

16 Jogui i lüing~ gui i dsea` do e laco' niguié'r' jial ni'náñ- Jesús fí' quini~ dseata~, joba' camí'r' dsea` do e fa' nijméiñ'- coo` e li~ e quí'r~ jmñ~, jo lajoba' nicuó- li~ e Fidiéeb' dsea` casí' quiá'r-. 17 Jo dsifí' ladob calilí^ Jesús jalé' e í' dsí' i dsea` do, joba' cajíñ'- casí'- reiñ'.

—Niñí^b 'nú' jialco' lí' coo' fií' lí' ja' s'ing' dsea' røø', co' seeng' jmaquíng' dsea' i' quia' ta' quia'r-, jo ja' ee' juguiá- seeng' jaléng' i' dsea' do. Jogui niñí^b cajo jialco' lí' quia'- dsea' i' seeng' coo' sinú^u i' teáng' ta' j'ing', ja' ee' juguiá- seeiñ', co' ja' røø' síiñ'. ¹⁸ Jo song lajob lí' cóo' fií' i' 'ling' i' sii' Satanás e quia'r ta' condseá'- dsea' quia'r e nijmeáiñ' dsea' ga', jogui condseá'-gui dsea' do e nijmicoo'r dsea', joba' ja' e ta' íng' quia'r song cajméer' lajo, co' ni'ím- laji' tú- e ta' do, jo jo' ee' bí' seeiñ' jí' coo' jóng. Joba' nicañi- i' 'nú' jalé' e na, co' f'ing' 'nú' fó'na' e la'eáang' fií' i' 'lim'ba' e tiin- uøøñ- jaléng' i' 'ling' i' jée' quia'- dsea'; ¹⁹ dsu' fa'jiu e jmicoo' fií' i' 'ling' quie- e laco' fó'na' na, joba' ÷i' i' líng-na' i' jmicoo' quia'- jaléng' dsea' góo'na' i' nica'uøøng' jaléng' i' 'ling' i' jée' quia'- dsea? Co' i' dsea' í' e'r' 'nú' e o' lajo e í' óo'na'. ²⁰ Dsu' song jnea' tiin- uøøñ- jaléng' i' 'ling' i' jée' quia'- dsea' la'eáang' cóo' güea'^ quia'- Fidiée' dsea' guing~ ñifi-, joba' nicañi' í' jóng e nijáang' yaang~na' fi' quini' Fidiée' e laco' nicár' nífi' quí-na' lajaang' lajaang'na'.

Jo miñ' calí- e cajíng' Jesús lana, jo casí- guir jaléng' i' dsea' do jo cajíñ'-:

²¹ —Jo miñ' seeng' jaang' dseañu' i' 'gøng' jogui óor' jalé' e cóo' nijmi'øng' ñia'r miñ' jmi'ø'r jalé' e sea' quia'r-, jo líiñ- e jo' i' quí- jmiñ' nicó' quia'r-.

²² Jo dsu' f'ing' caguié- jaang'gui dsea' i' 'gøng'gui eáang', jo nilí'bre tíñ- cóo' i' dsea' jaang'gui do, joba' ni'uø'-bre jalé' e sea' quiaíñ'- do.

²³ Joba' fií' i' 'nú' e i' i' ja' sing' uii~ quie- e, joba' 'ní' níim-bre jnea' jóng, jogui i' i' ja' jmicoo' jnea' e

laco' nilicuíng` dsea` jnea~, joba' ja` siñ' uii~ quié` e cajo.

*Jial lí' mi~ dsitáng` tu i 'ling' fí' dsí' dsea`
(Mt. 12:43-45)*

²⁴ Jo mi~ calí~ cajíng'~ Jesús lana, jo casí~ guir jaléng' i dsea` do jo cajíñ'~:

—Mi~ güi'í' jaang` i 'ling' i iuung~ dsí' jaang` dsea`, ngír' fí' lí~ quiúú e 'nó'r' fí' lí~ nijmi'íñ'. Jo mi~ ngír' e ja` niguié'r' lí~ nijmi'íñ', joba' í' dsír': “Ním'^túu fí' dsí' dsea` e lí~ cajú~u do, co' ja` lí~ sea` lí~ nijmi'ín'.” ²⁵ Jo mi~ niguieng'tur dsí' i dsea` do, niguiéiñ' lafa' coo` sináú^ lí~ siquiáang` guiá~ jo silí' jlo'^. ²⁶ Jo mi~ ninír' e dsíng'~ jlo'^ dsí' i dsea` do lí~ ni'ítur, jo nidsér~ nidsitéer` guiáng~ i 'ling' gui laco' ír' e nidsitáiñ' dsí' i dsea` do. Joba' ga` guib nilíng~ i dsea` do jóng laco' gui lamí~ iuung~ jaang` i 'ling' do fí' dsír'.

Jial lí' mi~ dseáng' e já' e íáng` dsí' dsea`

²⁷ Jo lajee` gui'nang'~ e fé'bi Jesús e júu^ na mi~ tí lí~ guicafé' jaang` dseam^ e teá' eáang' jee~ jaléng' i dsea` do jo guicajíñ'~:

—¡Juguiá~ o' quiá'~ niquí'í'^, dsea` cangoquieeiñ~ 'nu' jogui cajmicuáaiñ` 'nu' cajo!

²⁸ Jo dsu' Jesús cañír` quiá'~ i dseam^ do jogui casí'r~ jaléng' i dsea` do jo cajíñ'~:

—¡Jo dsu' juguiá~ gui quiá'~ jaléng' i dsea` i núu' jalé' júu^ quiá'~ Fidiéé` jogui jmitir` jalé' e jo cajo!

*Mi~ camí' dsea` Jesús e nijmé~ dsea` do lí' e já'~ba`
e tñiñ`
(Mt. 12:38-42; Mr. 8:12)*

29 Jo lajee˘ jo, dsíng'˘gui caguilíng˘ dsea` fí lí táang` Jesús, joba' canaang`tu dsea` do e e'guireiñ' jo cajiñ'˘:

—Jaléng'˘ dsea` i seeng` jmíĩ˘ na dsíng'˘ nírøøiñ` dsee˘, joba' mĩ'r' jnea˘ e nijmee˘ e lí e já'˘ba' e tíin˘, dsu' nicaliseáb` jalé'˘ e lajo lami˘ jéeng`gui. Téé` óóna' mĩ˘ cajá˘ Jonás, jaang` dsea` i café'˘ cuaiñ˘ quiá'˘ Fidiée˘ mali'˘gui eáang'. 30 Jo laco' Fidiée˘ casíiñ` i Jonás do e niguiáiñ'˘ do júu˘ quiá'˘ dsea` do jee˘ jaléng'˘ dsea` i caliséng` fí Nínive, jo lajob cajo casíng` Fidiée˘ jnea˘, dsea` i cajá˘ fí ñifí˘ e lĩn'n jaang` dsea` jmigüi˘, e niguiaa˘ júu˘ quiá'r˘ jee˘ jaléng'˘ 'nú'˘. 31 Jo maliĩ˘gui eáang` cajo caliséng` jaang` dseamf` i ca'éé` coo` ta˘ fé'˘ fí lí huíi˘ eáang`. Jo ie˘ jo seeng` jaang` dseata˘ dsea` féng'˘ fí Israel i calisí` Salomón i tíing` eáang`. Jo i dseamf` do cangór˘ cangonúur˘ e júu˘ quiá'˘ i dseata˘ Salomón do. Jo dsu' mĩ˘ niguiée'˘ jmíĩ˘ e niquidsí Fidiée˘ í' quiá'˘ jaléng'˘ dsea` uí'˘ jalé'˘ dsee˘ quiá'r˘, joba' i dseamf` do nicuø'r˘ 'nú'˘ dsee˘, co' ja` núu'˘na' jalé'˘ júu˘ quié˘ e. 32 Dsuco' mĩ˘ cajá˘ i Jonás do e caguiar` júu˘ quiá'˘ Fidiée˘ fí Nínive, lajalém'˘ i dsea` seeng` e fiĩ jo dsifí' lajob caquí'˘ jíng'˘ yaaiñ` fí quini˘ Fidiée˘, joba' i dsea` í'bing'˘ nijmé˘gui dsee˘ quí'˘na' mĩ˘ niguiée'˘ jmíĩ˘ e niquidsí Fidiée˘ í' quiá'˘ jaléng'˘ dsea` jmigüí'˘. Jo dsu' jnea˘ niing˘gui laco' i Jonás do.

*Mĩ˘ ca'e' Jesús jial lí' mĩ˘ jmijnea` dsea` jí`
(Mt. 5:15; 6:22-23)*

33 Jo mĩ˘ calí˘ jo, jo canaang` Jesús coo` 'lé'˘gui júu˘ quiá'r˘ jo cajiñ'˘:

—Mi~ jmijneá` jaang` dsea` coo` candíi^ quiá'r~, 'né- nisí'r` coo` lí` ñíí', joba' nijneá' fí' la'úng- sinúu^ quiá'r~. Jo ja` jmijneár` e jí` do e laco' nisí'r` fí' coo` dsíí' caja o'gui e ni'meár- fí' coo` lí` ja` jnéeng-, co' iin~ e jnéb'" jaléng'" dsea` i dsitáang'~ fí' dsíí' sinúu^ quiá'r~. ³⁴ Jo jalé'" jmini~ dsea` íng^ ta~ e jné'r` laco'gui ta~ íng^ e candíi^ do e jneá' mi~ canuu. Jogui jaléng'" dsea` i guiá- jmini~, jlo'gui jné'r` lacaang' fí' lí~ ngir' laco'gui jaang` dsea` i jo` 'ga' lí' dseeng` jmini~, co' i dsea` í` jo` 'ga' lí' røø` jné'r` lacaang' fí' lí~ ngir'. ³⁵ Jo lajob líí' cóo'~ 'nú'" mi~ já'- líng'na' jalé'" júu^ quié~ e quiá'- jial laang` Fidiéé~ dsea' jee~ jalé'" dsee- quiá'r~, co' e jo líí' lafa' mi~ jneá' coo` jí' dsíí' coo` sinúu^ e nuu. ³⁶ Joba' 'né- ñíing~ óo' 'nú'" jie~ mí' jmee- na' e ja` já'- líng'na' e júu^ quié~ e do, co' e jo líí' lafa' mi~ ja` jneá' jí' dsíí' coo` sinúu^ e nuu eáang'.

Mi~ cajíng- Jesús jaléng'" dsea' fariseo cóo'~ jaléng'" tífa' quiá'- júu^ quiu' ta~ quiá'- dsea' Israel
(Mt. 23:1-36; Mr. 12:38-40; Lc. 20:45-47)

³⁷ Jo mi~ cangí e cajíng'- Jesús lado, jaang` dsea` Israel i líng' dsea` fariseo cató'r- Jesús fí' quiá'r- e nidó'r-. Jo mi~ caguié- dsea` do fí' quiá'- i dsea` fariseo do, jo cangúmbre dsíí' sinúu^ jo cangúin' caguár' lí~ nidó'r-. ³⁸ Jo i dsea` fariseo do dsíng'- cangogá' dsíir' mi~ cangár- e ja` cajmiti~ Jesús fa' caru'r' guóor' laco' tíng' jaléng'" dsea` Israel. ³⁹ Joba' cajíng'- Jesús casí'r- i dsea` fariseo do:

—Jaléng'" 'nú'", dsea` fariseo, rúu'~ na' jalé'" cuéé'~ huíí' quií' na' jíí'~ lí' caluu~, jo dsu' eámam' 'lí' lí' dsíí'. Jo lajob líng' 'nú'" yaang~ na' cajo, co' guiáb- tíng'na' rúu'~ na' ní'na' jee~ jaléng'" dsea` mi~ ja' lí'

dsea` jial tí' jmoona' ð quiá'r- jo ee`gui jalé' 'lí' rúng'na' jmoona' cóo'~ jaléng' dsea`. 40 ;Dsinóo' 'nú'! ¿E~ ta` íng^ quií'na' e jmoona' lajo? Co' fí quini` Fidiée' 'né- e tee` lajì` tú- taam`. 41 Jo mi` líng~ e cuø'na' jaléng' dsea` i ja` sea` e 'né- quiá'-, joba' 'né- jmee`na' lajo e ngocáng` óo'ba', jo lajoba' ni'uíng- guiá- quií'na' fí quini` Fidiée'.

42 'iE ngi~ fíib- 'nú', jaléng' dsea` fariseo! Co' dsíng'- guíng~ óo'na' e nicuø'na' Fidiée' dseáng'- ca'íng'~ lajee` guí- íng'~ lajalé' oo' quiá'- jmiñi' e ro'na', jo dsu' ja` e guíng~ óo'na' fa' e ni'í'na' í' røø` quiá'- jaléng' dsea` rúng'na' o'gui e jmi'neáng'na' Fidiée'. Co' lajalé' e joba' 'né- nijmití'na' cóo'~ gui jalé' e caguíe- gui do cajo.

43 'iE ngi~ fíib- 'nú', jaléng' dsea` fariseo! Co' iing~na' ní'na' jíi'~ 'masii' e jlo'^ quiá'- dsea` lani- ing- mi~ nití- fí' guá'-, jogui jmoona' e 'nú'bing' i niing- gui mi~ nití- fí' jo cajo. Jogui lajobi mi~ jíng'na' jaléng' dsea` guiá'^ fí', jmoona' e jmiféiñ' 'nú' lafa' jíi'~ 'nú'bing' i cóøng'~ gui fí' la'úng- jmigüî.

44 'iE ngi~ fíib- 'nú', jaléng'na' dsea` fariseo! Co' dsíng'- jmigøøng'na' jaléng' dsea` cóo'~ jalé' e jmoona'. Co' 'nú' líng'na' la lí' lí' si'aang' 'líi~, co' dsíng'- jlo'^ jíng` tee` lí'^ lí' ni~, jo dsu' lí'^ lí' dsí' jolíng~ tée'~ nguú' jmé' e teáng'~ jóo'.

45 Jo mi~ canúu- i tifa' quiá'- júu^ quiu' ta~ quiá'- dsea` Israel e cajíng'- Jesús lado, joba' dsifí' ladob 'ní' catíiñ- júu^ quiá'- dsea` do, jo cañír' quiá'- Jesús jo cajíñ'':

—Tifa', mi~ fó' lana la quié- jneab'^ jminean'^ cajo.

46 J_oba' cañí' Jesús quiá' i dsea` do j_o cajíñ' casí' reiñ':

— ¡E ngí' fñb' 'nú' cajo, jaléng' tifa' quiá' júu` quiu' ta` quiá' dsea` Israel! Co' cuø'na' lee` laguidseaang` jaléng' dsea` jiéng' e jíí' jaang` ja` ií` quí' jmí` niró', jogui jíí' yaang`na' ja` iing`na' fa' taang`na' guóo`na' e niró` e lee` do.

47 ¡E ngí' fñb' 'nú' jaléng'na', co' jmo'na' jlo` lí' si'aang` jaléng' dsea` i café' cuaiñ` quiá' Fidié', j_o jaléng' dsea` íb` i cajngang' 'lí' dsea` cøng' quí'na' ie` malí'gui do! 48 Dsu' jalé' e jmoo`na' do guóng' e lafa' røøb` siing`na' cóo` jaléng' 'lí' dsea` cøng' quí'na' j_o e lafa' 'núb' cajngang'na' jaléng' i dsea` do cajo.

49 J_o co' laj_ob lí', j_oba' Fidié' dsea` eáang' tiiñ` cajíñ' lala: "Nisñn` jaléng' dsea` i fé' cuaiñ` quié' e cóo`gui jaléng' dsea` apóo` i si'íing` e ní' júu` quié' e jee` 'nú', j_o dsu' 'nú', seem`biñ' do i nijmeáang`na' la tí' e já` óo`na', jogui seem`biñ' do cajo i nijjúng' fí jaguóo`na' cartí nijngám`ba'r."

50 J_o dsu' Fidié' nijmér` e niquí` jaléng' dsea` seeng` jmí` na jalé' e cangongíng` jaléng' dsea` i café' cuaiñ` quiá'r` i nicaliséng` lajíí' mi` catiroo` jmígüí j_o latí` lana 51 j_o latí` mi` cajnga' dsea` quiá' Abel jogui cartí` mi` cajnga' dsea` quiá' Zacarías fí jeeng` lí' guí' jaléng' dsea` jalé' e cuø'r` Fidié'. J_oba' fñ` i 'nú' e nijméb` Fidié' e niquí` jaléng' dsea` seeng` jmí` na jalé' e cangongíng` i dsea` do.

52 ¡E ngí' fñb' 'nú', jaléng' tifa' quiá' júu` quiu' ta` quiá' dsea` Israel! Co' 'núb' dsea` quié`na' jalé' jí' lí' too` jalé' júu` quiá' Fidié', j_o dsu' ja` iing`

'ná' jmití'na' laco' fé' e fí' ní' jì' do, o'gui cuø'na' fí' e nijmiti~ jaléng' dsea` i iing~ jmé^ lajõ.

⁵³ Jõ mi~ cató' e cajíng~ Jesús jaléng' i dsea` fariseo cóõ'~ jaléng' i tifa' do, jõ jaléng' i dsea` do canaaĩn` jmiquíim'~ dsíir' cóõ'~ jalé' júu^ e cajíng'~ Jesús, jõ jmiguiab' jalé' e canaaĩn` jmingíir` laco' e nijmiguíĩn~ dsea` do; ⁵⁴ co' jaléng' i dsea` fariseo do cóõ'~ jaléng' i tifa' do 'nó'r' jial ni'náĩn~ Jesús fí' quini~ jaléng' dseata~ quiá'r~ cóõ'~ jalé' e fé' dsea` do.

12

Mi~ ca'e' Jesús e ja` dseeng` jmijløng' yee~naa' jee` jaléng' dsea`

¹ Jõ lajee` e fé' Jesús jalé' e júu^ na, caseáng' lí' lí' tú~ 'ní' mil dsea`. Jõ laco' ngóo' seáng' jaléng' i dsea` do, dsíng'~ ninaaiĩn` 'leng' rúĩn', co' lajalém' bre iĩn~ ninúr~ jalé' júu^ e e' Jesús. Jõ lajee` jõ canaang` Jesús féiĩn' jaléng' dsea` guitúung` quiá'r~ jõ casí'~ reiĩn':

—Ñiing~ óó'na' cóõ'~ jalé' e fé' jaléng' dsea` Israel i líng' dsea` fariseo, co' jíi'~ yaaiĩn~ ja` já'~ líiĩn` jalé' e fé'r', jõ jalé' e jõ íng^ ta~ quiá'r~ e lico' jmijløng'^ yaam~bre fí' quini~ jaléng' dsea` fiĩ'. ² Dsucõ' ja` sea` coõ` e siĩ~ jneaa~aa' e ñng' e ja` tõõ` jmĩ~ niliĩn' jaléng' dsea`, o'gui coõ` e sí'má'naa' e ja` tõõ` jmĩ~ niní jaléng' dsea` cajo. ³ Jõba' jalé' e nicafée'~ 'nú' e ñng', niliĩnib' jaléng' dsea`; jogui lajõbi jalé' e nicafée'~na' fí' sínáú^ quí'na', niliseab` júu^ latøng~ fiĩ` cajo.

I` i cat#ng~ e 'gøng'naa'
(Mt. 10:28-31)

4 'Jo lala fñi-i jaléng' 'nú', dsea` rú'naa'; ja` fòøng'~na' jaléng' i iing~ jngáng'^ 'nú', co' jji' e joba' tñiñ jmér-. 5 Dsu' lana nijmée'~e 'nú' júu^ i~ i catíng- i niféng'na': güiféng'na' i dsea` i niquiá'- ta` lí~ nijúung-na' jogui quí'r~ jmí~ e guiéiñ' dsea` fí lí~ 'lí'^. Joba' fñi-i 'nú' igüiféng'na' i dsea` î!

6 'Jo niñib^ 'nú' e 'nñim` dsea` tá'- la 'ñíing- ta` cóo'~ tú- 'ní' í' cuu-. Dsu' e já'-ba' e jji' camíng'~ i ta` do ni'íing- dsí' Fidiéé` laco'gui ja` ni'íing- dsíir' jji' jaang` 'nú' cajo. 7 Jo jñ'gui jalé' jñ'guí' 'nú' si'í'^ Fidiéé` tá'- camí'^. Joba' fñi-i 'nú' e ja` fòøng'~na' mí~ iing~ dsea` nijngáñ'- 'nú', co' eáang'gui quíng' 'nú' laco'gui fñing' ta'.

*Jaléng' dsea` i ja` i' líng- e cuíñ` Dsea` Jmáang`
(Mt. 10:32-33; 12:32; 10:19-20)*

8 'Jogui jaléng' 'nú', dsea` i ja` i' líng-na' e nijmée'~na' dsea` júu^ e cuíng-na' jnea` fí jmi güí la, joba' jnea~, dsea` cagá'-a fí ñífi- e lín'n jaang` dsea` jmi güí, lajob nijmee` e cajo fí quini` jaléng' ángeles quiá'- Fidiéé` mí~ niguilíng' 'nú' fí jo. 9 Dsu' jaléng' dsea` i nijíng'- e ja` cuíñ` jnea` jee~ jaléng' dsea` jmi güí, joba' lajob nifá'^a fí quini` jaléng' ángeles quiá'- Fidiéé` e ja` cuín`nre cajo.

10 'Jogui doñí' ii i 'ní' níng- jnea~, dsea` gáa'a fí ñífi- e lín'n jaang` dsea` jmi güí, ni'ím- Fidiéé` dsee- quiá'r-; jo dsu' ii i café' ga` uii~ quiá'- Jmiguí quiá'- Fidiéé`, joba' jo` quí'- jmí~ fa' e ni'íing- gui Fidiéé` dsee- quiá'r-.

11 'Jo jaléng' 'nú', song cajiúng'na' fí jaguó` dseata~ quiá'- guá'- quí-naa' osi fí jaguó` dsea` i quidsí' í' osi dseata~ bi é, joba' ja` fòøng'~na' fa' e ja` ñí^na' jial nijmi'øng' yaang~na' o'gui jial ningí~na'

quiá'r- mi~ nijmingí'r- 'nú'. ¹² Co' mi~ niteáang-na' fí quini~ jaléng' i dseata~ do, dsifí lajob nijmé- Jmiguí quiá'- Fidiée~ jial ningi-na' quiá'r- mi~ nijmingí'r- 'nú'.

Eáam' dseáang' mi~ óo' dsea` cuu- eáang'

¹³ Jo mi~ cangí e cajíng'- Jesús jalé' e júu^ na, jo jee~ jaléng' i dsea` i teáang- núu` jalé' e júu^ jo guicató- jaang` dseañu' jo guicajíñ'- casí'r- Jesús:

—Tifa', síi~ go rún'n dsea` ngáang'~ cóo'~o güicuø'r- jnea~ guiée^ quié~e jalé' e casée' 'lii~ tiquié~e mi~ cajúíñ-.

¹⁴ Joba' cañí' Jesús quiá'- i dseañu' do jo casí'-reiñ':

—Ja` casíng` Fidiée~ jnea~ jee~ 'nú' fa' e lín'n dseata~ i cajajmée^ jmá'-jiu jalé' e sea` quí'-na'.

¹⁵ Jogui casí'-guir jaléng' i dsea` teáang- do jo cajíñ'-:

—Ñiing~ óo'na' jo ja` jmee- na' e dsináang'na' jalé' cuu- o'gui doñí' ee' e sea` fí jmigüí, co' jii'~ jaang` dsea` ja` quí'- jmi~ e niquí'r- quiá'- e niteáang-guir huø- fí jmigüí la fa' jialgui la sea` quiá'r-.

¹⁶ Joba' ca'e' Jesús jaléng' i dsea` do cóo' júu^ já'- e lafa' júu^ cuento e fé' lala jo cajíñ'-:

—Coo` née'~ caliséng` jaang` dseañu' i sea` cuu- eáang' jo óor` uø- e jlo' eáang' cajo, jo catáíñ' dsea` 'léeng' quiá'r- i cajmée` ta~ e uø- do. Jo mi~ caroo` jalé' e cajnír' do, dsíng'- jlo'^ cacuø' e uø- do, jo dsu' jo` li~ sea'gui e ni'mea- i dsea` sea` cuu- do jalé' e caro'r'. ¹⁷ Joba' canaaíñ' í dsíir': “¿E~ nijmee~e cóo'~ jalé' e caró'o e jii' lana? Co' ja` sea` li~ ni'meaa- jalé' e jo.” ¹⁸ Jo coob` mi~ ca'øng' dsíir' jial nijmér-, joba' cajíñ'-: “Nica'øm" dsii' jial nijmee~e.

Nijiém~baa 'núú' quiá'- cuí' quié-e e tée- lana, jo nijmée'-e e cóo'-gui eáang', jo job ni'meaa- jalé' e caró'o do cóo'~lají' e sea` quié-e. ¹⁹ Jo mi~ ni'ién-g e 'nuu- do jogui mi~ nitée'~ líng' jalé' e sea` quié-e, dsíng'- juguiá- niliseen- jo jíí'~ coo' fi'í^ jo` ee` nijáa' quié-e jóng. Joguiba' nijmi'ín'teáa tú- 'ní' jiing', jo lajee' jo nidúu'~ nidóø'~ø jalé' e sea` quié-e jo dsíng'- nijmi'íang' dsii- lajee' jo." ²⁰ Jo dsu' uóø' job cajíng'- Fidiée' casí'r- i dseañu" do: "Dsea` tuung~, náb nití- í' e nijúun'-, jo ¿e~ ta~ íng^ quií'- jalé' e oo'- lana mi~ niguøng'^ fi' jmi-güi' coo'?" ²¹ Jo lanab dsingíng- jaléng' dsea` i silí'li cuu-, co' o' cóo'~ e jo nitííñ'~ fi' quini' Fidiée' mi~ nití- oor~ quiá'r-.

To' f#m' Fidiée' jaléng' dsea` quiá'r-
(Mt. 6:25-34)

²² Jo mi~ cangí jo, jo caféng'gui Jesús jaléng' dsea` guitúung' quiá'r- jo casí'-reiñ':

—Lala fñ-i 'nú': ja` jmee-na' fi'í^ quiá'- jalé' e nicø'^na' o'gui jmee-na' fi'í^ quiá'- jalé' sí'na'. ²³ Co' eáang'gui laniing- 'né- e jmita~ oo'na' e nigüilím'ba' fi' lí' guiá' mi~ nití- fñ' coo' e laco'gui e nijmee-na' fi'í^ quiá'- jalé' e nicø'^na' cóo'~gui quiá'- jalé' sí'na'. ²⁴ Jo quie'na' cuente quiá'- jaléng' quiee'; ja` jié' jñ're' o'gui jié' tée'~ jalé' e gø're' o'gui 'mea're' jalé' e nidó'-re', dsu' Fidiée' ní'bre e` héiñ' jaléng' i jó' do quiá'r-. jjo eáang'gui quíng' 'nú' fi' quini' Fidiée' laco'gui lajee' fñng' tá' i seeng' fi' jmi-güi'! ²⁵ Jo ¿i~ jaang' 'nú' niquí'- jmí~ nijmee-na' e nicuáng'guina' ca'ná'^ metro laco'gui jíí'~ tí'na' lana? ²⁶ Jo song ja` quí'~na' jmí~

jmeē-na' e capí' lajō, joba' ʒjali' guing̃ ó'na' jalé' e lí' seeng̃-na'?

27 'Jo quie'na' cuente jial jlo'^ jalé' lí' e sea' fí' jmigüi', jogui ja' ee' ta' jmóo' o'gui quie' fí' jial ni'uíng̃ e jlo'^. Jo dsu' car' júi' dseata' Salomón cóo' jalé' e jlo'^ e caliseá' quía'r- ja' casíng' 'ñia'r e jlo'^ lí' laco'gui la jnéng̃ cóo' lí'. 28 Cofa' jlob'^ cajmée' Fidiée' e jnéng̃ jalé' lí' e ja' huóø- té', dsu' jaléng'gui 'nú', dsea' i ja' mí' teáng̃ teá cóo' júu' quie'-e, jmigui'gui niñíng̃-na' quía'- Fidiée' jalé' e 'né'-na'. 29-30 Joba' fí' i 'nú' lana, ja' jmée'na' fí' quía'- jalé' e ni'u'^ nicø'na', dsuco' lajōb jmóo' jaléng' dsea' jmigüi' i ja' cuíng̃ Fidiée'. Jo dsu' 'nú' seem' jaang' Tiquí'na' dsea' guing̃ ñifí' i niñí jalé' e 'né'-na' laco'o' jmí' laco'o' jmí'. 31 Jo fí' guí' 'nú' lana e 'né' nijmí'úung̃-na' e Fidiée' dsea' nicá' nifí' quí'-na', jo lajōba' niñíng̃-na' jalé' e 'né'-na' laco'o' jmí'.

Jalé' e catíng̃- dsea' quía'- Fidiée' fí' jmigüi' cóo' (Mt. 6:19-21)

32 'Jo ja' jmeē- 'nú' fí' fí', dsea' i ja' fíng' mí' cuíng̃ jnea~, có' Tiquí'na' dsea' guing̃ ñifí' i quie' nifí' quí'-na' nica'fí' dsír' e nicuø'r- 'nú' lajúi' e catíng̃-na' e íaang̃ dsír'. 33 Joba' 'né' e 'nú'na' jalé' e sea' quí'-na' jo nijmicóo'na' jaléng' dsea' i lí' 'né' quía'- lajō; có' ja' ee' ta' íng̃ quí'-na' fíng̃ tá'- ca'meá' lí' cuu' cóo' jalé' e sea' fí' jmigüi' la, có' dsíng' fø' nicá' jaléng' í' jalé' e sea' quí'-na' osi nidø'- jaléng' guisí' i 'léé' é. Có' guí'-guib e nijmee-na' e nilisea' quí'-na' fí' ñifí' jalé' e jlo'^, dsuco' fí' jō jō' seeng̃ í' o'gui fa' dseáng' e ni'lé' gui

guisí. ³⁴ Co' li~ sea` jalé` e lî a' do, e jobi guing~ a' jóng.

Dseáng' - 'né- e siñiing' dsi'naa'

³⁵⁻³⁶ Joba' fii~ i ná' e 'né- neáng'na' laco' guing~ jaang` dsea` 'léeng' i guing~ fí' quiá'- fii~ e güjeeeñ` e nineár- 'núu' mi~ niguieng' fii~ i ngí' fí' lí' cung' guoo` dsea, jo` 'né- sijeeng' i dsea` 'léeng' do e jnea` jib` guiñ~, joba' dsifib' nineár- 'núu' mi~ niguieng' fii~ e nitór. ³⁷ Jo` juguiá'-jiu quiá'- jaléng' dsea` 'léeng' i sijnée` dsí' mi~ niguieng' fii~. Co' jnea~ jmitaa- óóna' e dsíng'- nili'iaang` dsí' i fii~ do jo` nitóør` jaléng' i dsea` 'léeng' i sijnée` dsí' do e nidó'r- colíing~ cóoiñ~ do e uóø` jo. ³⁸ Jo` juguiá'-jiu quiá'- jaléng' i dsea` 'léeng' i sijnée` dsí' do mi~ niguieng' fii~, nañí' fa' niguieñ' do guienúu` osi téé- ogóó` é. ³⁹ Jogui cajo fa' jaang` dsea` niñir' e~ oor~ niguiée' jaang` ñi' fí' quiá'r-, nijé'-bre e jo` nigüñ' e uóø` jo, jo` lajoba' ja` nicuór- fí' e ni'uó'- i ñi' do jalé' e sea` quiá'r-. ⁴⁰ Joba' lajob` 'né- neáng' 'nú' e siñiing' óó'ba'; co' jnea~, dsea` i cajú- fí' ñifi- e lín'n jaang` dsea` jmigüí, nigáa'túu calé' catú- fí' jmigüí la lajee' e ja` ñiing~ óóna'.

Jaang` dsea` 'léeng' i guíung- cóo~ jaang`gui dsea` 'léeng' i soo` dsí'

(Mt. 24:45-51)

⁴¹ Jo` dsifí' mi~ cató' e ca'e Jesús jalé' e júu^ na, jo` dsifí' lajob` cajmingí' Tí^ Simón cajmingí'r' Jesús jo` cajíñ'-:

—Tifa', jalé' e júu^ e nica'é'^ na, ¿su ca'ée'~ jíí~ jnea'^ dsea` guitúung'naa' ofa' quiá'- lajím` dsea` é?

⁴² Jo` lalab cañí' Jesús:

—Lalab lí' quiá'- jaang` dsea` i nées ni~ jaléng' dsea` 'léeng' i núu~gui jalé' ta~ quiá' fir~, jo guiung~guir cóo~ jaléng' dsea` 'léeng', jogui nicuó'-reñ' do e nidóñ'- mi~ nití- oor~ e gø' dsea`. Jo mi~ cagüi'í' i fir~ do e nidsér- fí' lí' jié', caséer' jalé' ta~ quiá'r- jo caguiar' ni~ i dsea` i nées ni~ jaléng' dsea` 'léeng' do, jo joguiba' cangór- jóng. ⁴³ Jo mi~ niguieng'tu i fir~ do, juguiá- o' quiá'- i dsea` i nées ni~ dsea` 'léeng' do song nicató' jalé' ta~ e casée' fir~ mi~ cagüi'í'r' cangór-. ⁴⁴ Jo já'-ba' fí'-i 'nú' e dsíng'- nili'iaang` dsí' i fir~ do, có' calitib~ jalé' ta~ e caséer' cóo' i dsea` nées ni~ jaléng' dsea` 'léeng' quiá'r- do, jo joguiba' nicuó'-reñ' do e nine'- niñ~ do jalé' e sea` quiá'r-. ⁴⁵ Jo dsu' fing song ja` cajmiti~ i dsea` nées ni~ i dsea` 'léeng' do lajúi~ ta~ caquiá' fir~, có' ca'f' dsíir' e ja` mí niguieng' fir~ lajminá-, jo lajee~ jo cajméer' soo` dsíir' cóo~ jaléng' dsea` 'léeng' i nées nir~, jogui canáñ' í' gø'r' jalé' e sea`, jogui cajméer' ta~ í' méé'; ⁴⁶ jo dsu' lajee~ jmóo` i dsea` nées ni~ i dsea` 'léeng' do jalé' e jo, lajee~ job caguiéng'- fir~, jo dsíng'- nicaliguiñ'- do, jo iihu'í' nicuó'-reñ' do lí' laco' catíng- e niñíng` jaang` dsea` i ja` núu~ jalé' júu^ quiá'- fir~.

⁴⁷ Jo i dsea` 'léeng' i ní' jial lí' jalé' e iing~ fir~ e nilí jo dsu' ja` caguiar' guiá- o'gui calinúu'r~ e nijmér- jalé' ta~ caquiá' fir~, joba' dsíng'- niñíñ` iihu'í' jóng. ⁴⁸ Jo dsu' i dsea` 'léeng' i ja` ní' jalé' e nijmér- jo eáam' ca'léer' quiá'- fir~, joba' i dsea` í' ja'gui niñíñ` iihu'í' laco'gui i jaang` do. Jo i dsea` i cangíng` jmiguiá', jmiguiá'guib catíng- niguiéer- cuente mi~ nití- í' lajo; jogui i dsea` i ée' guiá- cóo'

lajjĩ' ta' e cangñiñ' e nee' nir~, joba' eáang'gui guiá' 'né' guiér' cuenta mi~ nití' í' lajo.

*Nijíng' dsea' lajee' la'ó' rúñ' uí' Jesús
(Mt. 10:34-36)*

⁴⁹ Jo mi~ calí' e cajíng' Jesús jalé' e júu^ na, jo casí' guir jaléng' i dsea' do jo cajíñ'':

—Jnea~ cagá' a lafa' e caga'uun~ jì' fí' jmigüi' la; jo jdsíng' l' dsií' fa' jiã~ nicoo' lana! ⁵⁰ Co' ná' bi nicaa~ iihuí' e eáang', jo jdsíng' l' lijuung~ dsii' cartí' niliti~ lajalé' e jo! ⁵¹ Jo dsu' jaléng' 'nú' í' óóna' e cagá' a fí' jmigüi' la e gajmée' e liseeng'na' juguiá' júu^ røø, dsu' o' lajo; co' uí' jnea~ ná' bi nijmé' dsea' mñ'~ cóo'~ dsea' rúñ'. ⁵² Co' latí' lana gaang' dsea' nijíñ' cóo'~ gáng' dsea' la'ó' dsea' sinúu^ quiá'r'. ⁵³ Co' tiquiá'^ dsea' nijíñ' cóo'~ jóor' dseañu', jo jaléng' jóo' dsea' dseañu' nijíñ' cóo'~ tiquiá'r^; jogui niquiá'^ dsea' nijíñ' cóo'~ jóor' dseamí, jo jaléng' jóo' dsea' dseamí nijíñ' cóo'~ niquiá'r^; jogui iemisé' dsea' nijíñ' cóo'~ dsea' mĩloo~ quiá'r~, jogui jaléng' dsea' mĩloo~ quiá' dsea' nijíñ' cóo'~ iemisér^, co' ja' nisíñ' røø uii' quié' jnea~ cóo'~ jalé' júu^ quié' e.

*'Né' óng' dsí' dsea' e~ jalé' dsijée' jmñ' na
(Mt. 16:1-4; Mr. 8:11-13)*

⁵⁴ Jo casí' gui Jesús jaléng' i dsea' do jo cajíñ'':

—Mi~ móo' 'nú' e ta' jní' nuu' fí' yú'^ jmigüi', joba' dsifí' lajob fó'na' e nitú' jmí', jo lajob dsitíng' jóng. ⁵⁵ Jogui mi~ móo' 'nú' e í' guí' quiuu', dsifí' lajob fó'na' e ja' nitú' jmí', jo lajob dsitíng' cajo. ⁵⁶ j' jmicaang~ 'nú'! Co' ní'ba' jalé' e dsijée' fí' yú'^ jmigüi' jogui fí' guóo'~ uó^; joba' çjali' ja' ní'na' e uuing~ quiá' jalé' e dsijée' jee' 'nú' lana?

Jmí'úung'na' e niliseeng'na' juguiá~ cóo~ jaléng'
dsea`i`nı́`nı́ng~`nú`

(Mt. 5:25-26)

⁵⁷ Jō mĩ cangf̄ jō, cajíng'~gui Jesús e júu^ la:

—Jō ¿jialı́' ja` lí'na' guı́ı́'na' jnang~ e guı́á~ jōgui jnang~ e ja` dseeng` e dsijéé' quı́ı́'na'? ⁵⁸ Cō' song iı́ dsea` i`nı́`nı́ng~`nú` cangojéeiñ`nú` fı́ quini~ dseata~, joba' jmi'úung'na' e nisı́ng~tu' røø cóo'r~ lajee~ nú'-gui e niguilíng~na' fı́ quini~ i` dseata~ do. Ds̄cō' song caguilíng~na' fı́ lı́ guı́ı́ñ~, joba' niqı́ı́'r~ ta~ jaléng' ı́ı́' quı́á'r~ e nisáı́ñ'`nú` jō nitáı́ñ'`nú` dsı́'`nı́ı́ı́^ jóng. ⁵⁹ Joba' fı́ı́'`nú` e ja` nijúu'~na' e fı́ dsı́'`nı́ı́ı́^ do cartı́ niqı́ı́'na' jalé' cuu~ e nimır~, cō' lajob lı́ fı́ng catı́ fı́ quini~ dseata~.

13

Dsı́ng'~`né~ e niqı́ı́' jı́ng' yaang~ dsea` fı́ quini~
Fidiéé~

¹ Jō ie~ jō caguilíng~ cóo` tú~ mı́ng'~ dsea` fı́ lı́ táang' Jesús i`jmóo` júu^ jalé' e ga` e cajmée` dseata~ Pilato cóo' dsea` Israel, cō' caquiı́'r~ ta~ e cajúng~ cóo` tú~ mı́ng'~ dsea` Israel i` seeng` fı́ Galilea, jō e jmi'øøng~ i` dsea` Israel i` cajngaiñ' do cacáı́ñ` cóo'~ jmi~ jó' i` cajngaiñ' fı́ nife' quı́á'~ guá'~ e sı́ fı́ Jerusalén do. ² Joba' cañı́ı́' Jesús cası́'r~ jaléng' i` dsea` do jō cajı́ı́'~:

—Ja` ı́' óó'na' e calı́ng~ jaléng' i` dsea` do jalé' e fó'na' na ds̄ı́' uı́ı́' e røøng'guır dsee~ lajee~ la-jaléng' dsea` jmiğüı́, ³ cō' o' lajō; jō song 'nú' ja` niqı́ı́'~ jı́ng'~ yaang~na' fı́ quini~ Fidiéé~, joba' fı́ lı́ 'lib'~ nigüilíng'na' dsı́fı́ mĩ nijúung~na'. ⁴ Jō ¿su ja` tóo` óó'na' mĩ cajlı́ng~ guı́jñı́ng~ dsea` cóo`

'núú e ñíí eáang' quiá'- ojmi^ Siloé e si' fí dsíí fíí Jerusalén? Ja' í' óó'na' e cajúng- jaléng' i dsea` do dsu' uíí~ e røng`guir dsee- eáang' lajee` lajaléng' dsea` seeng` fí Jerusalén, ⁵ cõ' o' lajõ. Jo 'ná', song ja` niquíí~ jíing~ yaang~na' fí quini` Fidié~, joba' fí lí~ lib'^ nigüiling`na' dsifí' mi~ nití- oor~ quií-na'.

Mi~ ca'e' Jesús quiá'- 'ma` güiñí'^ e ja` ee` cuõ'

⁶ Jo casí'- gui Jesús jaléng' i dsea` do cõõ` júu^ já'- e lafa' júu^ cuento jo cajíí'-:

—Cõõ` née'~ jaang` dseañu` nicajnír` cõõ` 'ma` güiñí'^ fí uó^ quiá'r-. Jo mi~ catí í' e líiñ- e ni'íí, jo cangojõø`bre su ni'íí~ ofíí` quiá'- e 'ma` güiñí'^ do. ⁷ Jo mi~ caguiér-, jo casí'r- i dsea` née' ni~ e uó^ quiá'r- do jo cajíí'-: “Lajee` 'ni` jii` ñingóó' e gaa- cõõ` née'~ lacõõ` jii` e gajõø-ø fa' ni'íí` ofíí` quiá'- e 'ma` la, dsu' jii~ cõõ` ja` mí cadsé`e. Joba' fíí-i 'nu` e ni`né- nihuí'b", cõ' ja` tá'- jmóo` jii` quiá'- e ni~ uó^ la.” ⁸ Jo dsu' i dsea` i jmóo` í^ e uó^ do cajíí'- casí'r- fiir~: “Fíí'i, güigui~gui cateá' lajee` jii` lana, jo lajee` jo niylén'^n i' jo nitá'^a o'^. ⁹ Jo ne~duu' fíng lajõgui ni'íí- ofíí` quiá'-; jo song ja` ee` lí~ ni'íí-, jõgui'ba' nihuí' jõng.”

Mi~ cajmi'leáng- Jesús jaang` dseamí i tu` cogui`

¹⁰ Jo mi~ cangí jo, cõõ` jmií~ lajee` e jmi'íng' dsea` Israel, ca'e' Jesús jaléng' dsea` do júu^ quiá'r- fí dsíí cõõ` guá'- quiá'- dsea` góor` dsea` Israel. ¹¹ Jo jee~ jaléng' i dsea` i teáang'~ fí guá'- do niquiéeng` jaang` dseamí i nijée' i 'ling'^ quiá'-, jo ñingóó' mí guijñia` jii` e nicajmée` i 'ling'^ do e calitú' cogui` i dseamí do, jo jii~ capí'^ ja` e lí niñ'- do. ¹² Jo mi~

cangáng̃ Jesús̃ i dseam̃f̃ do, dsifí' ladob cató'̃-reiñ' fí' lí'̃ siñ'̃' jò casí'̃-reiñ'̃:

—Dseam̃f̃ rú'̃'uu', jm̃ĩ na ni'leáan'̃- lajii'̃ jmohuí'̃ e quie'̃' na.

13 Jò caquidsir' guóor' fí' mogui'̃ i dseam̃f̃ do, jò dsifí' ladob cangohuíng̃ i 'líng'̃^ do, jò canim'̃- i dseam̃f̃ do, jò canaaiñ'̃ jmiféiñ'̃ Fidiéé' jóng. 14 Jò dsu' dsíng'̃- caligúing̃ i dsea'̃ i née'̃ ni' e guá'̃- do dsu' e cajmi'leáang̃ Jesús̃ i dseam̃f̃ do lajee'̃ jm̃ĩ e jmi'íng'̃' jaléng'̃ dsea'̃ góor' dsea'̃ Israel. Jòba' casí'̃- i dsea'̃ i née'̃ ni' guá'̃- do jaléng'̃ dsea'̃ i teáang'̃ do ie'̃ jò, jò cajíñ'̃-:

—Lacoõ seaman'̃ sea'̃ jñúu'̃ jm̃ĩ e jmóo'̃ dsea'̃ ta'̃, jò lajee'̃ jòba' e catúing̃ e ñilíng̃-na' e nilí m̃í' quí'̃-na', jò dsu' ja' ñilíng̃-na' m̃i' jm̃ĩ e jmi'íng'̃'naa'.

15 Jò m̃i' cajíng'̃- i dsea'̃ née'̃ ni' guá'̃- do lado, jòba' dsifí' lajòb cañí'̃ Jesús̃ casí'̃-reiñ'̃ jò cajíñ'̃-:

—i jm̃icaang̃ 'nú'! ¿Su ja' güilíng̃-na' e güi'íng̃'na' güitá'̃ quí'̃-na' jm̃ĩ o'si bú'̃^ quí'̃-na' é lacoõ jm̃ĩ m̃i' catúing̃ e jmi'íng'̃'naa'? 16 Dsu' i dseam̃f̃ la líiñ'̃ siju'̃ Abraham, jò ñingóo'̃ guijñiá'̃ jii'̃ e cajmée'̃ Satanás e calidsée'r'̃ jò cajer'̃ tuiñ'̃. Jò lacó'̃ güijéng'̃ 'nú'̃ jó'̃ quí'̃-na' e dsi'í'̃'re'̃ jm̃ĩ m̃i' jm̃ĩ e jmi'íng'̃'naa', lajòb catúing̃ e nilaang̃- jnea'̃ i dseam̃f̃ la fí' jaguó'̃ Satanás m̃i' jm̃ĩ e jmi'íng'̃'naa' cajo.

17 Jò m̃i' cajíng'̃- Jesús̃ lado, dsíng'̃- calí'̃ i' líng̃- jaléng'̃ i dsea'̃ i 'ní'̃ ní'̃ quíá'r'̃- do. Jò dsu' lajaléng'̃ i dsea'̃ caguaaang̃-gui do dsíng'̃- calí'̃iáang̃ dsír'̃ dsu' e cangár̃- jalé'̃ e jlo'̃^ e cajmée'̃ Jesús̃ ie'̃ jm̃ĩ jò.

*Mi~ ca'e Jesús quiá'- coo` mijú` 'ma` e sii` mostáa`
(Mt. 13:31-32; Mr. 4:30-32)*

¹⁸ Jo mi~ calí- jo, jo cajíng'- Jesús:

—¿Jial líng-na' e lí' mi~ quie' Fidiéé` nifí quiá'- jaang` dsea? Jogui ¿e~ cóo~ cuøøng` nicøøng`naa'?

¹⁹ Co' e jo lí' la lí' camí'^ mijú` 'ma` e sii` mostáa`; jo e mijú` quiá'- e 'ma` do pí'^gui lajee` lajalé' mijú` 'ma` e sea` fí` jmigüí. Jo dsu' mi~ nijní` dsea` e mijú` do, féb' cuaang` lafa' coo` 'ma', jo fí` yú'^ e 'ma` do dsilíng` jaléng' ta' e jmo're' sii`re'.

*Mi~ ca'e Jesús quiá'- quie'^ iñí'^
(Mt. 13:33)*

²⁰ Jogui cajíng'- gui Jesús casí'r- jaléng' i dsea` do:

—Jo ¿e~ cóo~ cuøøng` lí` cøøng`naa' mi~ quie' Fidiéé` nifí quiá'- jaang` dsea? ²¹ Co' e jo lí' la lí' capí'^ quie'^ iñí'^ e cáng' dsea` jee` fí` iñí'^ quiá'r- e laco' niróo- jalé' e ca~ iñí'^ do, jo júí~ ja` ñí` dsea` jiali' calí- lajo. Jo dseáng'- lajob lí' cajo mi~ Fidiéé` quier' nifí quiá'- dsea`.

*Coo` o'nú` e dsuu`
(Mt. 7:13-14, 21-23)*

²² Jo mi~ cangí jo, lajee` iuung- Jesús fí` e ngóor' fí` Jerusalén, ja`bre e e'r' jaléng' dsea` jalé' júu` quiá'r- mi~ ngáíñ' jalé' fí' pí'^ osi jalé' fí' cóo~ é.

²³ Jo coo` fí' lí' caguiér-, cangoquiéeng' jaang` dsea` fí' lí' cajer', jo cajmingí' i dsea` do ír' jo cajíñ'-:

—Fí'i, ¿su júí~ tú- 'ní` mím'~ tí' dsea` i laang' jee` jalé' dsee- quiá'-?

Joba' cañí' Jesús quiá'- i dsea` do jo casí'-reiñ':

²⁴ —Jmí'úung-na' e nigüitáng'-na' fí' o'nú` e dsuu, dsuco' dsíng'- fíng' dsea` nijmér- quijí- e nidsitáaiñ'- fí' jo, dsu' júí~ tú- 'ní` míng'~bing' i

nilí[^]. ²⁵ Co' mi~ nití⁻ oor~ e nijní⁻ i dsea` fi~ do e o'nú[^] do, jaléng[^] 'nú', dsea` nijá[^]na' fí caluu[^], nitó[^]na'r jo nifí[^]na'r lala: “Janú”, Éé', jmee⁻ uí[^] diée~ nea[~]go e o'nú[^] la.” Jo dsu' lalab niñí⁻ i dsea` fi~ e o'nú[^] do jo nijíñ⁻: “Ja` cuínⁿ 'nú’.” ²⁶ Jo mi~ ninúu[^]na' e nijíñ⁻ lajo, jo ninaan⁻ 'nú' nifí[^]na'r: “Coliim~ nica'ié[^]ee' e nica'nee[^] caquiee~ee', jogui 'nub` dsea` nica'ié[^] fí jee~ fiñ góo[^]naa'.” ²⁷ Joba' niñí⁻ i dsea` fi~ e o'nú[^] do calé[^] catú⁻: “Nica'fá⁻baa e ja` cuínⁿ 'nú'. jDo güilíng⁻na' lí⁻ do jaléng[^] 'nú', dsea` i sitíng[^] 'léé'!” ²⁸ Jo job mi~ niquí[^] 'nú' jo dsíng⁻ nilijiuung~ óo[^]na' jogui nitú[^]na' majá[^]na' mi~ nimáang[^]na' Abraham cóo[^] Isáa' cóo[^] Jacóo[^] cóo[^] jaléng[^] dsea` i café[^] cuaiñ[^] quiá⁻ Fidiée[^] malí[^]gui eáang[^]; co' jaléng[^] i dsea` la nineáaiñ[^] colíng[^] cóo[^] Fidiée[^] fí ñifí⁻ lana, jo dsu' 'nú' fí caluub[^] ni'óøng⁻na'. ²⁹ Jo nijalíng[^] jaléng[^] dsea` quiá⁻ Dsea` Jmáang⁻ fí la'úng⁻ fí jmigü[^] e nigüear[^] e nidó[^]r⁻ ir~ colíng[^] cóo[^] Fidiée[^] fí ñifí⁻. ³⁰ Jo i líng[^] dsea` i líng[^] e niñ⁻ eáang[^] fí jmigü[^] la, dsu' íbing[^] i jí[^] capí[^] ja` ee` niing⁻ mi~ nití⁻ í[^] jo. Jo dsu' i líng[^] dsea` i líng[^] e ja` ee` niñ⁻ jí[^] capí[^] fí jmigü[^] la, jo íbing[^] i eáang[^]gui nilíniing⁻ mi~ nití⁻ e í[^] jo.

Mi~ caqui' Jesús uii~ quiá⁻ dsea` i seeng[^] fí Jerusalén

(Mt. 23:37-39)

³¹ Jo e jmí[^] jo caguilíng⁻ cóo[^] tú⁻ míng[^] dsea` Israel i líng[^] dsea` fariseo fí lí⁻ táang[^] Jesús jo casí^r dsea` do lala jo cajíñ⁻:

—'Né⁻ niguó[^] fí lí⁻ jié[^], co' lana niguia[^] dseata~ Herodes guiá⁻ e nijngáiñ⁻ 'na`.

32 Joba' cañíi` Jesús quiá'- ì dsea` do jò casí'- reiñ':
 —Güilíng`na' güisíi'~na' ì 'ná'^ dsinóo' í: “Lajee`
 jmíi~ e sea`gui la 'né- nijmité' e lajii'~ ta~ cagá-a fí'
 jmígüi' la e nijmi'leáan^n jaléng' dsea` dsée'~ jogui
 nijmihuín^n jaléng' ì 'ling'^ ì jée' quiá'- dsea.”
 33 Dsu' lajee` jò 'né- niguiéé' e lajii'~ lí' iuun- fí'
 ngóo'o, co' ja` catíng- jaang` ì fé' cuaiñ~ quiá'-
 Fidiéé' e nijúuiñ- fí' caluu` fíi' Jerusalén.

34 'Jò dsíng'- fíi- lín-n jaléng' 'nú', dsea`
 seeng`na' fí' Jerusalén, co' 'núb' dsea`
 nicajngang`na' jaléng' dsea` ì café' cuaiñ~
 quiá'- Fidiéé' jogui nicasi'lóo'na' cuu~ jaléng' ì
 cajmicóo'~ quiá'- jaléng' ì dsea` í cajo. Jò jnea~, ja`
 ñii- jó'gui néé'~ cali'iin~n e nito' fíi'n 'nú' laco' to'
 fíng' jaang` tui'iee' jaléng' tuyuu' quiáa` re' fí' nú'-
 cuée're', jò dsu' ja` cali'iing~na' lajò. 35 Jò lana tí' lí'
 ni'nám`baa jee~ 'nú', jò jò`nimáang`gui' jnea~ cartí'
 niguiéé' oor~ e nifo'^na' lala: “¡Juguiú- o' quiá'- ì
 dsea` ì casíng' Fidiéé' fí' jmígüi' la cuaiñ~ quiá'r'!”

14

Mi~ cajmi'leáng- Jesús jaang` dseañu' ì yaang`

1 Jò mi~ cangí' jò, coo` jmíi~ lajee` e jmi'íng' dsea`
 Israel, cató- jaang` fíi~ quiá'- jaléng' dsea` Israel ì
 líng' dsea` fariseo cató'r- Jesús e nidó'- dsea` do íí'
 fí' quiá'r-. Jò lajee` jò, dob teáng'~ jaléng' dsea`
 Israel ì líng' dsea` fariseo ì caguaang- do cóo'~
 tifa' quiá'- júu^ quiu' ta~ quiá'r- e téeiñ' Jesús lajee`
 jò. 2 Jò jee~ jaléng' ì dsea` teáng- do niquiéeng`
 jaang` dseañu' ì nilíng' jmohuí' e yaaiñ. 3 Jò
 mi~ cangáng- Jesús ì dsea` dsée'~ do, dsifí' lajòb
 cajmíngi'r' jaléng' ì dsea` neáng' do jò casí'- reiñ':

—¿Su cuóøng` e nijmi'leáan`n jaang` dsea` dsée' lajee` jmi~ e jmi'ing'naa' ofa' ja` cuóøng` é?

⁴ Dsu' tiib` caje' jaléng' i dsea` do, jii' camí'` júu` ja` ee` cañír`. Jo dsifí' lajob catíng` Jesús i dsea` dsée' do, jo ca'láam`-biñ' do lajii' e jmohuí' e lamí` líiñ'. Joba' caquiá' Jesús ta` e cangám`-biñ' do. ⁵ Jogui dsifí' ladob casí'` Jesús jaléng' i dsea` i teáng` do jo cajíñ'`:

—Já` já'`? jii'` jaang` 'nú'` ja` niseáang`na' jóo`na' osi jó'` núu` qui`na' song calingíng`na' e catóñ'` osi catóng`ne' fí' coo` dsí'` íi' lajee` jmi~ e jmi'ing'naa'.

⁶ Dsu' caléb`tu jii'` jaang` i dsea` do ja` ee` cañír` jii'` camí'` júu` quiá'` Jesús.

Jaléng` dsea` máng` quiá'` dsea` cung` guó`

⁷ Jo lajee` jo cajíng'` i dsea` fii` jaléng'` dsea` Israel i líng` dsea` fariseo do e nigüeá` dsea` e nidó'r` , jo jalém'` i dsea` do cagui'r` lí` niing`gui nigüeár`. Jo mi~ cangá` Jesús e cajmée` jaléng'` i dsea` do lado, joba' ca'e`reiñ' e júu` la jo cajíñ'`:

⁸ —Mi~ jaang` dsea` i cung'` guó` tó'r` 'nu` fí' quiá'r` , jo mi~ niguie'` quiá'` i dsea` í, ja` jmee'` fa' ningüin'` e nini'` lí` niing`gui, co' jialfa' caguié` jaang` dsea` máng` i niing`gui laco' 'nu` fí' quiá'` i dsea` do. ⁹ Jo song 'nu` niguiin'` lí` niing`gui, joba' i dsea` cató'` 'nu` do 'né` nisí'r` 'nu` e nijéen'` lí` niguiin'` do, jo nigüeá` i dsea` jaang` do, jo job lí` nicá` 'nu` fí'` mi~ nijéen'` e lí` niguiin'` do, jo nigüiní'` cartí' cøøng`gui fí' lí` neáang` dsea` i ja` niing`. ¹⁰ Dsu' mi~ tó'` i dsea` do 'nu` fí' lí` née` júu`, 'né` nini'` cartí' cøøng`gui lí` neáang` dsea` i ja` niing` mi~ niguie'` quiá'` i dsea` í. Joba' mi~

niniñ~ 'nə, nitó'r~ 'nə jo nijíñ~: “Fí la ngíng~
 cō' fí lab lí~ gua` dsea` i niing~gui.” Joba' nini`
 lí~ niing~gui jee~ jaléng` dsea` i máng~ i nineáang`
 quiá'r~ do. ¹¹ Dsucō' jaléng` dsea` i jmicóøng`
 yaang` jee~ jaléng` dsea` rúng`, í'bing' i nicá` fí'í',
 jo jaléng` dsea` i ja` jmicóøng` yaang` júi~ capí`
 í'bing' i niing~gui lajee~ lajaléng` dsea` jmigüi`.

¹² Jogui casí'~ Jesús i dsea` i cató~ quiá'r~ do jo
 cajíñ~:

—Mí~ jmoo` 'nə jmí~ jo iin`~ nihéen`~ jaléng`
 dsea`, ja` 'né~ nitó`^ jaléng` i cuín` o'gui jaléng`
 rún` o'gui jaléng` i sea` cuu~. Dsucō' song cajmee`
 lajo, joba' lajob nitó`tu jaléng` i dsea` do 'nə mí~
 nijmér~ jmí~ lajaang` lajaaíñ` fí` quiá'r~. ¹³ Cō'
 guiá~gui e mí~ nijmée` 'nə jmí~, nitó`^ jaléng`
 dsea` i ja` cuín` jogui jaléng` dsea` tiñíng~ cōo`~
 jaléng` dsea` i ja` lí ngí~ cōo`~ jaléng` dsea` bóøng`
 jogui jaléng` dsea` tiuung~. ¹⁴ Jo joguiba' dsíng`
 nili'íáang` o' jóng dsucō' ja` lí niqui`^ jaléng` i dsea`
 do táá quií`~ fa' nicuó'r~ 'nə laco' cacuóø`re. Jo
 dsu' Fidiée` dsea` guing~ ñifí~, íb` dsea` i nicuó'r~ 'nə
 mí~ niguiée` oor~ e nijí`tu calé` catú~ jaléng` dsea`
 i nisiguiúng` fí` quini` Fidiée`.

Mí~ jaang` dsea` cahéíñ` fíng` dsea` fí` quiá'r~

¹⁵ Jo mí~ canúu~ jaléng` i dsea` do jalé` júu` quiá`~
 Jesús, jaang` i dsea` la'ó` neáaiñ` gø'r` do cajíñ`
 casí'r~ Jesús:

—Juguiá~ o` quiá`~ jaléng` i nitíng~ nidó`
 colíng~ cōo`~ Fidiée` fí` ñifí~ mí~ nití~ oor~ quiá'r~.

¹⁶ Joba' casí`~gui Jesús jaléng` i dsea` do jo cajíñ`~:

—Cōo`~née`~ caguia` jaang` dseañu` guiá~ e nidó`
 fíng` dsea` i máng~ fí` quiá'r~. ¹⁷ Jo mí~ catí` oor~

e nidó'r- jò casiñ` jaléng` dsea` 'léeng`~ quiá'r- e cangotéer` jaléng` ì dsea` nisimíng` do. Jò mĩ caguié- ì dsea` 'léeng`~ do fí quiá'- lajaang` lajaang` ì dsea` nisimíng` do, jò casí'-reiñ': "Güilíng`-na' lajminá-, co' dob nigüijee` fí'i e nicø`^na' colíng`~ cóo'r~." 18 Jò dsu' jii`~ jaang` ì dsea` do jò` cali'iiñ` fa' cangolíñ-. Jò ì la'uii` do cajín'-: "Síi`-gò fíi` güijmée`gor féng`' dsír' e ja` nilí` nii`i, co' nabi nicalá'a cóo` jmáang`~ uó^, jò jobi 'né- nijóø^ø lajminá-." 19 Jò jaang`gui cajíng`-: "Síi`-gò fíi` güijmée`gor féng`' dsír' e ja` nilí` nii`i, co' nabi nicalón`n 'ñiá` jmíng` güitá^ quié-e, jò íbi 'né- nimoo`o jial jí're'." 20 Jogui jaang`gui cajíng`-: "Güisíi`-gò fíi` e ja` nilí` nii`i, co' la güeam`-bá e ngocúun`n guóo`o, jò güijmée`gor féng`' dsír' uui` quié-e." 21 Jò mĩ caguiéng`- ì dsea` 'léeng`~ do fí lí` guing`~ fiir` e cangocóor` júu^ e jii`~ jaang` ì dsea` do ja` nilí` guilíñ-, joba' dsíng`- calíguíng`- ì fiir` do mĩ canúur` lajò, jò caquiá'r` ta` ì dsea` 'léeng`~ do quiá'r- jò casí'-reiñ': "Gua` güingí` lajminá- lacaang` jee` 'núú, jò güite` jaléng` dsea` tiñíng` cóo`~ jaléng` dsea` ì ja` lí` ngí` cóo`~ jaléng` dsea` tiuung` cóo`~ jaléng` dsea` bøøng`~, jò güijalíñ- e nidó'r- fí quié-e." 22 Jò cangób- ì dsea` 'léeng`~ do cangojméer` laco' ta` caquiá' fiir`. Jò malí`gui lajò caguiém`-tur fí lí` guing`~ fiir` jò casí'-reiñ' do lala: "Níangotéé`-baa jaléng` ì dsea` ì café`~ do 'má, jò nab nínéáaiñ` lana, dsu' jóo`bi lí` nigüéá`gui dsea`." 23 Joba' cajíng`- ì fiir` do jò casí'-reiñ': "Gua` güingí`gui la`úng`- lacaang` lí` ja` mí` caguié'-, jò güite`gui jaléng` dsea`, jò güijalíñ- líng` güirøøng` sinúú^ quié-e. 24 Dsuco' jii`~ jaang` ì dsea` ì catøø-ø

la'uii~ do jo`nidø'r- jii~ capi'^ fi' quié-e.”

'Né- ɛ- dsí' dsea` røø` song iĩ~ nijmicuĩñ` Dsea` Jmáang`

²⁵ Jo mi~ cangî jo, dsíng'- fíng' jaléng' dsea` ngoliĩñ- fi' li~ ngóo' Jesús. Jøba' cajer' jo casí'r- jaléng' i dsea` do jo cajíñ'-:

²⁶ —Song iĩ` iing~ ni'uíng- dsea` quié-e, 'né- nili'iing~ guir jnea~ laco'gui tiquiá'r^ osi niquiá'r^ osi jaléng' rúíñ' osi dseamî quiá'r- osi dseañu' quiá'r- é osi jaléng' jóor', jogui 'né- nili'iing~ guir jnea~ laco'gui ñia'r' cajo. ²⁷ Jo song iĩ` dsea` i ja` niseáng' lafa' crúu^ quiá'r- e laco' cuø li~ e guia' dsír' e nidsingíĩñ e huíng' uíi~ e líiñ' dsea` quié-e jogui ja` ningír- cóo'~ jnea~, jøba' i dsea` í ja` quí'~ jmĩ~ e niliĩñ- dsea` quié-e. ²⁸ Fa' jaang` 'nú' iing~ na' nijmée'~ na' coo` 'núu', 'né- nijmée'~ na' cuante quí'~ na' su seab` cuu- quiá'~ e ninaang~ na' e nijmée'~ na' e 'núu' do car` nité'. ²⁹ Dsũco' fa' lí^ canaang` e líi e 'núu' do lajo e ja` mí calí~ cuante røø` jial tí' cuu- nili'né-, jo jialfa' ja` cató', jo dsíng'- ningíng- dsea` i dsea` fii~ e 'núu' e gui'ná^ líi do ³⁰ jo nijíñ'-: “I dseañu' do nicajmícaaiĩ~ e cajme'r' 'nar~ ofa' nisea` cuu- e nijmité'r' car` calieeng.” ³¹ Osi jaang` dseata~ iĩ~ nijmér- mĩ~ cóo'~ jaang` gui dseata~ i jíéng', jøba' 'né- ni'í- dsír' su niquí'~ jmĩ~ e nitíñ- cóo'~ i dseata~ do song i dseata~ í jéiñ- tú- 'lé' gui dsea` laco'gui ñia'r'. ³² Jo song calíi' i dseata~ do e ja` niquíi'~ dsea` quiá'r- jmĩ~ e nitíñ- cóo'~ i fíng'gui do, jøba' 'né- nisíñ- dsea` quiá'r- e nidsimiĩñ'~ do jmí'ee' e jo` nitíñ- cóo'~ i dseata~ i jaang`gui do. ³³ Jo lajob líi', doñí iĩ`

'nú' i ja`ni'náng`ca' lajalé' e lí dsír' e sea`fí jmiǵü' la, joba' ja`quá' jmiǵ jóng e nilíñ`dsea`quíe`e.

Jial mi`jo`dseeng`ñi`

(Mt. 5:13; Mr. 9:50)

³⁴⁻³⁵ Jo cajíng`gui Jesús casí'r`jaléng`i dsea`do lala:

—Dsíng`íng`ta`jalé' ñi~, jo dsu' song ca'íng`lajú' e ñii`do, joba' jo`ee`ta`íng`jí' cōo`jóng, jo lico' nibí'b`dsea', dsuco' ja`má' sea`quíá'-fa' e nilíñii`tu. Joba' fii`i`'nú' e ii`'nú' sea`loguá`na', núu`na' jalé' júu`quíe`e.

15

Mi`ca'e`Jesús júu`quíá'-jaang`jo'se'`i`si'ling`

(Mt. 18:10-14)

¹ Jo ie`jo dsíng`fíng`jaléng`nodsicuu`quíá'-Roma cōo'gui jaléng`dsea`i sea`júu`e dsíng`rōoiñ`dsee`ngoliñ`fí lí`sing' Jesús e núur`jalé' júu`quíá'-dsea`do. ² Jo mi`cangá`jaléng`dsea`Israel i líng`dsea`fariseo cōo'gui jaléng`tifa'quíá'-júu`quíu' ta`quíá'r`e ngolíng`jaléng`i dsea`do fí lí`sing' Jesús, joba' canaañ`do éeiñ`Jesús jo fé'r`:

—I dseañu`na colim`ngir`jogui gōr`cōo'jaléng`dsea`sea`júu`e dsíng`rōoiñ`dsee`.

³ Jo mi`canúu`Jesús e fé' jaléng`i dsea`do lado, joba' ca'e'reiñ`júu`já' e lafa`júu`cuento jo cajíñ`:

⁴ —Faco' jaang`'nú' aang`na' cien jo'se', jo calíng`ing`na' cango'íng`jaang`lajee`taang`na' e móo`na're', 'né`nitiúung`tea`i caguiaang`gui do lajee`nigüi`néng`na' i cango'íng`do cartí

niguiéng'na're!. ⁵ Jo mi~ niguiéng'na're!, dsíng'-
 nili'iaang` óo'na' jo nitøø~na're' e dsíng'ne'
 yú^ 'ná'na'. ⁶ Jo mi~ niguilíng'na' fí' quií~na',
 niseáang~na' jaléng' dsea` cúing'na' jo nifí'na'r:
 “Lana nijmi'iaang` dsí'naa', co' cadsém'baa jaang`
 jo'se' quié~e i caling:~n~n cango'íing'.” ⁷ Jo laco'
 li'iaang` óo' 'nú' mi~ dséng'na' jaang` jo'se' i dsí'íing'
 quií~na', joba' lajob li'iaang` dsí' Fidiéé` colíing~
 cóo'~ jaléng' i neáang' fí' ñifí~ quiá'r~ mi~ caquí'~
 jíng' 'ñia' jaang` dsea` i calilí^ e líiñ' dsea` dsee~
 dsea` qui' fí' quini~ laco'gui noventa y nueve dsea`
 i líing~ e ja` líiñ' lajo fí' quini~ Fidiéé`.

Mi~ ca'e' Jesús júu^ quiá'~ coo` cuu~ e si'íing`

⁸ Joba' cajíng'~gui Jesús casí'r~ jaléng' i dsea` do:

—Fa' jaang` dseamí i óo` guí~ cunée~, jo
 caling:~n~n e cango'íing' coo` e cuu~ do fí' dsí'
 sinúu^ quiá'r~. Joba' dsifib' nijmijneár` coo` jì jo
 ni'ír` niquiáaiñ` røø` la'úng~ e sinúu^ do, jo ni'nó'r'
 e cuu~ do car` niguié'r'. ⁹ Jo mi~ niguié'r' e cuu~
 do, jo nitø'r` jaléng' dsea` i cuíñ` jo nisí'reiñ':
 “Lana nijmi'iaang` dsí'naa', co' cadsé'baa coo`
 cunée~ quié~e e caling:~n~n cango'íing'.” ¹⁰ Jo laco'
 li'iaang` dsí' jaang` dsea` i dsé' cuu~ quiá'~, joba'
 lajob li'iaang` dsí' jaléng' ángeles quiá'~ Fidiéé` mi~
 caquí'~ jíng' 'ñia' jaang` dsea` i calilí^ e líiñ' dsea`
 dsee~ dsea` qui' fí' quini~ Fidiéé`.

*Mi~ ca'e' Jesús quiá'~ jaang` dseañu` i ca'íing~ dsee`
 quiá'~ jaang` jóo'r`*

¹¹ Jo mi~ calí~ jo, jo ca'e'gui Jesús jaléng' i dsea`
 do coo`gui júu^ já'~ e lafa' júu^ cuento jo cajíñ'~:

—Coo` née~ caliséng` jaang` dseañu`, jo caliséng` gáng- joor` dseañu`. ¹² Jo i jiuung` gui do coo` née~ casí'r- tiquiá'r^ jo cajíñ': "Teaa~, mi~ nijúung- 'nu, 'né- nilí jma'-jiu røø` jalé" e sea` quíi'- lana. Joba' fii- i 'nu` fa' jmée^ba' jma'-jiu jalé" e jo na la seeng`gui'." Jo dsifí' lajob cacuø` i tiquiá'r^ do lajii~ e catíiñ'- do. ¹³ Jo mi~ cangf` tú- 'ní jmi~ lajo, ca'náb` i siming` do jalé" e nicangíiñ` cacuø` tiquiá'r^, jo cóo~ jalé" e cuu- e calí'r- do cagüi'íbre góor` jo cangór- fí li~ huíi^ eáang, jo fí' job ca'íiñ- jalé" e cuu- quiá'r- do, jo cajmirøng` dsee- 'ñia'r' cóo~ jalé" e 'li^ e sea` fí' jmigüi. ¹⁴ Jo dsu' mi~ cangf` e cadseá'r- jalé" e cuu- quiá'r- do, lajee` job cali'øøng` jalé" e gø'` dsea` e fí' li~ táaiñ" do, jo coo` mi~ cangir' e jo ee` sea` dø'r-. ¹⁵ Jo joguiba' cajméer` quijí' ta~ nijmér- cóo~ jaang` dseañu` i seeng` e fí' li~ táaiñ" do, jo cangíiñ` coo` ta~ e jmóor` í` cú^ . ¹⁶ Jo dsíng'- lí dsíir' fa' nidø'-bijuar jalé" e gø'` i cú^ do lacoo` jmi~, co' ja` ee` 'ga' lí ngíiñ` e nidø'r- 'ñia'r'. ¹⁷ Jo lajee` jo dsíng'- cajo'- dsíir' quiá'- jalé" e cajméer` lamí~ jéeng`gui do jo ca'í dsíir': "Ja` ní` jøng`gui dsea` jmóo` ta~ quiá'- tiquié` e jo seab` e gø'r' laling` lana, jo dsu' jnea~ lab táan`n nijúun- n oo-! ¹⁸ Joba' ními^túu fí' góo`o jo ni'ném'^túu tiquié` e jo nifíi`ire: Teaa~, dsíng'- nicajmirøøng` dsee- 'ñiá'a fí' quini` Fidié` jogui fí' quini^ cajo. ¹⁹ Jo lana gán`n e iin`n nijmée'~ e ta~ lafa' jaang` dsea` 'léeng~ quíi^ba', jo jo` jmée'~ cuente e jóo` jnea~." ²⁰ Jo mi~ cangf` e ca'í dsíir' lado, dsifí' lajob cangáng'- tur fí' góor`, jo cango'néeng` tur tiquiá'r^.

'Jo jaquíém' niguieíñ' quiá'r- mi~ tí' li~ cangá- tiquiá'r^ e ningaiñ'. Jo dsíng'- calí' fii- líng-

i dseañu` do i jóor` do, jo e cui`bre cango-
 jmijng`neiñ' jo caróong` rúíñ'. ²¹ Joba' cajíng'-
 i siming` do casí'r- tiquiá'r^: "Teaa~, dsíng'-
 nica'lee~e fí quini` Fidiée` jogui nica'lee~baa fí
 quini` cajo, jo jo` jmée'~ cuente e jóo` jnea~."
²² Dsu' i tiquiá'r^ do dsifí lajob caquiá'r` ta~ dsea`
 'léeng' i née' ni~ sinúu` quiá'r- jo casí'-reiñ':
 "Güiquie`du' 'mi' e jlo`gui lajee` lajalé` e sea`
 jo niqui' i jóo`o la, jogui güiquie`na' coo` ní` iá~
 niguoo` jo ñicuóø`~na'r; jogui cuóø`~na'r caneáang`
 miloo` e 'míi- e ni'ó'r-. ²³ Jogui güitee`na' jaang`
 güitá^ jiuung~ i ni'úung`gui lajee` lajaléng`ne',
 jo nijngáang`na're' jo nilíng`ne' jmiñi`. iNá
 nijmó`oo' coo` jmíi~ jo ni'né`^ niquiee`naa' la-
 jalé`naa'! ²⁴ Dsüco' i jóo`o la huíib- eáang`
 nicangór- jogui huóøb- eáang` nicango`líñ; jo la-
 jee` jo ca'f dsii- e nicajúm`bre, jo lana lín`n e
 lafa' nicají'tur e nisiñ' la." Jo lajalém` i dsea` do
 canaaiñ` guiar` guíá- e cajmeáiñ` jmií~ i siming` i
 caguiéng'- do.

²⁵ Jo lajee` jo dob nitáang` i rúíñ` dsea` féng' do fí
 lí jmóor` ta~ quiá'- tiquiá'r^. Jo mi~ cangoquiéeiñ`
 fí quiá'r- mi~ tí lí canuu, jo canúur- e ii- lúu`
 jo ninaang` e née' tadséeng` fí quiá'r-. ²⁶ Jo mi~
 caguiéiñ` quiá'- o'ná^ quiá'r-, job sing' jaang`
 dsea` 'léeng`~ jo cajmingí'r- i dsea` do jo casí'-reiñ':
 "¿E`gui' jmoo`na' teáang`~na' na?" ²⁷ Joba' cañi`
 i dsea` 'léeng`~ do jo cajíñ': "Míi- cagüeang'- i
 siming` rún` i tá'- cangongí` do. Joba' dsíng'-
 cali'íáang` dsíi` tiquíi^, jo caquiá'r` ta~ e cajúng`-
 jaang` güitá^ jiuung~ i niguang`gui lajee` lajaléng`
 i seeng` quíi', joba' jmóor` jmií~ lana." ²⁸ Jo dsu'

mi~ canúu~ i siming' do lado sóong^ caliguiñ~, jo jo cali'iiñ~ fa' calí~ guir e sinúu^ li~ neé' jmiñ~ do. Jo mi~ calilí^ tiquiá'r^ e táang` i jóor' do caluu~, dsifí lajob cagüi'fir jo caguitee`reiñ'. ²⁹ Joba' cajíng'- i siming' do casí'r- tiquiá'r': "Contøøm- nicajmé- e ta~ quií'^ jo jíi~ coo` nee'~ ja` mí cajmé- e fa' e ja` núu~ u jalé' ta~ quií'^, dsu' jíi~ coo` nee'~ ja` mí cajmeáan'~ jnea~ jmiñ~, o'gui mí cacuóøn'~ jnea~ fa' jaam` jo'chí'^ quií'- e laco' nijmeáang'~ 'ñiá'a jmiñ~ cóo'~ jaléng' dsea` cuín`n. ³⁰ Jo dsu' lanagui e nicagüeang'-tu i rún`n na, dsea` nica'iiñ~ jalé' cuu- quií'- cóo'~ jalé' e li'^ e sea` fí jmigüi, jo 'nu' nicajngang' jaang` güitá^ jiuung~ i niguo'^gui lajee~ lajaléng' i seeng` quí-ii'."

³¹ 'Joba' cañií` tiquiá'r^ jo casí'-reiñ': "Yuu~ quí-ii', contøøm- guing` 'nu' cóo'~ jnea~, jo jalé' e sea` quié- e e quií'-ba' cajo. ³² Jo dsu' lana e nicagüeang'- i rún`n na dsi` í' e nijmeáang'~naa'r jmiñ~ jo nijmi'liáang` dsi'naa' jalé'naa'. Co' huóøb- nicango'iiñ', jo lajee~ jo nica'í dsi'naa' e nicajúm-bre; jo dsu' lanagui e nicagüeang'-tur, lí' e lafa' nicajíb'tur."

16

Mi~ ca'e' Jesús quiá'- jaang` dsea` 'léng' i ja` ca- jmée` ta~ røø` quiá'- fir~

¹ Jo mi~ cangí jo, jo ca'e'gui Jesús jaléng' dsea` i núu` jalé' júu^ quiá'r- coo'gui júu^ já'- e lafa' júu^ cuento jo casí'-reiñ':

—Coo` nee'~ caliséng` jaang` dseañu' i sea` cuu~, jo seeng` jaang` dseañu' i jmóo` ta~ contøøng- quiá'r- i nee' ni~ jalé' e sea` quiá'r-. Jo coo`

jmii~ caguilií dsee- quíá'- i dsea` 'léeng'~ do e lí' nica dseá'r- nica'liñ- lajɔ jalé' e sea` quíá'- fir~. ² Jo dsifí lajɔb cató- i dsea` sea` cuu- do cató'r- i dsea` 'léeng'~ quíá'r- do jo casí'-reiñ': "¿Su jáb'^ jalé' dsee- e nicajmée` jaléng' dsea` uii~ quíí'-? Lana nijáa~ jnea~ cuente quíá'- jalé' e sea` quíé'-e, co' latí' lanab jo` nijmée'^ ta` cóo'~ jnea~ co' jo` 'neán-n 'nua'." ³ Jo mi~ cangí jo, mi~ caguiéng'- i dsea` 'léeng'~ do fí' quíá'r-, jo canaaíñ` í' dsíir': "¿E~gui nijmee~e náng? Ná la catúun`n e jo` ee` ta` cuø' dsea` jnea~. Dsíng'- fñ'-n nijmee~e ta` jenuu, jogui dsíng'- i' lín-n nimii^ cuu- fí' jee~ 'núu'. ⁴ Dsa' nica'óm' dsii- e~ nijmee~e e laco' niliseeng` dsea` i niliguiúng- cóo'~ jnea~ mi~ níngí e jo` ta` sea` jmee~e." ⁵ Joba' canaaíñ` tó'r` lajaang` lajaang` i nirøøng` quíá'- fir~. Jo mi~ caguíé- la'uii~ i dsea` i nirøøng` do jo cajmingí'-reiñ': "¿Jial tí' røøng` 'nua` quíá'- fí'i?" ⁶ Joba' cañí' i dsea` do: "Cien sí' e a` aceite røøn- quíá'r-." Jo dsifí lajɔb cajíng'- i dsea` 'léeng'~ do casí'r- i dsea` do: "Lab róo` jì lí' táan' e røøn'. Téé' lana e røøn' júi~ cincuenta sí'." ⁷ Jo mi~ cangí lajɔ, cajmingí'r- jaang`gui i dsea` i røøng` do jo casí'-reiñ': "Jogui 'nua` ¿jial tí' røøn'?" Joba' cañí' i dsea` do: "Cien cuéé'~ micui'íee'." Joba' casí'- i dsea` do jo cajíñ': "Lab róo` jì lí' táan' e røøn', jo téé' e røøn' júi~ ochenta." ⁸ Joba' calilí' i fí' quíá'- i dsea` 'léeng'~ do e ja` ca'éeiñ' do røø` cóo'~ ta` quíá'r-, jo lifa' eáam`bre lí'r^ cóo'~ jalé' e cajméer` do. Jo lajɔb lí' cajo cóo'~ jaléng' i dsea` i ja` cuíng` Fidiéé', eáang`gui lí'r^ jmóor` jalé' e jmigóøiñ` dsea` rúíñ' laco'gui i dsea` i nilíng` dsea` quíá'- Fidiéé'.

⁹ Joba' liúun'~n 'nú' e jméaang'~na' ta` jalé' e sea`

e fi' jmigüi' li~ seeng` dsea` dsee- dsea` qui' e laco' nili'na' jaléng' dsea` i niliseeng` guiá- cóo'~ 'nú'. Jo lajoba' mi~ niguiá jalé' e sea` quií-na' fi' jmigüi', niliseem`bing' i ni'ing' 'nú' mi~ nití- fi' fi' cóo' jóng.

10 Jo ii` i ca'ée` jmang'- e guiá- cóo'~ capi' e sea` quiá'r-, joba' lajob ni'ér- mi~ nisea` jmiguiá quiá'r- cajo. Jo ii` i ja` jmóo` e guiá- cóo'~ capi' e sea` quiá'r-, joba' lajob ja` jmér- e guiá- fa' jialgui la jmiguiá e sea` quiá'r-. 11 Jo song ja` jmoo`na' e guiá- cóo'~ jalé' e sea` quií-na' fi' jmigüi' li~ seeng` dsea` dsee- dsea` qui', joba' lajob ja` nicuó'- Fidiée` 'nú' lajii'~ e catíng-na', dsea` líng-na' dsea` quiá'r-. 12 Jo song ja` ee-na' røø` cóo'~ jalé' e sea` quiá'- dsea` jiéng', joba' i' i nicuó'- 'nú' jalé' e catíng-na' do jóng?

13 Jo cajíng'- gui Jesús e júu` la:

—Jii'~ jaang` dsea` 'léeng'~ ja` quí- jmii~ fa' ni-jmér- ta~ fi' quini` gáng- fiir` colíng~, dsuco' song cajméer` lajo, joba' nilí` 'ní' níim-bre jaang` jogui nijmiti~bre ta~ e niquiá- i jaang`gui do. Jo co' lajob líí, joba' ja` quí- jmii~ fa' e nijmití-na' jalé' ta~ quiá' Fidiée` jogui e nijmití-na' cajo jalé' ta~ seáng' jmiguiá cuu- fi' jmigüi'.

14 Jo mi~ canúu- jaléng' dsea` Israel i líng' dsea` fariseo e cajíng'- Jesús jalé' e júu` na, joba' dsifi' lajob canaaíñ` e lóøiñ- dsea` do, co' eám` lí dsiiñ' jalé' cuu- quiá'r-. 15 Jo lalab cajíng'- Jesús casí'r- jaléng' i dsea` do:

—'Nú'bing' i tí dsíi` i ngí' jmi'jløng'^ yaang~ e ee-na' røø` fi' quini` jaléng' dsea` jmigüi', jo dsu' Fidiée` dsea` guing~ ñifí- niñi-bre guiá- jial líng-na' lajaang` lajaang-na'. Jo jalé' e jmi'gó` dsea`

eáang' fí jmiḡüü' la, dseáang' 'ní' ním- Fidiée' jalé' e jo.

Eáam' niing- jalé' júu^ quiu' ta~ quiá'- Moi~

16 Jo mi~ cangî e cajíng'- Jesús lajo, jo casí'- guir jaléng' i dsea` do jo cajíñ'-:

—Mi~ cajá- Juan i seáang` dsea` jmî, lajii' júu^ quiu' ta~ quiá'- Moi~ba' mí sea` cóo' gui jalé' júu^ e café' i dsea` i café' cuaiñ~ quiá'- Fidiée' malii' gui eáang'. Jo latí' ie~ job jaa' e guia' dsea` júu^ quiá'- Fidiée' quiá'- jial íing- dsea` do dsee- quiá'- dsea` jmiḡüü' jogui jial iin~ nicár` nifí quiá'- lajaang` lajaang` dsea`. Jo latí' ie~ job cuø' bí yaang~ dsea` e nitíñ' fí quini' Fidiée'.

17 'Jo eáang'gui ja` huíng' e ni'íng- guóo' uó- jmiḡüü' e laco'gui ja` niliti~ fa' camí'^ júu^ quiu' ta~ quiá'- Moi~.

Mi~ ca'e' Jesús e ja` cuøng` e nitiúung- rúng' dsea` i nisicúng' guó`

(Mt. 19:1-12; Mr. 10:1-12)

18 Jo mi~ cangî e cajíng'- Jesús lajo, jo casí'- guir jaléng' i dsea` do jo cajíñ'- lala:

—Song jaang` dseañu' catiúuiñ- dseamî quiá'r- jo nicúng' tur guóor` cóo' jaang` gui dseamî i jiéng', joba' 'lée'bre jóng fí quini' Fidiée', co' dseeb- éer'. Jogui i dseañu' i cúng' guoo` cóo' jaang` dseamî i catiúung- dseañu' quiá'-, joba' 'lée'bre cajo, co' dseeb- éer' fí quini' Fidiée'.

Jaang` dseañu' i sea` cuu- cóo' jaang` dseañu' i tiñíng-

19 Jo mi~ cangî e cajíng'- Jesús jalé' e júu^ na, jo casí'- guir jaléng' i dsea` do jo cajíñ'-:

—Coo` née^l caliséng` jaang` dseañu^l i sea` cuu` eáang', jo dsíng^l jlo^l jalé^l si^lr^e e quier', jogui lacoo` jmiib^l jmáng^l jmií^l ñia^lr'. ²⁰Jogui cajo seeng` jaang` dseañu^l dsea` dsée^l i sii` Lázaro i tiñíng^l eáang' i líng' 'mi' latøøng^l. Jo lacoo` jmií^l gua` i dsea` dsée^l do fi' o'nú^l quiá^l i dsea` sea` cuu` do ²¹e güijer^l fa' niñiñ` nidø^lr^l jalé^l e sojiú^l 'ni' mes^l quiá^l i dsea` sea` cuu` do lajee^l guiñ^l e gø^lr'; jo jiguí jaléng^l dsii` dsilíng^l ne' e 'u^lre' lacaang` lí^l lí^l 'mi' quiá^l i dsea` dsée^l do. ²²Jo coo` mi^l caguié^l jmií^l e cajúm^l i dsea` dsée^l do, jo casíng` Fidié^l jaléng^l ángeles quiá^lr^l jo catø^l reiñ^l do fi' lí^l guing^l Abraham fi' ñiff^l. Jo jo` huøø^l ngó^l mi^l cajúng^l Lázaro jo cajúm^l i dsea` sea` cuu` do cajo. Jo jaléng^l dsea` ruiñ^l cangojéng` neiñ^l do fi' codsii^l jo ca'áam^l breiñ^l do.

²³Jo mi^l cajné^l dsí^l i dsea` sea` cuu` do fi' jmiigüí coo`, joba' fi' lí^l 'lib^l ni'iuuiñ^l jóng, jo nicár^l jalé^l iihuí. Jo lajee^l jo caséer^l nir^l fi' yú^l jo cangáñ^l Abraham coo^l Lázaro e neáaiñ^l do colíng^l fi' ñiff^l. ²⁴Joba' canaang^l i dsea` sea` cuu` do áñ^l i dsea` do jo casí^l-reiñ^l: “Tea^l Abraham, fi^l güilín^l jnea^l jo síng`gø Lázaro fa' nicuø^lr^l jnea^l capí^l jmií, co' nili'lea^l nisí^l'i, co' dsíng^l quiee^l iihuí e fi' ni^l j^l la.” ²⁵Joba' cañí^l Abraham quiá^l i dsea` sea` cuu` do jo casí^l-reiñ^l: “Jóo^l, téé^l o', eáam' juguiú^l cateaang^l 'nu^l fi' jmiigüí, jogui Lázaro eáam' cangár^l iihuí lajee^l jo. Jo lanaguiba^l niní Lázaro juguiú^l, dsu^l 'nu^l nabi nicatí^l í^l e nimó^l jalé^l iihuí. ²⁶Jogui jí^l jaang' jneaa^l aa' ja' cuøøng^l ngiing^l naa' lacataang^l cataang^l, co' coo^l 'ni' e a' eáam' lí^l jee^l laco^l teáang^l na' jogui laco^l née^l jnea^l, jo ja' cuøøng^l fa' i dsea` neáang^l la ningíñ^l fi' na' o'gui i dsea`

teáang'~ na cuøøng` jaliĩn` fí' la."

27-28' J̄oba' cañí' i dsea` sea` cuu- do quiá'- Abraham j̄o casí'-reiñ': "Su ja` jiéé` o', Teaa~ Abraham, fa' niguiéen'~ Lázaro fí' jm̄igüi' fí' lĩ~ neáang' 'ñíng- rún'n dsea` ngáang'~ cóo'~o e nidsijmée'~reiñ' júu^ jial niteáiñ- fí' jm̄igüi', j̄o laj̄oba' nitíiñ'~ fí' lĩ~ guiá^ mĩ~ nijúuiñ-, j̄o ja` nijaliĩn` fí' lĩ~ iuun- lana e quiee- jalé" iihuĩ'." 29 J̄oba' cañí' Abraham quiá'- i dsea` sea` cuu- do j̄o casí'-reiñ': "Dob sea` jalé" j̄i lĩ~ fé' jalé" júu^ quiá'- Moi~ cóo'~gui jalé" júu^ quiá'- jaléng" dsea` i café" cuaiñ~ quiá'- Fidiée' mali'~gui eáang', j̄o güijmitir~ jalé" e j̄o." 30 J̄o cañí'tu i dsea` sea` cuu- do j̄o casí'r- Abraham: "Laj̄ob líi', Teaa~ Abraham. Dsu' eáang'gui ja` huñg' niquí'- nijíng" yaaiñ~ fí' quini' Fidiée' fíng song caguiéng'- jaang' 'lii~ j̄o niguiár- júu^ e~ jalé" iihuĩ' e cá' dsea' fí' la." 31 J̄oba' cañí'tu Abraham quiá'- i dsea` sea` cuu- do j̄o casí'-reiñ': "Song ja` jí'r~ o'gui já'- líiĩn` jalé" júu^ quiá'- Moi~ cóo'~gui jalé" júu^ quiá'- jaléng" dsea` i café" cuaiñ~ quiá'- Fidiée' mali'~gui eáang', j̄oba' laj̄ob ja` nilíjí'r~ o'gui já'- nilíiñ` caj̄o nañí' fa' jaang' 'lii~ nijí'r' j̄o niguieng'tur fí' jm̄igüi' calé" catú-."

17

Jial dseáang' e nijiúng' dsea' fí' ni~ dsee-
(Mt. 18:6-7, 21-22; Mr. 9:42)

1 Coo` née'~ cajíng'- Jesús casí'r- jaléng" dsea` quiá'r-:

—Contøøm- nilisea` jalé" e sea` fí' jm̄igüi' e ni- jmé- e nijiúng" dsea` fí' ni~ dsee-, j̄o dsu' e ngĩ' fíi- i dsea` i nijmé- e niténg" jaang'gui dsea` rúiiñ' fí' ni~ dsee-. 2 J̄o i dsea` i nijmé- laj̄o, guiá- gui ni'uíng-

quiá'r- e ni'ñá' dsea` fí' moluur` cōo` cuu` fé' jō nidsibíñ- fí' é' jmiñí' e laco'gui e nijmér- e niténg` fí' ni` dsee- jaang` dsea` i ja` mí ngóo` eáang` já' lñng` júu` quié` e. ³ Jōba' dsíng'- 'né- ñiing` óo'na' cóo'~ jalé' e jmoo`na'. Jō song jaang` dsea` rúng`na' ca'éer` dsee-, jōba' sí'~na'r e ja` dseeng` e jmér- lajō. Jōgui song caquí'- jíng` 'ñia'r' fí' quini` Fidié` uii'~ e dsee- do, jōba' íng`na' dsee- uii` quiá'r- jóng. ⁴ Jō doñí' fa' ca'léer' quií'-na' guié- née'~ lajee` cōo` jmí~, jōgui guié- née'~ cajár- cajasí'r- 'nũ: “Íng` dsee- uii` quié` e quiá'- jalé' e nicajmeáan`n 'nũ, dsũ' lana jō` nijmee`guí””, jōba' 'nú' 'né- íim`ba' dsee- uii` quiá'r- lacoo` née'~ e jár- jamí'r- 'nú' jmi'ee`.

Jial 'gøng' mi~ já'- lñng` dsea` jalé' júu` quiá'- Fidié`

⁵ Jō mi~ cangî jō, cajíng'- i dsea` guitúung` do casí'r- Jesús:

—Jmee- e já'- nilíng`guí' jalé' júu` quií'-.

⁶ Jōba' cañí' Jesús casí'r- i dsea` quiá'r- do:

—Ū~, fa' cóo'~ capí'`ba' e já'- lñng`na' júu` quié` e, jōba' cuøøm` nifí'`na' e 'ma` fé' si'` la e niráang- 'ñia' catí' jmó` jō nidsisíng` 'ñia' fí' ni` jmiñí', jō dsifí' lajōb niliti` jalé' e ta` e niquiá'`na' do.

E~ jalé' e catíng- e nijmé- jaang` dsea` 'léeng`

⁷ Jō mi~ cangî jō, jō cajíng'- gui Jesús e júu` la:

—Fa' 'nú' seeng` jaang` dsea` 'léeng`~ quií'na' i jmóo` jalé' ta` caluu` cóo'~ jalé' ta` sinúu` quií'-na', jō lacoo` jmí~ mi~ niniúíñ' ta` jí` osi ta` ní güitá` é, ja` nitø-`na'r e ni'í'` nidó'r- cóo'~ 'nú', ⁸ cō' niquiá'`na're ta` jō nifí'`na'r: “Guiá~ guiá- e nidóø'` jō ningíñ'- fí' quinií- jalé' e jō. Jō mi~

ningî joguiba' ni'u^ nicø'^ 'nu` uø'." 9 Jo mi~ cató' e jmóor` jalé' e jo, ja` ngíiñ` gui'máang' quiá'~ fiir~, co' jii'~ do ta~ quiá'~bre. 10 Jo lajob catáng~ nijmée^ 'nú' cajo mi~ ningî e jmití^na' jalé' ta~ quiu' Fidiée', co' 'né' fo^na': "Jii'~ dsea` 'léeng'~ lí' jnea'^, co' ja' caquí~naa' jmí~ e nijmó^naa' lí'gui, co' lico' nicajmó^naa' jii'~ laco' catám~baa'."

Mi~ cajmi'leáang~ Jesús guíng~ dsea` i lāng` jmohu'`li^

11 Jo mi~ cangî jo, lajee` iuung~ Jesús fí e ngóor` fí Jerusalén, cangíiñ` jee~ uó~ lí' iáng' Samaria cóo'~ Galilea. 12 Jo mi~ cangíiñ` coo' 'ni' fí, job ca'uøong` guíng~ dsea` dsée'~ i lāng` jmohu'`li^ fí ngúu' táang`. Jo mi~ cangáiñ~ Jesús, huíb~ cajer' e áiñ` dsea` do 13 jo casí'r~:

—Tifa' Jesús, fí~ güilín' jnea'^ e lí'naa' lala!

14 Jo mi~ canúu~ Jesús e tó` i dsea` do, dsifí ladob casí'~reiñ':

—Güilíng`na' güjjeaang~ yaang`na' fí quini` jmidsea` lí' laco' ta~ quiu' fí ni~ jì quiá'~ Moí~.

Jo dsifí ladob caquing'~ laji` guíng~ i dsea` dsée'~ do e nijmitir~ lajii'~ ta~ caqui' Jesús. Jo lajee` teáaiñ' fí, ladob ca'láaiñ~ lajii'~ jmohu' e líiñ' do. 15 Jo dsifí mi~ calilí^ jaang` i dsea` dsée'~ do e ca'láaiñ~, dsifí lajob caquing'~ tur fí lí' sing' Jesús jo canaaiñ` jmiféiñ' Fidiée' e ngocáng` dsíir'.

16 Jogui casí'r' uó^ jnir~ fí quini` Jesús, jo catúuiñ' car` cajnúu~ nir~ tí ni~ uó~, jo lajob cacuø'r' gui'máang'~ dsea` do e cajmi'leáang~neiñ'. Jo i dseañu' do seeiñ` fí Samaria, dsea` i 'ní' níng~ rúng' cóo'~ dsea` Israel. 17 Joba' cajíng'~ Jesús casí'r~ i dseañu' do:

—¿Su o' guíng- 'ná' tí'na' dsea` ca'láang-na' lajii~ jmohuí' e lamí~ líng-na'? Jo ¿jnan~gui i ñúng-gui do? ¹⁸ ¿Su jii~ 'nab` dsea` seen' fí Samaria dsea` cañijmiféng' Fidié~ dsea` guing~ ñiff-?

¹⁹ Jōba' cajíng'- Jesús casí'-guir i dsea` do:

—Ráan'- jo guóng' fí quí'-, co' nica'láam-ba' lajii~ jmohuí' e lamí~ lin', co' jáb'- calín'- lajii~ júu^ quié-e.

*Jial mi~ nijáa'tu Dsea` Jmáang- fí jmigüi' la
(Mt. 24:23-28, 36-41)*

²⁰ Jo cajmingí'tu dsea` Israel i líng' dsea` fariseo cajmingí'r- Jesús jo cajíñ'-:

—¿Li~ nináng` e nicá` Fidié~ nifí' quía'- jaléng' dsea` jmigüí'?

Jōba' cañi' Jesús quía'- i dsea` do jo casí'-reiñ':

—Mi~ nináng` e jo jee~ jaléng' dsea` jmigüi, ja lí' la lí' coo` e cuóong` lí' jøø^na'; ²¹ o'gui cuóong` nijíng'- dsea`: “Lab canaang”, osi “Dob canaang` é”; co' latí' lanab ninaang` e quie' Fidié~ nifí' jee~ 'ná'.

²² Jogui canaang` Jesús sí'r` jaléng' i dsea` quía'r- do jo cajíñ'-:

—Niguiéé' jmii~ mi~ nili'iing~na' e nimáang~gui' jnea~, dsea` i jáa' fí ñiff- e lín'n jaang` dsea` jmigüi, jo dsu' jo` quí'- jmii~ fa' e nimáang~gui' jnea~, co' jo` seen- fí jmigüi la ie~ jo. ²³ Jogui fíng' dsea` nijmigóor` jo nijíñ'-: “Fí lab táaiñ”, osi: “Fí dob táaiñ` é”, dsu' ja` já'- güilíng-na', o'gui güilíng-na' fí li~ nitó'r` 'ná'. ²⁴ Dsuco' la jnéeng- fí yú^ jmigüi mi~ jmijnea` güi'ñiá^ jire', lajob nilí mi~ nigáa'tuu fí jmigüi la, jnea~ dsea` lín'n jaang` dsea` jmigüi

i jaa' fi' ñiffi-. 25 Jo dsu' nu'-gui e nidsijee' jalé' e jo, 'né- nicaa- jalé' iihuú', jo fíim' dsea` jmigüi` nilí' 'ní' níiñ- jnea~. 26 Jo laco' calí- mi~ cateáng` Noé fi' jmigüi` la malii~gui eáang', lajob nijmé- dsea` jmigüi` cajo lajee` nu'-gui e nigaa' jnea~ calé' catú- fi' jmigüi`, jnea~ dsea` lán'n jaang` dsea` jmigüi` i jaa' fi' ñiffi-. 27 Co' ie~ jo cajmée` dsea` e jo` e guing~ dsíir' e jié', co' lico' guing~ dsíir' quía'- jii'~ e ni'í' nidó'-bre jogui quía'- e nicúng'- guó' jóor'; jo lajob cajmeer` cartí mi~ caquiá' Fidiée` ta~ quía'- Noé e ni'ír' cóo'~ dsea` sinúú` quía'r- fi' dsíi' e móo' e nicajme'r' do. Jo lajee` jo catí' í' e tuu` jmii' jo ca'á' jmii' la'úng- fi' jmigüi`, jo jalém' dsea` jmigüi` cajúñ- ie~ jo. Jo dseáng'- jii'~ Noé cóo'~ dsea` sinúú` quía'-bre caláaiñ- ie~ jo. 28 Jo lajob cajmée` dsea` cajo mi~ cateáng` jaang` i calisí Lot fi' jmigüi` la; jo ee' guing~ dsíir' e jié', co' lico' guing~ dsíir' jii'~ e ni'í' nidó'-bre cajo, jogui e teáaiñ' ta~ 'nii' jogui ta~ láa' jalé' e sea' fi' jmigüi`, jogui jmóor' ta~ jni' jalé' e sea` jogui ta~ jmo' jalé' 'núú' e jlo' cajo. 29 Jo coob` mi~ caquiá' Fidiée` ta~ e cagüi'íi' Lot fi' fii' Sodoma, jo jmii' job cajmeer` e cajiá' jii' e quiéeng` azufre fi' yá' jmigüi`, jo lajoba' ca'ím- congua' lajaléng' i dsea` i neáang' fi' fii' Sodoma ie~ jo. 30 Jo laco' cajmée` dsea` ie~ jo, lajob nijmé- tu dsea` jmigüi` mi~ tí li~ nijaquiéeng' e nigaa' túu fi' jmigüi` la, jnea~ dsea` lán'n jaang` dsea` jmigüi` i jaa' fi' ñiffi-.

31 'Jo mi~ niguiée' e jmii' jo, ii` dsea` i taang~ fi' caluu` osi fi' yá' 'núú' é, óong-gui quía'r- güicuú'bre jo ja` güi'í' dsíir' fa' e niqúúñ' e nidsi'uóor~ jalé' e sea' quía'r-. Jogui ii` dsea` i táang` fi' li~ jmóor' ta~ quía'r-, óong-gui quía'r-

güicufi`bre jo ja` güi'í^ dsíir' fa' e nidséng'`guir fi' quiá'r`. ³² Jo téé' óo'na' jial cangongíng` dseamí' quiá'- Lot mi~ cajøør` jial sojiú' jì jee~ fií Sodoma. ³³ Jo jaléng'`dsea` i lãng` e quíi'~bre jmií~ e nileáng` yaaiñ~, joba' í'bing' i nijúung` mi~ nití' í' lajo. Jogui jaléng'`dsea` i lí'^ e ja` quíi'r` jmií~ e nileáng` yaaiñ~, joba' í'bing' nitíng'` fi' quini` Fidiée` mi~ nití' í' lajo.

³⁴ 'Joba' fií`i 'nú'` lana, mi~ niguiéé' e oor~ jo, gáng` dsea` teiñ'` jmi'íñ'` fi' ni~ co'ma'; jo jaaíñ'` do nijér`, jogui jaang`guir nidséiñ'` cóo'` jnea~ fi' ñífi`. ³⁵ Jo gáng` dseamí' i teáng'` dsí' colíng`~; jaaíñ'` do nijér`, jogui i jaang`gui do nidséiñ'` cóo'` jnea`. ³⁶ Jo gáng` dseañu'` taaiñ` colíng` e jmóor` ta` quiá'r`; jaaíñ'` do nijér`, jogui i jaang`gui do nidséiñ'` cóo'` jnea`.

³⁷ Jo mi~ canúu` jaléng'` i dsea` do e cajíng'` Jesús lado, joba' cajmingi'r` dsea` do lala:

—Fíi'ì, ¿jie` fi' lí~ nidsijéé' jalé' e jo, faa~aa'?

Joba' cañí' Jesús quiá'- jaléng'` i dsea` do jo ca-jíñ'`:

—Jié' lí~ róo` ngúu' jmé', fi' job lí~ niseáng'` jaléng'` tujlí'.

18

Mi~ ca'e' Jesús quiá'- jaang`dseamí' i 'nñ'

¹ Jo mi~ cangí jo, canaang` Jesús e'r` jaléng'` i dsea` do cóo` júu^ já'^ e lafa' júu^ cuento, jo ca'e'`reiñ' e 'né' féiñ'` Fidiée` contøøng` e ngocáng` dsíir', ² jo lalab casí'r`:

—Coo` née'~ caliséng` jaang` dsea` i quidsí' í' fi' cóo` fií, jo i dsea` do ja` ee` jmiféiñ'` Fidiée` jíi'`

capí[^] o'gui jmi'gór` jaléng[^] dsea` rúíñ[^]. ³ Jo fí job niseeng` jaang` dseam[^] i` 'n[^]í, jo ninicajméer` m[^]í[~] cóo[^] jaang` dsea` góor`. Joba' i` dseam[^] do contøøm` dséer' fí quíá[^] i` dsea` i` quidsí' í[^] do e dsim[^]í[~]reiñ' fa' e niquidsiñ' do í[^] laj[^]í[~] e lí' seeiñ`. ⁴ Jo huøøb` jiu cangoca` ja` ee` jmijí[~] i` dsea` i` quidsí' í[^] do laj[^]í[~] júu[^] quíá[^] i` dseam[^] do, jo dsu' coob` m[^]í[~] ca'f' dsíir': "Ja` iing` jnea` jmifén'n Fidiée` o'gui jmi'goo` j[^]í[~] jaang` dsea` jmigüí, ⁵ dsu' nú[^]-gui e niguíá[^] féng' dsii` cóo[^] i` dseam[^] 'n[^]í la, nijmi'øm'baar e laco' jo` ningí`guir ta` jmiguíng` jnea` laco` jm[^]í[~]."

⁶ Jo m[^]í[~] calí[~] e cajíng[^]- Jesús e júu[^] na, jo casí'r` jaléng[^] i` dsea` do jo cajíñ[^]:-

—Lanab j[^]í[~] lí' e cajíng[^]- i` dsea` i` ja` quidsí' í[^] laco' catíng` do. ⁷ Jo dsu' eáang`gui jmi'øng[^] Fidiée` jaléng[^] dsea` quíá[^]r` i` féng' ír` uøø` jm[^]í[~]. ⁸ Co' fí[~] i` 'nú' e ja` nijmi'íiñ` laj[^]í[~] jmi'ee` e nilimí'r[^]. Dsu' m[^]í[~] nigáa`tu jnea` calé[^] catú[~], jnea` dsea` lín'n jaang` dsea` jmigüí i` jáa' fí ñifí[~], ne` duu' su niguiéng' guí coo` tú[~] m[^]íng[^] dsea` i` já[^]- líng` júu[^] quíe` e.

Mí' ca'e' Jesús júu[^] quíá[^]- jaang` dsea` fariseo cóo[^]- jaang` nodsicuu[~]

⁹ Jo m[^]í[~] cangí jo, ca'e'gui Jesús coo`gui júu[^] e catíng` jaléng[^] i` dsea` i` jmóo` ta` jmíçøng[^] yaang` jogui e gøøm` níiñ` dsea` caguaang`, jo lalab casí'r` i` dsea` í[^]:

¹⁰ —Coo` née[^] cangolíng` gáng` dseañu[^] e can-goféiñ[^] Fidiée` fí guá[^]:- jo jaaiñ[^] do líiñ` dsea` Israel i` líng` dsea` fariseo, jo i` jaang` do jmóor` ta` m[^]í[~] cuu` e catíng` dseata` seeng` fí Roma. ¹¹ Jo laco' sim' i` dsea` Israel i` líng` dsea` fariseo do m[^]í[~]

canaaiñ` fé'r` fa' quiá'r- jo cajíñ'- lala: “Fidiéé` qui-ii', gui'máam'`ba' 'leáang- co' ja` líng' jnea~ laco' líng' dsea` caguaang-; co' seeng` dsea` i jmóo` ìì jogui seeng` dsea` i soo` dsíí' jogui seeng` dsea` i ngí' 'lée' e güiñ` cóo'~ dseañu` osi dseamî i o' quiá'r-. Jogui ja` lín'n jii'~ capí' laco' líng' 'ná' nodsicuu- i sing' do. ¹² Co' jnea~ jmóo` ayuno tú- née'~ laco` seaman~, jogui cuóø`baa 'nu' lajii'~ e sea'jiu quié` e laco'gui ta~ huí' fí' ni~ jì quiá'- Moi’.” ¹³ Jo lajee` fé' i dsea` Israel i líng' dsea` fariseo do lado, huím-jiu caje` i nodsicuu- do, jo ja` cateá- dsíir' fa' caséer` nir~ fí' yá'^, jo lico' catú' gui~bre jo canaañ` quiúur` nidsíir' jo lajee` jo fé'r': “iFíi` Fidiéé` dsea` guiin'~ ñiff-, íng' dsee- uii~ quié` e, co' dsea` dsee- dsea` quib' lín'n!”

¹⁴ Jo lalab cajíng'-gui Jesús:

—Lala fii` i 'nú' e íáam` dsíí' i nodsicuu- do mi~ cangáañ'- fí' quiá'r-, co' nica'íim- Fidiéé` dsee- quiá'r-, jo dsu' ja` ca'íing-re'r dsee- quiá'- i dsea` fariseo do. Jo lajob nidsingíng- jaléng' dsea` i jmicóøng'~ yaang~, co' í'bing' i nicá' fí'í', jo dsu' jaléng' dsea` i ja` jmicóøng'~ yaang~ jii'~ capí', í'bing' i niliniing-gui fí' quini` Fidiéé` mi~ nití' í' lajo.

*Mi~ cajmigüeang'^ Jesús jaléng' jiuung`
(Mt. 19:13-15; Mr. 10:13-16)*

¹⁵ Jo mi~ cangî jo, fíng' dsea` caguiliñ- e jéeiñ` jaléng' jiuung~ quiá'r- fí' lí' táang` Jesús e iin~ e nijmigüeang'^ dsea` do jaléng' i jiuung~ do. Jo mi~ cangá- i dsea` guitúung` do e jmóo` dsea` lajo, joba' canaañ` 'gaam`bre quiá'- jaléng' i sejmiì i jiuung~

do. ¹⁶ Jò dsu' dsifí ladob cató'⁻ Jesús jaléng'⁻ ì dsea' quiá'r⁻ do jò casí'⁻ reiñ':

—Cuóø'⁻ na' fí jaléng'⁻ ì jiuung~ na güjialiñ~ fí la, jò ja' jñing~ na' quiá'r⁻. Dsaco' jaléng'⁻ dsea' ì líng' laco' la líng' ì jiuung~ na, í'bing' ì catíng~ e Fidiéé' quie' nifí quiá'r⁻. ¹⁷ Jò jnea~ jmitaa~ óo'na' e dseáng'⁻ ì ì ì ja' iing~ ni'íng'⁻ e Fidiéé' nicár' nifí quiá'r⁻ laco'gui íng'⁻ jaang' jiuung~, joba' ja' toó~ jmí~ e ni'íng'⁻ Fidiéé' dsea' do cajo.

Mí casíng~ Jesús cóo'⁻ jaang' dseañu'⁻ ì sea' cuu~ (Mt. 19:16-30; Mr. 10:17-31)

¹⁸ Jò mí cangí jò, cangoquiéeng' fí lí táang' Jesús jaang' dseañu'⁻ ì líng' jaang' fí quiá'⁻ jaléng'⁻ dsea' ì néé' ni' guá'⁻ quiá'⁻ dsea' Israel, jò cajmingí'r⁻ dsea' do jò cajíñ'⁻:

—Tifa' ì guiá~ dsíí, ¿e' 'né~ nijmee~ e laco' nilí'⁻ e niliseen~ cøøng' cóo'⁻ Fidiéé' car' ngongí~ jmí~?

¹⁹ Joba' cañí' Jesús quiá'⁻ ì dseañu'⁻ do jò casí'⁻ reiñ':

—¿Jiali' fí' jnea~ e guiá~ dsii~? Co' jíí~ Fidiéeb' dsea' guiing~ ñifí~bing' ì líng' lajò. ²⁰ Jò niñíb^ 'nua' jalé' júu^ quiu' ta~ quiá'⁻ Fidiéé' e fé' lala: “Ja' 'lee' e güñ' cóo'⁻ dseamí osi dseañu'⁻ ì o' quíí'⁻; ja' jngán' dsea' rún'⁻; ja' jmée'⁻ ì; ja' cá'⁻ júu^ e o' já'⁻; jogui jmí'goo' tiquíí'⁻ cóo'⁻ niquíí'⁻.”

²¹ Jò dsifí ladob cañí' ì dseañu'⁻ do quiá'⁻ Jesús jò casí'r⁻ dsea' do:

—Lajaléb' e jò nicajmé~ e núu'⁻u latí jíí~ mí simim'⁻baa.

²² Jò mí canúu~ Jesús e cajíng'⁻ ì dseañu'⁻ do lado, jò dsifí ladob cañí'tur quiáiñ'⁻ do jò casí'⁻ reiñ':

—Coo`gui 'né e nijmití[^]: guóng' fí quí⁻ jo güi'nü[~] lajalé e sea` quí⁻, jo e nilí[^] quí⁻ e jo güijmee⁻ guié[^] jee[~] jaléng[^] dsea` tiñíng⁻, jo joguiba' nilisea` juguí⁻ quí⁻ mi[~] nití⁻ fí jmigüí[^] coo`. Jo mi[~] calí⁻ e nijmé[^] lajo, joguiba' niñi' jo dsé[^]ee' cóo[^] jnea[~] jóng.

²³ Dsu' mi[~] canúu⁻ i dseañu[^] do e cajíng⁻ Jesús lado, dsíng⁻ calí⁻ jiuung[~] dsíur', co' dsíng⁻ sea` cuu⁻ quí⁻r'. ²⁴ Jo mi[~] cangá⁻ Jesús e calí⁻ jiuung[~] dsíi' i dseañu[^] do dsu' canúur⁻ lado, joba' dsifí ladob casí⁻r⁻ jaléng[^] i dsea` i teáng⁻ do jo cajíñ⁻:

—Dsíng⁻ huíng' lí[^] quí⁻ jaléng[^] dsea` sea` cuu⁻ e nijáng[^] yaaiñ[~] fí jaguó[^] Fidié[~] e laco' dsea` do nicá nifí quí⁻r'! ²⁵ Jo eáang'gui ja` huíng' e jaang' jó[^] camello ningíng⁻ne' fí dsíi' too' jmini[~] mocuu⁻ e laco'gui jaang' dsea` sea` cuu⁻ nijáng[^] 'ñia⁻r' fí jaguó[^] Fidié[~] e laco' dsea` do nicá nifí quí⁻r'.

²⁶ Jo mi[~] canúu⁻ jaléng[^] i dsea` i teáng⁻ do e cajíng⁻ Jesús lado, dsifí ladob cajmingi⁻r' dsea` do jo cajíñ⁻:

—Jo ¿i[~] jaléng[^] i nitíng[^] fí quini[~] Fidié[~] jóng song lajobi nilí[^]?

²⁷ Joba' cañi' Jesús quí⁻ jaléng[^] i dsea` do jo casí⁻reiñ⁻:

—Jalé[^] e ja` quí⁻ dsea` jmigüí[^] jmü[~] nijmér⁻, lajib' cuóøng[^] lí jmé⁻ Fidié[~] dsea` guiing[~] ñifí⁻.

²⁸ Jo mi[~] canúu⁻ i Tú[^] Simón do e cajíng⁻ Jesús lado, jo dsifí ladob casí⁻r⁻ dsea` do jo cajíñ⁻:

—Fíi, jnea[^], dsea` ngí⁻naa' contøøng⁻ cóo[^] 'nu[^], nicatú[^]baa' lajalé[^] e sea` quí⁻naa', co' ii⁻naa' e ngí⁻naa' cóo[^] 'nu[^] latab[~].

29 J_oba' cañí' Jesús quiá' i Tú Simón do j_o casí' reiñ':

—E já' e fí' i 'nú', doñí' i' 'nú' catú'na' 'nú'na', osi ca'naang'na' quiá' tiquí'na' osi niquí'na' osi jaléng' rúng'na' osi dseam' quí'na' osi jaléng' j_o'na' é dsu' uí' e nicajáang' yaang'na' fí' jaguó' Fidié' e laco' quier' nifí' quí'na', j_o i' dsea' i' nijmé' laj_o, ³⁰ í'bing' i' niñíng' jalé' e 'nér' fí' jmigü' la; j_o mi' nití' fí' jmigü' c_oo', niñíñ' e niliseeiñ' c_oong' c_oo' dsea' do lata'.

Mi' cajmée' tu Jesús júu' e nijngáng' dsea' ír'
(Mt. 20:17-19; Mr. 10:32-34)

31 J_o mi' cang' j_o, lajee' iuung' Jesús fí' e ngóor' fí' Jerusalén c_oo' jaléng' dsea' i' ngolíng' c_oo'r', j_o lajee' j_o co' cat_o' bre i' dsea' guitúung' quiá'r' do j_o casí' reiñ':

—Lana ningóo' fí' Jerusalén fí' lí' niliti' jalé' júu' e cajíng' uii' quí' e jaléng' i' dsea' i' café' cuaiñ' quiá' Fidié' mali'gui eáang', jnea' dsea' gáa'a fí' ñifí' e lán'n jaang' dsea' jmigü'. ³² J_o fí' j_ob lí' nijáng' jaléng' dsea' góo'naa' jnea' fí' jaguó' jaléng' dsea' i' ja' cúing' Fidié'. J_o jaléng' i' dsea' í' nilóñ' jnea' j_ogui nijmineaiñ' jnea' j_ogui niñíñ' jnea' ³³ j_o nijmihuñ' jnea' la tí' e já' dsíir' cartí' nijngáiñ' jnea'; j_o dsu' mi' nití' 'ní' jmí' laj_o e nijngáng' dsea' do jnea', j_oba' nijíb' túu' calé' catú'.

34 J_o mi' canúu' i' dsea' guitúung' do e cajíng' Jesús lado, jí' camí' júu' ja' cangáiñ' o'gui ñir' e' uing' quiá' e café' dsea' do lado.

Mi~ cajmi'leáang- Jesús jaang` dsea` tiuung- fi` Jericó

(Mt. 20:29-34; Mr. 10:46-52)

³⁵ Jò mi~ cangî e casîng- Jesús cóo~ i dsea` guitúung` do, catam'~tur fi' teáaiñ~ jò caguiliñ~ quiá'- cóo` fi` li~ sii` Jericó. Jò 'ni' fi' niguiing~ jaang` dsea` tiuung- e mir' jalé' e 'ner- cóo~ jaléng' dsea` i ngîng' e fi' li~ guiiñ~ do. ³⁶ Jò mi~ canúu- i dsea` tiuung- do e dsíng'- fîng' dsea` guijalíng- fi' li~ guiiñ~, jò cajmingí'r- i dsea` i ngîng' quiá'- do e~gui' calí- e jalíng- fîng' dsea`. ³⁷ Jòba' cajme' dsea` júu^ i dsea` tiuung- do e Jesús dsea` seeng` fi' Nazaret gui'ná^ ngîiñ' fi' do cóo~ dsea` quiá'r-. ³⁸ Jò mi~ canúu- i dsea` tiuung- do lado, jò canaiñ` áiñ' Jesús jò casí'r- dsea` do:

—¡Jesús, siju~ dseata~ Daví^, fi~- güilín' jnea~!

³⁹ Jò dsu' mi~ canúu- i dsea` ngolíng- nifi' do e canaang` i dsea` tiuung- do e áiñ' Jesús, jòba' canaiñ` 'gaam`bre quiáiñ'- do e laco' jò nifé'guiiñ' lajò. Jò dsu' i dsea` tiuung- do lí^ lí' teágui canaiñ` ám`bre dsea` do jò fé'tur lala:

—¡Jesús, siju~ dseata~ Daví^, fi~- güilín' jnea~!

⁴⁰ Jò dsifí' mi~ canúu- Jesús e tó` i dsea` tiuung- do, dsifí' ladob cajer', jò caquiæ'r ta~ e cangotée` dsea` i dsea` tiuung- do jò cangojéeng`neiñ' tí quiá'- li~ sing' Jesús. Jò mi~ caguieiñ'- do quiá'-, jò cajmingí'reiñ':

⁴¹ —¿E~ iin~ e nijmee~e quíi'?

Jòba' cañí' i dsea` tiuung- do jò casí'r- Jesús:

—Fí'i, iin~n e nijmée'^ e nilijné`baa.

⁴² Jòba' cañí' Jesús casí'r- i dsea` tiuung- do:

—jGüilijné' jo! Jo nica'láam-ba', co' jáb'-
nicalín'- júu^ quíé-e.

⁴³ Jo dsifí lajob calijné' i dsea` tiuung- do, jo canaaiñ` jmiféiñ' Fidiéé` lajee` e ngóor` cóo~ Jesús. Jo jaléng' dsea` i cangá- e cajméé` Jesús ie~ jo, cajmifém' bre Fidiéé` cajo.

19

Jesús cóo~ jaang` nodsicuu- i sii` Zaqueo

¹ Jo mi~ cangá jo, caguiéb- Jesús fí Jericó. Jo mi~ cangáiiñ` jee~ fií, dsíng'- fíng' dsea` caseáiñ'.
² Jo e fí jo niseeng` jaang` fií jaléng' nodsicuu- i sii` Zaqueo i sea` cuu- eáang', ³ jogui eáam' iñ~ do nijmicuíñ` Jesús, dsu' ja` lí'r` niníiñ- dsea` do co' dsíng'- fíng' dsea` caseáiñ' ie~ jo, jogui Zaqueo líiñ` jaang` dseañu' i ja` 'ga' lí' féng'. ⁴ Jo mi~ calilí'r^ e ja` tíiñ- fa' niníiñ- Jesús, jo cangojéem` bre quía'- jaléng' i dsea` do, jo cajgóor- fí cóo` yá' 'ma` e sii` sicómoro, co' calilí'r^ e fí job cuóøng` niníiñ- dsea` do. ⁵ Jo jo` huóø- líiñ~ cangúng' Jesús uii~ e 'ma` lí~ dsíng- Zaqueo do, jo cajóøng- neiñ' do lí~ dsíiñ'- jo casí'- reiñ':

—Jminá- güíng' lí~ dsíin'^ na, Zaqueo, co' lana 'né- nijaa- fí quíi'-.

⁶ Jo mi~ canúu- Zaqueo lajo, guiúb- jmóor, jo dsifí ladob cajgáiñ- e cango'íiñ~ Jesús, jo colíim~ cangáiñ'- cóo~ dsea` do fí quía'r-. ⁷ Jo mi~ cangá- jaléng' dsea` e cangó- Jesús fí quía'- i nodsicuu- i sii` Zaqueo do, dsifí lajo canaaiñ` éeiñ` Jesús, jo fé'r` e dsea` do cangojer~ fí quía'- jaang` dsea` i røøng` dsee- eáang'. ⁸ Jo mi~ nineáaiñ' fí quía'- Zaqueo, lalab cajíñ'- do casí'r- Fí'naa' Jesús:

—Janúʼ, Fíʼi, lana nicuøʼ jaléngʼ dsea` tiñíng` condseáʼ jaléʼ e sea` quiéʼe, jo` quiáʼ- lajaang` lajaang` dsea` i nicajméʼ e ii` quiáʼ, lana nijáaʼ are quiúʼ 'léʼgui lacoʼ jiiʼ e nicacáʼ a quiáʼr` do.

⁹ Jo mi` canúu` Jesús lajo, lalab casíʼr` dsea` do:

—Jmii` na niseeng` dsea` e fí` dsíʼ sinúu` la i nicaláang` jee` jaléʼ dsee` quiáʼ, coʼ i dseañuʼ na nicajmilir` e límʼbre siju` 'lii` yúu` Abraham cajo. ¹⁰ Coʼ jnea~, dsea` i jáaʼ fí` ñiff` e línʼn jaang` dsea` jmigüi, cagáʼ a e líʼ lacoʼ cagaʼnénʼn jogui e cagaleaan` jaléngʼ dsea` i røøng` dsee` fí` quini` Fidiéʼ.

Mi` caʼeʼ Jesús e ta` e cajmée` dsea` cóoʼ cuu` quiáʼ dseata`

¹¹ Jo mi` cangí jo, lajee` iuung` Jesús fí` e ngóor` cóoʼ dsea` quiáʼr` fí` Jerusalén, jo` caʼeʼr` jaléngʼ dsea` do cóo` júu` jáʼ e lafaʼ júu` cuento, dsucoʼ nijaquiém` e niguilíiñ` fí` Jerusalén, jo` fí` job` í` dsíʼ jaléngʼ dsea` e Jesús niquiáʼr` ta` jee` jaléngʼ dsea` góor` dsea` Israel líʼ lacoʼgui la jmóo` jaang` dseata` dsea` féngʼ i seeng` fí` jmigüi` la. ¹² Jo lalab casíʼr` jaléngʼ i dsea` do:

—Coo` néeʼ caliséng` jaang` dsea` 'goo, jo` caliʼiiñ` e nilíiñ` dseata` dsea` féngʼ fí` cóo` fi` lí` huíʼ. Jo mi` calíiñ` e ta` do, 'né` niquimʼ tur` fí` góor, coʼ fí` job` lí` nilíiñ` dseata` dsea` féngʼ. ¹³ Dsuʼ núʼgui e nigüiʼír` lí` nidsiʼiiñ` e ta` do, catóʼr` guíng` dsea` 'léengʼ quiáʼr, jo` cacuøʼ reiñ` do jmáʼ có` cuu` e 'moʼ eáang` lajaang` lajaaiñ` jo` cajiñ` casíʼr` reiñ` : “Jmee` naʼ ta` cóoʼ e cuu` la lajee` ninii` i jo` cartí` nigüeángʼ túu.” ¹⁴ Jo dsuʼ jaléngʼ dsea` góo` i dseata` dsea` féngʼ do ja` iiñ` e nilíiñ` do e ta` jo, coʼ

dsíng'-' ní' níng- neiñ', joba' casíñ' do nifí' gui tú-
 'ní' máng'~ dsea` í caguijmé' júu^ í dsea` nija' ta~
 do e ja` jí'r~ í dsea` góor` do fa' e í do nilíng- dseata~
 dsea` féng' quiá'r-.

15 'Jo dsu' ja` lí~ cacóng', cō' calím- í dsea` do
 dseata~ dsea` féng' lajii'~ laco' ta~ cahuí'. Jo mĩ~
 cangoyúung' jo, cangám'-tur fí' góor`. Jo mĩ~
 caguiéiñ' fí' quiá'r-, jo caquiá'r' ta~ e calité' í dsea`
 guíng- í cacuø'r' cuu- do lamĩ~ ná' gui e nigüi'fir'
 nidsér-, cō' cali'iiñ~ e calidseáang' dsír' jial tí' cuu-
 nicalíiñ' do lajaang` lajaaiñ`. 16 Jo mĩ~ caguié- í
 la'uii~ do, joba' cajíñ'- casí'r- í dseata~ dsea` féng'
 do: “Fí'i, cajmé~baa ta~ cóo'~ e cuu- e casee'~ cóo'~
 jnea~ do, jo nicalí'~baa guí' 'lé'gui e laco' jíi'~ e
 casee'~ do.” 17 Joba' cajíng'- í dseata~ dsea` féng'
 do casí'r- í dsea` 'léeng'~ quiá'r- do: “Eáam' guiú-
 lajo, 'nub' jaang` dsea` 'léeng'~ í guiúng-, cō' tĩm'ba'
 jmé'^ ta~ cóo'~ capí'^ cuu-, jo lana nicuøøø 'nu' e
 nilíin'- jaang` dseata~ quiá'- guí' fi'.” 18 Jo mĩ~
 cangí jo, caguié- jaang'gui í dsea` 'léeng'~ do, jo
 casí'r- í dseata~ dsea` féng' do jo cajíñ': “Fí'i,
 cajmé~baa ta~ cóo'~ e cuu- e casee'~ cóo'~ jnea~ do,
 jo lana nicalí'- í 'ñiá' 'lé'gui lajo.” 19 Joba' cañi' í
 dseata~ dsea` féng' do quiá'- í dsea` 'léeng'~ quiá'r-
 do jo casí'-reiñ': “Nicuøøø^baa 'nu' e nilíin'- dseata~
 quiá'- 'ñiá' fi' cajo.” 20 Jo mĩ~ cangí jo, caguié-
 jaang'gui í dsea` 'léeng'~ do, jo casí'r- í dseata~
 dsea` féng' do jo cajíñ': “Fí'i, lab quiee~e cuu-
 quí'- e casee'~ cóo'~ jnea~ do. Ca'meá'baa laco'
 mĩ~ ca'íin'~n do, 21 cō' 'góm'~baa 'nu', cō' lí'^ tí' o' e
 sitíng'~ jalé' ta~ jmóo' dsea` jiém'.” 22 Joba' cañi' í
 dseata~ dsea` féng' do quiá'- í dsea` 'léeng'~ quiá'r-

do jò casí^l-reiñ^l: “Nub^l jaang^l dsea^l 'léeng^l i fi^l i soo^l dsí^l, jò lana nijmiti^lbaa lajii^l e nicafée^l na. ²³ Song niñí^lbi^l e sitán^ln cuu^l quíá^l- jalé^l ta^l jmóo^l jaléng^l dsea^l jiéng^l, jòba^l çjiali^l ja^l caguíte^l e cuu^l quié^l-e do fi^l banco e lacò^l sea^lba^l e dsí mi^l cagüean^l-n?” ²⁴ Jòba^l caquiú^l i dseata^l dsea^l féng^l do ta^l quíá^l- jaléng^l i dsea^l i teáng^l do jò casí^l-reiñ^l: “Gui^lna^l cuu^l e quier^l na, jò cuø^lna^l i dsea^l i quie^l jmiguiú^lgui na.” ²⁵ Jò mi^l canúu^l jaléng^l i dsea^l do e cajíng^l i dseata^l dsea^l féng^l do lado, jò cañí^lr^l lajaléiñ^l do jò cajíñ^l: “Fí^lnaa^l, jiali^l e i na niñíiñ^l, cò^l guí^l-gui cuu^l niquier^l.” ²⁶ Jòba^l cañí^l i dseata^l dsea^l féng^l do quíá^l- i dsea^l do jò casí^l-reiñ^l: “Niñí^lb^l 'nú^l e jaléng^l dsea^l i sea^l quíá^l-, jmiguiú^lgui nilísea^l quíá^lr^l; dsu^l jaléng^l dsea^l i ja^l sea^l quíá^l-, conguiab^l ni'íng^l e capí^l e sea^l quíá^lr^l. ²⁷ Jò lana niñijéng^ldu^l jaléng^l dsea^l i ja^l cali'íng^l e nilíiñ^l-n dseata^l dsea^l féng^l, jò nijngáng^lna^lr^l fi^l quini^l- la lana.”

Mi^l ca^l- Jesús fi^l jee^l fi^l Jerusalén

(Mt. 21:1-11; Mr. 11:1-11; Jn. 12:12-19)

²⁸ Jò mi^l cangí^l e ca'e^l Jesús jaléng^l i dsea^l do e júu^l na, jòba^l ca'íb^l-tur^l fi^l iuuiñ^l e ngóor^l fi^l Jerusalén. ²⁹ Jò mi^l nijaquíéng^l e niguiéer^l fi^l quíá^l- cò^l fi^l e si^l Betania cóo^l cò^lgui^l fi^l e si^l Betfagé, fi^l e née^l tí^l mó^l e si^l Olivos quíá^l- fi^l Jerusalén, jò fi^l jòba^l casíiñ^l gáng^l i dsea^l guitúung^l quíá^lr^l do ³⁰ jò cajíñ^l- casí^l-reiñ^l:

—Güilíng^l-du^l e fi^l e née^l quíá^l-gui^l na, jò mi^l niguilíng^l-na^l fi^l jò, jò nimáang^l-na^l jaang^l bú^l i síng^l 'ñúung^l i ja^l i^l mí caguá^l jí^l jaang^l. Jò síng^l-na^lre^l jò ñijéng^l-na^lre^l fi^l la. ³¹ Jò song i^l

jmíngí' - 'ná' jialí' s'íng'~na're!, joba' nifí'~na'r: "E Fíi'baa' 'neáng~tear i bú'~ la lana."

³² Jo mi~ cangoyúung' e canúu~ i dsea` gáng~ do lado, jo cangolíim~bre jóng. Jo mi~ caguilíin~ e fií do, job caliti~ jíi'~ laco' cajíng'~ Jesús lamí~ jéeng'gui do. ³³ Jo lajee~ e taaiñ~ e si'r' lí~ 'ñúú' quía'~ i bú'~ do, dob caguilíng~ dsea` fií i jó' do, jo casí'r~ i dsea` gáng~ do jo cajíin'~:

—¡Jialí' s'íng'~na' bú'~ quí~naa'?

³⁴ Joba' cañí' i dsea` gáng~ do quía'~ i dsea` fií bú'~ do jo casí'~reiñ':

—Co' lana 'neáng~tea Fíi'naa' i bú'~ la, joba' s'íng'~na're'.

³⁵ Jo catób~ i dsea` gáng~ do i jó' do, jo casí'f'r tú~ 'ní si'r'~ fí mocóoiñ~ do. Jo mi~ caguilíin~ fí lí táang` Jesús, mifíng` caguiéem~bre dsea` do. ³⁶ Jo laco' iuung~ Jesús fí e ngóor' fí Jerusalén, lajaléng'~ dsea` i ngolíng~ cóo'r~ do canaaiñ` ni'r' jalé' si'r'~ guiá'~ fí fí lí~ ningíng~ dsea` do. ³⁷ Jo mi~ canaang` jgáang` lajaléng'~ i dsea` do fí dse'~ mó'~ Olivos, canaaiñ` ti'áiñ'~ Fidiéé~ e iáang` dsíir' jogui jmiféiñ' dsea` do quía'~ jalé' e quíi'~ jmí~ e nicajmée` dsea` do e dsigá dsíi' dsea`. ³⁸ Jo jalém'~ i dsea` do canaaiñ` fé'r' jo cajíin'~:

—¡Majmiféng'~naa' i dseata~ dsea` féng'~ i güeang'~ i jáa' cuaiñ` quía'~ Fidiéé'! ¡Jo lana juguiá~jiu quía'~ dsea` fí ñifí~, jo güijmí'goo~baa' Fidiéé~ dsea` guíng~ fí jo!

³⁹ Jo mi~ canúu~ jaléng'~ dsea` Israel i líng' dsea` fariseo i ngolíng~ do e fé'~ jaléng'~ i dsea` do lado, joba' casí'r~ Jesús lala jo cajíin'~:

—Tifa', jíng' jaléng' dsea` quíi' lacó' jo` güijmiféng' lir 'na`.

⁴⁰ Dsu' Jesús cañíir` quiá' i dsea` Israel i líng' dsea` fariseo do jo` casí'`reíñ' jo` cajíñ'`:

—Lí'` jíi'` laba' líí', cō' fíng song jo` jmiféng' jaléng' i dsea` la jnea` , joba' jalé' cuub` niróo` jóng jo` nifé' e jmiféng' jnea`.

⁴¹ Jo` malí`guíjiu lajo, mi` caguiliñ` quiá'` Jerusalén fí' lí` nijnéeng` e fíi` jo, jo canaang` Jesús qui'`bre uii` quiá'` jaléng' dsea` i neáang' fí' jo` ⁴² jo` cajíñ'`:

—iFa'jiu e já'` líng'` 'nú'`, dsea` neáang`na' fí' na, jalé'` júu` quié`e, joba' latí' lanab jóng niliseeng`na' juguíá` júu` røø` cōo'` Fidiéé'! Jo` dsu' lana ja` qui'` jmíi` ningáng'na' jalé'` júu` quié`e, cō' ja` iing`na' núu`na'. ⁴³ Jo` dsu' niguiéeb' jmíi` mi` nidsing`ng`na' iihuí' mi` tí' lí` nirí` jaléng' dsea` i 'ní'` níng` 'nú'` lacúng' lajíng' e fíi` la, jo` nijmér` míi'` cōo'` 'nú'`, ⁴⁴ jo` nijngáiñ` jaléng'` 'nú'`. Jo` lí'` jo, niquí'r` jalé'` 'nú'`na' catí'` tíi` fíi', jo` jíi'` cōo` cuu` jo` nisér` fa' e sífíng`gui e quie`gui eáang` 'nú'`na', dsuco' ja` calicuíng`na' jnea` e lín'n Dsea` Jmáang` mi` cataan`n jee` 'nú'` fí' jmigüi' la.

Mí' ca'uóøng` Jesús jaléng' dsea` i jmóo` ta` 'nú' fí' dsí' guá'`

(Mt. 21:12-17; Mr. 11:15-19; Jn. 2 :13-22)

⁴⁵ Jo` mi` cangí' jo, mi` caguié` Jesús fí' Jerusalén, dsifí' ladob ca'ír` fí' dsíi' sinúu` guá'` quiá'` dsea` góor` dsea` Israel. Jo` mi` cangáiñ` jaléng' dsea` i teáang'` ta` jmóo` 'móo'` cōo'` jalé' e 'nú'r', jo` dsifí' ladob ca'óøng`neiñ' ⁴⁶ jo` cajíñ'` casí'`reíñ':

—Lalab fé' fí nî jî quiá'- Fidiée': "E fí dsí' sinúá^ guá'- quié-e la íng^ ta~ e jmiféng' dsea` jneab~"; jò dsu' 'nú' nicajmee-na' lí~ cúng' seáng' jaléng' ìi` cóo~ jalé' e jmoo`na' lana.

⁴⁷ Jò mi~ cangî jò, lacoo` jmîib~ dsée' Jesús e dsi'éer~ jaléng' dsea` jalé' júu^ quiá'- Fidiée' e fí guá'- do. Jò lajee' jò jaléng' fi~ jmidsea` cóo~gui jaléng' tifa' quiá'- júu^ quiu' ta~ quiá'- dsea` Israel cóo~gui jaléng' dseata` ì seeng' fí Jerusalén jmóor` quijí- quiá'- jial nijngáin' dsea` do, ⁴⁸ jò dsu' ja` líng~ niguié'r jial nijmér- lajò, co' jalém' ì dsea` teáng'~ núu` do tib' dsíir' e núur jalé' júu^ e é dsea` do.

20

*Ì quiu' ta~ quiá'- Jesús e jmóor` jalé' e jmóor`
(Mt. 21:23-27; Mr. 11:27-33)*

¹ Jò cóo` jmîi~ mi~ cangî e jò, lajee' e táang` Jesús fí guá'- e er` joguì guiar' júu^ quiá'- Fidiée' jee~ jaléng' dsea` quiá'- jial nileáng` dsea` jee~ jalé' dsee- quiá'r-, jò lajee' jòb caguilíng- jaléng' fi~ jmidsea` cóo~gui jaléng' tifa' quiá'- júu^ quiu' ta~ quiá'- dsea` góor` dsea` Israel cóo~gui jaléng' yúu' dsea` cóong'~ quiá'- e guá'- do, ² jò casí'r- Jesús lala jò cajín'~:

—Jmee- júu^ ì~ quiu' ta~ quií'- e jmoo` jalé' e jmoo' na. Jò ìi~ cacuø' 'nu' e ta~ na?

³ Jòba' cañíi` Jesús quiá'- jaléng' ì dsea` do jò casí'-reiñ'~:

—Sea`bî cóo` e 'né- nijmíngíi'~ jnea~ 'nú' cajo. Ñii- na' quié-e lana. ⁴ Ìi~ ì caqui' ta~ quiá'- ì Juan e caseáain' dsea` jmîi~? ¿Su Fidiée' ofa' dsea` jmigüíb' é?

⁵ Jo mi~ canú~ jaléng' i dsea` do e cajíng'- Jesús lado, jo lajeé~ yaam~ bre canaaíñ` s'íiñ` jo sí'` rúíñ':

—¿Jial nisí'~naa'r, faa~aa'? Song casí'~naa'r e Fidiéeb~ casíng` dsea` do, joba' nijíñ'- nisí'r` jneaa~aa' jóng: “¿Jialí' ja` já'- calíng-na' jalé' júu^ quiá'r-?” ⁶ Jo song nisí'~na'r e dsea` jmígüíb` caquiú' ta~ quiá'- i Juan do, joba' jaléng' i dsea` la fø' nijngám'-bre jneaa~aa' jóng cóo~ jmang'- cuu~, co' ñi'bre guiá- e cajá- i Juan do e fé'r` cuaiñ~ quiá'- Fidiéé~.

⁷ Jo jíi'~ jaang` i dsea` do ja` cateá- dsíir' fa' ee cañír` quiá'- Jesús cuaiñ~ quiá'- i Juan do, jo lí' casí'r- dsea` do e ja` ñi'bre. ⁸ Joba' cañí' Jesús quiá'- i dsea` do jo casí'-reiñ':

—O'gui jnea~ nijméel~ 'ná' júu^ cajo i~ i quiú' ta~ quié- e e jmóo`o jalé' e jmóo`o la lana.

Júu^ quiá'- dsea` 'léeng' i soo` dsí'
(Mt. 21:33-44; Mr. 12:1-11)

⁹ Jo dsifí mi~ cangí jo, jo canaang` Jesús e e'r jaléng' i dsea` do cóo` júu^ já'- e lafa' júu^ cuento, jo casí'-reiñ' do lala jo cajíñ'-:

—Coo` née'~ nicaliséng` jaang` dseañú' jo nica-jnír` jmang'- huíng` jó'^ latøng- fí ni~ uó- quiá'r-. Jo mi~ cató' e caguiar' guiá- lajalé' e do, jo catáiñ` dsea` 'léeng' i cane'- ni~ latøng- e uó- do i nijmé- ta~ jmá'-jiu. Jo mi~ calí- jo, jo cagüi'íi'bre jo cangór- fí lí- huíi^'. ¹⁰ Jo mi~ catí' í' e caroo` e mí'^ huíng` jó'^ do, jo caguiéiñ' jaang` dsea` quiá'r- e tí lí- táaiñ` do i cangomíi~ lajíi'~ guiéé^ quiá'r- e catíiñ- quiá'- e ta~ jmá'-jiu e jmóo` i dsea` do fí ni~ guoo~ uó- quiá'r-. Jo dsu' mi~ caguiéng'- i dsea` quiá'r- do e lí- taang- i dsea` jmóo` ta~ e uó- do, caquié'biñ'

do quiá'r- e lafa' e nicuø¹-reiñ' do lajii¹~ guiéê[^] quiá¹- ì dsea` fii~ uø- do, jø caguiém¹breiñ' do calé¹ catú¹- fí¹ li¹ cajar¹, jø ja` ee¹ cacuø¹reiñ' do jii¹~ coo¹. ¹¹ Jø mi¹ caliñi¹ ì dsea` fii~ uø- do e calí¹ lado, dsifí¹ ladob caguiéiñ¹ jaang¹gui dsea` quiá¹r- ì cangomi¹~ guiéê[^] quiá¹r- quiá¹- lajii¹~ ta¹ jmóo¹ uø¹ quiá¹r-. Jø dsu¹ mi¹ caguiéng¹- ì dsea` quiá¹r- do fí¹ li¹ taang¹ ì dsea` jmóo¹ ta¹ do, cacøøm¹~bre cajo li¹ laco¹gui cangongúng¹- ì dsea` la¹uii¹ do, jø jii¹~ coo¹ ja¹ ee¹ cacuø¹reiñ' do cajo. ¹² Jø mi¹ caliñi¹tu¹ ì dsea` fii~ do e calí¹ lado, jø caguiém¹bre jaang¹gui dsea` quiá¹r-. Jø dsu¹ gab¹ cajméè¹ ì dsea` jmóo¹ ta¹ do cóo¹- ì dsea` do cajo, co¹ caquiém¹breiñ¹ jøgui cacuing¹neiñ¹, jø ja¹ ee¹ cacuø¹reiñ¹ do jii¹~ coo¹ cajo, jø ca¹øøm¹breiñ¹ do.

¹³ Jø mi¹ cang¹ jø, jø ca¹¹ dsí¹ ì dsea` fii~ uø- do: “¿E¹ nijmee¹ e náng? Jø seem¹ camúng¹~ jóo¹ ì 'neáan¹n eáang¹, jø íb¹ niguiéen¹~n lana, jø jangám¹ ì guib¹ ì nijmi¹gór¹.” ¹⁴ Jø dsu¹ mi¹ caguiéng¹- ì siming¹ do li¹ taang¹ ì dsea` jmóo¹ ta¹ do, jø dsifí¹ ladob canaañ¹ do síiñ¹ lajee¹ yaañ¹: “Jii¹~ ì nabing¹ ì seeng¹ ì nilíng¹ fii~ e uø¹ la mi¹ nijúung¹ tiquiá¹r¹. Jøba¹ majngáang¹~naa¹r lana, ná la cagüéiñ¹ fí¹ la, jø jnea¹ dsea` nilí¹-ii¹ fii~ latøøng¹ e uø¹ la.” ¹⁵ Jø mi¹ cangoyúung¹ e casúng¹ ì dsea` do røø¹ lado, jø caguíim¹bre ì siming¹ do jee¹ e uø¹ e li¹ sijnea¹ e huí¹ huíng¹ jó¹ do jø fí¹ jøb cajngang¹neiñ¹.

Jø mi¹ cató¹ e jmóo¹ Jesús e júu¹ na, jø cajmingi¹r lajaléng¹ ì dsea` ì teáang¹ do jø casí¹-reiñ¹ lala jø cajíñ¹-:

—¿E¹ líng¹-na¹ e nijmé¹ ì dsea` fii~ e uø¹ do mi¹ niliñir¹ e nicajngam¹ jaléng¹ ì dsea` 'léeng¹ do jóor¹?

16 Co' nidsém^l-bre, jo mi[~] niguieñ^l nijngám^l-bre lajaléng^l i dsea^l 'léeng^l do, jo i jiém^l nitáñ^l i nijmé^l ta[~] e uø^l quiá^lr^l do.

Jo mi[~] canúu^l jaléng^l i dsea^l i teáng^l do e cajíng^l Jesús lado, lajalém^l bre cañír^l jo cajíñ^l:

—Ja^l güli^l iing^l dsí^l Fidié^l e nilí^l lajo.

17 Jo mi[~] canúu^l Jesús e cajíng^l jaléng^l i dsea^l do lado, jo lí^l cajøøm^l breñ^l do, jo lí^l jo casí^l reiñ^l do lala jo cajíñ^l:

—¿E^l e líng^l-na^l e guøng^l e tóo^l fí^l ni[~] jì^l quiá^l Fidié^l lí^l fé^l lala?

E cuu^l e ja^l calijí^l i dsea^l i jmo^l 'núu^l,

lana nilí^l coo^l cuu^l e niing^l gui^l quiá^l tí^l fi^l.

18 Jo doñí^l i^l i catitaang^l e fí^l ni[~] e cuu^l do, joba^l cuib^l nilíñ^l jóng. Jogui^l fing song e cuu^l do cató^l jo cajlíng^l jaang^l dsea^l, joba^l conguiá^l túub^l nilíñ^l jóng.

Mi[~] cajming^l dsea^l Jesús cuaiñ^l quiá^l e catíng^l dseata^l

(Mt. 21:45-46, 22:15-22; Mr. 12:13-17)

19 Jo mi[~] canúu^l jaléng^l fi^l jmidsea^l cóo^l jaléng^l tífa^l quiá^l júu^l quiu^l ta[~] quiá^l dsea^l Israel e cajíng^l Jesús lado, joba^l lajmináb^l lamí^l iñ^l nisáñ^l dsea^l do, co^l calilí^l e uii^l quiá^l-bre café^l dsea^l do. Jo dsu^l júi^l coo^l ja^l ee^l cateá^l dsír^l fa^l ee^l cajmeáñ^l dsea^l do, co^l 'góm^l bre jaléng^l dsea^l fi^l i tí^l dsí^l núu^l jalé^l júu^l quiá^l Jesús.

20 Jo mi[~] cangí^l jo, jaléng^l i tífa^l do cóo^l gui^l jaléng^l jmidsea^l casíñ^l lajee^l la'ó^l yaaiñ^l e casíñ^l coo^l tú^l míng^l dsea^l i nijmé^l lafa^l dsea^l guiú^l dsí^l cóo^l Jesús, jo cajméer^l lajo quiá^l e nijméñ^l do quijí^l jial nífé^l dsea^l do júu^l guí^l, co^l í^l dsír^l e fa^l

lajo nilí'r` e nitisúng' dsea` do fí' quini` dseata`.
 21 J_oba' mi` caguiliñ' do fí' lí' táang` Jesús, jo
 cajmingí'r` dsea` do lala jo cajíñ'`:

—Tifa', n_ineb` jnea` røø` e jmang' júu` jáb'`
 jalé' e e` 'n_u, jogui ja` jøø` 'n_u cajo jial líng` dsea`
 lí' caluu`, jogui 'n_u e' jnea` jial dseáng'` lacõ' iing`
 Fidiée` e seē`naa'. 22 J_oba' cajajmingí'naa' 'n_u:
 ¿Su 'né` níquí`naa' cuu` e catúng` dseata` dsea`
 féng' i guing` fí' Roma õsi ja` 'né` quí`naa' é?

23 Jo dsu' dsifí' ladob calilí' Jesús e iing` i dsea` do
 nijmigøøng`neiñ', j_oba' cajíñ'` casí`reiñ':

24 —Ée'`na' jnea` cõõ` cuu`. J_oba' ne`duu' jial líí',
 jo ¿i` dsea` i táang` fí' ní' la jogui jial siir`?

J_oba' cañí' i dsea` do casí'r` Jesús jo cajíñ'`:

—Dseata` dsea` féng' i guing` fí' Romab táang` fí'
 na.

25 J_oba' cañí'tu Jesús jo casí'r` i dsea` do:

—Lají' e catúng` dseata` dsea` féng', cuøø'`na'
 dseata` dsea` féng'; jogui lají' e catúng` Fidiée`,
 cuøø'`na' Fidiée` cajo.

26 Jo dsíng'` cangogá` dsí' i dsea` i téeng` Jesús do
 mi` cañí' dsea` do lado fí' quini` jaléng' i dsea` i
 teáng` do, cõ' lí' lí' cango'gó'gui dsí'bre lají' e
 cañí' dsea` do, jo tiib` cajer' lajíñ' do.

*Mi` cajmingí` dsea` jial líí' mi` nijí'tu dsea` calé'
 catú`*

(Mt. 22:23-33; Mr. 12:18-27)

27 Jo mi` cangí' jo, caguilíng` cõõ` tú` máng'`
 dsea` Israel i líng` dsea` saduceo fí' lí' táang` Jesús.
 Jo jaléng' i dsea` saduceo do ja` já'` líñ' e nijí'tu
 jaléng'` líí'. J_oba' cangojmingí'r` dsea` do jo ca-
 jíñ'`:

28 —Tifa', Moi~ cajme'r' fi' ni~ ji` quiá'r- e song cajúng- jaang` dseañu' jo ja` jóor' caliséng` cóo' dseamf` quiá'r-, joba' 'né- nicúng'- guó` i dseamf` 'nhi- do cóo' rúng' dsea` ngáang' cóo' i 'lii~ do. Jo i yuu` la'uii~ i niliseeng` quiá'r- cóo' i dseañu' do, 'né- nijmér- e lafa' jóob' i dseañu' quiá'r- lamí~ uii~ do, co' lanab fé' fi' ni~ ji` quiá'- Moi~. 29 Joba' síi'~na' 'nu' e júu^ la: Cóo' ya' caliséng` guiáng- dseañu' la'ó' rúñ', jo i dsea` nifi' do cacúm' guóor', jo ja' e huóø- cateáaiñ' fi' jmigüi' la co' cajúm-bre, jo jíi'~ jaang` jóor' ja` ii` caliséng`. 30 Jo mi~ cangf` e cajúng- i dseañu' do, jo cacúm' guoo' i dseamf` 'nhi- do cóo' rúng' i 'lii~ dseañu' quiá'r- i catf` gáng- do. Jo dsu' lajob cangonghiñ- cajo, co' cajúm-bre, jo jíi'~ jaang` jóor' ja` ii` caliséng`. 31 Jo mi~ cangf` jo, cacúm'tu guoo' i dseamf` do cóo' i rúng' i 'lii~ dseañu' quiá'r- i catf` gaang` do, jo ja' huóø- cangó- jo cajúm-bre cajo, jo jíi'~ jaang` jóor' ja` ii` caliséng`. Jo lajob cangonghiñ- lajaléiñ' do. Jo coob` mi~ cató' júuiñ- laji` guiáiñ- do, jo jíi'~ jaang` jóor' ja` ii` caliséng`. 32 Jo dsu' jo` huóø- ngó- mi~ cangf` jo, jo cajúm- i dseamf` do cajo. 33 Joba' jmíngí'~naa' 'nu' lana jial líi' mi~ nitf` fi' cóo'. ¿I' dseáng'- dseamf` quiá'- nilíng- i dseamf` do lajee` laji` guiáng- i dseañu' do? Co' laji` guiám-bre cacúng'- guóor' cóo' i dseamf` do fi' jmigüi' la.

34 Joba' cañíi' Jesús quiá'- i dsea` saduceo do jo cajíñ'- casí' reiñ':

—Cum' guoo` jaléng' dseañu' dseamf` fi' jmigüi' la. 35 Jo dsu' jaléng' dsea` i niñíng` e nijí'tur calé' catú- jee~ jaléng' 'lii~ fi' jmigüi' cóo' jo` nicúng'- gui guoor' fi' jo, 36 jogui ja` qui'- jmí~ fa' e nijúung- guir,

co' laj_o l_ing' jaléng' ángeles quiá' Fidiéé' fí' ñiff' ,
 ja` cúng' guóor` o'gui júuiñ' ; jogui jóo' Fidiéé'
 nilíng' jaléng' i dsea` do uí' e nicají'tur calé'
 catú'. 37 Jo j_igui Moi~ cajme'r' fí' ni~ jì quiá'-
 Fidiéé' e nijíb'tu 'lii~, co' ie~ lamí~ cangár~ e gui~
 coo' 'matóo' e gui~ jì, jo jee~ e jì do café' Fí'naa' jo
 cajméer` júu^ e íbre líiñ' Fidiéé' quiá'- Abraham
 cóo'gui Isáa' jogui Jacóo^. 38 Dsaco' Fidiéé' líiñ'
 Fidiéé' quiá'- jaléng' dsea` jí', jo ja` líiñ' Fidiéé'
 quiá'- jaléng' 'lii~, co' jmang'^ dsea` jí'bing' i seeng'
 cøøng` cóo' Fidiéé'.

39 Jo mi~ canúu~ i líing~ tifa' quiá'- júu^ quiu' ta'
 quiá'- dsea` Israel do e cajíng'- Jesús lado, joba'
 dsifí' ladob cañíir' quiá'- Jesús jo casí'r~ dsea` do
 lala jo cajíñ' :

—Eáam' guiá~ laco' cafée'~ na, Tifa'.

40 Jo mi~ cangí jo, jíi'~ jaaiñ' do jo` ee` cateá~gui
 dsíir' fa' ee` cajmíngi' guir Jesús.

¿I' dsea` siju~ líing' Dsea` Jmáang~?
 (Mt. 22:41-46; Mr. 12:35-37)

41 Jo mi~ cangí jo, jo cajmíngi' Jesús jaléng' i
 dsea` do jo cajíñ' casí'-reiñ' :

—¿Jiali' fé' dsea` e siju~ dseata~ Davíb'^ líing'
 Dsea` Jmáang~? 42 Co' lalab cajíng'- dseata~ Daví'^
 fí' ni~ jì quiá'- Fidiéé' :

Lalab cajíng'- Fidiéé' casí'r~ Fí'i:

“Ní lí' lí' dséé' laco' guiin~n

43 cartí mi~ nijmee~ e jaléng' dsea` i 'ní' níng' 'nua'
 nisí'r' uó~ jnir~ fí' quiní'^ e laco' nijmi'gór' 'nua'.”

44 Joba' jmíngi~ jnea~ e song' ñia'bi dseata~ Daví'^
 sí'r' Dsea` Jmáang~ Fí'i, joba' ¿jial cuøøng` e Dsea'
 Jmáang~ líiñ' dsea` siju~ dseata~ Daví'^ jóng?

Jalé' e ga' e jmóo` jaléng' tifa' quiá' júu^ quiu' ta` quiá' dsea` Israel

(Mt. 23:1-36; Mr. 12:38-40; Lc. 11:37-54)

⁴⁵ Jò lajee` jò, fíim' dsea` teáaiñ~ e núur` jalé' júu^ quiá' Jesús, jò cajíng' dsea` do casí'r- jaléng' dsea` i ngí cóo'r~ do lala:

⁴⁶ —Ñiing~ óo'na' cóo'~ jaléng' tifa' quiá' júu^ quiu' ta~ quiá' dsea` góo'naa' dsea` Israel, có' jaléng' í tí dsír' e ngír' quiér' jalé' sí^ dsea` 'goo', jogui dsíng' iin~ e nijmiféng' dsea` ír' mi~ jié' jín' dsea` lacaang` fí jee~ 'núu', jò mir' 'masii~ e niing-gui mi~ dsilíiñ~ fí sinúu^ guá', jogui mi~ tí jmí e ngíiñ~ e gø'r', mir' lali~ lí jlo^gui e nigüear~, jò lajòba' e jlo^gui jnéeiñ~ fí quini` jaléng' dsea` rúíñ'. ⁴⁷ Jògui uø'r' jalé' e sea` quiá' jaléng' dseamí i 'nii~, jògui jmícaaiñ~ e fé'r' fa' e cuee` eáang' fí quini` dsea`. Jò có' dseáng'- lajòb líiñ~, jòba' íbing' i eáang'gui ni'íng' iihuí mi~ nití- í' lajò.

21

Mi~ cacuø' jaang` dseamí i 'nii- cuu- quiá'r- fí guá'

(Mr. 12:41-44)

¹ Jò mi~ cangí jò, lajee` táang` Jesús fí sinúu^ guá', jò cangár- e dsitea' dsea` sea` cuu- jmiguiú cuu- quiá'r- fí dsí' guóo' quiá' guá'. ² Jò dsu' lajee` jòb mi~ cangáiñ~ jaang` dseamí i 'nii- i tiííng- eáang' i catá'- dsí' e guóo' do tú- cuu- e jiáang` eáang' e quíng' cóo` ñinée-. ³ Jò mi~ cangá- Jesús e calí- lado, jò casí'r- jaléng' i dsea` i teáang- do jò cajíñ'-:

—Dseáng'- e já'- e fí-i 'nú' e i dseamí 'nii- nabing' i nicacuø' jmiguiúgui cuu- lajee` lajaléng'

ἰ dsea` sea` cuu- ἰ ningíng' na. ⁴ Co' jaléng' ἰ dsea` sea` cuu- na nicacuør' jalé' e niseáng- quíá' bre, jo dsu' ἰ dseamf' 'nái- na nicacuør' jalé' e sea` quíá'r- jo cóo' e naba' sí'í' nilár- capí' e ní'í' nidø'r-.

Mi~ cajíng'- Jesús e ni'ím- guá'- fé' e sí' fí' Jerusalén

(Mt. 24:1-2; Mr. 13:1-2)

⁵ Jo mi~ cangf' jo, fíim' dsea` ἰ la'ó' ngí' cóo' Jesús teáaiñ- síiñ- cuaiñ- quíá'- e guá'- fé' e sí' fí' Jerusalén jogui dsigá' dsíir' e dsíng'- jlo'^ e guá'- do, co' dsíng'- niguo'^ jalé' cuu~ cóo' e sí'ieeng' e guá'- do, jogui sím'bir cajo quíá'- jalé' e jlo'^ e nicacuø' dsea` quíá'- e sí'í' e guá'- do. Jo mi~ canúu- Jesús e síng' jaléng' ἰ dsea` do lado, joba' cajíñ'- casí'- reiñ':

⁶ —Niguiéeb' jmí~ mi~ niquí'- jalé' e móo- 'nú' e téé- na, jo jí'~ cóo' cuu~ jo` nijé- fa' e sí'íng'gui rúng' lí' laco' jlo'^ jnéeng- e na lana.

Jial nilí' mi~ nijaquíéeng' e tí' lí' ni'íng- jmígúí'

(Mt. 24:3-28; Mr. 13:3-23)

⁷ Jo mi~ canúu- jaléng' ἰ dsea` do e cajíng'- Jesús lado, jo cajmingi'r' dsea` do jo cajíñ'-:

—Tí'fa', ¿lí' nilí' jalé' e fó' na? ¿Jial nilí' mi~ nijaquíéeng' e nidsijéé' jalé' e jo?

⁸ Joba' cañí' Jesús quíá'- ἰ dsea` do jo cajíñ'- casí'- reiñ':

—Dsíng'- 'né- ñíing~ óo' 'nú' jo ja` güiligøng`na', co' fíim' dsea` nijalíng- jo nijíñ'-: “Jneab~ Dsea` Jmáang-”, jogui nijíng'-guir: “Lanab nicaguié- oor~ e ni'íng- jmígúí'.” Jo dsu' ja` jmíjíng`na'r jí'~ cóo', jo jie~ mí' ligøng`na'. ⁹ Jogui mi~ ninúu`na' e nijáa' mí'~ jo ninéé' ta` tíng', ja` føøng`na' jí'~ cóo',

co' jalé' e jo 'né- nilitib~ lajee~ ná'-gui e ni'íng- jmigüî.

10 Jogui cajíng'-gui Jesús casí'r- jaléng' i dsea` do:

—Jaléng' dsea` i neáang' coo` fiî nitíñ- cóo'~ coo`gui fiî, jogui coo` 'lé' dsea` nitíñ- cóo'~ coo`gui 'lé' dsea` cajo. 11 Jogui eáang' teà nijó' uó- fí' la fí' na, jogui nijáá oo-, jogui nilisea` jmiguiá' íng'~ jmohuí' la'úng- fí' jmigüî, jogui jmiguiá' íim'~ jalé' e nijnéng' fí' yá'^ jmigüî, jo dsíng'- niféng' jaléng' dsea` mí~ ninír` jalé' e jo.

12 'Jo dsu' ná'-gui e nidsijée' jalé' e nifá'-a na, fíng' dsea` nili'ni' níñ- 'nú', dsea` cuíng'na' jnea~, jo dsíng'- ga` nijmeáíñ' 'nú' uí'~ jnea~. Jo nidsijéeíñ' 'nú' fí' sinúú^ guá'- e laco' ni'núñ- 'nú' fí' quini~ jaléng' dsea', jogui nitáíñ' 'nú' fí' dsíí' 'núñí, jo lí- jo nidsijéeíñ' 'nú' fí' quini~ jaléng' dseata~ dsea` cóøng'~ uí'~ e líng'na' dsea` quié-e.

13 Jo mí~ nidsingíng'-na' jalé' e na, job mí~ nilí'na' nifóng'^na' jaléng' i dsea` do jial ca'uíng'-na' dsea` quié-e. 14 Jo ja` jmee- na' fí'í^ fa' e ja` ñí^na' jial ningí- na' quiá'- jaléng' i dsea` do mí~ nijmíngí'r- 'nú' quiá'- jalé' dsee- e niñíng'na'. 15 Co' jneab~ nijmee~ e e niliñí^na' jial ningí- na' quiá'r-, jogui nijmee~ e e tíng'na' eáang', jo jíí'~ jaang' i dsea` i 'ní' níng- 'nú' do ja` niquí'r~ jmí' fa' e niñír- quí- na'. 16 Jo dsíng'- niliseeng' i 'ní' níng- 'nú', co' jí'gui jaléng' tiquí^na' jogui niquí^na' jogui jaléng' rúng'na' jogui jaléng' i cuíng' 'nú' nijmér- lajo cóo'~ 'nú' jo jí'gui cartí' nijngáíñ- i líng' 'nú'. 17 Jo lajalém' dsea` jmigüî nili'ni' níñ- 'nú' uí'~ e líng'na' dsea` quié-e. 18 Jo dsu' jíí'~ camí^ jñguí^na' ja` nidsi'íng'. 19 Jo jie~ mí' litúng- áa'na'

e fí niteáang-na' cóo'~ jnea~, co' lajoba' e cuøøng` e nitíng'~na' fí' quini` Fidiée` mi~ nití' í' lajo.

20 'Jo mi~ nimó'na' e nijalíng- jaléng'` 'lée- e nirí- latøøng- fíi` Jerusalén, joba' güiliñí'na' jóng e jo` huøø- róo` e fíi` jo, co' tí' lí' ni'ím-. 21 Jo co' lajob nilí, joba' dsifí' lajob 'né- uøng` jaléng'` dsea` i neáang' jee~ fíi` Jerusalén e nicuí- fí' jee~ mó' ná'gui e nirí- jaléng'` 'lée- lacúng'` lajíng` e fíi` jo. Jo jaléng'` dsea` i taang- jmóo' ta~ fí' caluu` fíi` jo` güi'í' dsír' fa' e niquíng'-guir fí' jee~ fíi`, co' lí' güicuú'bre cajo. Jogui jaléng'` dsea` i neáang' latøøng- lí' se' Judea 'né- nicuí-bre cajo e laco' cuøøng` nijmi'øng'` yaaiñ~. 22 Co' ie~ job mi~ ni'íng'` dsea` iihuí, jo lajoguib e niliti~ jí' laco' fé' fí' ni~ jí' quiá'- Fidiée`. 23 Jo dsu' dsíng'` fíi` jaléng'` dseamí i ngí' quiéng` yuu` osi i ngí' jéeng` yuu` cu' tú' ie~ jo! Co' dsíng'` nicá' dsea` iihuí' la'úng- fí' jmigüí, jo dsu' eáang'guib nicá' i dsea` i seeng` fí' Jerusalén la iihuí' lajee` lajaléng'` dsea` jmigüí. 24 Jo fíim' dsea` nijúuiñ- fí' jee~ mii~, jogui fíim' dsea` niteiñ'^ jo nidsilíñ` 'nuñí' fí' fíi` lí' jíé'; jo jaléng'` dsea` i jalíng- fí' lí' huí' i ja` cúing` Fidiée` nijaso'øøml~bre fíi` Jerusalén cartí' mi~ nidsíng- e í' e nisi'í' quiá'-.

Jial mi~ nijáa'tu Dsea` Jmáang-

(Mt. 24:29-35, 42-44; Mr. 13:24-37)

25 'Jo dsíng'` nilisíng- jial jnéeng- iee` cóo'~gui si' cóo'~gui jaléng'` náu'. Jogui dsíng'` nidsigá' dsí' dsea` jogui niféiñ' cajo uí'~ e ga` niróo- jmíñí' jogui ga` nitá'- mii~. 26 Jo dsíng'` niféng'` dsea` jo fíim' dsea` ni'íng- dsír' cóo'~ jalé' e fø' do mi~ ni'í- dsír' jalé' e nilí' ie~ jo, co' jí'gui jalé' e sea' fí' yú' jmigüí' nijø' lafa' mi~ jø' uø-. 27 Jo joguiba' mi~

nimáang~na' jnea~, dsea` lín'n jaang` dsea` jmigüî`
 i jáa' fí' ñifí', e nigáa'a niquín~n jee~ cabøø~ jní'
 cóo~ e niing~ jî e 'gøng` quiá'- Fidiée~. ²⁸ Jo mi~
 nináng` e nidsijée' jalé' e nicafá'- a na, joba' cuøø~
 bí yaang~na' jóng, jogui jøø~na' yejí' fí' yá'^ jmigüî`,
 co' nijaquiém'ba' e nileáng`na' congua' jee~ jalé'
 dsee~ quí'na'.

²⁹ Jo lí~ jo casí'- Jesús jaléng` i dsea` do coo`gui
 júu^ jo cajín'- casí'-rein':

—Quië`na' cuente jial lí' jalé' 'ma` güiñí'^ osi
 lí'^ doñí' ee' 'ma` é. ³⁰ Jo mi~ móo~ 'nú' e
 ninaang` iée` jalé' má'^ e sí' quiá'-, 'nú' niñí'na'
 e jii' jmáb' nijaquiéeng' jóng. ³¹ Jo mi~ canaang`
 líti~ jalé' e nicafá'-a na, joba' güiñí'na' guiá~ e
 nijaquiém'ba' e nicá' Fidiée~ nifí' quiá'- lajaang`
 lajaang` dsea` jmigüî`.

³² 'Jo e já'- e fñ-i 'nú' e jalé' e na 'né~ nilitib~
 nú'-gui e nijúung~ jaléng` dsea` i seeng` jmî~ na.
³³ Jo ni'ím~ la'úng~ jmigüî` la cóo~gui la'úng~ yá'^
 jmigüî`, jo dsu' jalé' júu^ quíe~ e ja` tōo` jmî~ fa' e ja`
 niliti~ lajalé' e jo.

³⁴⁻³⁵ 'Jo co' lajob nilí, joba' fñ-i 'nú' e dsíng'- 'né~
 ñiing~ óo'na' jo ja` cuøø'^ fí' yaang~na' jii'~ capí'^ e
 nirøng`na' dsee~ cóo~ jalé' e 'lí'^ e sea' fí' jmigüî`. Jo
 ja` jmoo'na' ta` í' mée' o'gui ngí'na' e eáang`gui gui-
 ing~ óo'na' jial niliseeng`na' fí' jmigüî` la, jo lajoba'
 ja` nidsing`ng~na' la dsing`ng~ jaang` nóo` i guiée'
 lí~ rōo` cóo` leá`. Co' jaléb' e jo nilí mi~ niguiée'
 e jmî~ jo jee~ jaléng` dsea` i seeng` fí' la'úng~ fí'
 jmigüî`. ³⁶ Joba' liúun~n 'nú' e dseáng'- la guím'ba'
 'né~ e neáang`na' e née' guiá~ quí'na' contøøng~, jo
 contøøng~ 'né~ mî'na' jmi'ee~ Fidiée~ uii~ quí'na'

e laco' ja` gütíng`na' jalé' e nilí ie~ jo jogui e laco' cuøng` nigüiquiéeng`na' fí' quinií-, jnea~ dsea` lán'n jaang` dsea` jmigüi` i` jáa' fí' ñíí'.

Jo jalé' e júu^ na ca'e' Jesús ca'e'r' jaléng' i` dsea` do ie~ jmí~ jo.

³⁷ Jo mi~ cangf` jo, laco` jmí~ dsi'ée'~ Jesús jaléng' dsea` jalé' júu^ quiá'- Fidié' fí' guá'- fé' e si' fí' Jerusalén. Jo laco` 'lloo- dséer' dsijer~ fí' coo` yú'^ cuo' e sii` Olivos e fí' 'ni' fí' Jerusalén do.

³⁸ Jo lajalém' dsea` dsilííñ- e fí' guá'- do laca'ee' e dsínúur- jalé' júu^ e guia' Jesús.

22

Mr` casñng- jaléng' dsea` jial e nisáiñ' Jesús

(Mt. 26:1-5, 14-16; Mr. 14:1-2, 10-11; Jn. 11 :45-53)

¹ Jo ie~ jo nijaquiéeng' coo` jmí~ e sii` Pascua quiá'- jaléng' dsea` Israel, jo ie~ jmí~ jo gø'r' íñí'^ e ja` quie'^ quiéeng'. ² Jo lajee' jo canaang' jaléng' fii~ jmidsea` cóo'~gui jaléng' tifa' quiá'- júu^ quiu' ta~ quiá'- dsea` Israel e sñíñ` jial niguiér' e nijngáiñ'- Jesús, jo dsu' ja` teá' dsíir' e nijmér- jalé' e 'li'^ e í' dsíir' do, co' dsíng'- 'gøíñ' jaléng' dsea` i` seáng' fí' Jerusalén lajee' e jmí~ jo.

³ Jo lajee' jo calí- fii~ i` 'ling'^ i` sii` Satanás fí' dsíí' Judas Iscariote, jaang' lajee' dsea` guitúung` quiá'- Jesús. ⁴ Jo dsifí' lajob cangór- cangosiíñ~ cóo'~ jaléng' fii~ jmidsea` cóo'~gui jaléng' dseata~ quiá'- guá'- quiá'- dsea` Israel quiá'- jial nilí'r' nisáiñ' Jesús e laco' nijáiñ' dsea` do fí' quinií` i` dsea` í. ⁵ Jo dsíng'- cali'iaang` dsíí' jaléng' i` dsea` do mi~ canúur- e júu^ jo, jogui cacuø' júu^ quiá'r- e

nicuø'r- Judas Iscariote cuu- e 'léeiñ~ do e quiá'- e nijáiñ' Jesús. ⁶ Jo ca'íb- dsír' quiá'- rúíñ' e nijmér- lajo, jo mifing` canaang` Judas e 'nó'r' jial e nijáiñ' Jesús fí' jaguó` jaléng' i dsea` do.

Mi~ cagó'` Jesús ú' canuu` cóo'~ dsea` guitúung` quiá'r-

(Mt. 26:17-29; Mr. 14:12-25; Jn. 13 :21-30; 1 Co. 11 :23-26)

⁷ Jo mi~ cangf' jo, 'ñaia' ie~ jmii~ e gø' jaléng' dsea` Israel iñí'^ e ja` quiéeng` quié'^, jogui ie~ job cajo 'né- e nijngáiñ'- jaang` jo'se' jiuung~ lacoo` sinúu^ quiá'r- e nijmér- e jmii~ Pascua do, ⁸ jo 'ñaia' ie~ jmii~ jo caquiú' Jesús ta~ quiá'- Túa` Simón cóo'~ gui Juan jo cajiñ'- casí'- reiñ':

—Güiling- na' jo güiguia~ na' guiú- li~ nijmó'naa' jmii~ Pascua, jo fí' job niquiee~naa' coling~ canuu` na.

⁹ Joba' cajmingí'- i dsea` gáng- do Jesús jo casí'r- dsea` do:

—¿Jie~ fí' li~ iing~ 'nu` e nidsiguiá^naa' guiú- jalé' e jo?

¹⁰ Joba' cañí' Jesús quiá'- i dsea` do jo casí'- reiñ':

—Mi~ nigütáang'~na' jee~ fií' Jerusalén, job nimáang~na' jaang` dseañu' i ngang' quiéé` cóo` dsuu- e a~ jmii', jo nigüilim`ba' laco' ngaiñ', jo e 'núu' li~ ni'ír' do, job nigütáang'~na' cajo. ¹¹ Jo nifí'^na' i dsea` fií' e 'núu' do: “Lalab jíng'- tifa' quí-ii': ¿Jie~ sinúu^ li~ nijmee~ e jmii~ Pascua cóo'~ jaléng' dsea` guitúung` quié-e?” ¹² Jo ni'é'r- 'nú' cóo` 'núu' yá'^ li~ nisilíng` guiú-, jo fí' job niguiá^na' guiú- quiá'- e niquiee~naa' do.

¹³ Jo cangolíng' i dsea` gáng- do mi~ cangoyúung' e cajíng'- Jesús lajo, jo cadsém'bre i dsea` do, jo

calitib̃ laco' cajíng'ⁱ- Jesús jéeng'gui do. Jo fí' job caguiar' guiáⁱ- e nidó'rⁱ- iẽ canũũ jo.

14 Jo mĩ nijaquíéng' oor̃ e nidó'rⁱ-, jo cangolíimⁱ- Jesús cóo'ⁱ- i dsea` guitúung` do fí' lí̃ ninéé' guiáⁱ- e nidó'rⁱ-. Jo mĩ caguiliñⁱ- jo caguábre mes̃ lajaléiñ' do, 15 jo canaang' Jesús sí'reiñ' do lala:

—¡Dsíng'ⁱ- cali'iiñ n e nijmeẽ e e jm̃ĩ Pascua la cóo'ⁱ- 'ná' ná'ⁱ- gui e nijúunⁱ- n! 16 Co' jo' nijmeẽ e e jm̃ĩ jo cóo'ⁱ- 'ná' cartí' mĩ nití' í' e nijí'tu rú'naa' fí' ñifí' quiéⁱ- e.

17 Jo lí- jo catúiiñⁱ- coo` cóo^ e ã jmí'^ mí'^ huíng` jó'^ jo cacuø'r' gui'máang'ⁱ- Fidiééⁱ-, jo lí- jo casí'rⁱ- jaléng'ⁱ- i dsea` quiá'rⁱ- do jo cajíñ'ⁱ-:

—Jó'ⁱ- o e cóo^ la, jo jmeeⁱ- na' jmá'ⁱ- jiū e ã dsí' lajeeⁱ- lajaléng'ⁱ- na' na. 18 Dsūco' jo' nidúu'ⁱ- u e jmí'^ mí'^ huíng` jó'^ la cartí' nijí'tu rú'naa' fí' ñifí' quiéⁱ- e.

19 Jo mĩ cangí jo, jo casá'rⁱ- coo` iñí'^ jo cacuø'r' gui'máang'ⁱ- Fidiééⁱ-. Jo mĩ cangoyúung'ⁱ- jo, jo cajmээрⁱ- jmá'ⁱ- jiū e iñí'^ do lajeeⁱ- lajaléng'ⁱ- i dsea` guitúung` do. Jo lí- jo casí'ⁱ- reiñ' jo cajíñ'ⁱ-:

—Quié'na' e iñí'^ la, co' e la lí' e ngúu' táanⁱ- la, dsea` nijúunⁱ- n uiĩ quiá'ⁱ- jaléng'ⁱ- dsea` jmigüĩ. Jo jalé' e la 'néⁱ- nijmeeⁱ- na' e laco' niguiéng'ⁱ- óóna' jneã.

20 Jo mĩ cangoyúung'ⁱ- e cagó'rⁱ- e iñí'^ do, jo catíngⁱ- tur e cóo^ e lí ã jmí'^ mí'^ huíng` jó'^ do jo cajíñ'ⁱ-:

—E ã dsí' e cóo^ la lí' coo` júu^ 'm̃ĩ e jm̃ĩø Fidiééⁱ- cóo'ⁱ- dsea` jmigüĩ. Jo e júu^ jo nilitĩ mĩ nití' jm̃ĩøøñⁱ- uiĩ dseeⁱ- quiá'ⁱ- jaléng'ⁱ- dsea` jmigüĩ. 21 Jo dsu' lana, lab guíngⁱ- i dsea` i ni'níngⁱ-

jnea~ fi' quini~ jaléng^ dsea` i 'ní^ ní~ quié~e.
 22 Dsuo' lana jnea~, dsea` lín^n jaang` dsea` jmigüí`
 i jáa' fi' ñiff~, 'né~ nidsingün~ n lí^ laco' la fé' fi' ní~
 jì' quiá'- Fidiéé. jjo dsu' e ngí~ fíi~ i dsea` i ni'níng~
 jnea~ fi' quini~ jaléng^ i dsea` í!

23 Jjo mi~ canúu~ i dsea` guitúung` do e cajíng'-
 Jesús lado, jjo canaaiñ` jmingi' rúíñ`:

—¿I~ jaang` jneaa~aa', faa~aa', dsea` née'ee' la i
 ni'níng~naa' Fíinaa' Jesús?

I~ i niing~gui

24 Jjo mi~ cangoyúung^ e cagó'r, jjo canaang` i
 dsea` guitúung` do jmiquím'- dsíir' quiá'- uíi~ e
 sñiñ` quiá'- i~ i niing~gui lajee` la'ó' ír`.

25 Jjoba' cañíi' Jesús quiáíñ'- do jjo casí'- reiñ`:

—Jaléng^ dseata~ i quiu' ta~ quiá'- jaléng^ dsea`
 i ja` cuíng` Fidiéé` jmóor` laguidseaang^ e jmiti~
 dsea` jalé' ta~ e quiu'r. Jjo jalém^ i dsea` do 'né~
 fé'r e eáam` guiú~ jogui e eáam` jlo^ laco' ta~ quiu'
 dseata~ quiá'r. 26 Jjo dsu' 'nú', dsea` líng^na' dsea`
 quié~e, ja` cuóøng` fa' e líng^na' lajo. Co' ií` 'nú'
 i iing~ i nilíniing~gui, 'né~ nijmee~na' laco' jmóo`
 jaang` dsea` i ja` niing~; jogui ií` 'nú' iing~ i niquiá'-
 ta~, 'né~ nijmee~na' lajii' ta~ e iing~ dsea` rúm^ba'.
 27 Co' e já' e í dsíi' dsea` e eáang`gui niing~ i dsea`
 i guíng` gø' laco'gui i dsea` i caguié^ e jmiñi~ do.
 Dsu' jnea~ sín^n la jee~ 'nú' lí^ laco' jaang` dsea` i
 jmóo` lajii' e iing~ dsea` rúng^.

28 'Jjo co' nicangí^ba' cóo'~ jnea~ contøøng~ la-
 jee~ nicangongün~n jalé^ iihuí' fi' jmigüí' la, 29 jjo
 uíi~ e lajjo nicajmee~na', jjoba' nicuóøø 'nú'
 e niquiá'^na' ta~ colíng~ cóo'~ jnea~ fi' ñiff~ lí^
 laco'gui la nicangíng` jnea~ quiá'- Tiquié^e Fidiéé`

dsea` guing~ ñiff~ e niquiá'^u ta~ cajo. ³⁰ Jo colim~ ni'né'^ niquiee~naa' cóo'~ jnea~ fí' jo, jogui røøb` niquidsi'naa' í' cajo quia'- laji` guitu' 'lé" dsea` Israel.

Mi~ cajmée` Jesús júu^ e nijng'- Tú^ Simón e ja` cuiñ` dsea` do

(Mt. 26:31-35; Mr. 14:27-31; Jn. 13 :36-38)

³¹ Jo mi~ cali~ jo, cajng'-gui Jesús casí'r- Tú^ Simón:

—Simón, Simón, lana nicamng` Satanás 'nú" e niguia` ji'r' 'nú" lafa' mi~ ji' dsea` qui` cui'iee`. ³² Jo dsu' jnea~ nicamñi~i Tiquié`e dsea` guing~ ñiff~ uii~ quií'- e laco' ja` güilín'^ e nilitúng~ a' júu^ quie~e. Jo 'nu, mi~ nifo'tu' calé' catú~ e lin' dsea` quie~e, joba' jmicoo'~ jóng jaléng' dsea` rún" e laco' teágui nisíñ'- cóo'~ júu^ quie~e.

³³ Joba' cañi' Tú^ Simón jo casí'r- Jesús jo cajíñ'-:

—Fíi'i, teáb` dsí' jnea~ e ninii~i cóo'~ 'nu' fí' 'nuñí^ fng song casáng' dsea` 'nu, jogui colim~ nijúu~naa' fng cali'né~ lajo.

³⁴ Joba' cañi` Jesús quia'- Tú^ Simón jo casí'-reiñ':

—Tú^ Simón, e laba' fñi~i 'nu, e dsa'ó` góo' na, nú'-gui e niquí'- tuidsée^, 'nu' nifo'^ 'ní' née' e ja` cuín'^ jnea~.

Mi~ nijaquíeng' oor~ e nidsingñng- Jesús jalé` iihuá'

³⁵ Jo lí~ jo, cajmingí'- Jesús jaléng' i dsea` quia'r- do jo cajíñ'- casí'-reiñ':

—Mi~ casñn~n 'nú" e ja` quie^na' nosúu' quií~na' o'gui cuu~, jogui jíi'~ lomñi~na' e ø'ba', joba' jíi'~ coo' ja` ee` cali'né`gui, ¿já^ leáa'~?

Jōba' cañíi` i dsea` do jō casí'r` Jesús:

—Dseáng`- lajōb líí, Fíi`i'.

³⁶ Jōba' cajíng`-tū Jesús casí'r` jaléng` i dsea` do:

—Jō dsu' lana fíi`-i 'nú', jaléng` 'nú' i sea` nosúú' quiá'- cóo`-gui lí~ téé~ cuu` quií`-na', jōba' quie`na' jalé' e jō; jōgui ií` 'nú' i ja` sea` ñisú` quiá'-, jōba' 'ñi~na' cóo` 'mi'guiéé`- quií`-na' jō leáa`na' cóo` e ñí` jō. ³⁷ Dsucō' lana tí` nilití` jalé' e fé' fí` ní` jì` quiá'- Fidiéé` lí` fé' lala uii~ quié`-e: “Jō jee~ jaléng` dsea` i soo` dsíí` cali`líiñ`”. Dsucō' lajalé' e fé' fí` ní` jì` quiá'- Fidiéé` uii~ quié`-e, dseáng`- 'né` nilitib` e jō.

³⁸ Jōba' cañíi` i dsea` do quiá'` Jesús jō cajíñ`-:

—Fíi`i, lab sea` tú`- ñisú`.

Jōba' cañíi`tū Jesús jō cajíñ`-:

—Nitéb` jii`~ lana.

Mí` casíng`- Jesús cóo`- Fidiéé` fí` mó` Olivos

(Mt. 26:36-46; Mr. 14:32-42)

³⁹ Jō mí` cangí` e cajíng`- Jesús e júu` jō, dsifí` ladob cagüi`íir' jō cangó`-tur fí` mó` Olivos lí` laco`gui jii`~ e quií`- tíiñ` e jmóor`. Jō cangolíim` jaléng` i dsea` quiá'r` do cajo tí`leáaiñ` laco` cangó`- dsea` do. ⁴⁰ Jō mí` caguilíiñ` e fí` mó` jō, jōb cajíng`- Jesús casí'r` i dsea` quiá'r` do:

—Féeng`-na' Fidiéé`, jō lajōba' ja` dseáng`- e nijíúng`-na' fí` ní` dsee`-.

⁴¹ Jō lí` jō, dob catiúung`-tear i dsea` quiá'r` do, jō 'ña'bre cangóor`- tí` doguijiu` lí` laco` í' e tí' cóo` cuu` e bí` dsea` cóo`- guóor`. Jō casí'r` uó`- jnir` jō canaaiñ` féiñ` Fidiéé` jō cajíñ`-:

⁴² —Teaa~, song iin`~ jōba' cuóom` lí` laan`~ jnea` jee~ jalé' iihu' e tí` lí` nidsing`ñ`-n; jō dsu' ja` güilí`

laco' iing~ jnea~, co' güilitib~ jial dseáng'- jii' iing~ 'na' e niliti'.

43 Jo mi~ cajíng'- Jesús lajo, jo dsifi' lajob cajnéng- jaang` ángel i casíng` Fidié~, jo cacuø'r' dsea` do bí e quiá'- e nité'r` cóo'~ jalé` iihuí' e tí lí~ nids- ingúíñ'. 44 Jo lajee` jo eáang`gui canaang` Jesús jmiféiñ' Tiquiá'r^, jo canaang` sojiúíñ' jmiguíee` e lí' la lí' jmi'øøíñ' cartí' ni~ uó'.

45 Jo mi~ calí- e féiñ' Tiquiá'r^, jo cangám'- tur fí lí~ caseáaiñ' i dsea` quiá'r- do, jo cadséng`neiñ' do e güim`biñ' do lajaléiñ', co' dsíng'- nicalijiuung~ dsíir'. 46 Joba' cató'- Jesús i dsea` do jo casí'-reiñ' lala jo cajíñ'-:

—¿Jiali' güiing` 'ná'? Jminá- ráang-na' jo féeng'-na' Fidié~ dsea` guíing~ ñíff- uii~ quí'na' yaang-na', jo lajoba' ja` dseáng'- e nijíung-na' fí ni~ dsee-.

Mi~ casang'- dsea` Jesús

(Mt. 26:47-56; Mr. 14:43-50; Jn. 18 :2-11)

47 Jo laco' gui'nang'~ e fé'bi Jesús e júu^ na, mi~ canaang` guíling- fíing' dsea`. Jo jaang` lajee` lajaléng' i dsea` guitúung` do i sií Judas Iscariote, í'bing' i quíe' níff' quiá'- i dsea` do. Jo cangoquíeeiñ' fí lí~ sing' Jesús jo cachu'r' ni~ dsea` do. 48 Jo dsu' lalab cañí' Jesús quiáíñ'- do:

—Judas, ¿su cóo'~ e chu' ni~baa e nijáan'~ jnea~ fí jaguó` jaléng' i 'ní' níng- jnea~, dsea` i jáa' fí ñíff- i líng' jaang` dsea` jmígüí'?

49 Jo mi~ cangá- dsea` guitúung` quiá'- Jesús e calí- lado, jo cajmíngi'r' Jesús jo cajíñ'-:

—Fí'naa', ¿su nití~naa' cóo'~ ñisü'?

⁵⁰ Jø jaang`i dsea` guitúung` do caguir` ñí` quiá'r` , jø caquiũ'r` logua` dsée` quiá'- jaang` dsea` i` jmóo` ta` quiá'- i` jmidsea` i` laniing` do. ⁵¹ Jø dsifi' lajõb cajíng' Jesús casí'r` i` dsea` quiá'r` do:

—Jø` e cang`na'r` jüi` cõõ` ; nilíb` jüi` lana.

Jø dsifi' lajõb cagüi' Jesús e lí` 'ná` quiá'- i` dsea` sicuáng` do, jø ladsifi' lanab ca'lóo` loguaiñ` do. ⁵² Jø lí` jø, casí'- Jesús jaléng` fii` jmidsea` cóõ' jaléng` i` née` ní` guá'- cóõ' gui jaléng` dsea` cõong` quiá'- guá'- quiá'- dsea` góor` dsea` Israel, cõ' la-jalém` i` dsea` i` caguilíñ` e nitøør` Jesús, jø cajíñ` casí'r` i` dsea` do:

—Lana cagüilíng` 'nú` e quié`na' jalé` ñisü` cóõ' gui jalé` 'ma` e nijmang`na' jnea` lafa' jaang` ñi. ⁵³ Jø lacoõ` jmü` lacoõ` jmü` ca'ée` e 'nú` júu` quiá'- Fidiéé` fí` guá'- qui`naa', jø dsü' ja` cateá` óo`na' fa' e caséng`na' jnea` lajee` jø; jø dsü' lanagui cagüeá` oor` e güijé` 'nú', cõ' Fidiéeb` dsea` nicacuør` fí` lajõ e i` 'lim` niquiá'r` ta` e uøø` lana.

Mi` cajíng`- Tú` Simón e ja` cuiñ` Jesús

(Mt. 26:57-58, 69-75; Mr. 14:53-54, 66-72; Jn. 18 :12-18, 25-27)

⁵⁴ Jø dsifi' lajõb casaiñ` Jesús, jø catør` dsea` do fí` quiá'- i` jmidsea` laniing` quiá'- dsea` Israel. Jø huim` ngang` Tú` Simón e t'leáaiñ` laco' ngolíng` i` dsea` do e téer` Jesús. ⁵⁵ Jø mi` caguilíñ` fí` jø, jø canaang` i` dsea` i` casó'- quiá'- Jesús do e jüi'r` jüi` fí` guiá` jóo` siguí', jø caguár` lacúng` lajíng` e jüi` do mi` cacóo`. Jø dob caguá` Tú` Simón cajo jee` jaléng` i` dsea` do. ⁵⁶ Jø mi` cangá` jaang` dseamí` i` jmóo` ta` quiá'- i` jmidsea` do e dob guíng` Tú`

Simón jee~ jaléng' i dsea` i neáang' do, jò canaaíñ` jmicuíng`neiñ' jò casí'~reiñ':

—Jaa~, cangib' i dseañu' la cóo'~ Jesús cajo.

⁵⁷ Jò mi~ canúu~ Tú^ Simón lado, jò dsifí' lajòb cajíñ'~ casí'r~ i dseamî do:

—Ja` cúing`jneaiñ' do, dseamî.

⁵⁸ Jò mi'máing~guijia lajò, jiéng'gui calicuí' quiá'r~ jò cajíñ'~:

—Dsea` quiá'~ Jesús líng'gui 'nu' cajo.

Jò mi~ canúu~ tu Tú^ Simón lado, jò dsifí' ladob cañí'tur jò cajíñ'~:

—Ja` jee~ i do quíing'~ jnea~, dseañu'.

⁵⁹ Jò mi~ cangî cóo` oor~ lajò, jiéng'gui jaang` dsea` cajíñ'~:

—E já'~ba' líng' i dseañu' la dsea` quiá'~ Jesús, có' i seeng` fí Galileab la cajo.

⁶⁰ Jòba' cañí'tu Tú^ Simón jò casí'r~ i dsea` do jò cajíñ'~:

—Ja` ñii~ ee` e fó' na, dseañu'.

Jò ja` mí cató'bi e fé' i Tú^ Simón do lajò mi~ tí lí~ caqui' jaang` tuidsée^. ⁶¹ Jò jòb mi~ caji' Jesús nir~ jò cajóøiñ~ Tú^ Simón tí lí~ siñ', jò dsifí' lajòb cadseng'~ dsí' i Tú^ Simón do e cajíng'~ Jesús lamí~ neáaiñ' gø'r' do: “Dsa'ó` góo' na, ná'~gui e níquí'~ tuidsée^, 'nu` nifo^ 'ní` née'~ e ja` cuín' jnea~.”

⁶² Jò mi~ cadseng'~ dsí' i Tú^ Simón do e cajíng'~ Jesús lajò, jò dsíng'~ calijiuung` dsír', jò dsifí' lajòb cagüi'fir' jò dsíng'~ canaaíñ` qui'r' jóng.

Mi~ cajmeáng' dsea` Jesús

(Mt. 26:67-68; Mr. 14:65)

⁶³ Jò mi~ cangî jò, jaléng' i dsea` i jée' quiá'~ Jesús canaaíñ` lóøiñ~ dsea` do jògui bóøng~neiñ',

64 jə cajnír' jmini' dseá do jə cabár` moniñ'~ jə cajmingi' reiñ' lala jə cajíñ'~:

—¿I' i cabóøng' 'nə? jJmee' júu^, ne'ee'!

65 Jə jmigui'bi jalé' e fé'r' e jmineaiñ'^ dseá do lajee' jə.

Mi' cangojéiñ' Jesús fi' li' siseáng' jaléng' dseá cóøng' quiá'~ guá'~

(Mt. 26:59-66; Mr. 14:55-64; Jn. 18 :19-24)

66 Jə mi' cajneá' e jmii' jə, jə caseáng' jaléng' dseá cóøng' quiá'~ dseá Israel cóo'~ jaléng' fi' jmidsea' cóo'~gui jaléng' tifa' quiá'r~, jə cató'r~ Jesús fi' li' nisiseáiñ' do, jə cajmingi'r' dseá do lala jə cajíñ'~:

67 —Jmee' júu^, ne'ee', ¿su 'nəb' Dseá Jmáang'~?

Jəba' cañi' Jesús quiá'~ jaléng' i dseá do jə cajíñ'~:

—Song nijmee'~ jnea'~ júu^ røø, ja' já'~ nilíng' 'nú' júu^ quié'~ e jóng. 68 Jəgui song ee' nijmingi'~i 'ná', ja' e ñi'na' ningii'~na' quié'~ e cajo. 69 Jə dsu' latí' lana jnea'~, dseá cagá'~ a fi' ñifi'~ e líin'n jaang' dseá jmigüí, niní' i lí'^ lí' dsée' laco' guíng'~ Fidié'~ dseá guíng'~ ñifi'~, dseá i 'gøng' eáang' la'úng'~ fi' jmigüí.

70 Jə mi' canúu'~ jaléng' i dseá do e cajíng'~ Jesús lado, jə lajalém'bre cajmingi'r' dseá do jə cajíñ'~:

—Jə ¿su 'nəb' Joo' Fidié'~ dseá guíng'~ ñifi'~ liya?

Jəba' cañi'tu Jesús quiá'~ jaléng' i dseá do jə cajíñ'~:

—Dseáng'~ lajob lí' lí'^ laco' la nicafée'~na' na.

71 Jə mi' canúu'~ jaléng' i dseá do e cajíng'~ Jesús lajə, jə casiiñ'~ lajee'~ lajaléiñ' do jə cajíñ'~:

—¿Eñgui ta~ e 'neáng-guñi' jaléng' dsea` i tíi ni~? Co' yee~baa' nicaná' náng jial laco' lí' júu` quiá'r~.

23

Mi~ caguiéng'- Jesús fi' quini` dseata~ dsea` féng' i sii` Pilato

(Mt. 27:1-2, 11-14; Mr. 15:1-5; Jn. 18 :28-38)

¹ Jo mi~ cangî jo, lajalém' i dsea` do cangojéiñ` Jesús fi' quini` jaang` dseata~ dsea` féng' i sii` Pilato.

² Jo mi~ caguiliñ' do fi' do, jo canaañ` jmóor` dsee` quiá'- dsea` do jo cajíñ'-:

—I dseañu' la ngir' lacaang` jee~ 'núu' ta~ jmiguíng` jaléng' dsea` i seeng` fi' lí~ quiú' 'nu` ta~. Jogui ngir' fé'r' e ja` 'né~ niquí'naa' cuu` quiá'- i dseata~ dsea` féng' i guing` fi' Roma, jogui fé'bir cajõ e íbre líiñ` Dsea` Jmáang` i nisíng` Fidiéé` i nicá` nifí quiá'- jaléng' dsea` góo'naa' dsea` Israel.

³ Jo mi~ canúu` i dseata~ Pilato do lado, jo cajmingi'r` Jesús jo cajíñ'-:

—¿Su 'nub` dsea` i quie' nifí quiá'- dsea` Israel?

Joba' cañi` Jesús jo cajíñ'-:

—Dseáng'- lajõb lí' lí' laco' la nicafée'~ 'nu` na.

⁴ Jo mi~ canúu` Pilato e cajíng'- Jesús lajo, jo casí'r` jaléng' i fií~ jmidsea` do cóo'~gui jaléng' i dsea` i teáng' do jo cajíñ'-:

—Ja` niguié' jnea~ júi' coõ` dsee` e sea` quiá'- i dseañu' la.

⁵ Jo mi~ canúu` jaléng' i dsea` do lado, jo eáang'gui canaañ` jmóor` dsee` quiá'- Jesús jo cajíñ'-:

—I dseañu' na eáang' ngir' ta~ jmiguíng` dsea` cóo'~ jalé' e er'. Jo canaañ` jmóor` lajõ catí lí~ se'

Galilea cartí cagüéiñ` fí la, fí lí` se' Judea, e jmóor` lajo.

Mi` cangojéiñ` Jesús fí` quini` jaang` dseata` i sii` Herodes

⁶ Jo mi` canúu` Pilato e café` dseá` lajo, jo cajmingí`r` su fí` lí` se' Galileab seeng` Jesús. ⁷ Jo mi` cajíng`- dseá` e fí` job seeiñ`, joba' casiñ` dseá` do cóo`- jaang` dseata` i sii` Herodes i líng` dseata` dseá` féng`' quiá'- Galilea, co' ie` jo dob nitáang` i dseata` do fí` Jerusalén. ⁸ Jo mi` cangá- Herodes e cangáiñ` Jesús, dsíng`- cali'íáang` dsíir`, co' líb` nıcajá- e iñ` e niníiñ` dseá` do, co' fım' dseá` dsicóor` júu` quiá'- jalé' e guiá- e nıcajmée` dseá` do, jogui güıjer` fa' ee` nijmé- dseá` do e lí. ⁹ Jo jmiguiab` jalé' e cajmingi'r` dseá` do, dsu' jıı' camı'` júu` ja` ee` cañi` Jesús quiáiñ`- do. ¹⁰ Jo lajee` jo, dob teáang` jaléng`' fi` jmidsea` quiá'- dseá` Israel cóo`- jaléng`' tıfa' quiá'r-, jo dseáng`- eáam` teáaiñ`- do jmóor` dsee- quiá'- Jesús. ¹¹ Jo mi` cangá- Herodes e ja` ee` ngıı` Jesús, joba' cajmıcóo`- rúıñ` cóo`- jaléng`' 'léé- quiá'r- e canaaıñ` lóoıñ`- dseá` do, jo caquiñ` dseá` do caneáang` sı'` dseata` dseá` féng`'. Jo lí- jo, i dseata` do caguiéng`'tı Jesús fí` lí` guıng`- dseata` Pilato calé` catı'. ¹² Jo ie` jmı` jo røøb` casıng`-tı dseata` Herodes cóo`- dseata` Pilato, co' lamı` jéeng`gui` nıb` nıcangáng`- rúıñ`'.

Mi` cahı'`ta` e nijúung` Jesús

(Mt. 27:15-26; Mr. 15:6-15; Jn. 18 :39-19 :16)

¹³ Jo mi` caguiéng`-tı Jesús fí` lí` guıng`- dseata` Pilato, jo caquiıñ`' do ta` e caseáng`' jaléng`' fi` jmidsea` cóo`-gui jaléng`' dseata` jogui cóo`- jaléng`'

dsea` fii. ¹⁴ Jo mi~ caseáng' jaléng' i dsea` í, jo lalab cajíñ'- casí'- reiñ':

—'Nú' cañijéeng'na' i dseañu' la fí' la e jmoo'na' dsee- quiá'r- e ngir' jmiguiñ- jaléng' dsea` fii; jo jnea~ nicajmingú'r~ jalé' e júu^ jo fí' quini^ 'nú' lajaléng'na' na, jo dsu' júi~ coo` dsee- ja` mí cadsé'e e røøiñ' lí'^ laco' júi~ e 'náng'na're. ¹⁵ Jogui nicasúm-bír fí' lí' guing~ dseata~ Herodes, dsu' o'gui i dseata~ í lüing~ ee` dsee- cadser' quiá'- dsea' la, joba' fí' lab nicaguiéng'tureiñ'. Jo niñi^ba' e júi~ coo` ja` ee` mí cajméer` fa' cuøøng` e ni-jngáang'~naa'r, ¹⁶ jo dsu' nicuøø^baar iihuí', jo lí- jo nilaam-tur calé' catú-.

¹⁷ Jo lajee~ e jmü~ jo tíng` dseata~ Pilato e jmi'iaaiñ` dsí' jaléng' dsea` fii jo láaiñ` camüing'- dsea' i iuung- fí' dsí' 'nuñi^'. ¹⁸ Jo dsu' jaléng' i dsea` fii do canaiñ` oor` teá' jo fé'r' e éeiñ' Jesús:

—¡Ja' laan'- i dseañu' ná! ¡Leaang- Barrabás!

¹⁹ Jo i Barrabás do nica'ír- 'nuñi^ dsu' uí'~ e 'ní' níiñ- jaléng' dseata~ jogui e nicaingaiñ' dsea` cajo. ²⁰ Jo dsu' dseata~ Pilato eáang'gui iñ~ e niléaiñ- Jesús laco'gui i Barrabás do, joba' casí'-tur dsea` fii calé' catú-. ²¹ Jo dsu' jéeng'gui i dsea` fii do canaiñ` fé'r' coo'~ júu^ teá'gui jo cajíñ'- e éeiñ' Jesús:

—¡Fí' dse' crúu^ teáaiñ' na! ¡Fí' dse' crúu^ teáaiñ' na!

²² Jo lí- jo, catí' 'ní' née'~ cajíng'-tu dseata~ Pilato casí'r- jaléng' dsea` fii:

—Jo ¿e~gui dseáng'- e ga` nicajméer'? Ja'gui ee` dsee- niguié' jnea~ e røøiñ' fa' e cuøøng` e nijúuiñ-. Dsu' lifa' nicuøø^baar iihuí', jo lí- jo, nilaam-tur calé' catú-.

23 Jo dsu' jaléng' dsea` fii` cóo'~gui jaléng' fii` jmidse` eáng'gui canaaiñ` ta'r` mii` e mi'tur e nitáng` Jesús fí` dse` crúu^, jo lajòb cajméer` cartí` calí'r` lajii` e mi'r` do. 24 Jo lajòb cajmée` dseata` Pilato lí`^ laco' jii` e mi' i` dsea` i` teáng` do, 25 jo caleám`bre i` Barrabás do, dsea` i` 'ní` níng` jaléng' dseata` jogui` nicajngaiñ` dsea`, co' uing` quiá'- e joba' e iuuiñ` 'nuñí`, jo cajám`bre Jesús fí` jaguó` jaléng' dsea` i` 'ní` níng` dsea` do; jo cajméer` lajò cóo'~ jaléng' dsea` fii`, co' lajòb cali'íiñ` do.

*Mi` catáng` Jesús fí` dse` crúu^
(Mt. 27:32-44; Mr. 15:21-32; Jn. 19 :17-27)*

26 Jo mi` cangf` jo, jo cangojéem`bre Jesús fí` lí` nitáañ` fí` dse` crúu^ . Jo lajee` teáañ` do fí` e ngolíñ` , cajíñ` jaang` dseañu` i` laco' nijang' jee` ta` quiá'- i` sii` Simón i` seeng` fí` cóo` fii` e sii` Cirene, jo caquiur` ta` e cajéeng` i` dseañu` do crúu^ quiá'- Jesús laguidseang`; jo cangór` caluu` laco' ngóo` dsea` do.

27 Jo fii`m` dsea` i` ngolíng` laco' ngóo` Jesús, jogui` dsíng` fii`ng` dseamf` i` ngolíng` qui' jo ti'óor` e lijiuung` dsír` uii` quiá'- Jesús. 28 Dsu' Jesús cají' nir` cajóñ` jaléng' i` dseamf` do jo cajíñ` casí'-reiñ`:

—Dseamf` i` seeng` fí` Jerusalén, ja` qui`na' uíi` jnea~, dsu' quii`na' uii` qui`na' yaang`na' jogui` uii` quiá'- joo`na'. 29 Co' niguiéeb` jmii` mi` nífé` jaléng' dsea': "Juguiá` jia` quiá'- jaléng' dseamf` i` ja` cuóong` nidsiquieeng` yuu, jo ja` ii` caliséng` quiá'r` i` cacuó'r` tá'." 30 Jo ie` job mi` nináng` jaléng' dsea` e nimí'r` jalé' mó' jo nijíñ` : "Lii`ng` güjiiá' sii` lí` née'naa"; jogui` nisí'r` jalé' mó' : "Meeng` jnea' "

lajminá˘.” 31 Co' song lanab cuø'na' jnea˘ iihuı́, dsea' ja' dsee˘ røøn˘, jøba' jial tí'gui nidsinghng˘ 'ná', dsea' røøng'na' dsee˘.

32 Jo jaléng˘ i dsea' i ngolíng˘ do jéeiñ` gáng˘ ì i nidsijngáaiñ` colíng˘ cóo˘ Jesús. 33 Jo mi˘ caguiliñ` cóo˘ cuo˘ lí si˘ Cuo˘ Mogui˘ 'Li˘, jo fı́ job cateáaiñ` Jesús fı́ dse˘ crúu˘ cóo˘ laji˘ gáng˘ i ì do, jmá'˘ jáng˘ crúu˘ lajaañ` do: jo jmá'˘ jáng˘ i ì do catáañ` lacataang˘ cáang˘ Jesús, jaang˘ lí' lí dsée' jogui jaang˘ lí' lí tuung˘. 34 Jo lajee˘ gui'ná' e táang˘ Jesús fı́ dse˘ crúu˘ cajíñ`:

—Teaa˘, íng˘ dsee˘ uui˘ quiá'˘ jaléng˘ i dsea' na, co' e ja' lí'biñ' na jalé' e jmóor˘.

Jo mi˘ calí˘ e cateáaiñ` dsea' do fı́ dse˘ crúu˘, jaléng˘ i 'lée˘ do canaañ` cóor˘ quiá'˘ i˘ nilí' lajee˘ lajaléiñ` do i nicóo˘ sí'˘ Jesús fı́ quiá'r˘. 35 Jo lajalém' dsea' teáaiñ` e jøør˘ jalé' e calí˘, jo jaléng˘ i dseata˘ do canaañ` løøiñ` Jesús jo sí'r˘ dsea' do lala jo fé'r˘:

—Caleám˘bre jaléng˘ dsea' jíéng˘, joba' güileáang˘ 'ñia'r˘ náng, song dseáng'˘ já' e íbre líiñ` Dsea' Jmáang˘, dsea' i casíng˘ Fidiée˘ fı́ jmígüi˘ la.

36 Jo jaléng˘ i 'lée˘ do løøm˘bre dsea' do cajo, jo dsiquíeeiñ` quiá'˘ lí táang˘ dsea' do fı́ dse˘ crúu˘, jo cuø'r˘ dsea' do jmá'˘ mí'˘ huíng˘ jó' e tí'. 37 Jogui sí'r˘ dsea' do lala jo fé'r˘:

—Leaang˘ uø' náng song dseáng'˘ já' e 'na' lin' i dsea' i quie' nifí quiá'˘ dsea' Israel.

38 Jogui cóo˘ cóo˘ 'majmá' yá' gui˘ crúu˘ lí táaiñ` lí sílí` cóo˘ jalé' jmí' griego cóo˘ gui jmí' latín jogui cóo˘ jmí' hebreo, jo lalab guøng˘: “I lab i dsea' i quie' nifí quiá'˘ dsea' Israel.”

39 Jɔ jaang` i ɰ i taang` fi` dse` crúu` do gab` fé`r` uii` quiá`- Jesús cajo, jɔ sí`r` dsea` do lala:

—Song dseáng`- já`- e `nɘ lin` Dsea` Jmáang`-, jɔba` leaang`- uo` jóng jɔgu` leaang`- jnea`^.

40 Jɔ dsɘ` i ɰ i jaang`gu` do ca`gaam`bre quiá`- i ɰ rúin` do jɔ cajín`- casí`-reiñ`:

—¿Su ja` jáa` qui`- fa` e `góng` Fidié` dsea` gui-ing` ñifi`-, `nɘ dsea` tán` fi` dse` crúu` la cajo? 41 E liang` uim`ba` e taang`- jnea`^ la, co` lagu`b` qui`naa` quiá`- jalé` e nica`lee`naa`, dsɘ` i dseañ` la jji`- coo` ja` ee` mí` ca`léer`.

42 Jɔba` cajín`- casí`r`- Jesús:

—Jesús, gü`guiéng` o` jnea`- mi`- ninaan`- niquiá` ta` la`úng`- fi` jmigu`.

43 Jɔba` cañi` Jesús quiá`- i dseañ`- í` jɔ cajín`- casí`-reiñ`:

—E já`- e fi`-i `nɘ, dseañ`, e náb nidsi`ié`ee` cóo`- jnea`- fi` ñifi`- li` guing`- Tiquié`e.

Mi` cajúng`- Jesús

(Mt. 27:45-56; Mr. 15:33-41; Jn. 19 :28-30)

44 Jɔ lajee` táang` Jesús fi` dse` crúu` mi` catí` guieñi`- jóo`, jɔb mi` ca`í`- núu` fi` guóo`- uó`^ jɔ, jɔ cateá`- cartí` la ii`- `ni` e ca`lloo`. 45 Jɔ cajláng`- iee`, jɔ lajee` jɔ casíng`- tú`- dseá`- jóo` e `mi` e í` guiá`^ jóo` guá`- e si` fi` Jerusalén. 46 Jɔb mi` ca`óo` Jesús jɔ cajín`-:

—Teaa~, fi` jaguóo`ba` nisée`e jmigu` quié`e náng.

Jɔ dsifi` mi` cajín`- lajɔ, jɔ cajúm`-bre.

47 Jɔ mi` cangá`- fi` `lée`- quiá`- dsea` romano e calí`- lado, jɔgu`iba` cajmiféñ` Fidié` jɔ cajín`-:

—Dseáng' ja'ba' e ja` dsee` nirøong` i dseañu` na.

⁴⁸ Jo jaléng' i dsea` i teáng` do cangá-bre jalé' e calí` do, jo mi` caquiñ' e ngolíñ, joba' canaañ` bár` fi` nidsiir', co' fi' íb` eáang' calíñ` . ⁴⁹ Dsu' jaléng' dsea` i cangi' cóo' Jesús cóo' gui jaléng' dseamf` i cajalíng` cóo' dsea` do catí' lí` se' Galilea, huib` cajer' jøør` jalé' e calí` do ie` jo.

Mi` ca'áng` Jesús

(Mt. 27:57-61; Mr. 15:42-47; Jn. 19 :38-42)

⁵⁰ Jo ie` jo seeng` jaang` dseañu` i guiúng` eáang' i sií` Sé` i caliséng` fi' cóo` fi` lí` sií` Arimatea fi' lí` se' Judea. Jo líiñ' do jaang` dsea` féng' i quiu' ta` quiá' dsea` Israel. ⁵¹ Jo i dseañu` do güije`bre e nicá` Fidié` nifi' quiá' lajaang` lajaang` dsea` jmigüi, jogui ja` calijí'r` cajo dsu' e cahuí' ta` e nijúung` Jesús lí' laco'gui casíng` i dseata` caguaang` rúin' do. ⁵² Joba' mi` cajúng` Jesús, cangó` i Sé` do fi' quini` dseata` Pilato, jo camir' fi' e ni'áaiñ` Jesús, jo cacuøbi` i dseata` í` fi' e nijmé` Sé` lajo. ⁵³ Jo dsifi' lajob cangór` fi' lí` táang` Jesús fi' dse` crúu`, jo cajgiáaiñ` dsea` do, jo caquiñ' cóo` 'mi' té` e niguo`, jo cangojéiñ` dsea` do e ca'áiñ` fi' dsí' cóo` too` jiáa', co' lajob qui' táng` jaléng' dsea` Israel e áaiñ` 'líi` quiá'r` . Jo e fi' jo jíi' jaang` 'líi` ja` mí` ca'áang` lamí` jéeng'gui. ⁵⁴ Jo ie` jmíi` jo nilíi' e guati'ló` jmíi` e jmi'íng' jaléng' dsea` Israel.

⁵⁵ Jo jaléng' i dseamf` i cajalíng` cóo' Jesús catí' lí` se' Galilea cangolíim`bre cajo, joba' cangá-bre jie` lí` ca'áng` Jesús jogui jial caquiee` dsea` do dsí' e too` do. ⁵⁶ Jo mi` calíta` dsí' i dseamf` do

jie~ li~ ca'áng- Jesús, jòba' cangolíim`bre jóng fí lí~ neáaiñ' fí' Jerusalén, jò cangoguiar~ guiá- jalé' jmi~ jmeafi~ cóo'~gui jalé' noo~ jmeafi~ e nidsisuiiñ~ dsea` do mi~ ningf~ jmi~ e jmi'íng' jaléng' dsea` Israel, có' lajòb quiá'- t́ng` jaléng' dsea` ie~ jò cóo'~ jaléng' 'li~ quiá'r-. Jò cajmi'ím' i dseamf~ do mi~ catí í' lajò lí'^ laco'gui ta~ quiu' fí' ní' jì' quiá'- Fidié~.

24

Mi~ cají'tu Jesús

(Mt. 28:1-10; Mr. 16:1-8; Jn. 20 :1-10)

¹ Jò mi~ cangf~ e jmi~ e jmi'íng' jaléng' dsea` Israel, jò jmi~ la'uii~ quiá'- seamaan~ la'eé' eáng' jaléng' i dseamf~ i cajalíng- cóo'~ Jesús catí Galilea do caleáb` catú- cangoliñ- fí' lí~ si'aang~ Jesús, jò quiér' jalé' jmi~ jmeafi~ cóo'~gui jalé' noo~ jmeafi~ e nicaguiar' guiá- lami~ jééng'gui do quiá'- e si'í' nisúuiñ- dsea` do. ² Jò mi~ caguiliñ- e too' jíaa' lí~ ca'áng- Jesús, jò cangár- e nisinab' e oo- ée` do, jò cab' niróo` e cuu~ e cajní- mi~ ca'áng- dsea` do. ³ Jò cangotáam~bre fí' dsí' e ée` do, dsu' jò cadséiñ' Jesús fí' dsí' jò. ⁴ Jò mi~ cangá- i dseamf~ do lajò, jò dsíng'- cafóin' júi~ jò ñir' e~ nijmér-. Jò lajee' jò cóo` cangá-bre e cajnéng- gáng- dseañu' quiá'- laco' teáaiñ-, jò i dseañu' do qui'r' 'mi' té' e jí' jlo'^. ⁵ Jò dsíng'- cafóng' i dseamf~ do mi~ tí' lí~ cangáiñ- i dseañu' do, jò catúuiñ' cartí' ní' uó' dsu' e cafóin' dsea` do. Jòguiba' café' i dseañu' do e caféiñ' i dseamf~ do jò cajíñ'-:

—¿Jialí' ngi'na' 'náng'na' jee~ jaléng' 'li~ i dsea` i jí' lana? ⁶ Có' nicajíb'tur calé' catú-, jòba'

jo` i seeng` fi` la. Téé` óo`na` jial cajíñ`- lamí` cateaaiñ` cóo`- 'nú` fi` Galilea, ⁷ mi` cajíñ`- e ír, dsea` cagüéiñ`- fi` jmi`güi` e jáar` fi` ñifi`- e líiñ` jaang` dsea` jmi`güi`, dseáng`- 'néb`- e nijáng`- dsea` ír` fi` jaguó` jaléng`- dsea` dsee`- dsea` qui` cartí` nijnga`- dsea` do quiá`r`- fi` dse`- crúu`, jo` dsu` mi` nidsíng`- 'ni` jmi` lajo, nijib`- tur` calé`- catú`-.

⁸ Jo` mi` canúu`- i` dseamí` do e júu` na, joguiba` cadseng`- dsíir` jalé`- júu` quiá`- Jesús. ⁹ Jo` dsifí` lajob caquing`- tur, jo` cangojmée`r` júu` i` dsea` guijáng`- quiá`- Jesús cóo`- gui` jaléng`- i` dsea` caguaiang`- gui` do. ¹⁰ Jo` jaléng`- i` dseamí` i` caguicóo`- júu` do siir` Yá` i` seeng` fi` Magdala, jaang`gui` i` sii` Sihuoo`, jaang`gui` i` sii` Yá` ni`quiá`- Tiáa~, jogui` quíim`- bi` dseamí` i` caguaiang`- gui` cajo. ¹¹ Jo` mi` canúu`- i` dsea` guijáng`- do lado, ca`f` dsíir` e ngaam` i` dseamí` do, jo` ja` ee`- já`- calíiñ`- lajúi`- júu` e quíeeiñ`- do.

¹² Jo` dsu` Tá` Simón dsifib`- cangór`- güi`lí` e cangojóør` e fi` too` ée` do. Jo` mi` caguiér`- fi` jo, jo` catúuiñ` cajóør`- jo` cangár`- e jíi`- e 'mi` e caquing`- dsea` doba`- néé`gui. Jo` dsifí` ladob cangáng`- tur, jo` dsíng`- cangogá`- dsíir`- quiá`- jalé`- e cangár`- do.

*Mi` cangolíng`- gáng`- dsea` quiá`- Jesús fi` Emaús
(Mr. 16:12-13)*

¹³ Jo` e jmi` jo, gáng`- lajee`- la'ó`- i` dsea` i` cangi` cóo`- Jesús do cataiñ`- fi` e cangolíiñ`- fi` coo`- fi` lí` sii` Emaús e néé` guicó`- kilómetro lí`- lí` caluu`- fi` Jerusalén. ¹⁴ Jo` lajee`- teáng`- i` dsea` do fi`, jo` ngolíiñ`- síiñ`- quiá`- jalé`- e nicalí`- fi` Jerusalén lajee`- e jmi` jo. ¹⁵ Jo` lajee`- ngolíiñ`, cangoquíéng`- Jesús, jo` canaaíñ`- ngir`- colíing`- cóoiñ`- do. ¹⁶ Jo`

jóøm̄ i dsea` gánḡ do Jesús, dsu' ja` cangíiñ` fa' e calicuíñ` dsea` do ladsifí' lado. ¹⁷ Jo cajmingí' Jesús i dsea` gánḡ do jo casí'~reiñ' jo cajíñ'~:

—¿E~ jalé' e siing~ 'nú' lajee` teáng'~na' fi'?
¿Jiali' líng'na' fi'í'?

¹⁸ Jo jaang` i dseañu` do i nisii` Cleofas cañir` quiá'~ Jesús, jo casí'r~ dsea` do jo cajíñ'~:

—Lajim` dsea` niñir` jalé' e nicalí~ fi' Jerusalén lajee` e jmi~ e cangíng' na. Jo ¿su jíi~ 'nub` dsea` guiin~ fi' Jerusalén e ja` ñí'^ jalé' e nicalí~ fi' jo?

¹⁹ Joba' cajmingí'tu Jesús quiá'~ i dsea` do jo cajíñ'~ casí'~reiñ':

—¿E~ jalé' e nicalí~ fi' jo?

Joba' cañí' i dsea` gánḡ do jo cajíñ'~:

—Mó'` jáa'naa' si~naa' jalé' e calínḡ Jesús i seeng` fi' Nazaret, jaang` dsea` 'gøng' i café' cuaiñ~ quiá'~ Fidié~, jo cajméer` jalé' e quí'r~ jmi~ e dsigá` dsí' dsea', jogui eáng' 'gøng' jalé' júu^ e café'r` cajo; ²⁰ jogui si~naa' jial cajmée' jaléng'` fi~ jmidsea` cóo'~gui jaléng'` dseata~ quí'~ii' mi~ cajáiñ'` dsea` do fi' jaguó` jaléng'` dsea` fi~ e laco' niteáiñ~ dsea` do fi' dse'` crúu^ cartí' nijngáng'~neiñ'. ²¹ Jo jnea'^ nisita~ dsí'naa' e í'bre dsea` i nileánḡ jnea'^, dsea` lí'naa' dsea` góor` dsea` Israel. Jo dsu' lana ningóo'` ní' jmi~ e cangojée' jalé' e jo. ²² Jo cóo` tú~ mñng'~ dseamí i quíng'~ jee~ jnea'^ nicaguilíñ` 'ma'ee' e fóiñ' jnea'^, co' nicangolíñ` e ja` mí' jnea` røø' fi' lí' ca'ánḡ dsea` do, ²³ jo dsu' jo` seeng` i 'líi~ do e too' lí' ca'ír~ do mi~ caguilíñ~. Joba' mi~ caquing'~tut, quíeer` júu^ e cangáiñ~ ángeles quiá'~ Fidié~ i cajíng'~ e nicajíb'tu Jesús calé' catú~. ²⁴ Jo lí' jo, cangolínḡ fi' jo cóo` tú~ mñng'~ dsea` i la'ó'

ngí cóo'~naa' e fi' do, jò cangá-bre cajo dseáng'-
jii'~ laco' júu^ e quiéé` i dseam^ do, jò dsu' ja
cangáñ- Jesús.

²⁵ Jòba' cajíng'- Jesús casí'r- i dsea` gáng- do:

—iSóong- ja` iing~ 'nú' e ningáng'na' jalé` ee`
líí', jogui dsíng'- jmiíing~na' e já'- nilíng'na' jalé`
júu^ e caguaí jaléng' dsea` i café` cuaiñ~ quiá'-
Fidiéé` mali'gui eáang'! ²⁶ Co' dseáng'- 'né-ba' e
cangongíng- Dsea` Jmáang- jalé` e jò ná'-gui e
nidséng'-tur calé` catú- fí ñifí- quiá'r-.

²⁷ Jò dsifí' ladob canaang` Jesús e sí'r- i dsea` gáng-
do jalé` júu^ e fé` uii~ quiá'r- fí ni~ jì quiá'- Fidiéé`
jò canaaiñ` catí' júu^ quiá'- Moi~ cóo'~gui jalé` júu^
caguiee-gui e cajme' i dsea` i café` cuaiñ~ quiá'-
Fidiéé`.

²⁸ Jò malií~gui lajò, mi~ caguilíng- i dsea` gáng-
do e fií lí~ ngolíñ- do, jò cajmée` Jesús e lafa'
e ngóo'bir tí lí huíí'gui, ²⁹ dsu' i dsea` gáng- do
cajmée` e cajeb' Jesús e fií do jò casí'-reiñ' do:

—La je~ cóo'~ jnea'^, co' nica'lóob- eáang' jò tí lí~
ni'í núub^.

Jò mi~ cajíng'- i dsea` do lado, jò cajeb' Jesús fí
lí~ cajé' i dsea` gáng- do. ³⁰ Jò mi~ tí lí~ caguár' e
nidó'r- ir~ e canuu, jò catíng- Jesús coo` iñí^ jò
cacuø'r' gui'máang' Fidiéé`, jò lí- jò caffíñ' e iñí^ do
jò cacuø'r' i dsea` gáng- do. ³¹ Jò mi~ cajmée` Jesús
lado, jòb mi~ calilí^ i dsea` gáng- do e ni~ dseáng'-
Jesús i dsea` do. Jò dsu' dsifí' ladob cango'íing'
dsea` do e laco' gui'ná^ jøøm-bir. ³² Jò dsifí' ladob
canaang' i dsea` gáng- do sí' rúíñ':

—Lado 'míí-, lajee` téé'~naa' fí, dsíng'- cali'iaang`
dsi'naa' mi~ cajmea'r' jneaa~aa' júu^ jalé` e fé` fí

ni~ jì quiá'- Fidiée~ uii~ quiá'r-, dsea` líiñ' Dsea` Jmáang-, ¿já^ já'-?

³³ Jo jo` cajmi`ñing~ yaang~ i dsea` gáng- do, co' dsifi' ladob caquing'-tur cangolíñ' fi' Jerusalén fi' lí~ caseáng'-tur cóo'~ jaléng' i dsea` guijáng' do cóo'~ gui dsea` caguiaang- i ngí cóo'r~ do. ³⁴ Jo dsifi' mi~ cangáng- rúñ', jo lalab cajíng'- i dsea` fíng' do jo casí'-reiñ':

—E já'-ba' e nicají'tu Fí'naa', co' Tú^ Simón nicangá- quiá'r-.

³⁵ Jo joguiba' cajmée` i dsea` gáng- do júu^ jalé' e calíñ- guiá'^ fi', jo jial calicuíñ- Jesús mi~ tí' lí' cafíng` dsea` do iñí' e nidø'r-.

*Mi~ cajmijnéng- 'ñia' Jesús fi' quini` dsea` quiá'r-
(Mt. 28:16-20; Mr. 16:14-18; Jn. 20 :19-23)*

³⁶ Jo lajee~ gui'ná'^ sím'bi i dsea` do jalé' e júu^ na, coo` cajném- Jesús jo casíng' 'ñia'r' jee~ jaléng' i dsea` do jo casí'-reiñ' do lala:

—Güiliseem` 'ná' juguíá- júu^ røø.

³⁷ Jo mi~ cangáng- i dsea` do Jesús, dsíng'- caføiñ' jo canaañ' í dsír' e jøøiñ- jaang` dsea` guí.

³⁸ Jøba' cajíng'- Jesús casí'r- jaléng' i dsea` do:

—¿jiali' 'gó'na? Jo ¿jiali' jmoo'na' e ja` já'- líng'na' e jnea~? ³⁹ Fíng na jøø-du' guóo` cóo'~ gui tíi, co' dseáng'- jneab~ la. Güing'na' jnea~ jogui jøøng`na' jnea~, co' jaang` dsea` guí ja` teáaiñ'- móo` o'gui sea' loo` táaiñ` laco' móo- 'ná' e sea` quié- e lana.

⁴⁰ Jo mi~ cajíng'- Jesús lado, jo ca'e'r' jaléng' i dsea` do lajì tú- guóor` cóo'~ gui tíir-. ⁴¹ Jo dsu' i dsea` do ja` já'- calím- bir uí' e dsíng'- dsigá` dsír'

jogui e iáang` dsíir' cajo. Jōba' cajíng'~ Jesús casí'r~ jaléng` i dsea` do:

—¿Su ja` ee` sea` cuó`jiu' dóø'~ø lana?

42 Jōba' i dsea` do cacuø'r' Jesús ca'náang'~ 'ñu` i cuíng` cóo'~gui ca'ná^ mi' e a` ta'. 43 Jō ca'ím' Jesús e do, jō cagó'bre do fí' quini` jaléng' i dsea` do. 44 Jō mi` cangoyúung'~ e cagó'r', jō casí'r~ jaléng' i dsea` do jō cajíñ'~:

—Lajalé` e nicalín`n, e jōb e cafíi`i 'nú' lami` cangí'naa' colíng` e dseáng'~ 'né` e nilitib` jalé` e fé' uii` quie` e fí' ni` jì` quia'~ Fidiée` e cajme' Moi` jogui fí' ni` jì` e cajme' dsea` i café` cuaiñ` quia'~ Fidiée` jogui e fé' fí' ni` jì` e sii` salmos.

45 Jō lí` jō, cajmée` Jesús e cangáng' jaléng' i dsea` do jalé` e fé' fí' ni` jì` jō uii` quia'r~. Jō lí` jō casí'~reiñ' lala jō cajíñ'~:

46 —Lajōb too` fí' ni` jì` quia'~ Fidiée` e dseáng'~ nisi'í`ba' e cajún`n, jnea` dsea` lín`n Dsea` Jmáang` i casíng` Fidiée` fí' jmígüi` la, jō mi` catí` 'ní` jmíi` lajō, cajíb'túu` calé` catú`; 47 jogui 'né` e nini'~ dsea` júu` quie` e laco` fíi` fí' la'úng` fí' jmígüi`, jō 'né` nináng` e jō catí` Jerusalén e laco' niquí'~ jíng' yaang` dsea` fí' quini` Fidiée`, jō lajoguiba' quí'~ jmíi` e ni'íng` dsee` quia'r~. 48 Jō 'núb' nicañí`na' jalé` e nicalín`n. 49 Jō jnea` nicuóø`ø 'nú' e cajíng'~ Tiquié` e lami` jéeng`gui e nicuø'r~ 'nú', dsu' fí' Jerusalén labi` 'né` já`na' cartí` ni'íng'~na' e Jmígüi` 'gøng' quia'~ Fidiée` e jáa' fí' ñifí~, jō e jōb e nijmicóo'~ 'nú' lata`.

*Mi` cangáng'~ Jesús fí' ñifí`
(Mr. 16:19-20)*

50 Jo mi~ cangî jo, cajéeng` Jesús i dsea` quiá'r-
do fí caluu` fii` Jerusalén, jo cangolíñ` fí coo` lí`
sii` Betania. Jo mi~ caguiliñ` fí jo, jo casée` Jesús
guóor` fí yú` jo lajob cataiñ` güea` i dsea` quiá'r-
do. 51 Jo lajee` gui'ná`bî táíñ` güea` i dsea` quiá'r-
do, mi~ canaaiñ` soor` fí yú` e cangáiñ` fí ñiff`.
52 Jo dsu` lajaléng` i dsea` guijáng` do caquim` tur fí
Jerusalén mi~ cangoyúung` e cajmiféiñ` dsea` do,
jo dsing` iáang` dsíir` cangolíñ`. 53 Jo mi~ cangî
jo, sojiéb` niteáaiñ` fí dsíi` sinúu` guá` e jmiféiñ`
Fidiée`.

Jo lajob nilí.

Jo lanab jíi` lí` júu` e cajme` Lucas.

Júu 'má e cacuo fidiée
New Testament in Chinantec, Comaltepec
(MX:cco:Chinantec, Comaltepec)

copyright © 2002 Wycliffe Bible Translators, Inc.

Language: Chinantec, Comaltepec

Translation by: Wycliffe Bible Translators, Inc.

Chinanteco, Comaltepec [cco], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Comaltepec

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

30c6f873-0dee-5863-8883-ba3c5eaa988c